

Namo tassa bhagavato arahato sammāsambuddhassa

# Khuddakanikāye

## Jātaka-aṭṭhakathā

(Tatiyo bhāgo)

### 4. Catukkanipāto

#### 1. Kāliṅgavaggo

[301] 1. Cūḷakāliṅgajātakavaṇṇanā

**Vivarathimāsaṃ dvāranti** idaṃ satthā jetavane viharanto catunnaṃ paribbājikānaṃ pabbajjaṃ ārabba kathesi. Vesāliyaṃ kira licchavirājūnaṃ satta sahaṣṣāni satta satāni satta ca licchavī vasiṃsu. Te sabbe pi pucchāpaṭipucchācittakā ahesuṃ. Atheko pañcasu vādasatesu byatto nigaṇṭho vesāliyaṃ sampāpuṇi, te tassa saṅgahaṃ akaṃsu. Aparāpi evarūpā nigaṇṭhī sampāpuṇi. Rājāno dve pi jane vādaṃ kāresuṃ, ubhopi sadisāva ahesuṃ. Tato licchavīnaṃ etadahosi “ime dve pi paṭicca uppanno putto byatto bhavissati” ti. Tesu vivāhaṃ kāretvā dve pi ekato vāsesuṃ. Atha nesaṃ saṃvāsamanvāya paṭipāṭiyā catasso dārikāyo eko ca dārako jāyi. Dārikānaṃ “saccā, lolā, avadhārikā, paṭicchādā” ti nāmaṃ akaṃsu, dārakassa “saccako” ti. Te pañcapi janā viññutaṃ pattā mātito pañca vādasatāni, pitito pañca vādasatānīti vādasahassaṃ uggaṇhiṃsu. Mātāpitāro dārikānaṃ evaṃ ovadiṃsu “sace koci gihī tumhākaṃ vādaṃ bhindissati, tassa pādapariārikā bhaveyyātha. Sace pabbajito bhindissati, tassa santike pabbajeyyāthā” ti.

Aparabhāge mātāpitāro kalamakaṃsu. Tesu kālakesu saccakanigaṇṭho tattheva vesāliyaṃ licchavīnaṃ sippaṃ sikkhāpento vasi. Bhaginiyo jambusākhāṃ gahetvā vādatthāya nagarā nagaraṃ caramānā sāvatthiṃ patvā nagaradvāre sākhaṃ nikhaṇitvā “yo amhākaṃ vādaṃ āropetuṃ sakkoti gihī vā pabbajito vā, so etaṃ paṃsupuñjaṃ pādehi vikiritvā pādeheva sākhaṃ maddatū” ti dārakānaṃ vatvā bhikkhāya nagaraṃ pavasiṃsu. Athāyasmā sārīputto asammaṭṭhaṭṭhānaṃ sammajjitvā rittaghaṭesu pānīyaṃ upaṭṭhapetvā gilāne ca paṭijaggitvā divātaraṃ sāvatthiṃ piṇḍāya pavisanto taṃ sākhaṃ disvā dārake pucchi, dārakā taṃ pavattiṃ ācikkhiṃsu. Thero dārakeheva pātāpetvā maddāpetvā “yehi ayaṃ sākhaṃ ṭhapitā, te katabhattakiccāva āgantvā jetavanadvārakoṭṭhake maṃ passantū” ti dārakānaṃ vatvā nagaraṃ pavisitvā katabhattakicco vihāradvārakoṭṭhake aṭṭhāsi. Tāpi paribbājikā bhikkhāya caritvā āgatā sākhaṃ madditaṃ disvā “kenāyaṃ madditā” ti vatvā “sārīputtattherena, sace tumhe vādatthikā, jetavanadvārakoṭṭhakaṃ gacchathā” ti dārakehi vuttā puna nagaraṃ pavisitvā mahājanaṃ sannipātetvā vihāradvārakoṭṭhakaṃ gantvā therāṃ vādasahassaṃ pucchiṃsu. Thero taṃ vissajjetvā “aññaṃ kiñci jānāthā” ti pucchi. “Na jānāma, sāmi” ti. “Ahaṃ pana vo kiñci pucchāmi” ti. “Puccha, sāmi, jānantiyo kathessāmi” ti.

Thero “ekam nāma ki” nti pucchi. Tā na jāniṃsu. Thero vissajjesi. Tā “amhākaṃ, sāmi, parājayo, tumhākaṃ jayo” ti āhaṃsu. “Idāni kiṃ karissathā” ti? “Amhākaṃ mātāpitūhi ayaṃ ovādo dinno ‘sace vo gihī vādaṃ bhindissati, tassa pajāpatiyo bhaveyyātha. Sace pabbajito, tassa santike pabbajeyyāthā’ ti, pabbajjaṃ no dethā” ti. Thero “sādhū” ti vatvā tā uppalavaṇṇāya theriyā santike pabbajesi. Tā sabbāpi na cirasseva arahattaṃ pāpuṇiṃsu. Athekadivaṣaṃ bhikkhū dhammasabhāyaṃ kathaṃ samuṭṭhāpesuṃ “āvuso, sārīputtatthero catunnaṃ paribbājikānaṃ avassayo hutvā sabbā arahattaṃ pāpesi” ti. Satthā āgantvā “kāya nuttha, bhikkhave, etarahi kathāya sannisinnā” ti pucchitvā “imāya nāmā” ti vutte “na, bhikkhave, idāneva, pubbepesa etāsaṃ avassayo ahosi, idāni pana pabbajjābhisekaṃ dāpesi, pubbe rājamahesiṭṭhāne ṭhapesi” ti vatvā atītaṃ āhari.

Atīte kāliṅgaratṭhe dantapurānagare kāliṅgarāje rajjaṃ kārente assakaratṭhe pāṭalinagare assako nāma rājā rajjaṃ kāresi. Kāliṅgo sampannabalavāhano sayampi nāgabalo paṭiyodhaṃ na passaṭi. So yujjhītukāmo hutvā amaccānaṃ ārocesi “ahaṃ yuddhatthiko, paṭiyodhaṃ pana na passāmi, kiṃ karomā”ti. Amaccā “attheko, mahārāja, upāyo, dhītaro te catasso uttamarūpadharā, tā pasādhētvā paṭicchannayāne nisīdāpetvā balaparivutā gāmanīgamarājadhāniyo carāpetha. Yo rājā tā attano gehe kātukāmo bhavissati, tena saddhiṃ yuddhaṃ karissāmā”ti vadimsu. Rājā tathā kāresi. Tāhi gatagataṭṭhāne rājāno bhayena tāsāṃ nagaraṃ pavisitum na denti, paṇṇākāraṃ pesētvā bahinagareyeva vasāpentī. Evaṃ sakalajambudīpaṃ vicarivā assakaratṭhe pāṭalinagaraṃ pāpuṇimsu. Assakopi nagaradvārāni pidahāpetvā paṇṇākāraṃ pesesi. Tassa nandiseno nāma amacco paṇḍito byatto upāyakusalo. So cintesi “imā kira rājadhītaro sakalajambudīpaṃ vicarivā paṭiyodhaṃ na labhimsu, evaṃ sante jambudīpo tuccho nāma ahosi, ahaṃ kāliṅgena saddhiṃ yujjhissāmī”ti. So nagaradvāraṃ gantvā dovārike āmantētvā tāsāṃ dvāraṃ vivarāpetum paṭhamāṃ gāthamāha –

1. “Vivarathimāsāṃ dvāraṃ, nagaraṃ pavisantu aruṇarājassa;  
Sīhena susiṭṭhena, surakkhitaṃ nandisenenā”ti.

Tattha **aruṇarājassāti** so hi rajje patitṭhitakāle raṭṭhanāmavasena assako nāma jāto, kuladattiyāṃ panassa nāmaṃ aruṇoti. Tenāha “aruṇarājassā”ti. **Sīhenāti** purisasīhena. **Susiṭṭhenāti** ācariyehi suṭṭhu anusāsitena. **Nandisenenāti** mayā nandisenena nāma.

So evaṃ vatvā dvāraṃ vivarāpetvā tā gahētvā assakarañño datvā “tumhe mā bhāyittha, yuddhe sati ahaṃ jinissāmi, imā uttamarūpadharā rājadhītaro mahesiyo karothā”ti tāsāṃ abhisekaṃ dāpetvā tāhi saddhiṃ āgate purise “gacchatha, tumhe rājadhītūnaṃ assakarājena mahesiṭṭhāne ṭhapitabhāvaṃ tumhākaṃ rañño ācikkhathā”ti uyyojesi. Te gantvā ārocesum. Kāliṅgo “na hi nūna so mayhaṃ balaṃ jānāti”ti vatvā tāvadeva mahatīyā senāya nikkhami. Nandiseno tassa āgamaṃ ñatvā “attano kira rajjasīmāyameva hotu, mā amhākaṃ rañño rajjasīmāṃ okkamatu, ubhinnaṃ rajjānaṃ antare yuddhaṃ bhavissati”ti sāsanaṃ pesesi. So sāsanaṃ sutvā attano rajjapariyanteyeva aṭṭhāsi. Assakopi attano rajjapariyante aṭṭhāsi. Tadā bodhisatto isipabbajjaṃ pabbajitvā tesāṃ dvinnaṃ rajjānaṃ antare paṇṇasālāyaṃ vasati. Kāliṅgo cintesi “samaṇā nāma kiñci jānissanti, ko jānāti, kiṃ bhavissati, kassa jayo vā parājayo vā bhavissati, tāpasāṃ pucchissāmī”ti aññatakavesena bodhisattaṃ upasaṅkamitvā vanditvā ekamantaṃ nisīditvā paṭisanthāraṃ katvā “bhante, kāliṅgo ca assako ca yujjhītukāmā attano attano rajjasīmāyameva ṭhitā, etesu kassa jayo bhavissati, kassa parājayo”ti pucchi. Mahāpuṇṇa, ahaṃ “asukassa jayo, asukassa parājayo”ti na jānāmi, sakko pana devarājā idhāgacchati, tamahaṃ pucchitvā kathessāmi, sve āgaccheyyāsīti. Sakko bodhisattassa upaṭṭhānaṃ āgantvā nisīdi, atha naṃ bodhisatto tamatthaṃ pucchi. Bhante, kāliṅgo jinissati, assako parājissati, idañcidañca pubbanimittaṃ paññāyissatīti.

Kāliṅgo punadvase āgantvā pucchi, bodhisattopissa ācikkhi. So “kiṃ nāma pubbanimittaṃ bhavissati”ti apucchitvāva “ahaṃ kira jinissāmī”ti utṭhāya tuṭṭhiyā pakkāmi. Sā kathā vitthārikā ahosi. Taṃ sutvā assako nandisenaṃ pakkosāpetvā “kāliṅgo kira jinissatiṃ, mayāṃ parājissāma, kiṃ nu kho kātappa”nti āha. So “ko etaṃ jānāti mahārāja, kassa jayo vā parājayo vā, tumhe mā cintayitthā”ti rājānaṃ assāsetvā bodhisattaṃ upasaṅkamitvā vanditvā ekamantaṃ nisīno “bhante, ko jinissati, ko parājissati”ti pucchi. “Kāliṅgo jinissati, assako parājissati”ti? “Bhante, jinantassa pubbanimittaṃ kiṃ bhavissati, kiṃ parājinantassā”ti? “Mahāpuṇṇa, jinantassa ārakkhadevatā sabbaseto usabho bhavissati, itarassa sabbakālako, ubhinnaṃ ārakkhadevatā yujjhivā jayaparājayaṃ karissanti”ti. Nandiseno taṃ sutvā utṭhāya gantvā rañño sahāye sahasamatte mahāyodhe gahētvā avidūre pabbataṃ abhiruyha “ambho, amhākaṃ rañño jīvitaṃ dātum sakkhissathā”ti pucchi. “Āma, sakkhissāmā”ti. “Tena hi imasmiṃ papāte patathā”ti. Te patitum ārabhimsu. Atha ne vāretvā “alaṃ ettha patanena, amhākaṃ rañño jīvitaṃ dātum suhadayā anivattino hutvā yujjhathā”ti āha. Te sampaṭicchimsuṃ.

Atha saṅgāme upaṭṭhite kāliṅgo “ahaṃ kira jinissāmī”ti vosānaṃ āpajji, balakāyāpissa “amhākaṃ

kira jayo’’ti vosānaṃ āpajjivā sannāhaṃ akatvā vaggavaggā hutvā yathārucci pakkamiṃsu, vīriyakaraṇakāle vīriyaṃ na kariṃsu. Ubhopi rājāno assaṃ abhiruhitvā ‘‘yujjhissāmā’’ti aññaṃaññaṃ upasaṅkamanti. Ubhinnaṃ ārakkhadevatā purato gantvā kāliṅgaraṇṇo ārakkhadevatā sabbaseto usabho ahoṣi, itarassa sabbakāḷako. Tā devatāpi aññaṃaññaṃ yujjhanākāraṃ dassentā upasaṅkamiṃsu. Te pana usabhā ubhinnaṃ rājūnaṃyeva paññāyanti, na aññesaṃ. Nandiseno assakaṃ pucchi ‘‘paññāyati te, mahārāja, ārakkhadevatā’’ti. ‘‘Āma, paññāyati’’ti. ‘‘Kenākārenā’’ti. ‘‘Kāliṅgaraṇṇo ārakkhadevatā sabbaseto usabho hutvā paññāyati, amhākaṃ ārakkhadevatā sabbakāḷako kilamanto hutvā tiṭṭhati’’ti. ‘‘Mahārāja, tumhe mā bhāyatha, mayaṃ jinissāma, kāliṅgo parājissati, tumhe assapiṭṭhito otarivā imaṃ sattipiṃ gahetvā susikkhitasindhavaṃ udarapasse vāmahatthena uppīletvā iminā purisasahassena saddhiṃ vegena gantvā kāliṅgaraṇṇo ārakkhadevatāṃ sattippahārena pātetha, tato mayaṃ sahasamattā sattisahasena paharissāma, evaṃ kāliṅgassa ārakkhadevatā nassissati, tato kāliṅgo parājissati, mayaṃ jinissāmā’’ti. Rājā ‘‘sādhū’’ti nandisenena dinnasaññāya gantvā sattiyā pahari, sūrayodhasahassāpi amaccā sattisahasena pahariṃsu. Ārakkhadevatā tattheva jīvitakkhayaṃ pāpuṇi, tāvadeva kāliṅgo parājivā palāyi. Taṃ palāyamānaṃ disvā sahasamattā amaccā ‘‘kāliṅgo palāyati’’ti unnadiṃsu. Kāliṅgo maraṇabhaya bhīto palāyamāno taṃ tāpasāṃ akkosanto dutiyaṃ gāthamāha –

2. ‘‘Jayo kāliṅgānamasayhasāhinaṃ, parājayo anayo assakānaṃ;  
Iccea te bhāsitaṃ brahmacāri, na ujjubhūtā vitathaṃ bhaṇanti’’ti.

Tattha **asayhasāhinaṃ** asayaṃ dussaṃ sahituṃ samatthānaṃ. **Iccea te bhāsitaṃ** evaṃ tayā kūṭatāpasa lañjaṃ gahetvā parājīnakaṃ rājānaṃ jinissati, jīnanaṃ rājānaṃ ca parājissati bhāsitaṃ. **Na ujjubhūtā** ti ye kāyena vācāya manasā ca ujjubhūtā, na te musā bhaṇanti.

Evaṃ so tāpasāṃ akkosanto palāyanto attano nagarameva gato, nivattitvā oloketumpi nāsakkhi. Tato katipāhaccayena sakko tāpasassa upatṭhānaṃ agamāsi. Tāpaso tena saddhiṃ kathento tatiyaṃ gāthamāha –

3. ‘‘Devā musāvādamupātivattā, saccaṃ dhaṇaṃ paramaṃ tesu sakka;  
Taṃ te musā bhāsitaṃ devarāja, kiṃ vā paṭicca maghavā mahindā’’ti.

Tattha **taṃ te musā bhāsitaṃ** yaṃ tayā mayhaṃ bhāsitaṃ, taṃ attha bhaṇjanakamusāvādam kathenta tayā musā bhāsitaṃ, tayā kiṃ kāraṇaṃ paṭicca evaṃ bhāsitaṃ?

Taṃ sutvā sakko catutthaṃ gāthamāha –

4. ‘‘Nanu te sutāṃ brāhmaṇa bhaññaṃāne, devā na issanti purisaparakkamassa;  
Damo samādhī manaso abhejjo, abyaggaṭā nikkamanaṃca kāle;  
Daḷhaṃca viriyaṃ purisaparakkamo ca, teneva āsi vijayo assakāna’’nti.

Tassattho – kiṃ tayā, brāhmaṇa, tattha tattha vacane bhaññaṃāne idaṃ na sutapubbaṃ, yaṃ devā purisaparakkamassa na issanti na usūyanti, assakaraṇṇo vīriyakaraṇavasena attadamanasaṅkhāto **damo**, samaggabhāvena **manaso abhejjo**, abhejjasamādhī, assakaraṇṇo sahāyānaṃ vīriyakaraṇakāle **abyaggaṭā** yathā kāliṅgassa manussā vaggavaggā hutvā osakkimṃsu, evaṃ anosakkaṇaṃ samaggabhāvena abhejjacittānaṃ **vīriyaṃca purisaparakkamo** ca thiro ahoṣi, teneva kāraṇena assakānaṃ jayo ahoṣi.

Palāte ca pana kāliṅge assakarājā vilopaṃ gāhāpetvā attano nagaraṃ gato. Nandiseno kāliṅgassa sāsaṇaṃ pesesi ‘‘imāsaṃ catunnaṃ rājakaññaṃ dāyajjakoṭṭhāsaṃ pesetu, sace na peseti, kātabbamettha jānissāmi’’ti. So taṃ sāsaṇaṃ sutvā bhītatasi tāhi laddhabbādāyajjaṃ pesesi, tato paṭṭhāya samaggavāsaṃ vaṣiṃsu.

Satthā imaṃ dhammadesanaṃ āharitvā jātaṃ samodhānesi “tadā kāliṅgarañño dhītarō imā daharabhikkhuniyo ahesuṃ, nandiseno sārīputto, tāpasō pana ahameva ahoṣi”nti.

Cūlakāliṅgajātakavaṇṇanā paṭhamā.

[302] 2. Mahāassārohajātakavaṇṇanā

**Adeyyesuṃ** dadaṃ **dānanti** idaṃ satthā jetavane viharanto ānandattheraṃ ārabba kathesi. Paccuppannavatthu heṭṭhā kathitameva. Satthā “porāṇakapaṇḍitāpi attano upakāravaseneva kirimsū”ti vatvā idhāpi atītaṃ āhari.

Atīte bodhisatto bārāṇasirājā hutvā dhammena samena rajjaṃ kāreti, dānaṃ deti, sīlaṃ rakkhati. So “paccantaṃ kupitaṃ vūpasameṣāmi”ti balavāhanaparivuto gantvā parājito assaṃ abhiruhitvā palāyamāno ekaṃ paccantaḡamaṃ pāpuṇi. Tattha tiṃsa janā rājasevakā vasanti. Te pātova gāmamajjhe sannipatitvā gāmakiccaṃ karonti. Tasmim̄ khaṇe rājā vammaitaṃ assaṃ abhiruhitvā alankatapaṭiyatto gāmadvārena antogaṃamaṃ pāvīsi. Te “kiṃ nu kho ida”nti bhītā palāyitvā sakasakagehāni pavīsiṃsu. Eko panettha attano geḡamaṃ agantvā rañño paccuggamaṃ katvā “rājā kira paccantaṃ gato”ti suyayati, koṣi tvaṃ rājapuriso corapurisoti? “Rājapuriso, sammā”ti. “Tena hi ethā”ti rājānaṃ geḡamaṃ netvā attano pīṭhake nisīdāpetvā “ehi, bhadde, sahāyakassa pāde dhovā”ti bhariyaṃ tassa pāde dhovāpetvā attano balānurūpena āhāraṃ datvā “muhuttaṃ vissamathā”ti sayanaṃ paññāpesi, rājā nipajji. Itaro assassa sannāhaṃ mocetvā caṅkamāpetvā udakaṃ pāyetvā piṭṭhiṃ telena makkhetvā tiṇaṃ adāsi. Evaṃ tayo cattāro divase rājānaṃ paṭijaggitvā “gacchāmaḡamaṃ, sammā”ti vutte puna rañño ca assassa ca kattabbayuttakaṃ sabbamakāsi. Rājā tussitvā gacchanto “ahaṃ, samma, mahāassāroho nāma, nagaramajjhe amhākaṃ geḡamaṃ, sace kenaci kiccena nagaraṃ āgacchasi, dakkhiṇadvāre ṭhatvā dovārikaṃ ‘mahāassāroho kataragehe vasatī’ti pucchitvā dovārikaṃ gahetvā amhākaṃ geḡamaṃ āgaccheyyāsi”ti vatvā pakkāmi.

Balakāyopi rājānaṃ adisvā bahinagare khandhāvāraṃ bandhitvā ṭhito rājānaṃ disvā paccuggantvā parivāresi. Rājā nagaraṃ pavisanto dvārantare ṭhatvā dovārikaṃ pakkosāpetvā mahājanaṃ paṭikkamāpetvā “tāta, eko paccantaḡamavāsī maṃ daṭṭhukāmo āgantvā ‘mahāassārohassa geḡamaṃ kaha’nti taṃ pucchissati, taṃ tvaṃ hatthe gahetvā ānetvā maṃ dasseyyāsi, tadā tvaṃ saḡamaṃ labhissasi”ti āha. So nāgacchati, tasmim̄ anāgacchante rājā tassa vasanaḡame baliṃ vaḡḡhāpesi, balimhi vaḡḡhite nāgacchati. Evaṃ dutiyampi tatiyampi baliṃ vaḡḡhāpesi, neva āgacchati. Atha naṃ ḡamavāsino sannipatitvā āhaṃsu “ayya, tava sahāyassa mahāassārohassa āgatakā lato paṭṭhāya mayā balinā pīṭiyamānā sīsaṃ ukkhipituṃ na sakkoma, gaccha tava sahāyassa mahāassārohassa vatvā amhākaṃ baliṃ vissajjāpehī”ti. Sādhu gacchissāmi, na pana sakkā tucchahatthena gantuṃ, mayhaṃ sahāyassa dve dārakā atthi, tesaṅca bhariyāya cassa sahāyakassa ca me nivāsanapārūpanapiḡandhanādīni sajjethāti. “Sādhu sajjissāmā”ti te sabbaṃ paṇṇākāraṃ sajjayīsiṃsu.

So taṅca attano ḡhare pakkapūvaṅca ādāya gantvā dakkhiṇadvāraṃ patvā dovārikaṃ pucchi “kahaṃ, samma, mahāassārohassa geḡa”nti. So “ehi dassemi te”ti taṃ hatthe gahetvā rājadvāraṃ gantvā “dovāriko ekaṃ paccantaḡamavāsīṃ gahetvā āgato”ti paṭivedesi. Rājā taṃ sutvā āsanā uṭṭhāya “mayhaṃ sahāyo ca tena saddhiṃ āgatā ca pavisantū”ti paccuggamaṃ katvā disvāva naṃ pariṣajjitvā “mayhaṃ sahāyikā ca dārakā ca arogā”ti pucchitvā hatthe gahetvā mahātalaṃ abhiruhitvā setacchattassa heṭṭhā rājāsane nisīdāpetvā aggamaḡhesiṃ pakkosāpetvā “bhadde, sahāyassa me pāde dhovā”ti āha. Sā tassa pāde dhovi, rājā suvaṇṇabhīnkārena udakaṃ āsiṅci. Devīpi pāde dhovitvā gandhatelena makkhesi. Rājā “kiṃ, samma, atthi, kiṅci amhākaṃ khādaniya”nti pucchi. So “atthi”ti pasibbakato pūve nīharāpesi. Rājā suvaṇṇataṭṭakena gahetvā tassa saṅḡamaṃ karonto “mama sahāyena ānītaṃ khādathā”ti deviyā ca amaccānaṅca khādāpetvā sayampi khādī. Itaro itarampi paṇṇākāraṃ dassesi. Rājā tassa saṅḡahatthaṃ kāsikavatthāni apanetvā tena ābhatavatthayugaṃ nivāsesiṃ. Devīpi kāsikavatthaṅceva ābharaṅāni ca apanetvā tena ābhatavatthaṃ nivāsetvā ābharaṅāni piḡandhi.

Atha naṃ rājā rājārahaṃ bhojanaṃ bhojāpetvā ekaṃ amaccaṃ āṇāpesi “gaccha imassa mama karaṇaniyāmeneva massukammaṃ kāretvā gandhodakena nhāpetvā satasahassagghanikaṃ kāsikavatthaṃ nivāsāpetvā rājālaṅkārena alaṅkārapetvā ānehi”’ti. So tathā akāsi. Rājā nagare bheriṃ carāpetvā amacce sannipātāpetvā setacchattassa majjhe jātihiṅgulakasuttaṃ pātetvā upaḍḍharajjaṃ adāsi. Te tato paṭṭhāya ekato bhuñjanti pivanti sayanti, vissāso thiro ahosi kenaci abhejjo. Athassa rājā puttadārepi pakkosāpetvā antonagare nivesanaṃ māpetvā adāsi. Te samaggā sammodamānā rajjaṃ kārenti.

Atha amaccā kujjhitvā rājaputtaṃ āhaṃsu “kumāra, rājā ekassa gahapatikassa upaḍḍharajjaṃ datvā tena saddhiṃ ekato bhuñjati pivati sayati, dārake ca vandāpeti, iminā rañña katakammaṃ na jānāma, kiṃ karoti rājā, mayaṃ lajjāma, tvaṃ rañño kathehi”’ti. So “sādhū”’ti sampaṭicchitvā sabbaṃ taṃ kathaṃ rañño ārocetvā “mā evaṃ karohi, mahārājā”’ti āha. “Tāta, ahaṃ yuddhaparājito kahaṃ vasim, api nu jānāthā”’ti. “Na jānāma, devā”’ti. “Ahaṃ etassa ghare vasanto arogo hutvā āgantvā rajjaṃ kāresim, evaṃ mama upakārino kasmā sampattim na dassāmi”’ti evaṃ vatvā ca pana bodhisatto “tāta, yo hi adātabbayuttakassa deti, dātabbayuttakassa na deti, so āpadaṃ patvā kiñci upakāraṃ na labhati”’ti dassento imā gāthā āha –

5. “Adeyyesu dadaṃ dānaṃ, deyyesu nappavecchati;  
Āpāsu byasanaṃ patto, sahāyaṃ nādhigacchati.
6. “Nādeyyesu dadaṃ dānaṃ, deyyesu yo pavecchati;  
Āpāsu byasanaṃ patto, sahāyamadhigacchati.
7. “Saññogasambhogavisesadassanaṃ, anariyadhammesu saṭhesu nassati;  
Katañca ariyesu ca ajjavesu, mahapphalaṃ hoti aṇumpi tādisu.
8. “Yo pubbe katakalyāṇo, akā loke sudukkaraṃ;  
Pacchā kayirā na vā kayirā, accantaṃ pūjanāraho”’ti.

Tattha **adeyyesūti** pubbe akatūpakāresu. **deyyesūti** pubbe katūpakāresu. **Nappavecchatīti** na paveseti na deti. **Āpāsūti** āpadāsu. **Byasanaṃ** dukkhaṃ. **Saññogasambhogavisesadassanaṃ** yo mittena kato saññogo ceva sambhogo ca, tassa visesadassanaṃ guṇadassanaṃ sukataṃ mayhaṃ imināti etaṃ sabbaṃ asuddhadhammattā anariyadhammesu kerāṭikattā saṭhesu nassati. **Ariyesūti** attano kataguṇajānanaena ariyesu parisuddhesu. **Ajjavesūti** teneva kāraṇena ujukesu akuṭilesu. **Aṇumpīti** appamattakampi. **Tādisūti** ye tādisā puggalā honti ariyā ujubhūtā, tesu appampi kataṃ mahapphalaṃ hoti mahājutikaṃ mahāvipphāraṃ, sukhetta vuttabījamiva na nassati, itarasmim pana pāpe bahumpi kataṃ aggimhi khittabījamiva nassatīti attho. Vuttampi cetam –

“Yathāpi bījamaggimhi, ḍayhati na virūhati;  
Evaṃ kataṃ asappurise, nassati na virūhati.

“Kataññumhi ca posamhi, sīlavante ariyavuttine;  
Sukhetta viya bījāni, kataṃ tamhi na nassatī”’ti. (jā. 1.10.77-78);

**Pubbe katakalyāṇoti** paṭhamataraṃ upakāraṃ katvā ṭhito. **Akāti** akari, ayaṃ loke sudukkaraṃ nāma akāsīti attho. **Pacchā kayirāti** so pacchā aññaṃ kiñci guṇaṃ karotu vā mā vā, teneva paṭhamakatena guṇena **accantaṃ pūjanāraho** hoti, sabbaṃ sakkārasammānaṃ arahatīti.

Idaṃ pana sutvā neva amaccā, na rājaputto puna kiñci kathesīti.

Satthā imaṃ dhammadesanaṃ āharitvā jātaṃ samodhānesi – “tadā paccantagāmaṃvāsī ānando

ahosi, bārāṇasirājā pana ahameva ahosi’’nti.

Mahāassārohajātakavaṇṇanā dutiyā.

[303] 3. Ekarājajātakavaṇṇanā

**Anuttare kāmagaṇe samiddheti** idam sathā jetavane viharanto aññataram kosalarājasevakam ārabha kathesi. Paccuppannavatthu heṭṭhā **seyyajātake** (jā. 1.3.94 ādayo) kathitameva. Idha pana sathā ‘‘na tvaññeva anathena attham āhari, porāṇakapaṇḍitāpi attano anathena attham āharimsū’’ti vatvā atītam āhari.

Atīte bārāṇasirañño upaṭṭhāko amacco rājantepure dubbhi. Rājā paccakkhatova tassa dosam disvā tam raṭṭhā pabbājesi. So dubbhisenam nāma kosalarājānam upaṭṭhahantoti sabbam **mahāsīlavajātake** (jā. 1.1.51) kathitameva. Idha pana dubbhiseno mahātale amaccamajjhe nisinnam bārāṇasirājānam gaṇhāpetvā sikkāya pakkhipāpetvā uttarummāre heṭṭhāsīsakam olambāpesi. Rājā corarājānam ārabha mettam bhāvetvā kasiṇaparikkammaṃ katvā jhānam nibbatesi, bandhanam chijji, tato rājā ākāse pallaṅkena nisīdi. Corarājassa sarīre dāho uppajji, ‘‘ḍayhāmi ḍayhāmi’’ti bhūmiyam aparāparam parivattati. ‘‘Kimeta’’nti vutte ‘‘mahārāja, tumhe evarūpaṃ dhammīkarājānam niraparādham dvārassa uttarummāre heṭṭhāsīsakam olambāpethā’’ti vadimsu. Tena hi vegena gantvā mocetha nanti. Purisā gantvā rājānam ākāse pallaṅkena nisinnam disvā āgantvā dubbhisenassa ārocesum. So vegena gantvā tam vanditvā khamāpetum paṭhamam gāthamāha –

9. ‘‘Anuttare kāmagaṇe samiddhe, bhutvāna pubbe vasi ekarāja;  
Sodāni dugge narakamhi khitto, nappajjahe vaṇṇabalam purāṇa’’nti.

Tattha **vasīti** vuttho. **Ekarājāti** bodhisattam nāmenālapati. **Sodānīti** so tvam idāni. **Duggeti** visame. **Narakamhīti** āvāṭe. Olambitaṭṭhānam sandhāyetaṃ vuttam. **Nappajjahe vaṇṇabalam purāṇanti** evarūpe visamaṭṭhāne khittopi porāṇakavaṇṇaṇca balaṇca nappajahasīti pucchati.

Tam sutvā bodhisatto sesagāthā avoca –

10. ‘‘Pubbeva khantī ca tapo ca mayham, sampatthitā dubbhisena ahosi;  
Tamdāni laddhāna katham nu rāja, jahe aham vaṇṇabalam purāṇam.
11. ‘‘Sabbā kirevam pariniṭṭhitāni, yasassinam paññavantam visayha;  
Yaso ca laddhā purimam ulāram, nappajjahe vaṇṇabalam purāṇam.
12. ‘‘Panujja dukkhena sukham janinda, sukkena vā dukkhamasayhasāhi;  
Ubhayattha santo abhinibbutattā, sukhe ca dukkhe ca bhavanti tulyā’’ti.

Tattha **khantīti** adhivāsanakhanti. **Tapoti** tapacaraanam. **Sampatthitāti** icchitā abhikaṅkhitā. **Dubbhisenāti** tam nāmenālapati. **Tamdāni laddhānāti** tam patthanam idānāham labhitvā. **Jaheti** kena kāraṇena aham jaheyyam. Yassa hi dukkham vā domanassam vā hoti, so tam jaheyyāti dīpeti.

‘‘**Sabbā kirevam pariniṭṭhitāni**’’ti anussavavasena attano sampattim dassento āha. Idam vuttam hoti – sabbāneva mama kattabbakiccāni dānasīlabhāvanāuposathakammāni pubbeva niṭṭhitānīti. **Yasassinam paññavantam visayhāti** parivārasampattiyā yasassi, paññāsampadāya paññavanta, asayhasāhitāya visayha. Evam tūṇipetāni ālapanāneva. **Nanti** panettha nipāto. Byañjanasiliṭṭhatāvasenantakārassa sānunāsikatā katāti paccetabbā. **Yaso cāti** yasaṇca, ayameva vā paṭho. **Laddhā purimanti** labhitvā purimam pubbe aladdhapubbam. **Ulāranti** mahantam. Kilesavikkhambhanametābhāvanājhānupattiyō sandhāyevamāha. **Nappajjaheti** evarūpaṃ yasam laddhā kimkāraṇā purāṇavaṇṇabalam jahissāmīti attho.

**Dukkhenā**ti tayā uppāditena narakamhi khipanadukkkena mama rajjasukhaṃ panuditvā. **Sukhena vā dukkhanti** jhānasukhena vā taṃ dukkhaṃ panuditvā. **Ubhayattha santoti** ye santo honti mādisā, te dvīsupi etesu koṭṭhāsesu abhinibbutasabhāvā majjhataṃ **sukhe ca dukkhe ca bhavanti tulyā**, ekasadisā nibbikārāva hontīti.

Idaṃ sutvā dubbhiseno bodhisattaṃ khamāpetvā “tumhākaṃ rajjaṃ tumheva kāretha, ahaṃ vo core paṭibāhissāmī”ti vatvā tassa duṭṭhāmacassa rājānaṃ kāretvā pakkāmi. Bodhisattopi rajjaṃ amaccānaṃ niyyādetvā isipabbajjaṃ pabbajitvā brahmalokaparāyaṇo ahoṣi.

Satthā imaṃ dhammadesanaṃ āharitvā jātaṃ samodhānesi – “tadā dubbhiseno ānando ahoṣi, bārāṇasirājā pana ahameva ahoṣi”nti.

Ekarājajātakavaṇṇanā tatiyā.

[304] 4. Daddarajātakavaṇṇanā

**Imāni manti** idaṃ satthā jetavane viharanto ekaṃ kodhanaṃ bhikkhuṃ ārabba katesi. Vatthu heṭṭhā kathitameva. Tadā hi dhammasabhāyaṃ tassa kodhanabhāvakathāya samuṭṭhitāya satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte taṃ pakkosāpetvā “saccaṃ kira tvaṃ bhikkhu kodhanosi”ti vatvā “āma, bhante”ti vutte “na, bhikkhave, idāneva, pubbepesa kodhanoyeva, kodhanabhāvenevassa porāṇakapaṇḍitā parisuddhā nāgarājabhāve ṭhitāpi tīṇi vassāni gūthapūritāya ukkārabhūmiyaṃ vasiṃsū”ti vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto himavantapadese daddarapabbatapāde daddaranāgabhavanaṃ nāma atthi, tattha rajjaṃ kārentassa daddararañño putto mahādaddaro nāma ahoṣi, kaniṭṭhabhātā panassa cūladaddaro nāma. So kodhano pharusō nāgamāṇavake akkosanto paribhāsanto paharanto vicarati. Nāgarājā tassa pharusabhāvaṃ ñatvā nāgabhavanato taṃ nīharāpetuṃ āṇāpesi. Mahādaddaro pana pitaraṃ khamāpetvā nivāresi. Dutiyampi rājā tassa kujjhi, dutiyampi khamāpesi. Tatiyavāre pana “tvaṃ maṃ imaṃ anācāraṃ nīharāpentaṃ nivāresi, gacchatha dvepi janā imahā nāgabhavanā nikkhamitvā bārāṇasiyaṃ ukkārabhūmiyaṃ tīṇi vassāni vasathā”ti nāgabhavanā nikkāḍḍhāpesi. Te tattha gantvā vasiṃsu. Atha ne ukkārabhūmiyaṃ udakapariyante gocaraṃ pariyesamāne gāmadārakā dīsvā paharantā leḍḍudaṇḍādayo khipantā “ke ime puthulasisā sūcinaṅguṭṭhā udakadeḍḍubhā maṇḍūkabhakkhā”tiādīni vatvā akkosanti paribhāsanti.

Cūladaddaro caṇḍapharusatāya tesam taṃ avamānaṃ asahanto “bhātika, ime dārakā amhe paribhavanti, āsīvisabhāvaṃ no na jānanti, ahaṃ tesam avamānaṃ sahituṃ na sakkomi, nāsāvātena te nāsessāmī”ti bhātārā saddhiṃ sallapanto paṭhamam gāthamāha –

13. “Imāni maṃ daddara tāpayanti, vācāduruttāni manussaloke;  
Maṇḍūkabhakkhā udakantasevī, āsīvisaṃ maṃ avisā sapanti”ti.

Tattha **tāpayantī**ti dukkhāpentī. **Maṇḍūkabhakkhā udakantasevī**ti “maṇḍūkabhakkhā”ti ca “udakantasevī”ti ca vadantā ete avisā gāmadārakā maṃ āsīvisaṃ samānaṃ sapanti akkosantīti.

Tassa vacanaṃ sutvā mahādaddaro sesagāthā abhāsi –

14. “Sakā raṭṭhā pabbājito, aññaṃ janapadaṃ gato;  
Mahantaṃ koṭṭhaṃ kayirātha, duruttānaṃ nidhetave.
15. “Yattha posam na jānanti, jātiyā vinayena vā;  
Na tattha mānaṃ kayirātha, vasamaññātake jane.

16. “Videsavāsaṃ vasato, jātavedasamenapi;  
Khamitabbaṃ sapañña, api dāsassa tajjita”nti.

Tattha **duruttānaṃ nidhetaveti** yathā dhaññaṇidhānatthāya mahantaṃ koṭṭhaṃ katvā pūretvā kicce uppanne dhaññaṃ vaḷaṅgenti, evamevaṃ videsaṃ gato antohadaye paṇḍito poso duruttānaṃ nidhānatthāya mahantaṃ koṭṭhaṃ kayirātha. Tattha tāni duruttāni nidahitvā puna attano pahonakakāle kātappaṃ karissati. **Jātiyā vinayena vāti** “ayaṃ khattiyo brāhmaṇo”ti vā “sīlavā bahussuto guṇasampanno”ti vā evaṃ yattha jātiyā vinayena vā na jānantīti attho. **Mānanti** evarūpaṃ maṃ lāmakavohārena voharanti, na sakkaronti na garuṃ karontīti mānaṃ na kareyya. **Vasamaññātake janeti** attano jātigottādīni ajānantassa janassa santike vasanto. **Vasatoti** vasatā, ayameva vā pāṭho.

Evaṃ te tattha tīṇi vassāni vasiṃsu. Atha ne pitā pakkosāpesi. Te tato paṭṭhāya nihataṃā jātā.

Satthā imaṃ dhammadešanaṃ āharitvā saccāni pakāsetvā jātakaṃ samodhānesi, saccapariyosāne kodhano bhikkhu anāgāmiṃphale patiṭṭhahi. “Tadā cūḷadaddaro kodhano bhikkhu ahosi, mahādaddaro pana ahameva ahosi”nti.

Daddarajātakavaṇṇanā catutthā.

[305] 5. Sīlavīmaṃsanajātakavaṇṇanā

**Natthi loke raho nāmāti** idaṃ satthā jetavane viharanto kilesaniggahaṃ ārabba kathesi. Vatthu ekādasakanipāte **pāṇiyajātake** (jā. 1.11.59 ādayo) āvi bhavissati. Ayaṃ panettha saṅkhepo – pañcasatā bhikkhū antojetavane vasantā majjhimayāmasamanantare kāmavitakkaṃ vitakkayīṃsu. Satthā chasupi rattidivākoṭṭhāsesu yathā ekacakkhuko cakkhuṃ, ekaputto puttaṃ, cāmarī vālaṃ appamādena rakkhati, evaṃ niccakālaṃ bhikkhū oloketi. So rattibhāge dibbacakkhunā jetavanaṃ oloketto cakkavattirañño attano nivesane uppannacore viya te bhikkhū disvā gandhakuṭiṃ vivarivā ānandattheraṃ āmantetvā “ānanda, antojetavane koṭṭisanthāre vasanakabhikkhū sannipātāpetvā gandhakuṭidvāre āsanaṃ paññāpehi”ti āha. So tathā katvā satthu paṭivedesi. Satthā paññattāsane nisīditvā sabbasaṅgāhikavasena āmantetvā “bhikkhave, porāṇakapaṇḍitā ‘pāpakaraṇe raho nāma natthi’ti pāpaṃ na kariṃsū”ti vatvā tehi yācito atītaṃ āhari.

Atīte bārāṇasiyaṃ brahmadatte rajjaṃ kārente bodhisatto brāhmaṇakule nibbattitvā vayappatto tattheva bārāṇasiyaṃ disāpāmokkhasa ācariyassa santike pañcannaṃ māṇavakasatānaṃ jeṭṭhako hutvā sippaṃ uggaṇhāti. Ācariyassa pana vayappattā dhītā atthi. So cintesi “imesaṃ māṇavakānaṃ sīlaṃ vīmaṃsitvā sīlasampannasēva dhītaraṃ dassāmi”ti. So ekadivasaṃ māṇavake āmantetvā “tātā, mayhaṃ dhītā vayappattā, vivāhamassā kāressāmi, vatthālaṅkāraṃ laddhuṃ vaṭṭati, gacchatha tumhe attano attano nītakānaṃ apassantānaññeva thenetvā vatthālaṅkāre āharatha, kenaci adīṭṭhameva gaṇhāmi, dassetvā ābhatāṃ na gaṇhāmi”ti āha. Te “sādhū”ti sampaṭicchitvā tato paṭṭhāya nītakānaṃ apassantānaṃ thenetvā vatthapiḷandhanādīni āharanti. Ācariyo ābhatābhatāṃ visuṃ visuṃ ṭhapesi. Bodhisatto pana na kiñci āhari. Atha naṃ ācariyo āha “tvamaṃ pana, tātā, na kiñci āharasi”ti. “Āma, ācariyā”ti. “Kasmā, tātā”ti. “Tumhe na kassaci passantassa ābhatāṃ gaṇhatha, ahaṃ pana pāpakaraṇe raho nāma na passāmi”ti dipento imā dve gāthā āha –

17. “Natthi loke raho nāma, pāpakammaṃ pakubbato;  
Passanti vanabhūtāni, taṃ bālo maññatī raho.
18. “Ahaṃ raho na passāmi, suññaṃ vāpi na vijjati;  
Yattha aññaṃ na passāmi, asuññaṃ hoti taṃ mayā”ti.

Tattha **rahoti** paṭicchannaṭṭhānaṃ. **Vanabhūtānīti** vane nibbattabhūtāni. **Taṃ bāloti** taṃ pāpakammaṃ raho mayā katanti bālo maññati. **Suññaṃ vāpīti** yaṃ vā ṭhānaṃ sattehi suññaṃ tucchāṃ



bhaveyya, tampi natthīti āha.

Ācariyo tassa pasīdītvā “tāta, na mayhaṃ gehe dhaṇaṃ natthi, ahaṃ pana sīlasampannassa dhītaraṃ dātukāmo ime māṇavake vīmaṃsanto evamakāsiṃ, mama dhītā tuyhameva anucchavikā”ti dhītaraṃ alaṅkaritvā bodhisattassa adāsi. Sesamāṇavake “tumhehi ābhatābhatam tumhākaṃ gehameva nethā”ti āha.

Satthā “iti kho, bhikkhave, te dussīlamāṇavakā attano dussīlatāya taṃ itthiṃ na labhiṃsu, itaro paṇḍitamāṇavo sīlasampannatāya labhī”ti vatvā abhisambuddho hutvā itarā dve gāthā abhāsi –

19. “Dujjacco ca sujacco ca, nando ca sukhavaḍḍhito;  
Vajjo ca addhavasīlo ca, te dhammaṃ jahumatthikā.
20. “Brāhmaṇo ca kathaṃ jahe, sabbadhammāna pāragū;  
Yo dhammamanupāleti, dhitimā saccanikkamo”ti.

Tattha **dujjaccoti**ādayo cha jeṭṭhakamāṇavā, tesam nāmaṃ gaṇhi, avasesānaṃ nāmaṃ aggahetvā sabbasaṅgāhikavaseneva “**te dhammaṃ jahumatthikā**”ti āha. Tattha **teti** sabbepi te māṇavā. **Dhammanti** itthipaṭilābhasabhāvaṃ. **Jahumatthikā**ti jahuṃ atthikā, ayameva vā pāṭho. Makāro padabyañjanasandhivasena vutto. Idaṃ vuttaṃ hoti – sabbepi te māṇavā tāya itthiyā atthikāva hutvā attano dussīlatāya taṃ itthipaṭilābhasabhāvaṃ jahimṃsu.

**Brāhmaṇo cāti** itaro pana sīlasampanno brāhmaṇo. **Kathaṃ jaheti** kena kāraṇena taṃ itthipaṭilābhasabhāvaṃ jahissati. **Sabbadhammānanti** imasmim ṭhāne lokiyāni pañca sīlāni, dasa sīlāni, tīni sucaritāni ca, sabbadhammā nāma, tesam so pāraṃ gatoti **pāragū**. **Dhammanti** vuttappakārameva dhammaṃ **yo anupāleti** rakkhati. **Dhitimāti** sīlarakkhanadhitiyā samannāgato. **Sacchanikkamoti** sacce sabhāvabhūte yathāvutte sīladhamme nikkamena samannāgato.

Satthā imaṃ dhammadesanaṃ āharitvā saccāni pakāsetvā jātaṃ samodhānesi, saccapariyosāne tāni pañca bhikkhusatāni arahatte paṭiṭṭhahimṃsu.

Tadā ācariyo sārīputto ahosi, paṇḍitamāṇavo pana ahameva ahosinti.

Sīlavīmaṃsanajātakavaṇṇanā pañcamā.

[306] 6. Sujātājātakavaṇṇanā

**Kiṃaṇḍakā**ti idaṃ satthā jetavane viharanto mallikaṃ devim ārabba katesi. Ekadivasaṃ kira rañño tāya saddhiṃ sirivivādo ahosi, “sayanakalaho”tipi vadantiyeva. Rājā kujjhivā tassā atthibhāvampi na jānāti. Mallikā devīpi “satthā rañño mayi kuddhabhāvaṃ na jānāti maññe”ti cintesi. Satthāpi ṇatvā “imesaṃ samaggabhāvaṃ karissāmi”ti pubbaṇhasamayaṃ nivāsetvā pattacīvaramādāya pañcabhikkhusataparivāro sāvattiṃ pavisitvā rājadvāraṃ agamāsi. Rājā tathāgatassa pattaṃ gahetvā nivesanaṃ pavesetvā paññattāsane nisīdāpetvā buddhappamukhassa bhikkhusaṅghassa dakkhiṇodakaṃ datvā yāgukhajjakaṃ āhari. Satthā pattaṃ hatthena pidahitvā “mahārāja, kahaṃ devī”ti āha. “Kiṃ, bhante, tāya attano yasena mattāyā”ti? “Mahārāja, sayameva yasaṃ datvā mātugāmaṃ ukkhipitvā tāya katassa aparādhassa asahanaṃ nāma na yutta”nti. Rājā satthu vacanaṃ sutvā taṃ pakkosāpesi, sā satthāraṃ parivisi. Satthā “aññaṃaññaṃ samaggehi bhavituṃ vaṭṭatī”ti sāmaggirasavaṇṇaṃ kathetvā pakkāmi. Tato paṭṭhāya ubho samaggavāsaṃ vasimṃsu. Bhikkhū dhammasabhāyaṃ kathaṃ samuṭṭhāpesuṃ “āvuso, satthā ekavacaneneva ubho samagge akāsi”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepāhaṃ ete ekavādeneva samagge akāsi”nti vatvā tehi yācito atītaṃ āhari.

Atīte bārāṇasiyaṃ brahmadatte rajjaṃ kārente bodhisatto tassa atthadhammānusāsako amacco ahosi. Atheadivasam rājā vātapānaṃ vivaritvā rājāṅgaṇaṃ olokayamāno aṭṭhāsi. Tasmim̄ khāṇe ekā paṇṇikadhītā abhirūpā paṭhamavaye ṭhitā sujātā nāma badarapacchim̄ sīse katvā “badarāni gaṇhatha, badarāni gaṇhathā”ti vadamānā rājāṅgaṇena gacchati. Rājā tassā saddaṃ sutvā tāya paṭibaddhacitto hutvā asāmikabhāvaṃ ṇatvā taṃ pakkosāpetvā aggamaheṣiṭṭhāne ṭhapetvā mahantaṃ yasaṃ adāsi. Sā rañño piyā ahosi manāpā. Atheadivasam rājā suvaṇṇataṭṭake badarāni khādanto nisīdi. Tadā sujātā devī rājānaṃ badarāni khādantaṃ disvā “mahārāja, kiṃ nāma tumhe khādathā”ti pucchantī paṭhamam̄ gāthamāha –

21. “Kimaṇḍakā ime deva, nikkhittā kaṃsamallake;  
Upalohitakā vaggū, taṃ me akkhāhi pucchito”ti.

Tattha **kimaṇḍakā**ti kiṃphalāni nāmetāni, parimaṇḍalavasena pana aṇḍakāti āha. **Kaṃsamallaketi** suvaṇṇataṭṭake. **Upalohitakā**ti rattavaṇṇā. **Vaggū**ti cakkhā nimmalā.

Rājā kujjhivā “badaravāṇijake paṇṇikagahapatikassa dhīte attano kulasantakāni badarānipi na jānāsī”ti vatvā dve gāthā abhāsi –

22. “Yāni pure tuvaṃ devī, bhaṇḍu nantakavāsini;  
Ucchaṅgahatthā pacināsi, tassā te koliyaṃ phalaṃ.
23. “Uḍḍayhate na ramati, bhogā vippajahanti taṃ;  
Tatthevimaṃ paṇinetha, yattha kolaṃ pacissatī”ti.

Tattha **bhaṇḍū**ti muṇḍasīsā hutvā. **Nantakavāsini**ti jīṇṇapilotikanivatthā. **Ucchaṅgahatthā pacināsi**ti aṭaviṃ pavisitvā aṅkusakena sākhaṃ onāmetvā ocitocitaṃ hatthena gahetvā ucchaṅge pakkhipanavasena ucchaṅgahatthā hutvā pacināsi ocināsi. **Tassā te koliyaṃ phalanti** tassā tava evaṃ pacinantiyā ocinantiyā yamaṃ idāni khādāmi, idaṃ koliyaṃ kuladattiyaṃ phalanti attho.

**Uḍḍayhate na ramatī**ti ayaṃ jammī imasmim̄ rājakule vasamānā lohakumbhiyaṃ pakkhittā viya ḍayhati nābhiraṃmatī. **Bhogā**ti rājabhogā imaṃ alakkhikaṃ vippajahanti. **Yattha kolaṃ pacissatī**ti yattha gantvā puna badarameva pacinivā vikkiṇantī jīvikaṃ kappessatī, tattheva naṃ nethāti vadati.

Bodhisatto “ṭhapetvā maṃ añño ime samagge kātuṃ na sakkhissatī”ti rājānaṃ saññāpetvā “imissā anikkaḍḍhanaṃ karissāmī”ti cintetvā catutthaṃ gāthamāha –

24. “Honti hete mahārāja, iddhipattāya nāriyā;  
Khama deva sujātāya, māsā kujjha rathesabhā”ti.

Tassattho – mahārāja, ete evarūpā pamādadosā yasaṃ pattāya nāriyā hontiyeva, etaṃ evarūpe ucce ṭhāne ṭhapetvā idāni “ettakassa aparādhassa asahaṇaṃ nāma na yuttaṃ tumhākaṃ, tasmā khama, deva, sujātāya, etissā mā kujjha **rathesabha** rathajetthakāti.

Rājā tassa vacanena deviyā taṃ aparādhaṃ sahitvā yathāṭhāneyeva naṃ ṭhapesi. Tato paṭṭhāya ubho samaggavāsaṃ vasimsūti.

Satthā imaṃ dhammadesanaṃ āharitvā jātakam̄ samodhānesi – “tadā bārāṇasirājā kosalarājā ahosi, sujātā mallikā, amacco pana ahameva ahosi”nti.

Sujātājātakavaṇṇanā chaṭṭhā.

[307] 7. Palāsajātakavaṇṇanā

**Acetanaṃ brāhmaṇa assuṇantanti** idaṃ satthā parinibbānamañce nipanno ānandattheraṃ ārabha kathesi. Sohāyasmā “ajja rattiyā paccūsasamaye satthā parinibbāyissatī”ti ñatvā “ahañcamhi sekkho sakaraṇīyo, satthu ca me parinibbānaṃ bhavissati, pañcāvīsati vassāni satthu kataṃ upaṭṭhānaṃ nipphalaṃ bhavissatī”ti sokābhibhūto uyyānaovarake kapisīsaṃ ālambitvā parodi. Satthā taṃ apassanto “kaḥaṃ, bhikkhave, ānando”ti pucchitvā tamatthaṃ sutvā taṃ pakkosāpetvā “katapuññosi tvam, ānanda, padhānamanuyuñja, khippaṃ hohisi anāsavo, mā cintayi, idāni tayā mama kataṃ upaṭṭhānaṃ kiṃkāraṇā nipphalaṃ bhavissati, yassa te pubbe sarāgādikālepi mama kataṃ upaṭṭhānaṃ nipphalaṃ nāhosī”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto bārānasito avidūre palāsarukkadevatā hutvā nibbatti. Tadā bārānasivāsino manussā devatāmaṅgalikā ahesuṃ niccaṃ balikaraṇādīsu payuttā. Atheko duggatabrāhmaṇo “ahampi ekaṃ devataṃ paṭijaggissāmi”ti ekasmiṃ unnatappadese ṭhitassa mahato palāsarukkassa mūlaṃ samaṃ nittiṇaṃ katvā parikkhipitvā vāluṃ okiritvāva sammajjitvā rukkhe gandhapañcaṅgulikāni datvā mālāgandhadhūmehi pūjetvā dīpaṃ jāletvā “sukhaṃ sayā”ti vatvā rukkhaṃ padakkhiṇaṃ katvā pakkamati. Dutiyadivase pātova gantvā sukhasēyyaṃ pucchati. Athekadivasaṃ rukkadevatā cintesi “ayaṃ brāhmaṇo ativiya maṃ paṭijaggati, imaṃ brāhmaṇaṃ vīmaṃsitvā yena kāraṇena maṃ paṭijaggati, taṃ dassāmi”ti. Sā tasmīṃ khaṇe brāhmaṇe āgantvā rukkhamūle sammajjante mahallakabrāhmaṇavesena samīpe ṭhatvā paṭhamāṃ gāthamāha –

25. “Acetanaṃ brāhmaṇa assuṇantaṃ, jāno ajānantamimaṃ palāsaṃ;  
Āraddhaviriyo dhuvāṃ appamatto, sukhasēyyaṃ pucchasi kissa hetū”ti.

Tattha **assuṇantanti** acetanattāva asuṇantaṃ. **Jānoti** tuvaṃ jānamāno hutvā **dhuvāṃ appamattoti** niccaṃ appamatto.

Taṃ sutvā brāhmaṇo dutiyaṃ gāthamāha –

26. “Dūre suto ceva brahā ca rukkho, dese ṭhito bhūtanivāsarūpo;  
Tasmā namassāmi imaṃ palāsaṃ, ye cettha bhūtā te dhanassa hetū”ti.

Tattha **dūre sutoti** brāhmaṇa ayaṃ rukkho dūre suto vissuto, na āsannaṭṭhāneyeva pākaṭo. **Brahā cāti** mahanto ca. **Dese ṭhitoti** unnate same bhūmippadese ṭhito. **Bhūtanivāsarūpoti** devatānivāsasabhāvo, addhā ettha mahesakkhā devatā nivutthā bhavissati. **Te dhanassa hetūti** imañca rukkhaṃ ye cettha nivutthā bhūtā, te dhanassa hetu namassāmi, na nikkāraṇāti.

Taṃ sutvā rukkadevatā brāhmaṇassa pasannā “ahaṃ, brāhmaṇa, imasmiṃ rukkhe nibbattadevatā, mā bhāyi, dhanāṃ te dassāmi”ti taṃ assāsetvā attano vimānadvāre mahantena devatānubhāvena ākāse ṭhatvā itarā dve gāthā abhāsi –

27. “So te karissāmi yathānubhāvaṃ, kataññutaṃ brāhmaṇa pekkhamāno;  
Kathañhi āgamma satāṃ sakāse, moghāni te assu pariphanditāni.
28. “Yo tindukarukkassa paro pilakkho, parivārito pubbayañño uḷāro;  
Tassesa mūlasmiṃ nidhi nikhāto, adāyādo gaccha taṃ uddharāhi”ti.

Tattha **yathānubhāvanti** yathāsatti yathābalaṃ. **Kataññutanti** tayā mayhaṃ katagūṇaṃ jānanto taṃ attani vijjamaṇaṃ kataññutaṃ pekkhamāno. **Āgammāti** āgantvā. **Sataṃ sakāseti** sappurisānaṃ santike. **Moghāni te assu pariphanditāni** sukhasēyapucchana vasena vācāphanditāni sammajjanādikaraṇena kāyaphanditāni ca tava kathaṃ aphaḷāni bhavissanti.

**Yo tindukarukkassa paro pilakkhoti** yo esa tindukarukkassa parato pilakkharukkho ṭhitoti

vimānavāre t̥hitāva hattham pasāretvā dasseti. **Parivāritoti**ādīsu tassa pilakkharukkhassa mūle esa tam rukkhamūlam parikkhipitvā nihitatāya parivārito, pubbe yiṭṭhayaññavasena purimasāmikānam uppannatāya **pubbayañño**, anekanidhikumbhi bhāvena mahantattā **ulāro**, bhūmiṃ khaṇitvā t̥hapitattā **nikhāto**, idāni dāyādānam abhāvato **adāyādo**. Idam vuttam hoti – esa tam rukkhamūlam parikkhipitvā gīvāya gīvam paharantīnam nidhikumbhīnam vasena mahānidhi nikhāto asāmiko, gaccha tam uddharitvā gaṇhāti.

Evañca pana vatvā sā devatā “brāhmaṇa, tvam etaṃ uddharitvā gaṇhanto kilamissasi, gaccha tvam, ahameva tam tava gharam netvā asukasmīṃ asukasmīṃca t̥hāne nidahissāmi, tvam etaṃ dhanam yāvajīvam paribhuñjanto dānam dehi, sīlam rakkhāhi”ti brāhmaṇassa ovādam datvā tam dhanam attano ānubhāvena tassa ghare patit̥thāpesi.

Satthā imaṃ dhammadesanaṃ āharitvā jātakam samodhānesi – “tadā brāhmaṇo ānando ahosi, rukkhavevatā pana ahameva ahosi”nti.

Palāsajātakavaṇṇanā sattamā.

[308] 8. Sakuṇajātakavaṇṇanā

**Akaramhasa te kiccanti** idam satthā jetavane viharanto devadattassa akataññutam ārabba kathesi. “Na, bhikkhave, idāneva, pubbepi devadatto akataññūyevā”ti vatvā atītam āhari.

Atīte bārānasiyam brahmadatte rajjam kārente bodhisatto himavantapadese rukkhaḷḷakasakuṇo hutvā nibbatti. Athekassa sīhassa mamsam khādantassa aṭṭhi gale laggi, galo uddhumāyi, gocaram gaṇhitum na sakkoti, kharā vedanā pavattati. Atha nam so sakuṇo gocarappasuto disvā sākāya nilīno “kiṃ te, samma, dukkha”nti pucchi. So tamattham ācikkhi. “Aham te, samma, etaṃ aṭṭhim apaneyyam, bhayena pana te mukham pavisitum na visahāmi, khādeyyāsipi ma”nti. “Mā bhāyi, samma, nāham tam khādāmi, jīvitam me dehī”ti. So “sādhū”ti tam vāmapassena nipajjāpetvā “ko jānāti, kimpesa karissatī”ti cintetvā yathā mukham pidahitum na sakkoti, tathā tassa adharoṭṭhe ca uttaroṭṭhe ca daṇḍakam t̥hapetvā mukham pavisitvā aṭṭhikoṭṭim tuṇḍena pahari, aṭṭhi patitvā gatam. So aṭṭhim pātetvā sīhassa mukhato nikkhamanto daṇḍakam tuṇḍena paharitvā pātentova nikkhamitvā sākhaḡge nilīyi. Sīho nirogo hutvā ekadivasam ekaṃ vanamahimsam vadhitvā khādati. Sakuṇo “vīmaṃsissāmi na”nti tassa uparibhāge sākāya nilīyitvā tena saddhim sallapanto paṭhamam gāthamāha –

29. “Akaramhasa te kiccam, yam balam ahuvamhase;  
Migarāja namo tyatthu, api kiñci labhāmase”ti.

Tattha **akaramhasa te kiccanti** bho, sīha, mayampi tava ekaṃ kiccam akarimha. **Yam balam ahuvamhase**ti yam amhākam balam ahosi, tena balena tato kiñci ahāpetvā akarimhayeva.

Tam sutvā sīho dutiyam gāthamāha –

30. “Mama lohitabhakkhassa, niccam luddāni kubbato;  
Dantantaragato santo, tam bahum yampi jīvasī”ti.

Tam sutvā sakuṇo itarā dve gāthā abhāsi –

31. “Akataññumakattāram, katassa appaṭikārakam;  
Yasmim kataññutā natthi, niratthā tassa sevanā.

32. “Yassa sammukhaciṇṇena, mittadhammo na labbhati;

Anusūyamanakkosaṃ, saṅikaṃ tamhā apakkame’’nti.

Tattha **akataññūnti** kataguṇaṃ ajānantaṃ. **Akattāraṇti** yaṃkiñci akarontaṃ. **Sammukhaciṇṇenāti** sammukhe katena guṇena. **Anusūyamanakkosanti** taṃ puggalaṃ na usūyanta na akkosanto saṅikaṃ tamhā pāpapuggalā apagaccheyyāti. Evaṃ vatvā so sakuṇo pakkāmi.

Satthā imaṃ dhammadesanaṃ āharitvā jātaṃ samodhānesi – ‘‘tadā sīho devadatto ahosi, sakuṇo pana ahameva ahosi’’nti.

Sakuṇajātakavaṇṇanā aṭṭhamā.

[309] 9. Chavajātakavaṇṇanā

**Sabbamidaṃ carimaṃ katanti** idaṃ satthā jetavane viharanto chabbaggiye bhikkhū ārabha kathesi. Vatthu **vinaye** (pāci. 646) vitthārato āgatameva. Ayaṃ panettha saṅkhepo – satthā chabbaggiye pakkosāpetvā ‘‘saccaṃ kira tumhe, bhikkhave, nīce āsane nisīditvā ucce āsane nisinnassa dhammaṃ desethā’’ti pucchitvā ‘‘evaṃ, bhante’’ti vutte te bhikkhū garahitvā ‘‘ayuttaṃ, bhikkhave, tumhākaṃ mama dhamme agāravakaraṇaṃ, porāṇakapaṇḍitā hi nīce āsane nisīditvā bāhirakamantepe vācente garahiṃsū’’ti vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto caṇḍālakule nibbattitvā vayappatto kuṭumbaṃ saṅthapesi. Tassa bhariyā ambadohaḷinī hutvā taṃ āha ‘‘sāmi, icchāmaṃ ambaṃ khāditu’’nti. ‘‘Bhadde, imasmiṃ kāle ambaṃ natthi, aññaṃ kiñci ambulaphalaṃ āharissāmi’’ti. ‘‘Sāmi, ambaphalaṃ labhamānāva jīvissāmi, alabhamānāya me jīvitaṃ natthi’’ti. So tassā paṭibaddhacitto ‘‘kahaṃ nu kho ambaphalaṃ labhissāmi’’ti cintesi. Tena kho pana samayena bārāṇasirañño uyyāne ambo dhuvaphalo hoti. So ‘‘tato ambapakkaṃ āharitvā imissā dohaḷaṃ paṭippassambhessāmi’’ti rattibhāge uyyānaṃ gantvā ambaṃ abhiruhitvā nilīno sākḥāya sākhaṃ ambaṃ olokento vicari. Tassa tathā karontasseva ratti vibhāyi. So cintesi ‘‘sace idāni otaritvā gamissāmi, disvā maṃ ‘coro’ti gaṇhissanti, rattibhāge gamissāmi’’ti. Athesaṃ viṭapaṃ abhiruhitvā nilīno acchi.

Tadā bārāṇasirājā ‘‘purohitassa santike mante uggaṇhissāmi’’ti uyyānaṃ pavisitvā ambarukkhamūle ucce āsane nisīditvā ācariyaṃ nīce āsane nisīdāpetvā mante uggaṇhi. Bodhisatto upari nilīno cintesi – ‘‘yāva adhammiko ayaṃ rājā, yo uccāsane nisīditvā mante uggaṇhāti. Ayaṃ brāhmaṇopi adhammiko, yo nīcāsane nisīditvā mante vāceti. Ahampi adhammiko, yo mātugāmassa vasaṃ gantvā mama jīvitaṃ agaṇetvā ambaṃ āharāmi’’ti. So rukkhato otaranto ekaṃ olambanasākhaṃ gahetvā tesam ubhinnaṃ antare patiṭṭhāya ‘‘mahārāja, ahaṃ naṭṭho, tvaṃ mūḷho, purohito mato’’ti āha. So rañña ‘‘kiṃkāraṇā’’ti puṭṭho paṭhamam gāthamāha –

33. ‘‘Sabbamidaṃ carimaṃ kataṃ, ubho dhammaṃ na passare;  
Ubho pakatiyā cutā, yo cāyaṃ mantejjhāpeti;  
Yo ca mantam adhīyati’’ti.

Tattha **sabbamidaṃ carimaṃ katanti** yaṃ amhehi tīhi janehi kataṃ, sabbam idaṃ kiccaṃ lāmakaṃ nimmariyādaṃ adhammikaṃ. Evaṃ attano corabhāvaṃ tesaṅca mantesu agāraṃ garahitvā puna itare dveyeva garahanto ‘‘**ubho dhammaṃ na passare**’’tiādimāha. Tattha **ubhoti** ime dvepe janā garukārāraṃ porāṇakadhammaṃ na passanti, tato dhammapakatito cutā. Dhammo hi paṭhamuppattivāsena pakati nāma. Vuttampi cetam –

‘‘Dhammo have pāturahosi pubbe;  
Pacchā adhammo udapādi loke’’ti. (jā. 1.11.28);

**Yo cāyanti** yo ca ayaṃ nīcāsane nisīditvā mante ajjhāpeti, yo ca ucce āsane nisīditvā adhīyatīti.

Taṃ sutvā brāhmaṇo dutiyaṃ gāthamāha –

34. “Sālīnaṃ odanaṃ bhuñje, suciṃ maṃsūpasecanaṃ;  
Tasmā etaṃ na sevāmi, dhammaṃ isihi sevita”nti.

Tassattho – ahañhi bho imassa rañño santakaṃ sālīnaṃ odanaṃ **suciṃ** paṇḍaraṃ nānappakārāya maṃsavikatiyā sittaṃ **maṃsūpasecanaṃ** bhuñjāmi, tasmā udare baddho hutvā etaṃ esitaguṇehi isihi sevitaṃ dhammaṃ na sevāmīti.

Taṃ sutvā itaro dve gāthā abhāsi –

35. “Paribbaja mahā loko, pacantaññepi pāṇino;  
Mā taṃ adhammo ācarito, asmā kumbhamivābhidā.
36. “Dhiratthu taṃ yasalābhaṃ, dhanalābhañca brāhmaṇa;  
Yā vutti vinipātena, adhammacaraṇena vā”ti.

Tattha **paribbajāti** ito aññattha gaccha. **Mahāti** ayaṃ loko nāma mahā. **Pacantaññepi pāṇinoti** imasmiṃ jambudīpe aññepi pāṇino pacanti, nāyameveko rājā. **Asmā kumbhamivābhidāti** pāsāṇo ghaṭaṃ viya. Idaṃ vuttaṃ hoti – yaṃ tvaṃ aññattha agantvā idha vasanto adhammaṃ ācarasi, so adhammo evaṃ ācarito pāsāṇo ghaṭaṃ viya mā taṃ bhindī.

“**Dhiratthū**”ti gāthāya ayaṃ saṅkhepattho – brāhmaṇa yo esa evaṃ tava yasalābho ca dhanalābho ca dhiratthu, taṃ garahāma mayaṃ. Kasmā? Yasmā ayaṃ tayā laddhalābho āyatim apāyesu vinipātanahetunā sampati ca adhammacaraṇena jīvitavutti nāma hoti, yā cesā vutti iminā āyatim vinipātena idha adhammacaraṇena vā nippajjati, kiṃ tāya, tena taṃ evaṃ vadāmīti.

Athassa dhammakathāya rājā pasīditvā “bho, purisa, kiṃjātikosī”ti pucchi. “Caṇḍālo ahaṃ, devā”ti. Bho “sace tvaṃ jātisampanno abhavisssa, rajjaṃ te ahaṃ adassaṃ, ito paṭṭhāya pana ahaṃ divā rājā bhavissāmi, tvaṃ rattim rājā hohī”ti attano kaṅṭhe piḷandhanaṃ pupphadāmaṃ tassa gīvāyaṃ piḷandhāpetvā taṃ nagaraguttikaṃ akāsi. Ayaṃ nagaraguttikānaṃ kaṅṭhe rattapupphadāmapiḷandhanavaṃso. Tato paṭṭhāya pana rājā tassovāde ṭhatvā ācariye gāravaṃ karitvā nīce āsane nisinno mante uggaṇhīti.

Satthā imaṃ dhammadesanaṃ āharitvā jātaṃ samodhānesi “tadā rājā ānando ahosi, caṇḍālaputto pana ahameva ahosi”nti.

Chavajātakavaṇṇanā navamā.

[310] 10. Seyyajātakavaṇṇanā

**Sasamuddapariyāyanti** idaṃ satthā jetavane viharanto ukkaṅṭhitabhikkhuṃ ārabha kathesi. So hi sāvattiyāṃ piṇḍāya caranto ekaṃ abhirūpaṃ alaṅkatapaṭiyattaṃ itthim disvā ukkaṅṭhito sāsane nābhiraṃ. Atha bhikkhū bhagavato ārocesuṃ. So bhagavatā “saccaṃ kira tvaṃ bhikkhu ukkaṅṭhitosī”ti puṭṭho “saccaṃ, bhante”ti vatvā “ko taṃ ukkaṅṭhāpesī”ti vutte tamatthaṃ ārocesi. Satthā “kasmā tvaṃ evarūpe niyyānikasāsane pabbajitvā ukkaṅṭhitosi, pubbe paṇḍitā purohitaṭṭhānaṃ labhantāpi taṃ paṭikkhipitvā pabbajimsū”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto purohitassa brāhmaṇiyā kucchimhi paṭisandhim gaṇhitvā rañño puttena saddhim ekadivase vijāyī. Rājā “atthi nu kho koci me puttena saddhim ekadivase jāto”ti amacce pucchi. “Atthi, mahārāja, purohitassa putto”ti. Rājā taṃ āharāpetvā dhātīnaṃ datvā puttena saddhim ekatova paṭijaggāpesi. Ubhinnaṃ ābharaṇāni ceva pānabhojanādāni ca

ekasadisāneva ahesuṃ. Te vayappattā ekatova takkasilaṃ gantvā sabbasippāni uggaṇhitvā āgamamsu. Rājā puttassa oparajjaṃ adāsi, mahāyaso ahosi. Tato paṭṭhāya bodhisatto rājaputtena saddhiṃ ekatova khādati pivati sayati, aññamaññaṃ viśāso thiro ahosi.

Aparabhāge rājaputto pitu accayena rajje paṭiṭṭhāya mahāsampattiṃ anubhavi. Bodhisatto cintesi “mayhaṃ sahāyo rajjamanusāsati, sallakkhitakkaṇeṃveva kho pana mayhaṃ purohitaṭṭhānaṃ dassati, kiṃ me gharāvāsena, pabbajitvā vivekamanubrūhessāmi”’ti? So mātāpitaro vanditvā pabbajjaṃ anujānāpetvā mahāsampattiṃ chaḍḍetvā ekakova nikkhamitvā himavantaṃ pavisitvā manorame bhūmibhāge paṇṇasālaṃ māpetvā isipabbajjaṃ pabbajitvā abhiññā ca samāpattiyo ca nibbattetvā jhānakīlaṃ kīlanto vihāsi. Tadā rājā taṃ anussaritvā “mayhaṃ sahāyo na paññāyati, kahaṃ so”’ti pucchi. Amaccā tassa pabbajitabhāvaṃ ārocetvā “ramaṇīye kira vanasaṇḍe vasati”’ti āhamsu. Rājā tassa vasanokāsaṃ pucchitvā seyyaṃ nāma amaccaṃ “gaccha sahāyaṃ me gahetvā ehi, purohitaṭṭhānamassa dassāmi”’ti āha. So “sādhū”’ti paṭissuṇitvā bārāṇasito nikkhamitvā anupubbena paccantagāmaṃ patvā tattha khandhāvāraṃ ṭhapetvā vanacarakehi saddhiṃ bodhisattassa vasanokāsaṃ gantvā bodhisattaṃ paṇṇasāladvāre suvaṇṇapaṭimaṃ viya nisinnaṃ disvā vanditvā ekamantaṃ nisīditvā katapaṭisanthāro “bhante, rājā tuyhaṃ purohitaṭṭhānaṃ dātukāmo, āgamaṇaṃ te icchatī”’ti āha.

Bodhisatto “tiṭṭhatu purohitaṭṭhānaṃ, ahaṃ sakalaṃ kāsikosalajambudīparajjaṃ cakkavattisirimēva vā labhantopi na gacchissāmi, na hi paṇḍitā sakiṃ jahitakilese puna gaṇhanti, sakiṃ jahitañhi niṭṭhubhakheḷasadisāṃ hotī”’ti vatvā imā gāthā abhāsi –

37. “Sasamuddapariyāyaṃ, mahiṃ sāgarakuṇḍalaṃ;  
Na icche saha nindāya, evaṃ seyya vijānāhi.
38. “Dhiratthu taṃ yasalābhaṃ, dhanalābhañca brāhmaṇa;  
Yā vutti vinipātena, adhammacaraṇena vā.
39. “Api ce pattamādāya, anagāro paribbaje;  
Sāyeva jīvikā seyyo, yā cādhammena esanā.
40. “Api ce pattamādāya, anagāro paribbaje;  
Aññaṃ ahimsayaṃ loke, api rajjena taṃ vara”’nti.

Tattha **sasamuddapariyāyanti** pariyaṃ vuccati parivāro, samuddaṃ parivāretvā ṭhitena cakkavālapabbatena saddhiṃ, samuddasaṅkhātena vā parivārena saddhinti attho. **Sāgarakuṇḍalanti** sāgaramajjhe dīpavasena ṭhitattā tassa kuṇḍalabhūṭanti attho. **Nindāyāti** jhānasukhasampannaṃ pabbajjaṃ chaḍḍetvā issariyaṃ gaṇhīti imāya nindāya. **Seyyāti** taṃ nāmenālapati. **Vijānāhīti** dhammaṃ vijānāhi. **Yā vutti vinipātenāti** yā purohitaṭṭhānavasena laddhā yasalābhadhanalābhavutti jhānasukhato attavinipātanasaṅkhātena vinipātena ito gantvā issariyamadamattassa adhammacaraṇena vā hoti, taṃ vuttiṃ dhiratthu.

**Pattamādāyāti** bhikkhābhājanaṃ gahetvā. **Anagāro**ti api ahaṃ agāravirahito parakulesu careyyaṃ. **Sāyeva jīvikāti** sā eva me jīvikā seyyo varatarā. **Yā cādhammena esanāti** yā ca adhammena esanā. **Idaṃ vuttaṃ hoti** – yā adhammena esanā, tato esāva jīvikā sundaratarāti. **Ahimsayanti** aviheṭhento. **Api rajjenāti** evaṃ paraṃ aviheṭhento kapālahatthassa mama jīvikakappaṇaṃ rajjenāpi varam uttamanti.

Iti so punappunaṃ yācantampi taṃ paṭikkhipi. Seyyopi tassa manaṃ alabhitvā taṃ vanditvā gantvā tassa anāgamanabhāvaṃ rañño ārocesi.

Satthā imaṃ dhammadeśanaṃ āharitvā saccāni pakāsetvā jātaṃ samodhānesi, saccapariyosāne

ukkaṇṭhitabhikkhu sotāpattiphale patitṭhahi, aparepi bahū sotāpattiphālādīni sacchikariṃsu.

Tadā rājā ānando ahosi, seyyo sārīputto, purohitaputto pana ahameva ahosinti.

Seyyajātakavaṇṇanā dasamā.

Kāliṅgavaggo paṭhamo.

## 2. Pucimandavaggo

[311] 1. Pucimandajātakavaṇṇanā

**Uṭṭhehi corāti** idamaṃ satthā veḷuvane viharanto āyasmantaṃ mahāmoggallānaṃ ārabba katesi.

There kira rājagahaṃ upanissāya araṇṇakuṭīkāya viharante eko coro nagaradvāragāme ekasmiṃ gehe sandhiṃ chinditvā hatthasāraṃ ādāya palāyitvā therassa kuṭipariveṇaṃ pavisitvā “idha mayhaṃ ārakkho bhavissatī”ti therassa paṇṇasālāya pamukhe nipajji. Thero tassa pamukhe sayitabhāvaṃ ñatvā tasmīṃ āsaṅkaṃ katvā “corasaṃsaggo nāma na vaṭṭatī”ti nikkhamitvā “mā idha sayī”ti nīhari. So coro tato nikkhamitvā padaṃ mohetvā palāyi. Manussā ukkaṃ ādāya corassa padānusārena tattha āgantvā tassa āgataṭṭhānaṭṭhitatṭhānanisinnatṭhānasayitattṭhānādīni disvā “coro ito āgato, idha ṭhito, idha nisinno, iminā ṭhānena apagato, na diṭṭho no”ti ito cito ca pakkhanditvā adisvāva paṭigatā. Punadivase thero pubbaṇhasamayaṃ rājagahe piṇḍāya caritvā piṇḍapātapaṭikkanto veḷuvanaṃ gantvā taṃ pavattiṃ satthu ārocesi. Satthā “na kho, moggallāna, tvaññeva āsaṅkitabbayuttakaṃ āsaṅki, porāṇakapaṇḍitāpi āsaṅkiṃsū”ti vatvā therena yācito atītaṃ āhari.

Atīte bārāṇasiyaṃ brahmadatte rajjaṃ kārente bodhisatto nagarassa susānavane nimbarukkhadevatā hutvā nibbatti. Athekadivasaṃ nagaradvāragāme katakammacoro taṃ susānavanaṃ pāvisi. Tadā ca pana tattha nimbo ca assattho cāti dve jeṭṭhakarukkhā. Coro nimbarukkhamūle bhaṇḍikaṃ ṭhapetvā nipajji. Tasmīṃ pana kāle core gahetvā nimbasūle uttāsenti. Atha sā devatā cintesi “sace manussā āgantvā imaṃ coraṃ gaṇhissanti, imasseva nimbarukkhasa sākhaṃ chinditvā sūlaṃ katvā etaṃ uttāsessanti, evaṃ sante rukkho nassissati, handa naṃ ito nīharissāmi”ti. Sā tena saddhiṃ sallapaṇṭi paṭhamam gāthamāha –

41. “Uṭṭhehi cora kiṃ sesi, ko attho supanena te;  
Mā taṃ gahesuṃ rājāno, gāme kibbisakāraka”nti.

Tattha **rājānoti** rājapurise sandhāya vuttaṃ. **Kibbisakārakanti** dāruṇasāhasikacorakammakārakaṃ.

Iti naṃ vatvā “yāva taṃ rājapurisā na gaṇhanti, tāva aññattha gacchā”ti bhāyāpetvā palāpesi. Tasmīṃ palāte assatthadevatā dutiyaṃ gāthamāha –

42. “Yaṃ nu coraṃ gahessanti, gāme kibbisakārakaṃ;  
Kiṃ tattha pucimandassa, vane jātassa tiṭṭhato”ti.

Tattha **vane jātassa tiṭṭhatoti** nimbo vane jāto ceva ṭhito ca. Devatā pana tattha nibbattatā rukkhasamudācāreneva samudācari.

Taṃ sutvā nimbadevatā tatiyaṃ gāthamāha –

43. “Na tvaṃ assattha jānāsi, mama corassa cantaraṃ;  
Coraṃ gahetvā rājāno, gāme kibbisakārakaṃ;



Appenti nimbāsūlasmim, tasmim me saṅkate mano”ti.

Tattha **assatthā**ti purimanayeneva tasmim nibbattadevatam samudācarati. **Mama corassa cantaranti** mama ca corassa ca ekato avasanakāraṇam. **Appenti nimbāsūlasminti** imasmim kāle rājāno coram nimbāsūle āvuṇanti. **Tasmim me saṅkate manoti** tasmim kāraṇe mama cittam saṅkati. Sace hi imam sūle āvuṇissanti, vimānam me nassissati, atha sākāya olambessanti, vimāne me kuṇapagandho bhavissati, tenāham etaṃ palāpesinti attho.

Evam tāsam devatānam aññamaññam sallapantānaññeva bhaṇḍasāmikā ukkāhatthā padānusārena āgantvā corassa sayitaṭṭhānam disvā “ambho idāneva coro uṭṭhāya palāto, na laddho no coro, sace labhissāma, imasseva nam nimbassa sūle vā āvuṇitvā sākāya vā olambetvā gamissāmā”ti vatvā ito cito ca pakkhanditvā coram adisvāva gatā.

Tesam vacanam sutvā assatthadevatā catuttham gāthamāha –

44. “Saṅkeyya saṅkitabbāni, rakkheyyānāgataṃ bhayaṃ;  
Anāgatabhayā dhīro, ubho loke avekkhatī”ti.

Tattha **rakkheyyānāgataṃ bhayanti** dve anāgatabhayāni diṭṭhadhammikañceva samparāyikañcāti. Tesu pāpamitte parivajjento diṭṭhadhammikaṃ rakkhati, tīṇi duccharitāni parivajjento samparāyikaṃ rakkhati. **Anāgatabhayāti** anāgatabhayahetutaṃ bhayaṃ bhāyamāno **dhīro** paṇḍito puriso pāpamittasaṃsaggaṃ na karoti, tīhipi dvārehi duccharitaṃ na carati. **Ubho loketi** evam bhāyanto hesa idhalokaparalokasaṅkhāte ubho loke avekkhati oloketi, olokayamāno idhalokabhayena pāpamitte vivajjeti, paralokabhayena pāpaṃ na karotīti.

Satthā imam dhammadesanaṃ āharitvā jātaṃ samodhānesi – “tadā assatthadevatā ānando ahosi, nimbadevatā pana ahameva ahosi”nti.

Pucimandajātakavaṇṇanā paṭhamā.

[312] 2. Kassapamandiyajātakavaṇṇanā

**Api kassapa mandiyāti** idaṃ satthā jetavane viharanto ekaṃ mahallakabhikkhum ārabha kathesi. Sāvatthiyaṃ kireko kulaputto kāmesu ādīnavaṃ disvā satthu santike pabbajitvā kammaṭṭhāne anuyutto na cirasseva arahattaṃ pāpuṇi. Tassa aparabhāge mātā kālamakāsi. So mātu accayena pitarañca kaniṭṭhabhātarañca pabbājetvā jetavane vasitvā vassūpanāyikasamaye cīvarapaccayassa sulabhatam sutvā ekaṃ gāmakāvāsam gantvā tayopi tattheva vassaṃ upagantvā vutthavassā jetavanameva āgamamsu. Daharabhikkhu jetavanassa āsannaṭṭhāne “sāmaṇero tvam theram vissāmetvā āneyyāsi, aham puretaram gantvā pariveṇam paṭijaggissāmī”ti jetavanam pāvisi. Mahallakatthero saṅikaṃ āgacchati. Sāmaṇero punappunam sīsena uppīlento viya “gaccha, bhante, gaccha, bhante”ti tam balakkārena neti. Thero “tvam maṃ attano vasaṃ ānesī”ti puna nivattitvā koṭito paṭṭhāya āgacchati. Tesam evam aññamaññam kalahaṃ karontānaññeva sūriyo atthaṅgato, andhakāro jāto.

Itaropi pariveṇam sammajjitvā udakaṃ upaṭṭhapetvā tesam āgamanam apassanto ukkaṃ gahetvā paccuggamanam katvā te āgacchante disvā “kiṃ cirāyithā”ti pucchi. Mahallako tam kāraṇam kathesi. So te dvepi vissāmetvā saṅikaṃ ānesi. Tam divasaṃ buddhupaṭṭhānassa okāsam na labhi. Atha nam dutiyadivase buddhupaṭṭhānam āgantvā vanditvā nisinnam satthā “kadā āgatosī”ti pucchi. “Hiyyo, bhante”ti. “Hiyyo āgantvā ajja buddhupaṭṭhānam karosī”ti? So “āma, bhante”ti vatvā tam kāraṇam ācikkhi. Satthā mahallakam garahitvā “na esa idāneva evarūpaṃ kammaṃ karoti, pubbepi akāsi. Idāni pana tena tvam kilamito, pubbepi paṇḍite kilamesī”ti vatvā tena yācito atītam āhari.

Atīte bārānasiyam brahmadatte rajjam kārente bodhisatto kāsiniḅgame brāhmaṇakule nibbatti. Tassa

vayappattakāle mātā kālamakāsi. So mātu sarīrakiccaṃ katvā māsaddhamāsaccayena ghare vijjamānaṃ dhanam dānaṃ datvā pitarañca kaniṭṭhabhātarañca gahetvā himavantapadese devadattiyam vakkalaṃ gahetvā isipabbajjam pabbajitvā uñchācariyāya vanamūlaphalāphalehi yāpento ramaṇīye vanasaṇḍe vasi. Himavante pana vassakāle acchinnadhāre deve vassante na sakkā hoti kandamūlaṃ khaṇitum, phalāni ca paṇṇāni ca patanti. Tāpasā yebhuyyena himavantato nikkhamitvā manussapathe vasanti. Tadā bodhisatto pitarañca kaniṭṭhabhātarañca gahetvā manussapathe vasitvā puna himavante pupphitaphalite te ubhopi gahetvā himavante attano assamapadaṃ āgacchanto assamassāvidūre sūriye atthaṅgate “tumhe saṇikaṃ āgaccheyyātha, ahaṃ purato gantvā assamaṃ paṭijaggissāmi”’ti vatvā te ohāya gato. Khuddakatāpaso pitarā saddhiṃ saṇikaṃ gacchanto taṃ kaṭippadese sīsena uppīlento viya gaccha gacchāti taṃ balakkārena neti. Mahallako “tvaṃ maṃ attano ruciyā ānesi”’ti paṭinivattitvā koṭito paṭṭhāya āgacchati. Evaṃ tesam kalahaṃ karontānaññeva andhakāro ahoṣi.

Bodhisattopi paṇṇasālaṃ sammajjitvā udakaṃ upaṭṭhapetvā ukkamādāya paṭipathaṃ āgacchanto te disvā “ettakaṃ kālaṃ kiṃ karitthā”’ti āha. Khuddakatāpaso pitarā katakāraṇaṃ kathesi. Bodhisatto ubhopi te saṇikaṃ netvā parikkhāraṃ paṭisāmetvā pitaraṃ nhāpetvā pādadhovanapiṭṭhisambāhanādīni katvā aṅgārapallam upaṭṭhapetvā paṭippassaddhakilamathaṃ pitaraṃ upanisīditvā “tāta, taruṇadārakā nāma mattikābhājanasadisā muhuttaneva bhijjanti, sakiṃ bhinnakālato paṭṭhāya puna na sakkā honti ghaṭetum, te akkosantāpi paribhāsantāpi mahallakehi adhivāsetabbā”’ti vatvā pitaraṃ ovdanto imā gāthā abhāsi –

45. “Api kassapa mandiyā, yuvā sapati hanti vā;  
Sabbam taṃ khamate dhīro, paṇḍito taṃ titikkhati.
46. “Sacepi santo vivadanti, khippaṃ santīyare puna;  
Bālā pattāva bhijjanti, na te samathamajjhagū.
47. “Ete bhiyyo samāyanti, sandhi tesam na jīrati;  
Yo cādhipannaṃ jānāti, yo ca jānāti desanaṃ.
48. “Eso hi uttaritaro, bhāravaho dhuraddharo;  
Yo paresādhipannānaṃ, sayam sandhātumarahatī”’ti.

Tattha **kassapāti** pitaraṃ nāmenālapati. **Mandiyāti** mandībhāvena taruṇatāya. **Yuvā sapati hanti vāti** taruṇadārako akkosatīpi paharatīpi. **Dhīro**ti dhikkatapāpo, dhī vā vuccati paññā, tāya samannāgatotīpi attho. Itaraṃ pana imasseva vevacanaṃ. Ubhayenāpi sabbam taṃ bāladārakehi kataṃ aparādhaṃ mahallako dhīro paṇḍito sahati titikkhatīti dasseti.

**Sandhiyareti** puna mittabhāvena sandhīyanti ghaṭiyanti. **Bālā pattāvāti** bālakā pana mattikāpattāva bhijjanti. **Na te samathamajjhagūti** te bālakā appamattakampi vivādaṃ katvā verūpasamanaṃ na vindanti nādhigacchanti. **Ete bhiyyoti** ete dve janā bhinnāpi puna samāgacchanti. **Sandhīti** mittasandhi. **Tesanti** tesaññeva dvinnaṃ sandhi na jīrati. **Yo cādhipannanti** yo ca attanā adhipannaṃ atikkantaṃ aññasmim katadosaṃ jānāti. **Desananti** yo ca tena attano dosaṃ jānanta desitaṃ accayadesanaṃ paṭiggaṇhitum jānāti.

**Yo paresādhipannānanti** yo paresaṃ adhipannānaṃ dosena abhibhūtānaṃ aparādhakāraṇaṃ. **Sayam sandhātumarahatīti** tesu akhamāpentesupi “ehi, bhāramukha, uddesaṃ gaṇha, aṭṭhakathaṃ suṇa, bhāvanamanuyuñja, kasmā paribāhiro hoṣi”’ti evaṃ sayam sandhātum arahatī mittabhāvaṃ ghaṭeti, eso evarūpo mettāvihārī uttaritaro mittabhārassa mittadhurassa ca vahanato “**bhāravaho**”’ti “**dhuraddharo**”’ti ca saṅkhaṃ gacchatīti.

Evaṃ bodhisatto pitu ovādaṃ adāsi, sopi tato pabhuti danto ahoṣi sudanto.

Satthā imaṃ dhammadesanaṃ āharitvā jātaṃ samodhānesi – “tadā pitā tāpaso mahallako ahosi, khuddakatāpaso sāmaṇero, pitu ovādadāyako pana ahameva ahosi”nti.

Kassapamandiyajātakavaṇṇanā dutiyā.

[313] 3. Khantivādījātakavaṇṇanā

**Yo te hatthe ca pāde cāti** idaṃ satthā jetavane viharanto ekaṃ kodhanabhikkhuṃ ārabha kathesi. Vatthu heṭṭhā kathitameva. Satthā pana taṃ bhikkhuṃ “kasmā, tvaṃ bhikkhu, akkodhanassa buddhassa sāsane pabbajitvā kodhaṃ karosi, porāṇakapaṇḍitā sarīre pahārasahassee patante hatthapādakaṇṇanāsasu chijjamānāsu parassa kodhaṃ na karimāsu”ti vatvā atītaṃ āhari.

Atīte bārāṇasiyaṃ kalābu nāma rājā rajjaṃ kāresi. Tadā bodhisatto asītikotiṅgāhave brāhmaṇakule nibbattitvā kuṇḍalākumāro nāma māṇavo hutvā vayappatto takkasilāṃ gantvā sabbasippāni uggaṇhitvā kuṭumbaṃ saṅghapetvā mātāpitūnaṃ accayena dhanarāsiṃ oloketvā “imaṃ dhanāṃ uppādetvā mama ñātakā aggahetvā gatā, mayā panetaṃ gahetvā gantuṃ vaṭṭatī”ti sabbaṃ dhanāṃ viceyyadānavasena yo yaṃ āharati, tassa taṃ datvā himavantaṃ pavisitvā pabbajitvā phalāphalena yāpento ciraṃ vasitvā loṇambilasevanatthāya manussapathaṃ āgantvā anupubbena bārāṇasiṃ patvā rājuyyāne vasitvā punadivase nagare bhikkhāya caranto senāpatissa nivāsanaadvāraṃ sampāpuṇi. Senāpati tassa iriyāpathesu pasīditvā gharaṃ pavesetvā attano paṭiyāditabhōjanaṃ bhōjetvā paṭiññaṃ gahetvā tattheva rājuyyāne vasāpesi.

Athekadivasāṃ kalāburājā surāmadamatto chekanāṭakaparivuto mahantena yasena uyyānaṃ gantvā maṅgalasilāpaṭṭe sayanaṃ attharāpetvā ekissā piyamanāpāya itthiyā anke sayi. Gītavāditanaccesu chekā nāṭakitthiyo gītādīni payojesaṃ, sakkassa devaraṇṇo viya mahāsampatti ahosi, rājā niddaṃ okkami. Atha tā itthiyo “yassatthāya mayāṃ gītādīni payojayāma, so niddaṃ upagato, kiṃ no gītādīhi”ti vīṇādīni tūriyāni tattha tattheva chaḍḍetvā uyyānaṃ pakkantā pupphaphalāpallavādīhi palobhiyamānā uyyāne abhiraṃsu. Tadā bodhisatto tasmīṃ uyyāne supupphitasālamūle pabbajjāsukhena vītināmento mattavaravāraṇo viya nisinna hoti. Atha tā itthiyo uyyāne caramānā taṃ disvā “etha, ayyāyo, etasmīṃ rukkhālamūle pabbajito nisinna, yāva rājā na pabujjhati, tāvassa santike kiñci suṇamānā nisīdissāmā”ti gantvā vanditvā parivāretvā nisinnā “amhākaṃ kathetabbayuttakaṃ kiñci kathethā”ti vadimāsu. Bodhisatto tāsāṃ dhammaṃ kathesi. Atha sā itthī ankaṃ cāletvā rājānaṃ pabodhesi. Rājā pabuddho tā apassanto “kahaṃ gatā vasaliyo”ti āha. Etā, mahārāja, gantvā ekaṃ tāpasaṃ parivāretvā nisīdimāsu. Rājā kupīto khaggaṃ gahetvā “sikkhāpessāmi naṃ kūṭajaṭila”nti vegena agamāsi.

Atha tā itthiyo rājānaṃ kuddhaṃ āgacchantaṃ disvā tāsū vallabhatarā gantvā rañño hatthā asīṃ gahetvā rājānaṃ vūpasamesuṃ. So āgantvā bodhisattassa santike ṭhatvā “kiṃvādī tvaṃ, samaṇā”ti pucchi. “Khantivādī, mahārāja”ti. “Kā esā khanti nāmā”ti? “Akkosantesu paribhāsantesu paharantesu akujjhanabhāvo”ti. Rājā “passissāmi dāni te khantiyā atthibhāva”nti coraghātaṃ pakkosāpesi. So attano cārittina pharasuṇca kaṅṭhakakasaṇca ādāya kāsāyanivasano rattamālādharo āgantvā rājānaṃ vanditvā “kiṃ karomi, devā”ti āha. Imaṃ coraṃ duṭṭhatāpasaṃ gahetvā ākaḍḍhitvā bhūmiyaṃ pātetvā kaṅṭhakakasaṃ gahetvā purato ca pacchato ca ubhosu passesu cāti catūsupi passesu dvepahārasahassamassa dehīti. So tathā akāsi. Bodhisattassa chavi bhijji. Cammaṃ bhijji, maṃsaṃ chijji, lohitaṃ paggharati.

Puna rājā “kiṃvādī tvaṃ bhikkhū”ti āha. “Khantivādī, mahārāja”. “Tvaṃ pana mayhaṃ cammantare khanti”ti maññasi, natthi mayhaṃ cammantare khanti, tayā pana daṭṭhuṃ asakkuṇeyye hadayabbhantare mama khanti paṭiṭṭhitā. “Mahārāja”ti. Puna coraghātaṃ “kiṃ karomī”ti pucchi. “Imassa kūṭajaṭilassa ubho hatthe chindā”ti. So pharasuṃ gahetvā gaṇḍiyaṃ ṭhapetvā hatthe chindī. Atha naṃ “pāde chindā”ti āha, pādepi chindī. Hatthapādakoṭṭhi ghaṭachiddehi lākhāraso viya lohitaṃ paggharati. Puna rājā “kiṃvādīsī”ti pucchi. “Khantivādī, mahārāja”. “Tvaṃ pana mayhaṃ hatthapādakoṭṭsu ‘khanti atthī’ti maññasi, natthesā ettha, mayhaṃ khanti gambhīraṭṭhāne paṭiṭṭhitā”ti.

So “kaṇṇanāsamassa chindā”ti āha. Itaro kaṇṇanāsaṃ chindi, sakalasarīre lohitaṃ ahoṣi. Puna naṃ “kiṃvādī nāma tva”nti pucchi. “Mahārāja, khantivādī nāma”. “Mā kho pana tvaṃ ‘kaṇṇanāsikakoṭṭisu patiṭṭhitā khantī’ti maññasi, mama khanti gambhīre hadayabbhantare patiṭṭhitā”ti. Rājā “kūṭajaṭila tava khantiṃ tvameva ukkhipitvā nisīdā”ti bodhisattassa hadayaṃ pādena paharivā pakkāmi.

Tasmim gate senāpati bodhisattassa sarīrato lohitaṃ puñchitvā hatthapādakaṇṇanāsakoṭṭiyo sātākakaṇṇe katvā bodhisattaṃ saṅikaṃ nisīdāpetvā vanditvā ekamantaṃ nisīditvā “sace, bhante, tumhe kujjhītukāmā, tumhesu katāparādhassa rañño va kujjheyyātha, mā aññesa”nti yācanto paṭṭhamam gāthamāha –

49. “Yo te hatthe ca pāde ca, kaṇṇanāsaṅca chedayi;  
Tassa kujjha mahāvīra, mā raṭṭhaṃ vinasā ida”nti.

Tattha **mahāvīrā**ti mahāvīriya. **Mā raṭṭhaṃ vinasā idanti** idam niraparādham kāsiraṭṭhaṃ mā vināsehi.

Taṃ sutvā bodhisatto dutiyaṃ gāthamāha –

50. “Yo me hatthe ca pāde ca, kaṇṇanāsaṅca chedayi;  
Ciraṃ jīvatu so rājā, na hi kujjhanti mādisā”ti.

Tattha **mādisā**ti mama sadisā khantibalena samannāgatā paṇḍitā “ayaṃ maṃ akkosi paribhāsi pahari, chindi bhindī”ti taṃ na kujjhanti.

Raṅṅo uyyānā nikkhamantassa bodhisattassa cakkhupathaṃ vijahanakāleyeva ayaṃ catunahutādhiḱā dviyojanasatasahassabahalā mahāpathavī khalibaddhasāṭako viya phalitā, avīcīto jālā nikkhamitvā rājānaṃ kuladattiyena rattakambalena pārupantī viya gaṇhi. So uyyānadvāreyeva pathaviṃ pavisitvā avīcimahāniraye patiṭṭhahi. Bodhisattopi taṃ divasameva kālamakāsi. Rājaparisā ca nāgarā ca gandhamālādūmahatthā āgantvā bodhisattassa sarīrakiccaṃ akaṃsu. Keci panāhu “bodhisatto puna himavantameva gato”ti, taṃ abhūtaṃ.

51. “Ahū atītamaddhānaṃ, samaṇo khantidīpano;  
Taṃ khantiyāyeva ṭhitaṃ, kāsīrājā achedayi.
52. “Tassa kammapharusassa, vipāko kaṭuko ahu;  
Yaṃ kāsīrājā vedesi, nirayamhi samappito”ti. –

Imā dve abhisambuddhagāthā.

Tattha **atītamaddhānanti** atīte addhāne. **Khantidīpanoti** adhivāsanakhantisamvaṇṇano. **Achedayīti** mārāpesi. Ekacce pana “bodhisattassa puna hatthapādakaṇṇanāsā ghaṭṭitā”ti vadanti, tampi abhūtameva. **Samappitoti** patiṭṭhito.

Satthā imaṃ dhammadesanaṃ āharitvā saccāni pakāsetvā jātaṃ samodhānesi, saccapariyosāne kodhano bhikkhu anāgāmiṃphale patiṭṭhahi, aññe bahū sotāpattiphalādāni pāpuṇṇisu.

Tadā kalāburājā devadatto ahoṣi, senāpati sārīputto, khantivādī tāpaso pana ahameva ahoṣinti.

Khantivādījātakavaṇṇanā tatiyā.

[314] 4. Lohakumbhijātakavaṇṇanā

**Dujjivitamajjivimhāti** idaṃ satthā jetavane viharanto kosalarājānaṃ ārabha kathesi. Tadā kira kosalarājā rattibhāge catunnaṃ nerayikasattānaṃ saddaṃ suṇi. Eko **du**-kārameva bhaṇi, eko **sa**-kāraṃ, eko **na**-kāraṃ, eko **so**-kāramevāti. Te kira atītabhave sāvattthiyāmyeva pāradārikā rājaputtā ahesuṃ. Te paresaṃ rakkhitagopitamātugāmesu aparajjhivā cittakeḷiṃ kīlāntā bahuṃ pāpakammaṃ katvā maraṇacakkena chinnā sāvattthisāmaṃte catūsu lohakumbhīsu nibbattā satthi vassasahassāni tattha paccitvā uggatā lohakumbhimukhavatthiṃ disvā “kadā nu kho imamahā dukkhā muccissāmā”ti cattāropi mahantena saddena anupaṭipāṭiyā viraviṃsu. Rājā tesam saddaṃ sutvā maraṇabhayatajjito nisinnakova aruṇaṃ uṭṭhāpesi.

Aruṇuggamanavelāya brāhmaṇā āgantvā rājānaṃ sukhasayitaṃ pucchimṃsu. Rājā “kuto me ācariyā sukhasayitaṃ, ajjāhaṃ evarūpe cattāro bhīmsanakasaddaṃ suṇi”nti. Brāhmaṇā hatthe vidhunimṃsu. “Kiṃ ācariyā”ti? “Sāhasikasaddā, mahārājā”ti. “Sapaṭikammaṃ appaṭikammaṃ”ti? “Kāmaṃ appaṭikammaṃ, mayaṃ pana susikkhitā, mahārājā”ti. “Kiṃ katvā paṭibāhissathā”ti? “Mahārāja, paṭikammaṃ mahantaṃ na sakkā kātuṃ, mayaṃ pana sabbacatukkaṃ yaññaṃ yajitvā hāressāmā”ti. “Tena hi khippaṃ cattāro hatthi cattāro asse cattāro usabhe cattāro manusseti laṭukikasakuṇikā ādiṃ katvā cattāro cattāro pāṇe gahetvā sabbacatukkayaññaṃ yajitvā mama sotthibhāvaṃ karoṭhā”ti. “Sādhu, mahārājā”ti sampaṭicchitvā yenattho, taṃ gahetvā yaññāvāṭaṃ paccupaṭṭhapesuṃ, bahupāṇe thūṇūpanīte katvā ṭhapesuṃ. “Bahuṃ macchamaṃsaṃ khādissāma, bahuṃ dhaṇaṃ labhissāmā”ti ussāhappattā hutvā “idaṃ laddhuṃ vaṭṭati, idaṃ laddhuṃ vaṭṭati, devā”ti aparāparaṃ caranti.

Mallikā devī rājānaṃ upasaṅkamitvā “kiṃ nu kho, mahārāja, brāhmaṇā ativiya ussāhayantā vicaranti”ti pucchi. “Devi kiṃ tuyhiminā, tvamaṃ attano yaseneva mattā pamattā, dukkhaṃ pana amhākameva na jānāsī”ti? “Kiṃ, mahārājā”ti. “Devi, ahaṃ evarūpaṃ nāma asotabbaṃ suṇim, tato imesaṃ saddānaṃ sutattā “kiṃ bhavissati”ti brāhmaṇe pucchim, brāhmaṇā “tumhākaṃ mahārāja rajjassa vā bhogaṇaṃ vā jīvitassa vā antarāyo paññāyati, sabbacatukkena yaññaṃ yajitvā sotthibhāvaṃ karissāmā”ti vadimṃsu, te mayhaṃ vacanaṃ gahetvā yaññāvāṭaṃ katvā yena yenattho, tassa tassa kāraṇā āgacchanti”ti. “Kiṃ pana deva, imesaṃ saddānaṃ nipphattiṃ sadevake loke aggabrāhmaṇaṃ pucchithā”ti? “Ko esa devī, sadevake loke aggabrāhmaṇo nāmā”ti? “Mahāgotamo sammāsambuddho”ti. “Devi, sammāsambuddho me na pucchito”ti? “Tena hi gantvā pucchathā”ti.

Rājā tassā vacanaṃ gahetvā bhuttapātarāso rathavaramāruya jetavanaṃ gantvā satthāraṃ vanditvā pucchi “ahaṃ, bhante, rattibhāge cattāro sadde sutvā brāhmaṇe pucchim, te ‘sabbacatukkayaññaṃ yajitvā sotthim karissāmā’ti vatvā yaññāvāṭe kammaṃ karonti, tesam saddānaṃ sutattā mayhaṃ kiṃ bhavissati”ti. “Na kiñci, mahārāja, nerayikasattā dukkhamanubhavanta evaṃ viraviṃsu, na ime saddā idāni tayā eva sutā, porāṇakarājūhipi sutāyeva, tepi brāhmaṇe pucchitvā pasughātayaññaṃ kattukāmā hutvā paṇḍitānaṃ kathaṃ sutvā na kariṃsu, paṇḍitā tesam saddānaṃ antaraṃ kathetvā mahājanaṃ vissajjāpetvā sotthimakamsū”ti vatvā tena yācito atītaṃ āhari.

Atīte bārāṇasiyaṃ brahmadatte rajjaṃ kārente bodhisatto aññatarasmim kāsigāme brāhmaṇakule nibbattitvā vayappatto kāmesu ādīnavaṃ disvā kāme pahāya isipabbajjaṃ pabbajitvā abhiññā ca samāpattiyo ca uppādetvā jhānakīlaṃ kīlānto himavante ramaṇīye vanasaṇḍe vasati. Tadā bārāṇasirājā catunnaṃ nerayikānaṃ imeva cattāro sadde sutvā bhīttasito imināva niyāmena brāhmaṇehi “tiṇṇaṃ antarāyānaṃ aññataro bhavissati, sabbacatukkayaññaṃ taṃ vūpasamessāmā”ti vutte sampaṭicchī. Purohito brāhmaṇehi saddhim yaññāvāṭaṃ paccupaṭṭhāpesi, mahājano thūṇūpanīto ahoṣi. Tadā bodhisatto mettābhāvanaṃ purecārikaṃ katvā dibbacakkhunā lokaṃ olokento imaṃ kāraṇaṃ disvā “ajja, mayā gantuṃ vaṭṭati, mahājanassa sotthi bhavissati”ti iddhibalena vehāsaṃ uppatitvā bārāṇasirañño uyyāne otarivā maṅgalasilāpaṭṭe kañcanarūpakaṃ viya nisīdi. Tadā purohitassa jeṭṭhantevāsiko ācariyaṃ upasaṅkamitvā “nanu, ācariya, amhākaṃ vedesu paraṃ māretvā sotthikaraṇaṃ nāma natthi”ti āha. Purohito “tvamaṃ rājadhanaṃ rakkhasi, bahuṃ macchamaṃsaṃ khādissāma, dhaṇaṃ labhissāma, tuṇhī hohī”ti taṃ paṭibāhi.

So “nāhaṃ ettha sahāyo bhavissāmī”ti nikkhamitvā rājuyyānaṃ gantvā bodhisattaṃ disvā vanditvā katapaṭisanthāro ekamantaṃ nisīdi. Bodhisatto “kiṃ, māṇava, rājā dhammena rajjaṃ kāreti”ti pucchi. “Bhante, rājā dhammena rajjaṃ kāreti, rattibhāge pana cattāro sadde sutvā brāhmaṇe pucchi. Brāhmaṇā ‘sabbacattakayaññaṃ yajitvā sotthiṃ karissāmā’”ti vadiṃsu. Rājā pasughātakammaṃ katvā attano sotthiṃ kātukāmo mahājano thūṇūpanīto, “kiṃ nu kho, bhante, tumhādisānaṃ sīlavantānaṃ tesam saddānaṃ nipphattiṃ vatvā mahājanaṃ maraṇamukhā mocetuṃ vaṭṭati”ti. “Māṇava, rājā amhe na jānāti, mayampi taṃ na jānāma, imesaṃ pana saddānaṃ nipphattiṃ jānāma, sace rājā amhe upasaṅkamtivā puccheyya, rājānaṃ nikkāṅkhaṃ katvā kathessāmā”ti. “Tena hi, bhante, muhuttaṃ idheva hotha, ahaṃ rājānaṃ ānessāmī”ti. “Sādhu, māṇavā”ti. So gantvā rañño tamatthaṃ ārocetvā rājānaṃ ānesi.

Atha rājā bodhisattaṃ vanditvā ekamantaṃ nisinno pucchi “saccaṃ kira tumhe mayā sutasaddānaṃ nipphattiṃ jānāthā”ti? “Āma, mahārājā”ti. “Kathetha, bhante”ti. “Mahārāja, ete purimabhava paresaṃ rakkhitagopitesu dāresu cārittaṃ āpajjitvā bārāṇasisāmaṃte catūsu lohakumbhīsu nibbattā pakkuthite khāralohodake pheṇuddehakaṃ paccamānā tiṃsa vassasahassāni adho gantvā kumbhitalaṃ āhacca uddhaṃ ārohantā tiṃsavassasahasseneva kālena kumbhimukhaṃ disvā bahi oloketvā cattāro janā catasso gāthā paripuṇṇaṃ katvā vattukāmāpi tathā kātuṃ asakkontā ekekameva akkharāṃ vatvā puna lohakumbhīsuyeva nimuggā. Tesu **du**-kāraṃ vatvā nimuggasatto evaṃ vattukāmo ahosi –

53. ‘Dujjīvitamajīvimha, ye sante na dadamhase;  
Vijjamānesu bhogesu, dīpaṃ nākamha attano’ti. –

Taṃ gāthaṃ paripuṇṇaṃ kātuṃ nāsakkhī”ti vatvā bodhisatto attano ñāṇena taṃ gāthaṃ paripuṇṇaṃ katvā kathesi. Sesāsupi eseva nayo.

Tesu **sa**-kāraṃ vatvā vattukāmassa ayaṃ gāthā –

54. “Saṭṭhi vassasahassāni, paripuṇṇāni sabbaso;  
Niraye paccamānānaṃ, kadā anto bhavissatī”ti.

**Na**-kāraṃ vatvā vattukāmassa ayaṃ gāthā –

55. “Natthi anto kuto anto, na anto paṭidissati;  
Tadā hi pakataṃ pāpaṃ, mama tuyhañca mārisā”ti.

**So**-kāraṃ vatvā vattukāmassa ayaṃ gāthā –

56. “Sohaṃ nūna ito gantvā, yoniṃ laddhāna mānusiṃ;  
Vadaññū sīlasampanno, kāhāmi kusalaṃ bahu”nti.

Tattha **dujjīvitanti** tīṇi duccharitāni caranto dujjīvitaṃ lāmakajīvitaṃ jīvati nāma, sopi tadeva sandhāyāha “dujjīvitamajīvimhā”ti. **Ye sante na dadamhase**ti ye mayaṃ deyyadhamme ca paṭiggāhake ca saṃvijjamāneyeva na dānaṃ dadimha. **Dīpaṃ nākamha attanoti** attano paṭiṭṭhaṃ na karimha. **Paripuṇṇānī**ti anūnāni anadhikāni. **Sabbasoti** sabbākārena. **Paccamānānanti** amhākaṃ imasmiṃ niraye paccamānānaṃ.

**Natthi antoti** “amhākaṃ asukakāle nāma makkho bhavissatī”ti evaṃ kālaparicchedo natthi. **Kuto antoti** kena kāraṇena anto paññāyissati. **Na antoti** antaṃ daṭṭhukāmānampi no dukkhassa anto na paṭidissati. **Tadā hi pakatanti** tasmim kāle mārisā mama ca tuyhañca pakataṃ pāpaṃ pakatṭhaṃ kataṃ atibahumeva kataṃ. “Tathā hi pakata”ntipi pāṭho, tena kāraṇena kataṃ, yenassa anto daṭṭhuṃ na

sakkāti attho. **Mārisāti** mayā sadisā, piyālapanametaṃ etesaṃ. **Nūnāti** ekaṃsatthe nipāto, so ahaṃ ito gantvā yoniṃ mānuṣiṃ laddhāna vadaññū sīlasampanno hutvā ekaṃseneva bahuṃ kusalaṃ karissāmīti ayamettha attho.

Iti bodhisatto ekamekaṃ gāthaṃ vatvā “mahārāja, so nerayikasatto imaṃ gāthaṃ paripuṇṇaṃ katvā vattukāmo attano pāpassa mahantatāya tathā kathetuṃ nāsakkhi, iti so attano kammavipākaṃ anubhavanto viravi. Tumhākaṃ etassa saddassa savanapaccayā antarāyo nāma natthi, tumhe mā bhāyitthā”ti rājānaṃ saññāpesi. Rājā mahājanaṃ vissajjāpetvā suvaṇṇabheriṃ carāpetvā yaññāvāṭaṃ viddhaṃsāpesi. Bodhisatto mahājanassa sotthiṃ katvā katipāhaṃ vasitvā tattheva gantvā aparihīnajjhāno brahmaloke uppajji.

Satthā imaṃ dhammadesanaṃ āharitvā saccāni pakāsetvā jātaṃ samodhānesi – “tadā purohitassa jeṭṭhantevāsikamaṇavo sārīputto ahosi, tāpasso pana ahameva ahosi”nti.

Lohakumbhijātakavaṇṇanā catutthā.

[315] 5. Sabbamaṃsalābhajātakavaṇṇanā

**Pharusā vata te vācāti** idaṃ satthā jetavane viharanto sārīputtattherena pītavirecanānaṃ dinnarasapiṇḍapātaṃ ārabha katesi. Tadā kira jetavane ekacce bhikkhū snehavirecanaṃ pivīṃsu. Tesā rasapiṇḍapātena attho hoti, gilānupaṭṭhākā “rasabhataṃ āharissāmā”ti sāvattiṃ pavisitvā odanikagharavīthiyaṃ piṇḍāya caritvāpi rasabhataṃ alabhitvā nivattiṃsu. Thero divātaṃ piṇḍāya pavisaṃsāna te bhikkhū disvā “kiṃ, āvuso, atipageva nivattathā”ti pucchi. Te tamatthaṃ ārocesuṃ. Thero “tena hi ethā”ti te gahetvā tameva vīthiṃ agamāsi, manussā pūretvā rasabhataṃ adaṃsu. Gilānupaṭṭhākā rasabhataṃ āharitvā gilānānaṃ adaṃsu, te paribhuñjiṃsu. Athekadivasāṃ dhammasabhāyaṃ bhikkhū kathaṃ samuṭṭhāpesuṃ “āvuso, thero kira pītavirecanānaṃ upaṭṭhāke rasabhataṃ alabhitvā nikkhamante gahetvā odanikagharavīthiyaṃ caritvā bahuṃ rasapiṇḍapātaṃ pesesī”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāni sārīputtova maṃsaṃ labhi, pubbepi muduvācā piyavacanā vattuṃ chekā paṇḍitā labhiṃsū”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto seṭṭhiputto ahosi. Athekadivasāṃ eko migaluddako bahuṃ maṃsaṃ labhitvā yānakaṃ pūretvā “vikkiṇissāmī”ti nagaraṃ āgacchati. Tadā bārānasivāsikā cattāro seṭṭhiputtā nagarā nikkhamitvā ekasmiṃ maggasabhāgaṭṭhāne kiñci diṭṭhaṃ suttaṃ sallapantā nisīdiṃsu. Etesu eko seṭṭhiputto taṃ maṃsayānakaṃ disvā “etaṃ luddakaṃ maṃsakhaṇḍaṃ āharāpemi”ti āha. “Gaccha āharāpehi”ti. So taṃ upasaṅkamitvā “are, luddaka, dehi me maṃsakhaṇḍa”nti āha. Luddako “mārisa, paraṃ kiñci yācanta nāma piyavacanena bhavitabbaṃ, tayā kathitavācāya anucchavikaṃ maṃsakhaṇḍaṃ labhissasī”ti vatvā paṭhamaṃ gāthamāha –

57. “Pharusā vata te vācā, maṃsaṃ yācanako asi;  
Kilomasadisī vācā, kilomaṃ samma dammi te”ti.

Tattha **kilomasadisīti** pharusatāya kilomasadisī. **Kilomaṃ samma dammi teti** handa gaṇha, idaṃ te vācāya sadisaṃ kilomaṃ dammīti niraṃsaṃ nimaṃsalohitaṃ kilomakakhaṇḍaṃ ukkhipitvā adāsī.

Atha naṃ aparo seṭṭhiputto “kinti vatvā yācasī”ti pucchi. “Are”ti vatvāti. So “ahampi naṃ yācissāmī”ti vatvā gantvā “jeṭṭhabhātika, maṃsakhaṇḍaṃ me dehī”ti āha. Itaro “tava vacanassa anucchavikaṃ maṃsakhaṇḍaṃ labhissasī”ti vatvā dutiyaṃ gāthamāha –

58. “Aṅgamaṃ manussānaṃ, bhātā loke pavuccati;  
Aṅgassa sadisī vācā, aṅgaṃ samma dadāmi te”ti.

Tassattho – imasmiṃ loke manussānaṃ aṅgasadisattā aṅgametaṃ yadidaṃ bhātā bhaginīti, tasmā tavesā aṅgasadisī vācāti etissā anucchavikaṃ aṅgameva dadāmi teti. Evañca pana vatvā aṅgamaṃsaṃ ukkhipitvā adāsi.

Tampi aparo seṭṭhiputto “kinti vatvā yācasī”ti pucchi. “Bhātikā”ti vatvāti. So “ahampi naṃ yācissāmi”ti vatvā gantvā “tāta, maṃsakhaṇḍaṃ me dehi”ti āha. Luddako tava vacanānūrūpaṃ lacchasi”ti vatvā tatiyaṃ gāthamāha –

59. “Tātāti putto vadamāno, kampeti hadayaṃ pitu;  
Hadayassa sadisī vācā, hadayaṃ samma dammi te”ti.

Evañca pana vatvā hadayamaṃsena saddhiṃ madhuramaṃsaṃ ukkhipitvā adāsi.

Taṃ catuttho seṭṭhiputto “kinti vatvā yācasī”ti pucchi. So “tātā”ti vatvāti. So “ahampi yācissāmi”ti vatvā gantvā “sahāya maṃsakhaṇḍaṃ me dehi”ti āha. Luddako “tava vacanānūrūpaṃ lacchasi”ti vatvā catutthaṃ gāthamāha –

60. “Yassa gāme sakhā natthi, yathāraññaṃ tatheva taṃ;  
Sabbassa sadisī vācā, sabbaṃ samma dadāmi te”ti.

Tassattho – yassa purisassa gāme sukhadukkhesu saha ayanato sahāyasankhāto **sakhā** natthi, tassa taṃ ṭhānaṃ yathā amanussaṃ **araññaṃ** tatheva hoti, iti ayaṃ tava vācā **sabbassa sadisī**, sabbena attano santakena vibhavana sadisī, tasmā sabbameva imaṃ mama santakaṃ maṃsayānakaṃ dadāmi teti.

Evañca pana vatvā “ehi, samma, sabbameva idaṃ maṃsayānakaṃ tava gehaṃ āharissāmi”ti āha. Seṭṭhiputto tena yānakaṃ pājāpento attano gharaṃ gantvā maṃsaṃ otārāpetvā luddakassa sakkārasammānaṃ katvā puttadāraṃpissa pakkosāpetvā luddakammato apanetvā attano kuṭumbamajjhe vasāpento tena saddhiṃ abhejjasahāyo hutvā yāvajīvaṃ samaggavāsaṃ vasi.

Satthā imaṃ dhammadesanaṃ āharitvā jātaṃ samodhānesi – “tadā luddako sārīputto ahosi, sabbamaṃsalābhī seṭṭhiputto pana ahameva ahosi”nti.

Sabbamaṃsalābhajātakavaṇṇanā pañcamā.

[316] 6. Sasapaṇḍitajātakavaṇṇanā

**Satta me rohitā macchā**ti idaṃ satthā jetavane viharanto sabbaparikkhāradānaṃ ārabha kathesi. Sāvattiyaṃ kira eko kuṭumbiko buddhappamukhassa bhikkhusaṅghassa sabbaparikkhāradānaṃ sajjetvā gharadvāre maṇḍapaṃ kāretvā buddhappamukhaṃ bhikkhusaṅghaṃ nimantetvā susajjitamaṇḍape paññattavarāsane nisīdāpetvā nānaggarasaṃ paññitadānaṃ datvā puna svātanāyāti sattāhaṃ nimantetvā sattame divase buddhappamukhānaṃ pañcannaṃ bhikkhusatānaṃ sabbaparikkhāre adāsi. Satthā bhattakiccāvasāne anumodanaṃ karonto “upāsaka, tayā pītisomanassaṃ kātuṃ vaṭṭati, idaṃhi dānaṃ nāma porāṇakapaṇḍitānaṃ vaṃso, porāṇakapaṇḍitā hi sampattayācakānaṃ jīvitāṃ pariccajitvā attano maṃsampi adamaṃsū”ti vatvā tena yācito atītaṃ āhari.

Atīte bārānasiyaṃ brahmadatte rajjaṃ kārente bodhisatto sasayoniyaṃ nibbattitvā araññe vasi. Tassa pana araññassa ekato pabbatapādo ekato nadī ekato paccantagāmaṃ ahosi. Aparepissa tayo sahāyā ahesuṃ makkaṭo ca siṅgālo ca uddo cāti. Te cattāropi paṇḍitā ekatova vasantā attano attano gocarāṭṭhāne gocaraṃ gahetvā sāyanhasamaye ekato sannipatanti. Sasapaṇḍito “dānaṃ dātappaṃ, sīlaṃ rakkhitappaṃ, uposathakammaṃ kātappaṃ”nti tiṇṇaṃ janānaṃ ovādavasena dhammaṃ deseti. Te tassa ovādaṃ sampatiṇṇitvā attano attano nivāsagumbaṃ pavisitvā vasanti. Evaṃ kāle gacchante ekadivasaṃ bodhisatto ākāsaṃ oloketvā candānaṃ dīsvā “sve uposathadivaso”ti ñatvā itare tayo āha “sve



uposatho, tumhepi tayo janā sīlaṃ samādiyivā uposathikā hotha, sīle patitthāya dinnadānaṃ mahapphalaṃ hoti, tasmā yācake sampatte tumhehi khāditabbhārato dānaṃ datvā khādeyyāthā”ti. Te “sādhū”ti sampaṭicchitvā attano attano vasanaṭṭhānesu vasiṃsu.

Punadivase tesu uddo pātova “gocaraṃ pariyesissāmī”ti nikkhamitvā gaṅgātīraṃ gato. Atheko bālisiko satta rohitamacche uddharitvā vallyiā āvuṇitvā netvā gaṅgātīre vālukamaṃ viyūhitvā vālikāya paṭicchādetvā puna macche gaṇhanto adhogaṅgaṃ gacchi. Uddo macchagandhaṃ ghāyitvā vālukamaṃ viyūhitvā macche disvā nīharitvā “atthi nu kho etesaṃ sāmiko”ti tikkhattuṃ ghosetvā sāmikaṃ apassanto vallikoṭiṃ ḍaṃsitvā netvā attano vasanaṅgumbe ṭhapetvā “velāyameva khādissāmī”ti attano sīlaṃ āvajjento nipajji. Siṅgālopi vasanaṭṭhānato nikkhamitvā gocaraṃ pariyesanto ekassa khettagopakassa kuṭiyaṃ dve maṃsasūlāni ekaṃ godhaṃ ekañca dadhivāraṅgaṃ disvā “atthi nu kho etesaṃ sāmiko”ti tikkhattuṃ ghosetvā sāmikaṃ adisvā dadhivāraṅgassa ugghaṇarajjukaṃ gīvāya pavesetvā dve maṃsasūle ca godhañca mukhena ḍaṃsitvā netvā attano vasanaṅgumbe ṭhapetvā “velāyameva khādissāmī”ti attano sīlaṃ āvajjento nipajji. Makkaṭopi vasanaṭṭhānato nikkhamitvā vanasaṅgaṃ pavisitvā ambapiṇḍaṃ āharitvā attano vasanaṅgumbe ṭhapetvā “velāyameva khādissāmī”ti attano sīlaṃ āvajjento nipajji.

Bodhisatto pana “velāyameva vasanaṭṭhānato nikkhamitvā dabbatiṇāni khādissāmī”ti attano vasanaṅgumbeyeva nipanno cintesi “mama santikaṃ āgatānaṃ yācakānaṃ tiṇāni dātuṃ na sakkā, tīlataṇḍulādayopi mayhaṃ natthi, sace me santikaṃ yācako āgacchissati, attano sarīramaṃsaṃ dassāmī”ti. Tassa sīlatejena sakkassa paṇḍukambalasilāsaṃ uṇhākāraṃ dassesi. So āvajjamāno idaṃ kāraṇaṃ disvā “sasarājānaṃ vīmaṃsissāmī”ti paṭhamaṃ uddassa vasanaṭṭhānaṃ gantvā brāhmaṇavesena aṭṭhāsī. “Brāhmaṇa, kimatthaṃ ṭhitosī”ti vutte paṇḍita sace kiñci āhāraṃ labheyyaṃ, uposathiko hutvā vaseyyanti. So “sādhu dassāmi te āhāra”nti tena saddhiṃ sallapanto paṭhamaṃ gāthamāha –

61. “Satta me rohitā macchā, udakā thalamubbhatā;  
Idaṃ brāhmaṇa me atthi, etaṃ bhutvā vane vasā”ti.

Tattha **thalamubbhatā**ti udakato thale ṭhapitā, kevaṭṭena vā uddhaṭā. **Etaṃ bhutvā**ti etaṃ mama santakaṃ macchāhāraṃ pacitvā bhuñjitvā samaṇadhammaṃ karonto ramaṇīye rukkhamūle nisinno imasmiṃ vane vasāti.

Brāhmaṇo “pageva tāva hotu, pacchā jānissāmī”ti siṅgālassa santikaṃ gato. Tenāpi “kimatthaṃ ṭhitosī”ti vutto tathevāha. Siṅgālo “sādhu dassāmī”ti tena saddhiṃ sallapanto dutiyaṃ gāthamāha –

62. “Dussa me khettapālassa, rattibhattaṃ apābhattaṃ;  
Maṃsasūlā ca dve godhā, ekañca dadhivāraṅgaṃ;  
Idaṃ brāhmaṇa me atthi, etaṃ bhutvā vane vasā”ti.

Tattha **dussa meti** yo esa mama avidūre khettapālo vasati, dussa amussāti attho. **Apābhattanti** ābhattaṃ ānītaṃ. **Maṃsasūlā ca dve godhā**ti aṅgārapakkāni dve maṃsasūlāni ca ekā ca godhā. **Dadhivāraṅganti** dadhivāraṅgo. **Idanti** idaṃ ettakaṃ mama atthi, etaṃ sabbampi yathābhirucitena pākena pacitvā paribhuñjitvā uposathiko hutvā ramaṇīye rukkhamūle nisīditvā samaṇadhammaṃ karonto imasmiṃ vanasaṅge vasāti attho.

Brāhmaṇo “pageva tāva hotu, pacchā jānissāmī”ti makkaṭassa santikaṃ gato. Tenāpi “kimatthaṃ ṭhitosī”ti vutto tathevāha. Makkaṭo “sādhu dassāmī”ti tena saddhiṃ sallapanto tatiyaṃ gāthamāha –

63. “Ambapakkamaṃ dakaṃ sītaṃ, sītaccchāyā manoramā;  
Idaṃ brāhmaṇa me atthi, etaṃ bhutvā vane vasā”ti.

Tattha **ambapakkanti** madhuraambaphalaṃ. **Dakaṃ sītanti** gaṅgāya udakaṃ sītalaṃ. **Etaṃ bhutvā vane vasāti** brāhmaṇa etaṃ ambapakkam paribhuñjitvā sītalaṃ udakaṃ pivitvā yathābhīrucite ramaṇīye rukkhamaṇe nisinno samaṇadhammaṃ karonto imasmiṃ vanasaṇḍe vasāti.

Brāhmaṇo “pageva tāva hotu, pacchā jānissāmī”ti sasapaṇḍitassa santikaṃ gato. Tenāpi “kimatthaṃ ṭhitosī”ti vutto tathevāha. Taṃ sutvā bodhisatto somanassappatto “brāhmaṇa, suṭṭhu te kataṃ āhāratthāya mama santikaṃ āgacchantena, ajjāhaṃ adinnapubbaṃ dānaṃ dassāmi. Tvaṃ pana sīlavā pāṇātipātaṃ na karissasi, gaccha, brāhmaṇa, nānādārūni saṅkaḍḍhitvā aṅgāre katvā mayhaṃ ārocehi, ahaṃ attānaṃ pariccajitvā aṅgāramajjhe patissāmi. Mama sarīre pakke tvaṃ maṃsaṃ khāditvā samaṇadhammaṃ kareyyāsī”ti tena saddhiṃ sallapanto catutthaṃ gāthamāha –

64. “Na sasassa tilā atthi, na muggā napi taṇḍulā;  
Iminā agginā pakkaṃ, mamaṃ bhutvā vane vasā”ti.

Tattha **mamaṃ bhutvāti** yaṃ taṃ ahaṃ aggiṃ karohīti vadāmi, iminā agginā pakkaṃ maṃ bhuñjitvā imasmiṃ vane vasa, ekassa sasassa sarīraṃ nāma ekassa purisassa yāpanamattaṃ hotīti.

Sakko tassa vacanaṃ sutvā attano ānubhāvena ekaṃ aṅgārāsiṃ māpetvā bodhisattassa ārocesi. So dabbatiṇasayanato uṭṭhāya tattha gantvā “sace me lomantaresu pāṇakā atthi, te mā marimṣū”ti tikkhattuṃ sarīraṃ vidhunitvā sakalasarīraṃ dānamukhe ṭhapetvā laṅghitvā padumasare rājahaṃso viya pamuditacitto aṅgārāsiṃhi pati. So pana aggi bodhisattassa sarīre lomakūpamattampi uṇhaṃ kātuṃ nāsakkhi, himagabbhaṃ pavitṭho viya ahosi. Atha sakkam āmantetvā “brāhmaṇa, tayā kato aggi atisītaḥ, mama sarīre lomakūpamattampi uṇhaṃ kātuṃ na sakkoti, kiṃ nāmeta”nti āha. “Sasapaṇḍita, nāhaṃ brāhmaṇo, sakkohamasmi, tava vīmaṃsanatthāya āgatomhī”ti. “Sakka, tvaṃ tāva tiṭṭha, sakalopi ce lokasannivāso maṃ dānena vīmaṃseyya, neva me adātukāmatam passeyyā”ti bodhisatto sīhanādaṃ nadi. Atha naṃ sakko “sasapaṇḍita, tava guṇo sakalakappaṃ pākaṇo hotū”ti pabbatam piḷetvā pabbatarasaṃ ādāya candamaṇḍale sasalakkaṇaṃ likhitvā bodhisattam ānetvā tasmim vanasaṇḍe tasmimyeva vanagumbe taruṇadabbatiṇapiṭṭhe nipajjāpetvā attano vasanaṭṭhānameva gato. Tepi cattāro paṇḍitā samaggā sammodamānā sīlam pūretvā dānaṃ datvā uposathakammaṃ katvā yathākammaṃ gatā.

Satthā imaṃ dhammadesanaṃ āharitvā saccāni pakāsetvā jātakam samodhānesi, saccapariyosāne sabbaparikkhāradānadāyako gahapati sotāpattiphale patiṭṭhahi.

Tadā uddo ānando ahosi, siṅgālo moggallāno, makkaṇo sārīputto, sakko anuruddho, sasapaṇḍito pana ahameva ahosinti.

Sasapaṇḍitajātakavaṇṇanā chaṭṭhā.

[317] 7. Matarodanajātakavaṇṇanā

**Matam matam eva rodathāti** idaṃ satthā jetavane viharanto aññataraṃ sāvattativāsiṃ kuṭumbikaṃ ārabha kathesi. Tassa kira bhātā kālamakāsi. So tassa kālakiriyāya sokābhībhūto na nhāyati na bhuñjati na vilimpati, pātova susānaṃ gantvā sokasamappito rodati. Satthā paccūsasamaye lokaṃ olokento tassa sotāpattiphalaṃ dātum ṭhapetvā maṃ añño koci samattho natthi, imassa mayā avassayena bhavitum vaṭṭatī”ti punadivase pacchābhataṃ piṇḍapātapaṭikkanto pacchāsamaṇaṃ ādāya tassa gharadvāraṃ gantvā “satthā āgato”ti sutvā āsanaṃ paññāpetvā “pavesethā”ti kuṭumbikena vutto pavisitvā paññatte āsane nisīdi. Kuṭumbikopi āgantvā satthāraṃ vanditvā ekamantaṃ nisīdi. Atha naṃ satthā “kiṃ kuṭumbika cintesi”ti āha. “Āma, bhante, mama bhātu matakālato paṭṭhāya cintemi”ti. “Āvuso, sabbe saṅkhārā aniccā, bhijjitabbayuttakaṃ bhijjati, na tattha cintetabbam, porāṇakapaṇḍitāpi bhātari matepi ‘bhijjitabbayuttakaṃ bhijjati’ti na cintayimṣū”ti vatvā tena yācito atītaṃ āhari.

Atīte bārānasiyaṃ brahmadatte rajjaṃ kārente bodhisatto asītikoṭivibhave seṭṭhikule nibbatti, tassa vayappattassa mātāpitaro kālamakaṃsu. Tesu kālakatesu bodhisattassa bhātā kuṭumbaṃ vicāreti, bodhisatto taṃ nissāya jīvati. So aparabhāge tathārūpena byādhinā kālamakāsi. Nātimittā suhajjā sannipatitvā bāhā paggayha kandanti rodanti, ekopi sakabhāvena saṅghātuṃ nāsakkhi, bodhisatto pana neva kandati na rodati. Manussā “passatha bho, imassa bhātari mate mukhasaṅkocanamattampi natthi, ativiya thaddhahadayo, ‘dvepi koṭṭhāse ahameva paribhuñjissāmī’ ti bhātu maraṇaṃ icchati maññe” ti bodhisattaṃ garahiṃsu. Nātakāpi naṃ “tvam bhātari mate na rodasī” ti garahiṃsuyeva. So tesam kathaṃ sutvā “tumhe attano andhabālabhāvena aṭṭha lokadhamme ajānantā ‘mama bhātā mato’ ti rodatha, ahampi marissāmi, tumhepi marissatha, attānampi ‘mayampi marissāmā’ ti kasmā na rodatha. Sabbe saṅkhārā aniccā hutvā nirujjhanti, teneva sabhāvena saṅghātuṃ samattho ekasaṅkhāropi natthi. Tumhe andhabālā aññānatāya aṭṭha lokadhamme ajānitvā rodatha, ahaṃ kimatthaṃ rodissāmī” ti vatvā imā gāthā abhāsi –

65. “Mataṃ mataṃ eva rodatha, na hi taṃ rodatha yo marissati;  
Sabbepi sarīradhārino, anupubbena jahanti jīvitaṃ.
66. “Devamanussā catuppadā, pakkhigaṇā uragā ca bhogino;  
Samhi sarīre anissarā, ramamānāva jahanti jīvitaṃ.
67. “Evaṃ calitaṃ asaṅghitaṃ, sukhadukkhaṃ manujesvapekkhiya;  
Kanditaruditaṃ niratthakaṃ, kiṃ vo sokagaṇābhikīrare.
68. “Dhuttā ca soṇḍā akatā, bālā sūrā ayogino;  
Dhīraṃ maññanti bāloti, ye dhammassa akovidā” ti.

Tattha **matam matam evati** mataṃ matameva. **Anupubbenāti** attano attano maraṇavāre sampatte paṭipāṭiyā jahanti jīvitaṃ, na ekatova sabbe maranti, yadi evaṃ mareyyuṃ, lokappavatti ucchijjeyya. **Bhoginoti** mahantena sarīrabhogena samannāgatā. **Ramamānāvāti** tattha tattha nibbattā sabbepi ete devādayo sattā attano attano nibbattaṭṭhāne abhiramamānāva anukkaṅghitāva jīvitaṃ jahanti. **Evaṃ calitanti** evaṃ tīsu bhavesu niccalabhāvassa ca saṅghitabhāvassa ca abhāvā calitaṃ asaṅghitaṃ. **Kiṃ vo sokagaṇābhikīrareti** kiṃkāraṇā tumhe sokarāsī abhikīranti ajjhottharanti.

**Dhuttā ca soṇḍā akatāti** itthidhuttā surādhuttā akkhadhuttā ca surāsoṇḍādayo soṇḍā ca akatabuddhino asikkhitakā ca. **Bālāti** bālyena samannāgatā aviddasuno. **Sūrā ayoginoti** ayonisomanasikārena sūrā, yogesu ayuttatāya ayogino. “Ayodhino” tipī pāṭho, kilesamārena saddhiṃ yujjhitaṃ asamatthāti attho. **Dhīraṃ maññanti bāloti, ye dhammassa akovidāti** ye evarūpā dhuttādayo aṭṭhavidhassa lokadhammassa akovidā, te appamattakepi dukkhadhamme uppanne attanā kandamānā rodamānā aṭṭha lokadhamme kathato jānitvā nātimaraṇādīsu akandantaṃ arodantaṃ mādisaṃ dhīraṃ paṇḍitaṃ “bālo ayaṃ na rodati” ti maññantīti.

Evaṃ bodhisatto tesam dhammaṃ desetvā sabbepi te nissoke akāsi.

Satthā imaṃ dhammadešanaṃ āharitvā saccāni pakāsetvā jātakaṃ samodhānesi, saccapariyosāne kuṭumbiko sotāpattiphale patiṭṭhahi. Tadā mahājanassa dhammaṃ desetvā nissokabhāvakarapaṇḍito pana ahameva ahosinti.

Matarodanajātakavaṇṇanā sattamā.

[318] 8. Kaṇaverajātakavaṇṇanā

**Yaṃ taṃ vasanta samayeti** idaṃ satthā jetavane viharanto purānadutiyyikāpalobhanaṃ ārabha katesi. Vatthu **indriyajātake** (jā. 1.8.60 ādayo) āvi bhavissati. Satthā pana taṃ bhikkhuṃ “pubbe tvam

bhikkhu etaṃ nissāya asinā sīsacchedaṃ paṭilabhī”ti vatvā tena yācito atītaṃ āhari.

Atīte bārāṇasiyaṃ brahmadatte rajjaṃ kārente bodhisatto kāsīgāmake ekassa gahapatikassa ghare coranakkhattena jāto vayappatto corakammaṃ katvā jīvikaṃ kappento loke pākaṭo ahoṣi sūro nāgabalo, koci naṃ gaṇhituṃ nāsakkhi. So ekadivasaṃ ekasmiṃ seṭṭhighare sandhiṃ chinditvā bahuṃ dhanam avahari. Nāgarā rājānaṃ upasaṅkamitvā “deva, eko mahācoro nagaraṃ vilumpati, taṃ gaṇhāpethā”ti vadimsu. Rājā tassa gahaṇatthāya nagaraguttikaṃ āṇāpesi. So rattibhāge tattha tattha vaggabandhanena manusse ṭhapetvā taṃ sahoḍḍhaṃ gāhāpetvā rañño ārocesi. Rājā “sīsamassa chindā”ti nagaraguttikaññeva āṇāpesi. Nagaraguttiko taṃ pacchābāhaṃ gāḷhabandhanaṃ bandhāpetvā gīvāyassa rattakaṇavīramālaṃ laggetvā sīse iṭṭhakacuṇṇaṃ okiritvā catukke catukke kasāhi tāḷapento kharassarena paṇavena āghātaṃ neti. “Imasmiṃ kira nagare vilopakārako coro gahito”ti sakalanagaraṃ saṅkhubhi.

Tadā ca bārāṇasiyaṃ sahasaṃ gaṇhantī sāmā nāma gaṇikā hoti rājavallabhā pañcasatavaṇṇadāsīparivārā. Sā pāsādāta vātapānaṃ vivarivā ṭhitā taṃ nīyamānaṃ passi. So pana abhirūpo pāsādiko ativiya sobhaggappatto devavaṇṇo sabbesaṃ matthakamatthakena paññāyati. Sāmā taṃ disvā paṭibaddhacittā hutvā “kena nu kho upāyēnāhaṃ imaṃ purisaṃ attano sāmikaṃ kareyya”nti cintayantī “attheko upāyo”ti attano atthacarikāya ekissā hatthe nagaraguttikassa sahasaṃ pesesi “ayaṃ coro sāmāya bhātā, aññatra sāmāya añño etassa avassayo natthi, tumhe kira idaṃ sahasaṃ gahetvā etaṃ vissajjethā”ti. Sā gantvā tathā akāsi. Nagaraguttiko “ayaṃ coro pākaṭo, na sakkā etaṃ vissajjetaṃ, aññaṃ pana manussaṃ labhitvā imaṃ paṭicchannayānake nisīdāpetvā pesetaṃ sakkā”ti āha. Sā gantvā tassā ārocesi.

Tadā paneko seṭṭhiputto sāmāya paṭibaddhacitto devasikaṃ sahasaṃ deti. So taṃ divasampi sūriyatthaṅgamanavelāya sahasaṃ gaṇhitvā taṃ gharaṃ agamāsi. Sāmāpi sahasabhaṇḍikaṃ gahetvā ūrūsu ṭhapetvā parodantī nisinnā hoti. “Kiṃ eta”nti ca vuttā “sāmi, ayaṃ coro mama bhātā, ‘ahaṃ nīcakammaṃ karomī”ti mayhaṃ santikaṃ na eti, nagaraguttikassa pahitaṃ ‘sahasam labhamāno vissajjessāmi na’nti sāsanaṃ pesesi. Idāni imaṃ sahasaṃ ādāya nagaraguttikassa santikaṃ gacchantaṃ na labhāmī”ti āha. So tassā paṭibaddhacittatāya “ahaṃ gamissāmi”ti āha. “Tena hi tayā ābhatameva gahetvā gacchāhī”ti. So taṃ gahetvā nagaraguttikassa gehaṃ gañchi. So taṃ seṭṭhiputtaṃ paṭicchannaṭṭhāne ṭhapetvā coraṃ paṭicchannayānake nisīdāpetvā sāmāya pahīnitvā “ayaṃ coro ratthe pākaṭo, tamandhakāraṃ tāva hotu, atha naṃ manussānaṃ paṭisallīnavelāya ghātāpessāmi”ti apadesaṃ katvā muhuttaṃ vītināmetvā manussesu paṭisallīnesu seṭṭhiputtaṃ mahantenārakkhena āghātaṃ netvā asinā sīsāṃ chinditvā sarīraṃ sūle āropetvā nagaraṃ pāvīsi.

Tato paṭṭhāya sāmā aññesaṃ hatthato kiñci na gaṇhāti, teneva saddhiṃ abhiramamānā vicarati. So cintesi “sace ayaṃ aññasmiṃ paṭibaddhacittā bhavissati, mampi mārāpetvā tena saddhiṃ abhiramissati, accantaṃ mittadubbhīnī esā, mayā idha avasitvā khippaṃ palāyitūṃ vaṭṭati, gacchanta ca pana tucchahattho agantvā etissā ābharaṇabhaṇḍaṃ gahetvā gacchissāmi”ti cintetvā ekasmiṃ divase taṃ āha – “bhadde, mayaṃ pañjare pakkhittakukkuṭā viya niccaṃ ghareyeva homa, ekadivasaṃ uyyānakīlaṃ karissāma”ti. Sā “sādhū”ti sampaṭicchitvā khādanīyabhojanīyādiṃ sabbam paṭiyādetvā sabbābharaṇapaṭimaṇḍitā tena saddhiṃ paṭicchannayāne nisīditvā uyyānaṃ agamāsi. So tattha tāya saddhiṃ kīḷanto “idāni mayhaṃ palāyitūṃ vaṭṭati”ti tāya saddhiṃ kilesaratiyā ramitukāmo viya ekaṃ kaṇavīragacchantaraṃ pavisitvā taṃ āliṅganto viya nippīletvā visaññaṃ katvā pātetvā sabbābharaṇāni omuñcitvā tassāyeva uttarāsaṅgena bandhitvā bhaṇḍikaṃ khandhe ṭhapetvā uyyānavatiṃ laṅghitvā pakkāmi.

Sāpi paṭiladdhasañña utthāya paricārikānaṃ santikaṃ āgantvā “ayyaputto kaha”nti pucchi. “Na jānāma, ayye”ti. “Maṃ matāti saññāya bhāyitvā palāto bhavissati”ti anattamanā hutvā tatoyeva gehaṃ gantvā “mama piyasāmikassa adiṭṭhakālato paṭṭhāyeva alaṅkatasayane na sayissāmi”ti bhūmiyaṃ nipajji. Tato paṭṭhāya manāpaṃ sāṭakaṃ na nivāseti, dve bhattāni na bhuñjati, gandhamālādīni na

paṭisevati, “yena kenaci upāyena ayyaputtam pariyesitvā pakkosāpessāmī”ti naṭe pakkosāpetvā sahaṣṣam adāsi. “Kiṃ karoma, ayye”ti vutte “tumhākaṃ agamaṇaṭṭhānaṃ nāma natthi, tumhe gāmanigamarājadhāniyo carantā samajjam katvā samajjamaṇḍale paṭhamameva imaṃ gītaṃ gāyeyyāthā”ti naṭe sikkhāpentī paṭhamam gātham vatvā “tumhehi imasmiṃ gītake gīte sace ayyaputto tasmim parisantare bhavissati, tumhehi saddhim kathessati, athassa mama arogabhāvaṃ kathetvā taṃ ādāya āgaccheyyātha, no ce āgacchati, sāsanaṃ peseyyāthā”ti paribbayaṃ datvā naṭe uyyojesi. Te bārānasito nikkhamitvā tattha tattha samajjam karontā ekaṃ paccantaḡāmakam agamiṃsu. Sopi coro palāyitvā tattha vasati. Te tattha samajjam karontā paṭhamameva imaṃ gītakam gāyimṃsu –

69. “Yaṃ taṃ vasantasamaye, kaṇaveresu bhāṇusu;  
Sāmaṃ bhāya piḷesi, sā taṃ ārogyamabravī”ti.

Tattha **kaṇaveresūti** karavīresu. **Bhāṇusūti** rattavaṇṇānaṃ pupphānaṃ pabhāya sampannesu. **Sāmanti** evaṃnāmikaṃ. **Piḷesīti** kilesaratiyā ramitukāmo viya āliṅganto piḷesi. **Sā tanti** sā sāmā arogā, tvaṃ pana “sā matā”ti saññāya bhīto palāyasi, sā attano ārogyam **abravī** kathesi, ārocesīti attho.

Coro taṃ sutvā naṭam upasaṅkamtivā “tvaṃ ‘sāmā jīvati’ti vadasi, ahaṃ pana na saddahāmī”ti tena saddhim sallapanto dutiyaṃ gāthamāha –

70. “Ambho na kira saddheyyam, yaṃ vāto pabbataṃ vahe;  
Pabbatañce vahe vāto, sabbampi pathaviṃ vahe;  
Yattha sāmā kālakatā, sā maṃ ārogyamabravī”ti.

Tassattho – ambho naṭa, idaṃ kira na saddaheyyam na saddahitabbaṃ. Yaṃ vāto tiṇapaṇṇāni viya pabbataṃ vaheyya, sacepi so pabbataṃ vaheyya, sabbampi pathaviṃ vaheyya, yathā cetam asaddaheyyam, tathā idanti. **Yattha sāmā kālakatāti** yā nāma sāmā kālakatā, **sā maṃ ārogyam abravīti** kiṃkāraṇā saddaheyyam. Matā nāma na kassaci sāsanaṃ pesenti.

Tassa vacanaṃ sutvā naṭo tatiyaṃ gāthamāha –

71. “Na ceva sā kālakatā, na ca sā aññamicchati;  
Ekabhattikinī sāmā, tameva abhikaṅkhatī”ti.

Tattha **tameva abhikaṅkhatīti** aññaṃ purisaṃ na icchati, taññeva kaṅkhati icchati pattheti.

Taṃ sutvā coro “sā jīvatu vā mā vā, na tāya mayhaṃ attho”ti vatvā catuttham gāthamāha –

72. “Asanthutaṃ maṃ cirasanthutena, nimīni sāmā adhuvaṃ dhuvena;  
Mayāpi sāmā nimineyya aññaṃ, ito ahaṃ dūrataram gamissa”nti.

Tattha **asanthutanti** akatasamṣaggaṃ. **Cirasanthutenāti** cirakatasamṣaggena. **Nimīnīti** parivattesi. **Adhuvaṃ dhuvenāti** maṃ adhuvaṃ tena dhuvasāmikena parivattetuṃ nagaraguttikassa sahaṣṣam datvā maṃ gaṇhīti attho. **Mayāpi sāmā nimineyya aññanti** sāmā mayāpi aññaṃ sāmikam parivattetvā gaṇheyya. **Ito ahaṃ dūrataram gamissanti** yattha na sakkā tassā sāsanaṃ vā pavattim vā sotuṃ, tādisam dūrataram ṭhānaṃ gamissam, tasmā mama ito aññaṭṭha gatabhāvaṃ tassā ārocethāti vatvā tesam passantānaññeva gāḷhataram nivāsetvā vegena palāyi.

Naṭa gantvā tena katakiriyaṃ tassā kathayimṃsu. Sā vippaṭisārinī hutvā attano pakatiyā eva vītināmesi.

Satthā imaṃ dhammadesanaṃ āharitvā saccāni pakāsetvā jātakam samodhānesi, saccapariyosāne

ukkaṇṭhitabhikkhu sotāpattiṭṭhale patitṭhahi.

Tadā seṭṭhiputto ayaṃ bhikkhu ahoṣi, sāmā purāṇadutiyikā, coro pana ahameva ahoṣinti.

Kaṇaverajātakavaṇṇanā aṭṭhamā.

[319] 9. Tittirajātakavaṇṇanā

**Susukhaṃ vata jīvāmīti** idaṃ satthā kosambiyaṃ nissāya badarikārāme viharanto rāhulatheraṃ ārabha kathesi. Vatthu heṭṭhā **tipallatthajātaka** (jā. 1.1.16) vitthāritameva. Bhikkhū dhammasabhāyaṃ kathaṃ samuṭṭhāpesuṃ “āvuso, rāhulo sikkhākāmo kukkuccako ovādakkhamo”ti. Tassāyasmato guṇakathāya samuṭṭhāpitāya satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepe rāhulo sikkhākāmo kukkuccako ovādakkhamoyevā”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto brāhmaṇakule nibbattitvā vayappatto takkasilāṃ gantvā sabbasippāni uggaṇṭhitvā nikkhamma himavantapadese isipabbajjaṃ pabbajitvā abhiññā ca samāpattiyo ca nibbattetvā jhānakīlaṃ kīlanto ramaṇīye vanasaṇḍe vasitvā loṇambilasevanatthāya aññatarāṃ paccantaḡamakāṃ agamāsi. Tattha naṃ manussā dīsvā pasannacittā aññatarasmim̄ araṇṇīe paṇṇasālaṃ kāretvā paccayehi upaṭṭhahantā vāsāpesuṃ. Tadā tasmim̄ gāmake eko sākuṇiko ekaṃ dīpakatittiraṃ gahetvā suṭṭhu sikkhāpetvā pañjare pakkhipitvā paṭijaggati. So taṃ araṇṇīyaṃ netvā tassa saddena āgatāgate tittire gahetvā vikkiṇitvā jīvikāṃ kappesi. Tittiro “maṃ ekaṃ nissāya bahū mama ñātakā nassanti, mayhametaṃ pāpa”nti nissaddo ahoṣi. So tassa nissaddabhāvaṃ ñatvā veḷupesikāya naṃ sīse paharati. Tittiro dukkhāturatāya saddaṃ karoti. Evaṃ so sākuṇiko taṃ nissāya tittire gahetvā jīvikāṃ kappesi.

Atha so tittiro cintesi “ime marantūti mayhaṃ cetanā natthi, paṭiccammaṃ pana maṃ phusati, mayi saddaṃ akaronte ete nāgacchanti, karonteyeva āgacchanti, āgatāgate ayaṃ gahetvā jīvitakkhayaṃ pāpeti, atthi nu kho ettha mayhaṃ pāpaṃ, natthi”ti. So tato paṭṭhāya “ko nu kho me imaṃ kaṅkhaṃ chindeyyā”ti tathārūpaṃ paṇḍitaṃ upadhārento carati. Athekadivasāṃ so sākuṇiko bahū tittire gahetvā pacchim̄ pūretvā “pānīyaṃ pivissāmī”ti bodhisattassa assamaṃ gantvā taṃ pañjaraṃ bodhisattassa santike ṭhapetvā pānīyaṃ pivitvā vālukātale nipanno niddaṃ okkami. Tittiro tassa niddokkantaḡhāvaṃ ñatvā “mama kaṅkhaṃ imaṃ tāpasāṃ pucchissāmī, jānanto me kathessatī”ti pañjare nisinnoyeva taṃ pucchanto paṭhamaṃ gāthamāha –

73. “Susukhaṃ vata jīvāmi, labhāmi ceva bhuñjituṃ;  
Paripanthe ca tiṭṭhāmi, kā nu bhante gatī mamā”ti.

Tattha **susukhaṃ vata jīvāmīti** ahaṃ, bhante, imaṃ sākuṇikaṃ nissāya suṭṭhu sukhaṃ jīvāmi. **Labhāmīti** yathārucitaṃ khādanīyaṃ bhojanīyaṃ bhuñjitumpi labhāmi. **Paripanthe ca tiṭṭhāmīti** apica kho yattha mama ñātakā mama saddena āgatāgatā vinassanti, tasmim̄ paripanthe tiṭṭhāmi. **Kā nu, bhante, gatī mamāti** kā nu kho, bhante, mama gatī, kā nipphatti bhavissatīti pucchi.

Tassa pañhaṃ vissajjento bodhisatto dutiyaṃ gāthamāha –

74. “Mano ce te nappaṇamati, pakkhi pāpassa kammuno;  
Abyāvaṭassa bhadraṣṣa, na pāpamupalimpati”ti.

Tattha **pāpassa kammunoti** yadi tava mano pāpakammassatthāya na paṇamati, pāpakaraṇe tanninno tappoṇo tappabbhāro na hoti. **Abyāvaṭassatī** evaṃ sante pāpakammakaraṇatthāya abyāvaṭassa ussukkaṃ anāpannassa tava bhadraṣṣa suddhasseva sato pāpaṃ na upalimpati na allīyatīti.

Taṃ sutvā tittiro tatiyaṃ gāthamāha –

75. “Ñātaṃ no nisinnoti, bahu āgacchate jano;  
Paṭiccammaṃ phusati, tasmim̐ me saṅkate mano”ti.

Tassattho – bhante, sacāhaṃ saddaṃ na kareyyaṃ, ayaṃ tittirajano na āgaccheyya, mayi pana saddaṃ karonte “ñātaṃ no nisinnoti”ti ayaṃ bahu jano āgacchati, taṃ āgatāgataṃ luddo gahetvā jīvitakkhayaṃ pāpento maṃ paṭicca nissāya etaṃ pāṇātipātakammaṃ phusati paṭilabhati vindati, tasmim̐ maṃ paṭicca kate pāpe mama nu kho etaṃ pāpanti evaṃ me mano saṅkate parisāṅkati kukkucchaṃ āpajjati.

Taṃ sutvā bodhisatto catutthaṃ gāthamāha –

76. “Na paṭiccammaṃ phusati, mano ce nappadussati;  
Appossukkassa bhadrassa, na pāpamupalimpati”ti.

Tassattho – yadi tava pāpakiriyāya mano na padussati, tanninno tappono tappabbhāro na hoti, evaṃ sante luddena āyasmantaṃ paṭicca katampi pāpakammaṃ taṃ na phusati na allīyati, pāpakiriyāya hi appossukkassa nirālayassa bhadrassa parisuddhasseva sato tava pāṇātipātacetanāya abhāvā taṃ pāpaṃ na upalimpati, tava cittam̐ na allīyatīti.

Evaṃ mahāsatto tittiraṃ saññāpesi, sopi taṃ nissāya nikkukkucco ahoṣi. Luddo pabuddho bodhisattaṃ vanditvā pañjaraṃ ādāya pakkāmi.

Satthā imaṃ dhammadeśanaṃ āharitvā jātaṃ samodhānesi – “tadā tittiro rāhulo ahoṣi, tāpaso pana ahameva ahoṣi”nti.

Tittirajātakavaṇṇanā navamā.

[320] 10. Succajajātakavaṇṇanā

**Succajaṃ vata naccajīti** idaṃ satthā jetavane viharanto ekaṃ kuṭumbikaṃ ārabha kathesi. So kira “gāmake uddhāraṃ sādheṣṣāmī”ti bhariyāya saddhiṃ tattha gantvā sādhetvā dhanam̐ āharitvā “pacchā nēssāmī”ti ekasmim̐ kule ṭhapetvā puna sāvattiṃ gacchanto antarāmagge ekaṃ pabbataṃ addasa. Atha naṃ bhariyā āha “sace, sāmi, ayaṃ pabbato suvaṇṇamayo bhaveyya, dadeyyāsi pana me kiñcī”ti. “Kāsi tvam̐, na kiñcī dassāmī”ti. Sā “yāva thaddhahadayo vatāyaṃ, pabbate suvaṇṇamaye jātepi mayhaṃ kiñcī na dassati”ti anattamanā ahoṣi. Te jetavanasamīpaṃ āgantvā “pānīyaṃ pivissāmā”ti vihāraṃ pavisitvā pānīyaṃ pivimsu. Satthāpi paccūsakāleyeva tesam̐ sotāpattiphalassa upanissayaṃ disvā āgamaṇam̐ olokayamāno gandhakuṭipariveṇe nisīdi chabbaṇṇarasmiyo vissajjento. Tepi pānīyaṃ pivitvā āgantvā satthāraṃ vanditvā nisīdim̐su. Satthā tehi saddhiṃ paṭisanthāraṃ katvā “kaḥam̐ gatāthā”ti pucchi. “Amhākaṃ gāmake uddhāraṃ sādhanatthāya, bhante”ti. “Kiṃ, upāsike tava sāmiko tuyhaṃ hitaṃ paṭikaṅkhati, upakāraṃ te karotī”ti. Bhante, ahaṃ imasmim̐ sasinehā, ayaṃ pana mayi nissineho, ajja mayā pabbataṃ disvā “sacāyaṃ pabbato suvaṇṇamayo assa, kiñcī me dadeyyāsi”ti vutto “kāsi tvam̐, na kiñcī dassāmī”ti āha, evaṃ thaddhahadayo ayanti. “Upāsike, evaṃ nāmesa vadati, yadā pana tava guṇam̐ sarati, tadā sabbissariyaṃ te detī”ti vatvā “kathetha, bhante”ti tehi yācito atītaṃ āhari.

Atīte bārānasiyaṃ brahmadatte rajjaṃ kārente bodhisatto tassa sabbakiccakārako amacco ahoṣi. Athekadivasaṃ rājā puttaṃ uparājānaṃ upaṭṭhānaṃ āgacchantam̐ disvā “ayaṃ mama antepure dubbheyyā”ti taṃ pakkosāpetvā “tāta, yāvāhaṃ jīvāmi, tāva nagare vasitum̐ na lacchasi, aññattha vasitvā mamaccayena rajjaṃ kārehi”ti āha. So “sādhū”ti pitaraṃ vanditvā jeṭṭhabhariyāya saddhiṃ nagarā nikkhamitvā paccantaṃ gantvā araññaṃ pavisitvā paṇṇasālaṃ māpetvā vanamūlaphalāphalehi

yāpento vasi. Aparabhāge rājā kālamakāsi. Uparājā nakkhattaṃ olokento tassa kālakatabhāvaṃ ñatvā bārāṇasiṃ āgacchanto antarāmagge ekaṃ pabbataṃ addasa. Atha naṃ bhariyā āha “sace, deva, ayaṃ pabbato suvaṇṇamayo assa, dadeyyāsi me kiñcī”ti. “Kāsi tvaṃ, na kiñci dassāmī”ti. Sā “ahaṃ imasmiṃ sinehaṃ chindituṃ asakkontī araṇṇaṃ pāvisiṃ, ayañca evaṃ vadati, ativiya thaddhahadayo, rājā hutvāpi esa mayhaṃ kiṃ kalyāṇaṃ karissatī”ti anattamanā ahosi. So āgantvā rajje patiṭṭhito taṃ aggamaheṣiṭṭhāne ṭhapesi, idaṃ yasamattakameva adāsi. Uttari pana sakkārasammāno natthi, tassā atthibhāvampi na jānāti.

Bodhisatto “ayaṃ devī imassa rañño upakārikā dukkhaṃ agaṇetvā araṇṇavāsaṃ vasi. Ayaṃ panetaṃ agaṇetvā aññāhi saddhiṃ abhiraṃanto vicarati, yathā esā sabbissariyaṃ labhati, tathā karissāmī”ti cintetvā ekadivasaṃ taṃ upasaṅkamtivā “mahādevi mayaṃ tumhākaṃ santikā piṇḍapātamaṭṭampi na labhāma, kasmā amhesu pamajjittha, ativiya thaddhahadaya atthā”ti āha. “Tāta, sacāhaṃ attanā labheyyaṃ, tuyhampi dadeyyaṃ, alabhamānā pana kiṃ dassāmi, rājāpi mayhaṃ idāni kiṃ nāma dassati, so antarāmagge ‘imasmiṃ pabbate suvaṇṇamaye jāte mayhaṃ kiñci dassasi’ti vutto ‘kāsi tvaṃ, na kiñci dassāmī’ti āha, supariccajampi na pariccajī”ti. “Kiṃ pana rañño santike imaṃ kathaṃ kathetuṃ sakkhissathā”ti? “Sakkhissāmi, tātā”ti. “Tena hi ahaṃ rañño santike ṭhito pucchissāmi, tumhe katheyyāthā”ti. “Sādhu, tātā”ti. Bodhisatto deviyā rañño upaṭṭhānaṃ āgantvā ṭhitakāle āha “nanu, ayye, mayaṃ tumhākaṃ santikā kiñci na labhāma”ti? “Tāta, ahaṃ labhamānā tuyhaṃ dadeyyaṃ, ahameva kiñci na labhāmi, alabhamānā tuyhaṃ kiṃ dassāmi, rājāpi idāni mayhaṃ kiṃ nāma dassati, so araṇṇato āgamanakāle ekaṃ pabbataṃ disvā ‘sacāyaṃ pabbato suvaṇṇamayo assa, kiñci me dadeyyāsi’ti vutto ‘kāsi tvaṃ, na kiñci dassāmī’ti vadati, supariccajampi na pariccajī”ti etamaṭṭhaṃ dīpentī paṭṭhamāṃ gāthamāha –

77. “Succajaṃ vata naccaji, vācāya adadaṃ giriṃ;  
Kiñhi tassacajantassa, vācāya adada pabbata”nti.

Tattha **succajaṃ vatāti** sukkena cajituṃ sakuṇeyyampi na caji. **Adadanti** vacanamattenāpi pabbataṃ adadamāno. **Kiñhi tassacajantassāti** tassa nāmetassa mayā yācitassa na cajantassa kiñhi cajeyya. **Vācāya adada pabbatanti** sacāyaṃ mayā yācito mama vacanena suvaṇṇamayampi hontaṃ taṃ pabbataṃ vācāya adada, vacanamattena adassāti attho.

Taṃ sutvā rājā dutiyaṃ gāthamāha –

78. “Yañhi kayirā tañhi vade, yaṃ na kayirā na taṃ vade;  
Akarontaṃ bhāsamaṇaṃ, parijānanti paṇḍitā”ti.

Tassattho – yadeva hi paṇḍito puriso kāyena kareyya, taṃ vācāya vadeyya. Yaṃ na kayirā, na taṃ vadeyya, dātukāmoḃa dammīti vadeyya, na adātukāmoti adhippāyo. Kiṃkāraṇā? Yo hi “dassāmī”ti vatvāpi pacchā na dadāti, taṃ akarontaṃ kevalaṃ musā bhāsamaṇaṃ parijānanti paṇḍitā. Ayaṃ “dassāmī”ti vacanamattameva bhāsati, na pana deti, yañhi kho pana adinnampi vacanamatteneva dinnaṃ hoti, taṃ puretameva laddhaṃ nāma bhavissatīti evaṃ tassa musāvādibhāvaṃ parijānanti paṇḍitā, bālā pana vacanamatteneva tussantīti.

Taṃ sutvā devī rañño añjaliṃ paggahetvā tatiyaṃ gāthamāha –

79. “Rājaputta namo tyatthu, sacce dhamme ṭhito casi;  
Yassa te byasanaṃ patto, saccasmiṃ ramate mano”ti.

Tattha **sacce dhammeti** vacīsacce ca sabhāvadhamme ca. **Byasanaṃ pattoti** yassa tava raṭṭhā pabbājanīyasāṅkhātāṃ byasanaṃ pattoti mano saccasmiṃyeva ramati.



Evam rañño guṇakathaṃ kathayamānāya deviyā taṃ sutvā bodhisatto tassā guṇakathaṃ kathento catutthaṃ gāthamāha –

80. “Yā daliddī daliddassa, aḍḍhā aḍḍhassa kittima;  
Sā hissa paramā bhariyā, sahiraññaṣṣa itthiyo”’ti.

Tattha **kittimāti** kittisampannāti attho. **Sā hissa paramāti** yā daliddassa sāmikassa daliddakāle sayampi daliddī hutvā taṃ na pariccajati. **Aḍḍhassāti** aḍḍhakāle aḍḍhā hutvā sāmikameva anuvattati, samānasukhadukkhāva hoti, sā hi tassa paramā uttamā bhariyā nāma. **Sahiraññaṣṣa** pana issariye t̥hitassa itthiyo nāma hontiyeva, anacchariyameva etanti.

Evañca pana vatvā bodhisatto “ayaṃ, mahārāja, tumhākaṃ dukkhitakāle araññe samānadukkhā hutvā vasi, imissā sammānaṃ kātuṃ vaṭṭatī”’ti deviyā guṇaṃ kathesi. Rājā tassa vacanena deviyā guṇaṃ saritvā “paṇḍita, tava kathāyāhaṃ deviyā guṇaṃ anussari”’nti vatvā tassā sabbissariyamadāsi. “Tayāhaṃ deviyā guṇaṃ sarāpito”’ti bodhisattassapi mahantaṃ sakkāraṃ akāsi.

Satthā imaṃ dhammadesanaṃ āharitvā saccāni pakāsetvā jātaṃ samodhānesi, saccapariyosāne ubho jayampatikā sotāpattiphale patīttahimsu.

Tadā bārāṇasirājā ayaṃ kuṭumbiko ahosi, devī ayaṃ upāsikā, paṇḍitāmacco pana ahameva ahosinti.

Succajajātakavaṇṇanā dasamā.

Pucimandavaggo dutiyo.

### 3. Kuṭidūsakavaggo

[321] 1. Kuṭidūsakajātakavaṇṇanā

**Manussasseva te sīsanti** idaṃ satthā jetavane viharanto mahākassapattherassa paṇṇasālajhāpakam daharabhikkhuṃ ārabha kathesi. Vatthu pana rājagahe samuṭṭhitaṃ. Tadā kira thero rājagahaṃ nissāya araññakuṭiyaṃ viharati, tassa dve daharā upaṭṭhānaṃ karonti. Tesu eko therassa upakārako, eko dubbaco itarena kataṃ attanā katasadisam karoti. Tena mukhodakādīsū upaṭṭhāpitesu therassa santikaṃ gantvā vanditvā “bhante, udakaṃ t̥pitaṃ, mukhaṃ dhovathā”’tiādīni vadati. Tena kālasseva vuṭṭhāya therassa pariveṇe sammat̥the therassa nikkhamanavelāya ito cito ca paharanto sakalapariveṇaṃ attanā sammat̥thaṃ viya karoti. Vattasampanno cintesi “ayaṃ dubbaco mayā kataṃ attanā katasadisam karoti, etassa saṭṭhakammaṃ pākaṭaṃ karissāmī”’ti.

Tasmim antogāme bhutvā āgantvā niddāyanteva nhānodakaṃ tāpetvā piṭṭhikoṭṭhake t̥petaṃ aññaṃ aḍḍhanālimattaṃ udakaṃ uddhane t̥patesi. Itaro pabujjhivāva gantvā usumaṃ ut̥thahantaṃ disvā “udakaṃ tāpetvā koṭṭhake t̥pitaṃ bhavissatī”’ti therassa santikaṃ gantvā “bhante, nhānakoṭṭhake udakaṃ t̥pitaṃ, nhāyathā”’ti āha. Thero ‘nhāyissāmī”’ti tena saddhimyeva āgantvā koṭṭhake udakaṃ aditvā “kaṃ udaka”’nti pucchi. So vegena aggisālaṃ gantvā tucchabhājane uḷuṅkaṃ otāresi, uḷuṅko tucchabhājanassa tale paṭihato “tatā”’ti saddamakāsi. Tato paṭṭhāya tassa “uḷuṅkasaddako”’tveva nāmaṃ jātaṃ.

Tasmim khaṇe itaro piṭṭhikoṭṭhakato udakaṃ āharitvā “nhāyatha, bhante”’ti āha. Thero nhatvā āvajjento uḷuṅkasaddakassa dubbacabhāvaṃ ñatvā taṃ sāyaṃ therupaṭṭhānaṃ āgataṃ ovadi “āvuso, samaṇena nāma attanā katameva ‘kataṃ me’’ti vattum vaṭṭati, aññathā sampajānamusāvādo hoti, ito paṭṭhāya evarūpaṃ mā akāsi”’ti. So therassa kujjhivā punadivase therena saddhim piṇḍāya gāmaṃ na

pāvīsi. Thero itareneva saddhiṃ pāvīsi. Uḷūṅkasaddakopi therassa upaṭṭhākakulaṃ gantvā “bhante, thero kaha”nti vutte “aphāsukena vihāreyeva nisinno”ti vatvā “kiṃ, bhante, laddhuṃ vaṭṭatī”ti vutte “idañcidañca dethā”ti gahetvā attano rucitaṭṭhānaṃ gantvā bhuñjitvā vihāraṃ agamāsi.

Punadivase thero taṃ kulaṃ gantvā nisīdi. Manussehi “kiṃ, bhante, ayyassa aphāsukaṃ, hiyyo kirattha vihāreyeva nisinnā, asukadaharassa hatthe āhāraṃ pesayimha, paribhutto ayyenā”ti vutte thero tuṅhībhūtova bhattakiccaṃ katvā vihāraṃ gantvā sāyaṃ therupaṭṭhānakāle āgataṃ āmantetvā “āvuso, asukagāme nāma asukakule ‘therassa idañcidañca laddhuṃ vaṭṭatī’ti viññāpetvā kira te bhutta”nti vatvā “viññatti nāma na vaṭṭatī, mā puna evarūpaṃ anācāraṃ carā”ti āha. So ettakena there āghātaṃ bandhitvā “ayaṃ hiyyopi udakamattaṃ nissāya mayā saddhiṃ kalahaṃ kari, idāni panassa upaṭṭhākānaṃ gehe mayā bhattamuṭṭhi bhuttāti asahanto puna kalahaṃ karoti, jānissāmissa kattabbayuttaka”nti punadivase there piṇḍāya pavitṭhe muggaraṃ gahetvā paribhogabhājanāni bhinditvā paṇṇasālaṃ jhāpetvā palāyi. So jīvamānova manussapeto hutvā sussitvā kālaṃ katvā avīcimahāniraye nibbatti. So tena kato anācāro mahājanassa majjhe pākato jāto.

Athekacce bhikkhū rājagahā sāvattiṃ gantvā sabhāgaṭṭhāne pattaṭṭhāraṃ paṭisāmetvā satthu santikaṃ gantvā vanditvā nisīdimṃsu. Sathā tehi saddhiṃ paṭisanthāraṃ katvā “kuto āgatathā”ti pucchi. “Rājagahā, bhante”ti. “Ko tatha ovādadāyako ācariyo”ti. “Mahākassapatthero, bhante”ti. “Sukhaṃ, bhikkhave, kassapassā”ti. “Āma, bhante, therassa sukhaṃ, saddhivihāriko panassa ovāde dinne kujjhitvā therassa paṇṇasālaṃ jhāpetvā palāyīti. Taṃ sutvā sathā “bhikkhave, kassapassa evarūpena bālena saddhiṃ caraṇato ekacariyāva seyyo”ti vatvā imaṃ dhammapade gāthamāha –

“Carañce nādhigaccheyya, seyyaṃ sadisamattano;  
Ekacariyaṃ daḷhaṃ kayirā, natthi bāle sahāyatā”ti. (dha. pa. 61);

Idaṅca pana vatvā puna te bhikkhū āmantetvā “na, bhikkhave, idāneva so kuṭidūsako, pubbepi kuṭidūsakoyeva, na ca idāneva ovādadāyakassa kujjhati, pubbepi kujjhiyevā”ti vatvā tehi yācito atītaṃ āhari.

Atīte bārānasiyaṃ brahmadatte rajjaṃ kārente bodhisatto siṅgilasakuṇayoniyāṃ nibbattitvā vayappatto attano manāpaṃ anovassakaṃ kulāvakaṃ katvā himavantapadese vasati. Atheko makkaṭo vassakāle acchinnadhāre deve vassante sītapīḷito dante khādanto bodhisattassa avidūre nisīdi. Bodhisatto taṃ tathā kilamantaṃ disvā tena saddhiṃ sallapanto paṭhamāṃ gāthamāha –

81. “Manussasseva te sīsaṃ, hatthapādā ca vānara;  
Atha kena nu vaṇṇena, agāraṃ te na vijjatī”ti.

Tattha **vaṇṇenāti** kāraṇena. **Agāranti** tava nivāsagehaṃ kena kāraṇena natthīti pucchi.

Taṃ sutvā vānaro dutiyaṃ gāthamāha –

82. “Manussasseva me sīsaṃ, hatthapādā ca siṅgila;  
Yāhu seṭṭhā manussesu, sā me pañña na vijjatī”ti.

Tattha **siṅgilāti** taṃ sakuṇaṃ nāmenālapati. **Yāhu seṭṭhā manussesūti** yā manussesu seṭṭhāti kathenti, sā mama vicāraṇapañña natthi. Sīsatthapādakāyabalāni hi loke appamaṇaṃ, vicāraṇapaññaṃ seṭṭhā, sā mama natthi, tasmā me agāraṃ na vijjatīti.

Taṃ sutvā bodhisatto itaraṃ gāthādvayamāha –

83. “Anavaṭṭhitacittassa, lahucittassa dubbhino;

Niccaṃ addhuvasīlassa, sukhabhāvo na vijjati.

84. “So karassu ānubhāvaṃ, vītivattassu sīliyaṃ;  
Sītavātaparittāṇaṃ, karassu kuṭavaṃ kapī”ti.

Tattha **anavaṭṭhitacittassāti** appatitṭhitacittassa. **Dubbinoti** mittadubbhissa. **Addhuvasīlassāti** na sabbakālaṃ sīlarakkhakassa. **So karassu ānubhāvanti** so tvaṃ samma makkaṭa paññāya uppādanatthaṃ ānubhāvaṃ balaṃ upāyaṃ karohi. **Vītivattassu sīliyanti** attano dussīlabhāvasaṅkhātaṃ sīliyaṃ atikkamitvā sīlavā hoti. **Kuṭavaṃ kapīti** sītavātassa parittāṇasamatthaṃ attano kuṭavaṃ kulāvakaṃ ekaṃ vasaṅgāraṃ karohīti.

Makkaṭo cintesi “ayaṃ tāva attano anovassakaṭṭhāne nisinnabhāvena maṃ paribhāsati, na nisīdāpessāmi naṃ imasmiṃ kulāvake”ti. Tato bodhisattaṃ gaṇhitukāmo pakkhandi, bodhisatto uppatitvā aññattha gato. Makkaṭo kulāvakaṃ viddhamsetvā cuṇṇavicuṇṇaṃ katvā pakkāmi.

Satthā imaṃ dhammedesanaṃ āharitvā jātaṃ samodhānesi – “tadā makkaṭo kuṭijhāpako ahoṣi, siṅgīlasakuṇo pana ahameva ahoṣi”nti.

Kuṭidūsakajātakavaṇṇanā paṭhamā.

[322] 2. Duddubhajātakavaṇṇanā

**Duddubhāyati bhaddanteti** idaṃ satthā jetavane viharanto aññatitthiye ārabba kathesi. Titthiyā kira jetavanassa samīpe tasmim̐ tasmim̐ ṭhāne kaṇṭakāpassaye seyyaṃ kappenti, pañcātapam̐ tapenti, nānappakāraṃ micchātapam̐ caranti. Atha sambahulā bhikkhū sāvattiyam̐ piṇḍāya caritvā jetavanam̐ āgacchantā antarāmagge te disvā gantvā satthāraṃ upasaṅkamitvā “atthi nu kho, bhante, aññatitthiyānaṃ vatasamādāne sāro”ti pucchimsu. Satthā “na, bhikkhave, tesam̐ vatasamādāne sāro vā viseso vā atthi, tañhi nighamsiyamānaṃ upaparikkhiyamānaṃ ukkārabhūmimaggasadiṣaṃ sasakassa duddubhasadiṣaṃ hotī”ti vatvā “duddubhasadiṣabhāvamassa mayaṃ na jānāma, kathetha no, bhante”ti tehi yācito atītaṃ āhari.

Atīte bārānasiyaṃ brahmadatte rajjaṃ kārente bodhisatto sīhayoniyam̐ nibbattitvā vayappatto araññe paṭivasati. Tadā pana pacchimasamuddasamīpe beluvamissakatālavanaṃ hoti. Tatreko sasako beluvarukkhamūle ekassa tālagacchassa heṭṭhā vasati. So ekadivasam̐ gocaraṃ ādāya āgantvā tālapaṇṇassa heṭṭhā nipanno cintesi “sace ayaṃ pathavī saṃvaṭṭeyya, kahaṃ nu kho gamissāmi”ti. Tasmim̐ khaṇe ekaṃ beluvarappaṃ tālapaṇṇassa upari pati. So tassa saddena “addhā pathavī saṃvaṭṭatī”ti uppatitvā pacchato anolokentova palāyi. Taṃ maraṇabhayaabhītaṃ vegena palāyantaṃ añño sasako disvā pucchi “kiṃ bho, ativiya bhīto palāyāsī”ti. “Mā pucchi, bho”ti. So “kiṃ bho, kiṃ bho”ti pacchato dhāvateva. Itaro nivattitvā anolokentova “ettha pathavī saṃvaṭṭatī”ti āha. Sopi tassa pacchato palāyi. Evaṃ tamañño addasa, tamaññoti evaṃ sasakasahassaṃ ekato hutvā palāyi. Te ekopi migo disvā ekato hutvā palāyi. Eko sūkaro, eko gokaṇṇo, eko mahimsa, eko gavayo, eko khaggo, eko byaggho, eko sīho, eko hatthī disvā “kimeta”nti pucchitvā “ettha pathavī saṃvaṭṭatī”ti vutte palāyi. Evaṃ anukkamena yojanamattaṃ tiracchānabalaṃ ahoṣi.

Tadā bodhisatto taṃ balaṃ palāyantaṃ disvā “kimeta”nti pucchitvā “ettha pathavī saṃvaṭṭatī”ti sutvā cintesi “pathavīsāvaṭṭanaṃ nāma na kadāci atthi, addhā etesaṃ kiñci dussutaṃ bhavissati, mayi kho pana ussukkaṃ anāpajjante sabbe nassissanti, jīvitam̐ nesaṃ dassāmi”ti sīhavegena purato pabbatapādaṃ gantvā tikkhattum̐ sīhanādaṃ nadi. Te sīhabhayatajjitā nivattitvā piṇḍitā aṭṭhaṃsu. Sīho tesam̐ antaraṃ pavisitvā “kimatthaṃ palāyathā”ti pucchi. “Pathavī saṃvaṭṭatī”ti. “Kena saṃvaṭṭamānā diṭṭhā”ti? “Hatthī jānantī”ti. Hatthī pucchi. Te “mayaṃ na jānāma, sīhā jānantī”ti vadimsu, sīhāpi “mayaṃ na jānāma, byagghā jānantī”ti, byagghāpi “mayaṃ na jānāma, khaggā jānantī”ti, khaggāpi “gavayā jānantī”ti, gavayāpi “mahimsā jānantī”ti, mahimsāpi “gokaṇṇā

jānanti’’ti, gokaṇṇāpi ‘‘sūkarā jānanti’’ti, sūkarāpi ‘‘migā jānanti’’ti, migāpi ‘‘mayam na jānāma, sasakā jānanti’’ti, sasakesu pucchiyamānesu ‘‘ayam katheti’’ti tam sasakam dassesum. Atha nam ‘‘evam kira, samma, passasi pathavī samvaṭṭati’’ti pucchi. ‘‘Āma, sāmi mayā diṭṭhā’’ti. ‘‘Kattha vasanto passasi’’ti? ‘‘Pacchimasamuddasamīpe beluvamissakatālavane vasāmi. Ahañhi tattha beluvarukkhamūle tālagacche tālapaṇṇassa heṭṭhā nipanno cintesiṃ ‘‘sace pathavī samvaṭṭati, kham gamissāmi’’ti, atha taṅkhaṇaṇṇeva pathaviyā samvaṭṭanasaddam sutvā palātomhī’’ti.

Sīho cintesi ‘‘addhā tassa tālapaṇṇassa upari beluvapakkaṃ pativā duddubhāyanasaddamakāsi, svāyam tam saddam sutvā ‘pathavī samvaṭṭati’’ti saññaṃ uppādetvā palāyi, tathato jānissāmi’’ti. So tam sasakam gahetvā mahājanam assāsetvā ‘‘aham iminā diṭṭhaṭṭhāne pathaviyā samvaṭṭanabhāvam vā asaṃvaṭṭanabhāvam vā tathato jānitvā āgamissāmi, yāva mamāgamanā tumhe ettheva hothā’’ti sasakam piṭṭhiyam āropetvā sīhavegena pakkhanditvā tālavane sasakam otāretvā ‘‘ehi tayā diṭṭhaṭṭhānam dassēhi’’ti āha. ‘‘Na visahāmi sāmi’’ti. ‘‘Ehi mā bhāyī’’ti. So beluvarukkham upasaṅkamtum asakkonto avidūre ṭhatvā ‘‘idaṃ sāmi duddubhāyanaṭṭhāna’’nti vatvā paṭhamam gāthamāha –

85. ‘‘Duddubhāyati bhaddante, yasmimṃ dese vasāmahaṃ;  
Ahampetaṃ na jānāmi, kimetaṃ duddubhāyati’’ti.

Tattha **duddubhāyati** duddubhasaddam karoti. **Bhaddanteti** bhaddam tava atthu. **Kimetanti** yasmimṃ padese aham vasāmi, tattha duddubhāyati, ahampi na jānāmi ‘‘kim vā etaṃ duddubhāyati, kena vā kāraṇena duddubhāyati, kevalam duddubhāyanasaddam assosi’’nti.

Evam vutte sīho beluvarukkhamūlam gantvā tālapaṇṇassa heṭṭhā sasakena nipannaṭṭhānañceva tālapaṇṇamatthake patitam beluvapakkañca disvā pathaviyā asaṃvaṭṭanabhāvam tathato jānitvā sasakam piṭṭhiyam āropetvā sīhavegena khippam migasaṅghānam santikam gantvā sabbam pavattim ārocetvā ‘‘tumhe mā bhāyathā’’ti migagaṇam assāsetvā vissajjesi. Sace hi tadā bodhisatto na bhavye, sabbe samuddam pavisitvā nasseyyum. Bodhisattam pana nissāya sabbe jīvitam labhiṃsūti.

86. ‘‘Beluam patitam sutvā, duddubhanti saso javi;  
Sasassa vacanam sutvā, santattā migavāhinī.
87. ‘‘Appatvā padaviññānam, paraghosānusārino;  
Panādaparamā bālā, te honti parapattiyā.
88. ‘‘Ye ca sīlena sampannā, paññāyūpasame ratā;  
Ārakā viratā dhīrā, na honti parapattiyā’’ti. –

Imā tisso abhisambuddhagāthā.

Tattha **beluvanti** beluvapakkaṃ. **Duddubhanti** evam saddam kurumānam. **Santattāti** utrastā. **Migavāhinīti** anekasahasasāṅkhā migasena. **Padaviññānanti** viññānapadam, sotaviññāṅkoṭṭhāsam apāpuṇitvāti attho. **Te honti parapattiyāti** te paraghosānusārino tameva paraghosasaṅkhātam panādam ‘‘parama’’nti maññamānā bālā andhaputhujjanā viññānapadassa appattatāya parapattiyāva honti, paresam vacanam saddahitvā yam vā tam vā karonti.

**Sīlenāti** ariyamaggena āgatasīlena samannāgatā. **Paññāyūpasame ratāti** maggeneva āgatapaññāya kilesūpasame ratā, yathā vā sīlena, evam paññāyapi sampannā, kilesūpasame ratātipi attho. **Ārakā viratā dhīrāti** pāpakiriyato ārakā viratā paṇḍitā. Na hontīti te evarūpā sotāpannā pāpato oratabhāvena kilesūpasame abhiratabhāvena ca ekavāram maggaññaṇena paṭividdhadhammā aññesam kathentānampi na saddahanti na gaṇhanti. Kasmā? Attano paccakkhattāti. Tena vuttam –

“Assaddho akataññū ca, sandhicchedo ca yo naro;  
Hatāvakāso vantāso, sa ve uttamaporiso”ti. (dha. pa. 97);

Satthā imaṃ dhammadesanaṃ āharitvā jātaṃ samodhānesi – “tadā sīho ahameva ahosi”nti.

Duddubhajātakavaṇṇanā dutiyā.

[323] 3. Brahmadatajātakavaṇṇanā

**Dvayaṃ yācanakoti** idaṃ satthā ālavimṃ nissāya aggālave cetiye viharanto kuṭikārasikkhāpadaṃ ārabha kathesi. Vatthu pana heṭṭhā **maṇikaṇṭhajātake** (jā. 1.3.7 ādayo) āgatameva. Idha pana satthā “saccaṃ kira tumhe, bhikkhave, yācanabahulā viññattibahulā viharathā”ti vatvā “āma, bhante”ti vutte te bhikkhū garahitvā “bhikkhave, porāṇakapaṇḍitā pathavissarena raññā pavāritāpi paṇṇacchattañca ekapaṭalikaṃ upāhanayugañca yācitukāmā hirottappabhedanabhayena mahājanamajjhe akathetvā raho kathayimsū”ti vatvā atītaṃ āhari.

Atīte kapilaratṭhe uttarapañcālanagare uttarapañcālarāje rajjaṃ kārente bodhisatto ekasmimṃ nigamagāme brāhmaṇakule nibbattitvā vayappatto takkasilāyaṃ sabbasippāni uggaṇhitvā aparabhāge tāpasapabbajjaṃ pabbajitvā himavante uñchācariyāya vanamūlaphalāphalena yāpento ciraṃ vasitvā loṇambilasevanatthāya manussapathaṃ vicaranto uttarapañcālanagaraṃ patvā rājuyyāne vasitvā punadivase bhikkhaṃ pariyesamāno nagaraṃ pavisitvā rājadvāraṃ sampāpuṇi. Rājā tassācāre ca vihāre ca pasīditvā mahātale nisīdāpetvā rājārahaṃ paṇṭabhojanaṃ bhojetvā paṭiññaṃ gahetvā uyyāneyeva vasāpesi. So nibaddhaṃ rājaghareyeva bhuñjanto vassānassa accayena himavantameva gantukāmo hutvā cintesi “mayhaṃ maggaṃ gacchantassa ekapaṭalikaṃ upāhanā ceva paṇṇacchattañca laddhuṃ vaṭṭati, rājānaṃ yācissāmī”ti. So ekadivasaṃ rājānaṃ uyyānaṃ āgantvā vanditvā nisinnaṃ disvā “upāhanañca chattañca yācissāmī”ti cintetvā puna cintesi “paraṃ ‘imaṃ nāma dehī’ti yācanto rodati nāma, paropi ‘natthī’ti vadanto paṭirodati nāma, ‘mā kho pana maṃ rodantaṃ mahājano addasa, mā rājāna’nti raho paṭicchannaṭṭhāne ubhopi roditvā tuñhī bhavissāmā”ti. Atha naṃ “mahārāja, raho paccāsīsāmī”ti āha. Rājā taṃ sutvā rājapurise apasakki. Bodhisatto “sace mayi yācante rājā na dassati, metti no bhijjissati, tasmā na yācissāmī”ti taṃ divasaṃ nāmaṃ gahetuṃ asakkonto “gaccha, tāva, mahārāja, punekadivasaṃ jānissāmī”ti āha.

Punekadivasaṃ rañño uyyānaṃ āgatakāle tatheva puna tathevāti evaṃ yācituṃ asakkontasseva dvādasa saṃvaccharāni atikkantāni. Tato rājā cintesi “mayhaṃ ayyo ‘mahārāja, raho paccāsīsāmī’ti vatvā parisāya apagatāya kiñci vattuṃ na visahati, vattukāmassevassa dvādasa vassāni atikkantāni, ciraṃ kho panassa brahmacariyaṃ carantassa ukkaṇṭhitvā bhoge bhuñjitukāmo rajjaṃ paccāsīsati maññe, rajjassa pana nāmaṃ gahetuṃ asakkonto tuñhī hoti, ajja dānissāhaṃ rajjaṃ ādiṃ katvā yaṃ icchati, taṃ dassāmī”ti. So uyyānaṃ gantvā vanditvā nisinna bodhisattena “raho paccāsīsāmī”ti vutte parisāya apagatāya taṃ kiñci vattuṃ asakkontaṃ āha “tumhe dvādasa vassāni ‘raho paccāsīsāmī’ti vatvā raho laddhāpi kiñci vattuṃ na sakkotha, ahaṃ vo rajjaṃ ādiṃ katvā sabbaṃ pavāremi, nibbhayā hutvā yaṃ vo ruccati, taṃ yācathā”ti. “Mahārāja, yamahaṃ yācāmi, taṃ dassasī”ti? “Dassāmi, bhante”ti. “Mahārāja, mayhaṃ maggaṃ gacchantassa ekapaṭalikaṃ upāhanā ca paṇṇacchattañca laddhuṃ vaṭṭati”ti. “Ettakaṃ, bhante, tumhe dvādasa saṃvaccharāni yācituṃ na sakkothā”ti. “Āma, mahārāja”ti. “Kiṃkāraṇā, bhante, evamakatthā”ti. “Mahārāja, ‘imaṃ nāma me dehī’ti yācanto rodati nāma, ‘natthī’ti vadanto paṭirodati nāma. ‘Sace tvaṃ mayā yācito na dadeyyāsi, taṃ no roditapaṭiroditāṃ nāma mahājano mā passatū’ti etadatthaṃ raho paccāsīsāmī”ti vatvā ādito tisso gāthā abhāsi –

89. “Dvayaṃ yācanako rāja, brahmadatta nigacchati;  
Alābhaṃ dhanalābhaṃ vā, evaṃdhammā hi yācanā.

90. “Yācanaṃ rodanaṃ āhu, pañcālānaṃ rathesabha;

Yo yācanaṃ paccakkhāti, tamāhu paṭirodanaṃ.

91. “Mā maddasaṃsu rodantaṃ, pañcālā susamāgatā;  
Tuvaṃ vā paṭirodantaṃ, tasmā icchāmahaṃ raho”ti.

Tattha **rāja brahmadattā**ti dvīhipi rājānaṃ ālapati. **Nigacchatī**ti labhati vindati. **Evaṃdhammā**ti evaṃsabhāvā. **Āhūti** paṇḍitā kathenti. **Pañcālānaṃ rathesabhāti** pañcālaratṭhassa issara rathapavara. **Yo yācanaṃ paccakkhāti**ti yo pana yaṃ yācanaṃ “natthi”ti paṭikkhipati. **Tamāhūti** taṃ paṭikkhipanaṃ “paṭirodana”nti vadanti. **Mā maddasaṃsūti** tava raṭṭhavāsino pañcālā susamāgatā maṃ rodantaṃ mā addasaṃsūti.

Rājā bodhisattassa gāvalakkhaṇe pasīdīvā vamaṃ dadamāno catutthaṃ gāthamāha –

92. “Dadāmi te brāhmaṇa rohiṇīnaṃ, gavaṃ sahasaṃ saha puṅgavena;  
Ariyo hi ariyassa kathaṃ na dajjā, sutvāna gāthā tava dhammayuttā”ti.

Tattha **rohiṇīnanti** rattavaṇṇānaṃ. **Ariyoti** ācārasampanno. **Ariyassāti** ācārasampannassa. **Kathaṃ na dajjāti** kena kāraṇena na dadeyya. **Dhammayuttāti** kāraṇayuttā.

Bodhisatto pana “nāhaṃ, mahārāja, vatthukāmehi atthiko, yaṃ ahaṃ yācāmi, tadeva me dehī”ti ekaṇḍalīkā upāhanā ca paṇṇacchattañca gahetvā “mahārāja, appamatto hohi, dānaṃ dehi, sīlaṃ rakkhāhi, uposathakammaṃ karohī”ti rājānaṃ ovadivā tassa yācantaṃseva himavantameva gato. Tattha abhiññā ca samāpattiyo ca nibbattetvā brahmalokaparāyaṇo ahoṣi.

Satthā imaṃ dhammadesanaṃ āharitvā jātaṃ samodhānesi – “tadā rājā ānando ahoṣi, tāpaso pana ahameva ahoṣi”nti.

Brahmadattajātakavaṇṇanā tatiyā.

[324] 4. Cammasātakajātakavaṇṇanā

**Kalyāṇarūpo vatayanti** idaṃ satthā jetavane viharanto cammasātakam nāma paribbājakaṃ ārabha katesi. Tassa kira cammameva nivāsanañca pārupanañca hoti. So ekadivasam paribbājakārāmā nikkhamitvā sāvattiyaṃ bhikkhāya caranto eḷakānaṃ yujjhanaṭṭhānaṃ sampāpuṇi. Eḷako taṃ disvā paharitukāmo osakki. Paribbājako “esa mayhaṃ apacitiṃ dasseti”ti na paṭikkami. Eḷako vegenāgantvā taṃ ūrumhi paharivā pātesi. Tassa taṃ asantapaggahaṇakāraṇaṃ bhikkhusaṅghe pākātaṃ ahoṣi. Bhikkhū dhammasabhāyaṃ kathaṃ samuṭṭhāpesuṃ “āvuso, cammasātakaparibbājako asantapaggahaṃ katvā vināsaṃ patto”ti satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepesa asantapaggahaṃ katvā vināsaṃ pattoyevā”ti vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto ekasmiṃ vāṇijakule nibbattitvā vayappatto vaṇijjaṃ karoti. Tadā eko cammasātakaparibbājako bārāṇasiyaṃ bhikkhāya caranto eḷakānaṃ yujjhanaṭṭhānaṃ patvā eḷakaṃ osakkantaṃ disvā “apacitiṃ me karotī”ti saññāya apaṭikkamitvā “imesaṃ ettakānaṃ manussaṇaṃ antare ayaṃ eko eḷako amhākaṃ guṇaṃ jānāti”ti tassa aṅjalim paggahetvā ṭhitova paṭhamam gāthamāha –

93. “Kalyāṇarūpo vatayaṃ catuppado, subhaddako ceva supesalo ca;  
Yo brāhmaṇaṃ jātimantūpapannaṃ, apacāyati meṇḍavaro yasassī”ti.

Tattha **kalyāṇarūpoti** kalyāṇajātiko. **Supesaloti** suṭṭhu piyasīlo. **Jātimantūpapannanti** jātiyā ca mantehi ca sampannaṃ. **Yasassīti** vaṇṇabhaṇanametaṃ.

Tasmim̄ khāṇe āpaṇe nisinno paṇḍitavāṇiḷo taṃ paribbājakamaṃ nisedhento dutiyaṃ gāthamāha –

94. “Mā brāhmaṇa ittaradassanena, vissāsamaṃpajji catuppadassa;  
Daḷhappahāraṃ abhikaṅkhamāno, avasakkatī dassatī suppahāra”nti.

Tattha **ittaradassanenā**ti khaṇikadassanena.

Tassa paṇḍitavāṇiḷassa kathentasseva so meṇḍako vegenāgantvā ūrumhi paharivā taṃ tattheva vedanāppattaṃ katvā pātesi. So paridevamāno nipajji. Satthā taṃ kāraṇaṃ pakāsento tatiyaṃ gāthamāha –

95. “Ūruṭṭhi bhaggaṃ vaṭṭito khāribhāro, sabbaṅca bhaṇḍaṃ brāhmaṇassa bhinnaṃ;  
Ubhopi bāhā paggayha kandati, atidhāvatha haññate brahmacārī”ti.

Tassattho – bhikkhave, tassa paribbājakassa ūruṭṭhikaṃ bhaggaṃ, khāribhāro vaṭṭito pavaṭṭito, tasmim̄ pavaṭṭamāne yaṃ tattha tassa brāhmaṇassa upakaraṇabhaṇḍaṃ, tampi sabbaṃ bhinnaṃ, sopi ubho bāhā ukkhipitvā parivāretvā ṭhitapariṣaṃ sandhāya “abhidhāvatha, haññate brahmacārī”ti vadanto kandati rodati paridevatīti.

Paribbājako catutthaṃ gāthaṃ āha –

96. “Evaṃ so nihato seti, yo apūjaṃ pasamsati;  
Yathāhamajja pahato, hato meṇḍena dummatī”ti.

Tattha **apūjanti** apūjanīyaṃ. **Yathāhamajjāti** yathā ahaṃ ajja asantapaggahaṃ katvā ṭhito meṇḍena daḷhappahārena pahato ettheva mārito. **Dummatī**ti duppañño. Evaṃ yo aññoṇi asantapaggahaṃ karissati, sopi ahaṃ viya dukkhaṃ anubhavissatīti so paridevanto tattheva jīvitakkhayaṃ pattoti.

Satthā imaṃ dhammadesanaṃ āharivā jātakamaṃ samodhānesi – “tadā cammasāṭako etarahi cammasāṭako ahosi, paṇḍitavāṇiḷo pana ahameva ahosi”nti.

Cammasāṭakajātakavaṇṇanā catutthā.

[325] 5. Godharājajātakavaṇṇanā

**Samaṇaṃ taṃ maññamānoti** idaṃ satthā jetavane viharanto ekaṃ kuhakaṃ bhikkhuṃ ārabba katesi. Vatthu heṭṭhā vitthāritameva. Idhāpi bhikkhū taṃ bhikkhuṃ ānetvā “ayaṃ, bhante, bhikkhu kuhako”ti satthu dassesaṃ. Satthā “na, bhikkhave, idāneva, pubbepesa kuhakoyevā”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto godhayoniyamaṃ nibbattitvā vayappatto kāyabalena sampanno araṇṇe vasati. Eko dusīlatāpasopi tassa avidūre paṇṇasālaṃ māpetvā vāsaṃ kappesi. Bodhisatto gocarāya caranto taṃ disvā “sīlavantatāpasassa paṇṇasālā bhavissatī”ti tattha gantvā taṃ vanditvā attano vasanaṭṭhānameva gacchati. Athekadivasaṃ so kūṭatāpaso upaṭṭhākakule sampāditaṃ madhuramaṃsaṃ labhitvā “kiṃ maṃsaṃ nāmeta”nti pucchitvā “godhamamsa”nti sutvā rasataṅhāya abhibhūto “mayhaṃ assamaṃpadaṃ nibaddhaṃ āgacchamānaṃ godhaṃ māretvā yathārucci pacitvā khādissāmī”ti sappidadhikaṭukabhaṇḍādīni gahetvā tattha gantvā muggaraṃ gahetvā kāsāvena paṭicchādetvā bodhisattassa āgamaṃ olokento paṇṇasāladvāre upasantūpasanto viya nisīdi.

So āgantvā taṃ paduṭṭhindriyaṃ disvā “iminā amhākaṃ sajjātikamaṃsaṃ khāditaṃ bhavissati, pariggaṇhissāmī na”nti adhovāte ṭhatvā sarīragandhaṃ ghāyitvā sajjātimaṃsassa khāditaḷhāvaṃ ñatvā

tāpasam anupagamma paṭikkamitvā cari. Tāpasopi tassa anāgamanabhāvaṃ ñatvā muggaraṃ khiṇi, muggaro sarīre apatitvā naṅguṭṭhakoṭiṃ pāpuṇi. Tāpaso “gaccha viraddhosmī”ti āha. Bodhisatto “maṃ tāva viraddhosi, cattāro pana apāye na viraddhosī”ti vatvā palāyitvā caṅkamanakoṭiyam ʔhitam vammikaṃ pavisitvā aññaena chiddena sīsam nīharitvā tena saddhiṃ sallapanto dve gāthā abhāsi –

97. “Samaṇam taṃ maññaṃāno, upagacchimasaññaṃtaṃ;  
So maṃ daṇḍena pāhāsi, yathā assamaṇo tathā.

98. “Kiṃ te jaṭāhi dummedha, kiṃ te ajinasāṭiyā;  
Abbhantaram te gahanam, bāhiram parimajjasi”ti.

Tattha **asaññaṃ**taṃ ahaṃ kāyādīhi asaññaṃtaṃ assamaṇameva samānaṃ taṃ “samaṇo eso”ti samitapāpatāya samaṇam maññaṃāno upagacchiṃ. **Pāhāsīti** pahari. **Ajinasāṭiyā**ti ekamsam katvā pārutena ajinacammaena tuyham ko attho. **Abbhantaram te gahananti** tava sarīrabbhantaram visapūrā viya alābu, gūthapūro viya āvāto, āsīvisapūro viya vammiko kilesagahanam. **Bāhiranti** kevalam bahisarīram **parimajjasi**, taṃ antopharusatāya bahimatṭhatāya hatthilaṇḍam viya assalaṇḍam viya ca hotīti.

Taṃ sutvā tāpaso tatiyam gāthamāha –

99. “Ehi godha nivattassu, bhuñja sālīnamodanam;  
Telaṃ loṇaṇca me atthi, pahūtam mayha pipphalī”ti.

Tattha **pahūtam mayha pipphalī**ti na kevalam sālīnamodanam telaloṇameva, hiṅgujīrakasiṅgiveralasuṇamaricapipphalippabhedam kaṭukabhaṇḍampi mayham bahu atthi, tenābhisankhataṃ sālīnamodanam bhuñjāhīti.

Taṃ sutvā bodhisatto catuttham gāthamāha –

100. “Esa bhiyyo pavekkhāmi, vammikaṃ sataporisam;  
Telaṃ loṇaṇca kittesi, ahitam mayha pipphalī”ti.

Tattha **pavekkhāmī**ti pavisissāmi. **Ahīti** yaṃ etaṃ tava kaṭukabhaṇḍasaṅkhātam pipphali, etaṃ mayham ahitam asappāyanti.

Evaṇca pana vatvā “are, kūṭajaṭila, sace idha vasissasi, gocaragāme manusseheva taṃ ‘ayam coro’ti gāhāpetvā vippekāram pāpessāmi, sīgham palāyassū”ti santajjesi. Kūṭajaṭilo tato palāyi.

Satthā imaṃ dhammadesanaṃ āharitvā jātakam samodhānesi – “tadā kūṭajaṭilo ayam kuhakabhikkhu ahosi, godharājā pana ahameva ahosi”nti.

Godharājajātakavaṇṇanā pañcamā.

[326] 6. Kakkārujātakavaṇṇanā

**Kāyena yo nāvahareti** idaṃ satthā veḷuvane viharanto devadattam ārabba kathesi. Tassa hi saṅgham bhinditvā gatassa aggasāvakehi saddhiṃ parisāya pakkantāya uṇham lohitaṃ mukhato uggañchi. Atha bhikkhū dhammasabhāyam katham samutṭhāpesuṃ “āvuso, devadatto musāvādam katvā saṅgham bhinditvā idāni gilāno hutvā mahādukkham anubhotī”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepesa musāvādīyeva, na cesa idāneva musāvādam katvā mahādukkham anubhoti, pubbepi anubhosiyevā”ti vatvā atūtam āhari.



Atīte bārānasiyaṃ brahmadatte rajjaṃ kārente bodhisatto tāvatīṃsabhavane aññataro devaputto ahosi. Tena kho pana samayena bārānasiyaṃ mahāussavo ahosi. Bahū nāgā ca supañṇā ca bhūmaṭṭhakā ca devā āgantvā ussavāṃ olokayīṃsu. Tāvatiṃsabhavanatopi cattāro devaputtā kakkārūni nāma dibbapupphāni tehi katacumbaṭakaṃ piḷandhitvā ussavadassanaṃ āgamiṃsu. Dvādasayojanikaṃ bārānasinagaraṃ tesāṃ pupphānaṃ gandhena ekagandhaṃ ahosi. Manussā “imāni pupphāni kena piḷandhitāni”ti upadhārentā vicaranti. Te devaputtā “amhe ete upadhārentī”ti ñatvā rājaṅgaṇe uppatitvā mahantena devānubhāvena ākāse aṭṭhaṃsu. Mahājano sannipati, rājāpi saddhiṃ uparājādīhi agamāsi. Atha ne “kataradevalokato, sāmi, āgacchathā”ti pucchīṃsu. “Tāvatiṃsadevalokato āgacchāmā”ti. “Kena kammaena āgatathā”ti. “Ussavadassanathāyā”ti. “Kiṃpupphāni nāmetāni”ti? “Dibbakakkārūpupphāni nāmā”ti. “Sāmi, tumhe devaloke aññāni piḷandheyyātha, imāni ambhākaṃ dethā”ti. Devaputtā “dibbakakkārūpupphāni mahānubhāvāni devānaññeva anucchavikāni, manussaloke lāmakānaṃ duppaññānaṃ hīnādhiṃuttikānaṃ dussīlānaṃ nānucchavikāni. Ye pana manussā imehi ca imehi ca guṇehi samannāgatā, tesāṃ etāni anucchavikāni”ti āhaṃsu.

Evañca pana vatvā tesu jeṭṭhakadevaputto paṭhamaṃ gāthamāha –

**101.** “Kāyena yo nāvahare, vācāya na musā bhāṇe;  
Yaso laddhā na majjeyya, sa ve kakkārūmarahatī”ti.

Tassattho – yo kāyena parassa santakaṃ tiṇasalākampi nāvaharati, vācāya jīvitāṃ pariccajamānopi musāvādaṃ na bhāṇati. Desanāsīsamevetāṃ, kāyadvāravacīdvāramanodvārehi pana yo dasapi akusalakammaṃ paṭhe na karotīti ayamettha adhippāyo. **Yaso laddhāti** issariyañca labhitvā yo issariyamadamatto satīṃ vissajjetvā pāpakammaṃ na karotī, sa ve evarūpo imehi guṇehi yutto puggalo imaṃ dibbapupphaṃ arahati. Tasmā yo imehi guṇehi samannāgato, so imāni pupphāni yācituṃ arahati, tassa dassāmīti.

Taṃ sutvā purohito cintesi “mayhaṃ imesu guṇesu ekopi natthi, musāvādaṃ pana vatvā etāni pupphāni gahetvā piḷandhissāmi, evaṃ maṃ mahājano ‘guṇasampanno aya’nti jānissatī”ti. So “ahaṃ etehi guṇehi samannāgato”ti vatvā tāni pupphāni āharāpetvā piḷandhitvā dutiyaṃ devaputtaṃ yāci. So dutiyaṃ gāthamāha –

**102.** “Dhammena vittameseyya, na nikatyā dhanāṃ hare;  
Bhoge laddhā na majjeyya, sa ve kakkārūmarahatī”ti.

Tassattho – dhammena parisuddhājīvena suvaṇṇarajatādivittāṃ pariyeseyya. **Na nikatyāti** na vañcanāya dhanāṃ hareyya, vatthābharāṇādike bhoge labhitvā pamādaṃ nāpajjeyya, evarūpo imāni pupphāni arahatīti.

Purohito “ahaṃ etehi guṇehi samannāgato”ti vatvā tāni āharāpetvā piḷandhitvā tatiyaṃ devaputtaṃ yāci. So tatiyaṃ gāthamāha –

**103.** “Yassa cittaṃ ahāliddaṃ, saddhā ca avirāginī;  
Eko sādumaṃ na bhūñjeyya, sa ve kakkārūmarahatī”ti.

Tassattho – yassa puggalassa cittaṃ ahāliddaṃ haliddirāgo viya khippaṃ na virajjati, thirameva hoti. **Saddhā ca avirāginīti** kammaṃ vā vipākaṃ vā okappaṇiyassa vā puggalassa vacanaṃ saddahitvā appamattakeneva na virajjati na bhijjati. Yo yācake vā aññe vā saṃvibhāgārahe puggale bahi katvā ekakova sādurasabhojanaṃ na bhūñjati, nesāṃ saṃvibhajitvā bhūñjati, so imāni pupphāni arahatīti.

Purohito “ahaṃ etehi guṇehi samannāgato”ti vatvā tāni pupphāni āharāpetvā piḷandhitvā catutthaṃ devaputtaṃ yāci. So catutthaṃ gāthamāha –

**104.** “Sammukhā vā tirokkhā vā, yo sante na paribhāsati;  
Yathāvādī tathākārī, sa ve kakkārumarahatī”ti.

Tassattho – yo puggalo sammukhā vā parammukhā vā sīlādiguṇayutte sante uttamapaṇḍitapurise na akkosati na paribhāsati, yaṃ vācāya vadati, tadeva kāyena karoti, so imāni pupphāni arahatīti.

Purohito “ahaṃ etehi guṇehi samannāgato”ti vatvā tānipi āharāpetvā piḷandhi. Cattāro devaputtā cattāri pupphacumbaṭakāni purohitassa datvā devalokameva gatā. Tesam gatakāle purohitassa sīse mahatī vedanā uppajji, tikhiṇasikharena nimmathitaṃ viya ca ayapaṭṭena pīlitaṃ viya ca sīsam ahoṣi. So vedanāppatto aparāparam parivattamāno mahāsaddena viravi, “kimeta”nti ca vutte “ahaṃ mamabbhantare avijjamāneyeva guṇe ‘atthī’ti musāvādaṃ katvā te devaputte imāni pupphāni yāciṃ, harathetāni mama sīsato”ti āha. Tāni harantāpi harituṃ nāsakkhiṃsu, ayapaṭṭena baddhāni viya ahesuṃ. Atha naṃ ukkhipitvā gehaṃ nayiṃsu. Tattha tassa viravantassa satta divasā vītivattā.

Rājā amacce āmantetvā “dussīlabrāhmaṇo marissati, kiṃ karomā”ti āha. “Deva, puna ussavaṃ kārema, devaputtā puna āgacchissantī”ti. Rājā puna ussavaṃ kāresi. Devaputtā puna āgantvā sakalanagaraṃ pupphagandhena ekagandhaṃ katvā tatheva rājanāgāṇe aṭṭhaṃsu, mahājano sannipatitvā dussīlabrāhmaṇaṃ ānetvā tesam purato uttānaṃ nipajjāpesi. So “jīvitaṃ me detha, sāmī”ti devaputte yāci. Devaputtā “tuyhaṃ dussīlassa pāpadhammassa ananucchavikānevetāni pupphāni, tvaṃ pana ‘amhe vañcessāmī’ti saññī ahoṣi, attano musāvādaphalaṃ laddha”nti mahājanamajjhe dussīlabrāhmaṇaṃ garahitvā sīsato pupphacumbaṭakaṃ apantvā mahājanassa ovādaṃ datvā sakaṭṭhānameva agamaṃsu.

Satthā imaṃ dhammaḍḍanaṃ āharitvā jātaṃ samodhānesi – “tadā brāhmaṇo devadatto ahoṣi, tesu devaputtesu eko kassapo, eko moggallāno, eko sārīputto, jeṭṭhakadevaputto pana ahameva ahoṣi”nti.

Kakkārujātakavaṇṇanā chaṭṭhā.

[327] 7. Kākavatījātakavaṇṇanā

**Vāti cāyaṃ tato gandhoti** idaṃ satthā jetavane viharanto ekaṃ ukkaṇṭhitabhikkhuṃ ārabha katesi. Tadā hi satthā taṃ bhikkhuṃ “saccaṃ kira tvaṃ bhikkhu ukkaṇṭhitosī”ti pucchi. “Saccaṃ, bhante”ti. “Kasmā ukkaṇṭhitosī”ti? “Kilesavasena, bhante”ti. “Bhikkhu mātugāmo nāma arakkhiyo, na sakkā rakkhituṃ, porāṇakapaṇḍitā pana mātugāmaṃ mahāsamuddamajjhe simbalirukkhavimāne vasāpentāpi rakkhituṃ nāsakkhiṃsū”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto tassa aggamaḥesiyā kucchismiṃ nibbattitvā vayappatto pitu accayena rajjaṃ kāresi. Kākavatī nāmassa aggamaḥesī ahoṣi abhirūpā devaccharā viya. Ayamettha saṅkhepo, vitthārato pana atītavatthu **kuṇāljātaka** (jā. 2.21.kuṇāljātaka) āvi bhavissati. Tadā paneko supaṇṇarājā manussavesena āgantvā raññā saha jūtaṃ kiḷanto kākavatiyā aggamaḥesiyā paṭibaddhacitto taṃ ādāya supaṇṇabhavanaṃ netvā tāya saddhiṃ abhirami. Rājā devim apassanto naṭakuveraṃ nāma gandhabbaṃ “tvaṃ vicināhi na”nti āha. So taṃ supaṇṇarājānaṃ pariggahetvā ekasmiṃ sare erakavane nipajjitvā tato supaṇṇassa gamanakāle pattantare nisīditvā supaṇṇabhavanaṃ patvā pattantarato nikkhamitvā tāya saddhiṃ kilesasamsaggam katvā puna tasseva pattantare nisinnō āgantvā supaṇṇassa raññā saddhiṃ jūtakiḷānakāle attano vīṇaṃ gahetvā jūtaṃḍalaṃ gantvā rañño santike ṭhito gītavasena paṭhamaṃ gāthamāha –

**105.** “Vāti cāyaṃ tato gandho, yattha me vasatī piyā;  
Dūre ito hi kākavatī, yattha me nirato mano”ti.

Tattha **gandhoti** tassā dibbagandhavitāyā sarīragandho. **Yattha meti** yattha supaṇṇabhavane

mama piyā vasati, tato iminā saddhiṃ katakāyasaṃsaggāya tassā imassa kāyena saddhiṃ āgato gandho vāyatīti adhippāyo. **Dūre itoti** imamhā ṭhānā dūre. **Hi-kāro** nipātamatto. **Kākavatīti** kākavatī devī. **Yattha meti** yassā upari mama mano nirato.

Taṃ sutvā supaṇṇo dutiyaṃ gāthamāha –

**106.** “Kathaṃ samuddamatarī, kathaṃ atari kepukaṃ;  
Kathaṃ satta samuddāni, kathaṃ simbalimāruhi”ti.

Tassattho – tvaṃ imaṃ jambudīpasamuddaṃ tassa parato kepukaṃ nāma nadiṃ pabbatantaresu ṭhitāni satta samuddāni ca kathaṃ atari, kenupāyena tiṇṇo satta samuddāni atikkamitvā ṭhitaṃ amhākaṃ bhavanaṃ simbalirukkhañca kathaṃ āruhi.

Taṃ sutvā naṭakuvero tatiyaṃ gāthamāha –

**107.** “Tayā samuddamatarim, tayā atari kepukaṃ;  
Tayā satta samuddāni, tayā simbalimāruhi”nti.

Tattha **tayāti** tayā karaṇabhūtena tava pattantare nisinno ahaṃ sabbametaṃ akāsinti attho.

Tato supaṇṇarājā catutthaṃ gāthamāha –

**108.** “Dhiratthu maṃ mahākāyaṃ, dhiratthu maṃ acetanaṃ;  
Yattha jāyāyaṃ jāraṃ, āvahāmi vahāmi cā”ti.

Tattha **dhiratthu manti** attānaṃ garahanto āha. **Acetananti** mahāsarīratāya lahubhāvagarubhāvassa ajānanatāya acetanaṃ. **Yatthāti** yasmā. Idaṃ vuttaṃ hoti – yasmā ahaṃ attano jāyāya jāraṃ imaṃ gandhabbaṃ pattantare nisinnaṃ ānento āvahāmi nento ca vahāmi, tasmā dhiratthu manti. So taṃ ānetvā bārāṇasirañño datvā puna nagaraṃ nāgamāsi.

Satthā imaṃ dhammadesanaṃ āharitvā saccāni pakāsetvā jātaṃ samodhānesi, saccapariyosāne ukkaṇṭhitabhikkhu sotāpattiphale patiṭṭhahi. Tadā naṭakuvero ukkaṇṭhitabhikkhu ahosi, rājā pana ahameva ahosinti.

Kākavatījātakavaṇṇanā sattamā.

[328] 8. Ananusociyajātakavaṇṇanā

**Bahūnaṃ vijjati bhotīti** idaṃ satthā jetavane viharanto ekaṃ matabhariyaṃ kuṭumbikaṃ ārabha katesi. So kira bhariyāya matāya na nhāyi na pivi na limpi na bhuñji, na kammante payojesi, aññadatthu sokābhībhūto ālāhanaṃ gantvā paridevamāno vicari. Abbhantare panassa kuṭe padīpo viya sotāpattimaggassa upanissayo jalati. Satthā paccūsamāyē lokaṃ olokeno taṃ disvā “imassa maṃ ṭhapetvā añño koci sokaṃ nīharitvā sotāpattimaggassa dāyako natthi, bhavissāmi avassayo”ti pacchābhattaṃ piṇḍapātaṭikkanto pacchāsamaṇaṃ ādāya tassa gehadvāraṃ gantvā kuṭumbikena sutāgamano katapaccuggamanādisakkāro paññattāsane nisinno kuṭumbikaṃ āgantvā vanditvā ekamantaṃ nisinnaṃ “kiṃ, upāsaka, cintesi”ti pucchitvā “āma, bhante, bhariyā me kālakatā, tamahaṃ anusocanto cintemi”ti vutte “upāsaka, bhijjanadhammaṃ nāma bhijjati, tasmim bhinne na yuttaṃ cintetuṃ, porāṇakapaṇḍitāpi bhariyāya matāya ‘bhijjanadhammaṃ bhijjati’ti na cintayimsū”ti vatvā tena yācito atītaṃ āhari. Atītavatthu dasakanipāte **cūlabodhijātake** (jā. 1.10.49 ādayo) āvi bhavissati, ayaṃ panettha saṅkhepo.

Atīte bārāṇasiyaṃ brahmadatte rajjaṃ kārente bodhisatto brāhmaṇakule nibbattitvā vayappatto

takkasilāyaṃ sabbasippāni uggaṇhitvā mātāpitūnaṃ santikaṃ agamāsi. Imasmim jātaka bodhisatto komārabrahmacārī ahoṣi. Athassa mātāpitāro “tava dārikapariyesanaṃ karomā”ti ārocayimṣu. Bodhisatto “na mayhaṃ gharāvāsenattho, ahaṃ tumhākaṃ accayena pabbajissāmi”ti vatvā tehi punappunaṃ yācīto ekaṃ kañcanarūpakaṃ kāretvā “evarūpaṃ kumārikaṃ labhamāno gaṇhissāmi”ti āha. Tassa mātāpitāro taṃ kañcanarūpakaṃ paṭicchannayāne āropetvā “gacchatha jambudīpatalaṃ vicarantā yattha evarūpaṃ brāhmaṇakumārikaṃ passatha, tattha imaṃ kañcanarūpakaṃ datvā taṃ ānethā”ti mahantena parivārena manusse pesesum.

Tasmim pana kāle eko puñṇavā satto brahmalokato cavitvā kāsiraṭṭheyeva nigamaḡāme asītkoṭivibhavassa brāhmaṇassa gehe kumārikā hutvā nibbatti, “sammillahāsini”tissā nāmaṃ akaṃsu. Sā soḷasavassakāle abhirūpā ahoṣi pāsādikā devaccharappaṭibhāḡā sabbaṅgasampannā. Tassāpi kilesavasena cittaṃ nāma na uppannapubbaṃ, accantabrahmacārīni ahoṣi. Kañcanarūpakaṃ ādāya vicarantā manussā taṃ ḡāmaṃ pāpuṇimṣu. Tattha manussā taṃ disvā “asukabrāhmaṇassa dhītā sammillahāsiniṃ kiṃkāraṇā idha ṭhitā”ti āhaṃsu. Manussā taṃ sutvā brāhmaṇakulaṃ gantvā sammillahāsiniṃ vāresum. Sā “ahaṃ tumhākaṃ accayena pabbajissāmi, na me gharāvāsenattho”ti mātāpitūnaṃ sāsanam pesesi. Te “kiṃ karosi kumārike”ti vatvā kañcanarūpakaṃ gahetvā taṃ mahantena parivārena pesayimṣu. Bodhisattassa ca sammillahāsiniyā ca ubhinnampi anicchantaṇaṇṇeva maṅgalaṃ kariṃsu. Te ekagabbhe vasamānā ekasmim sayane sayantāpi na añṇamañṇaṃ kilesavasena olokayimṣu, dve bhikkhū dve brāhmāno viya ca ekasmim ṭhāne vasimṣu.

Aparabhāḡe bodhisattassa mātāpitāro kālamakaṃsu. So tesam sarīrakiccaṃ katvā sammillahāsiniṃ pakkosāpetvā “bhadde, mama kulasantakā asītkoṭiyō, tava kulasantakā asītkoṭiyoti imaṃ ettakaṃ dhanam gahetvā imaṃ kuṭumbaṃ paṭipajjāhi, ahaṃ pabbajissāmi”ti āha. “Ayyaputta, tayi pabbajante ahampi pabbajissāmi, na sakkomi taṃ jahitu”nti. “Tena hi ehi”ti sabbaṃ dhanam dānamukhe vissajjetvā khelaṇḡaṃ viya sampattim pahāya himavantaṃ pavisitvā ubhopi tāpasapabbajjam pabbajitvā vanamūlaphalāhārā tattha ciram vasitvā loṇambilasevanatthāya himavantā otaritvā anupubbena bārāṇasiṃ patvā rājuyyāne vasimṣu.

Tesam tattha vasantānaṃ sukhumālāya paribbājikāya nirojam missakabhattaṃ paribhuṇḡantiyā lohitaṃpakhandikābādho uppajji. Sā sappāyabhesajjam alabhamānā dubbalā ahoṣi. Bodhisatto bhikkhācāraṇelāya taṃ pariggahetvā nagaradvāraṃ netvā ekissā sālāya phalake nipajjāpetvā sayam bhikkhāya pāvīsi. Sā tasmim anikkhanteyeva kālamakāsi. Mahājano paribbājikāya rūpasampattim disvā parivāretvā rodati paridevati. Bodhisatto bhikkham caritvā āgato tassā matabhāvaṃ ṇatvā “bhijjanadhammaṃ bhijjati, sabbe saṅkhārā aniccā evaṃḡatikāyevā”ti vatvā tāya nipannaphalakeyeva nisīditvā missakabhojanaṃ bhuṇḡitvā mukham vikkhālesi. Parivāretvā ṭhitamahājano “ayaṃ te, bhante, paribbājikā kiṃ hoti”ti pucchi. “ḡihikāle me pādapariḡarikā ahoṣi”ti. “Bhante, mayam tāva na saṅṭhāma rodāma paridevāma, tumhe kasmā na rodathā”ti? Bodhisatto “jīvamānā tāva esā mama kiṅci hoti, idāni paralokasamaṅḡitāya na kiṅci hoti, maraṇavasam ḡatā, ahaṃ kissa rodāmi”ti mahājanassa dhammaṃ desento imā ḡathā abhāsi –

109. “Bahūnaṃ vijjati bhoti, tehi me kiṃ bhavissati;  
Tasmā etaṃ na socāmi, piyaṃ sammillahāsiniṃ.
110. “Taṃ taṃ ce anusoceyya, yaṃ yaṃ tassa na vijjati;  
Attānamanusoceyya, sadā maccuvasam patam.
111. “Na heva ṭhitaṃ nāsīnaṃ, na sayānaṃ na paddhagum;  
Yāva byāti nimisati, tatrāpi rasatī vayo.
112. “Tatthattani vatappaddhe, vinābhāve asaṃsaye;  
Bhūtam sesam dayitabbaṃ, vītam ananusociya”nti.

Tattha **bahūnaṃ vijjati bhotī** ayam bhotī amhe chaḍḍetvā idāni aññesaṃ bahūnaṃ matakasattānaṃ antare vijjati atthi upalabbhati. **Tehi me kiṃ bhavissatī** tehi matakasattehi saddhiṃ vattamānā idānevesā mayhaṃ kiṃ bhavissati, tehi vā matakasattehi atirekasambandhavasenesā mayhaṃ kiṃ bhavissati, kā nāma bhavissati, kiṃ bhariyā, udāhu bhaginīti? “Tehi meka”ntipi pāṭho, tehi matakahehi saddhiṃ idampi me kaḷevaraṃ ekaṃ bhavissatīti attho. **Tasmāti** yasmā esā matakesu saṅkhaṃ gatā, mayhaṃ sā na kiñci hoti, tasmā etaṃ na socāmi.

**Yaṃ yaṃ tassāti** yaṃ yaṃ tassa anusocanakassa sattassa na vijjati natthi, mataṃ niruddhaṃ, taṃ taṃ sace anusoceyyāti attho. “Yassā”tipi pāṭho, yaṃ yaṃ yassa na vijjati, taṃ taṃ so anusoceyyāti attho. **Maccuvasaṃ patanti** evaṃ sante niccaṃ maccuvasaṃ patantaṃ gacchantaṃ attānameva anusoceyya, tenassa asocanakāloyeva na bhaveyyāti attho.

Tatiyagāthāya **na heva ʃhitam nāsīnaṃ, na sayānaṃ na paddhagunti** kañci sattaṃ āyusaṅkhāro anugacchatīti pāṭhaseso. Tattha **paddhagunti** parivattetvā caramānaṃ. Idaṃ vuttaṃ hoti – ime sattā catūsipi iriyāpathesu pamattā viharanti, āyusaṅkhārā pana rattiñca divā ca sabbiriyāpathesu appamattā attano khayagamanakammameva karontīti. **Yāva byātīti** yāva ummisati. Ayañhi tasmim kāle vohāro. Idaṃ vuttaṃ hoti – yāva ummisati ca nimisati ca, tatrāpi evaṃ appamattake kāle imesaṃ sattānaṃ **rasatī vayo**, tīsu vayesu so so vayo hāyateva na vaḍḍhatīti.

**Tatthattani vatappaddheti** tattha vata attani paddhe. Idaṃ vuttaṃ hoti tasmim vata evaṃ rasamāne vaye ayam “attā”ti saṅkhyam gato attabhāvo paddho hoti, vayena aḍḍho upaḍḍho aparipuṇṇova hoti. Evaṃ tattha imasmim attani paddhe yo cesa tattha tattha nibbattānaṃ sattānaṃ vinābhāvo asaṃsayo, tasmim **vinābhāvepi asaṃsaye** nissaṃsaye yaṃ **bhūtaṃ sesaṃ** amataṃ jīvamānaṃ, taṃ jīvamānameva **dayitabbaṃ** piyāyitabbaṃ mettāyitabbaṃ, “ayam satto arogo hotu abyāpajjo”ti evaṃ tasmim mettābhāvanā kātabbā. Yaṃ panetaṃ **vītaṃ** vigataṃ mataṃ, taṃ **ananusociyaṃ** na anusocitabbanti.

Evaṃ mahāsatto catūhi gāthāhi aniccākāraṃ dīpento dhammaṃ desesi. Mahājano paribbājikāya sarīrakiccaṃ akāsi. Bodhisatto himavantameva pavisitvā jhānābhīññāsamāpattiyo nibbattetvā brahmalokaparāyaṇo ahosi.

Satthā imaṃ dhammadešanaṃ āharitvā saccāni pakāsetvā jātakam samodhānesi, saccapariyosāne kuṭumbiko sotāpattiphale patiṭṭhahi. Tadā sammillahāsini rāhulamātā ahosi, tāpaso pana ahameva ahosinti.

Ananusociyajātakavaṇṇanā aṭṭhamā.

[329] 9. Kāḷabāhujātakavaṇṇanā

**Yaṃ annapānassāti** idaṃ satthā veḷuvane viharanto hatalābhasakkāraṃ devadattaṃ ārabha katesi. Devadattena hi tathāgate aṭṭhānakopaṃ bandhitvā dhanuggahesu payojitesu nālāgirivissajjanena tassa doso pākaṭo jāto. Athassa paṭṭhapitāni dhuvabhaddāni manusssā na karimso, rājāpi naṃ na olokesi. So hatalābhasakkāro kulesu viññāpetvā bhuñjanto vicari. Bhikkhū dhammasabhāyaṃ kathaṃ samuṭṭhāpesuṃ “āvuso, devadatto ‘lābhasakkāraṃ uppādessāmī’ti uppannampi thiraṃ kātuṃ nāsakkhī”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepesa hatalābhasakkāro ahosī”ti vatvā atītaṃ āhari.

Atīte bārānasiyaṃ dhanañjaye rajjaṃ kārente bodhisatto rādho nāma suko ahosi mahāsarīro paripuṇṇagatto, kaniṭṭho panassa poṭṭhapādo nāma. Eko luddako te dvepi jane bandhitvā netvā bārānāsirañño adāsi. Rājā ubhopi te suvaṇṇapañjare pakkhipitvā suvaṇṇataṭṭakena madhulāje khādāpento sakkharodakaṃ pāyento paṭijaggi. Sakkāro ca mahā ahosi, lābhaggayasaggappattā ahesuṃ. Atheko vanacarako kāḷabāhuṃ nāmekam mahākālamakkaṭam ānetvā bārānāsirañño adāsi. Tassa pacchā

āgatattā mahantataro lābhasakkāro ahosi, sukānaṃ parihāyi. Bodhisatto tādilakkhaṇayogato na kiñci āha, kaniṭṭho panasssa tādilakkhaṇābhāvā taṃ makkaṭassa sakkāraṃ asahanto “bhātika, pubbe imasmiṃ rājakule sādhuṃsakhādānīyādīni amhākameva denti, idāni pana mayaṃ na labhāma, kāḷabāhumakkaṭasseva denti. Mayaṃ dhanañjayaṃrañño santikā lābhasakkāraṃ alabhantā imasmiṃ ṭhāne kiṃ karissāma, ehi araññaṃeva gantvā vasissāma”ti tena saddhiṃ sallapanto paṭhamam gāthamāha –

113. “Yaṃ annapānassa pure labhāma, taṃ dāni sākhamigameva gacchati;  
Gacchāma dāni vanameva rādha, asakkatā casma dhanañjayāyā”ti.

Tattha **yaṃ annapānassāti** yaṃ annapānaṃ assa rañño santikā. Upayogatthe vā sāmivacanaṃ. **Dhanañjayāyāti** karaṇatthe sampadānavacanaṃ, dhanañjayaena. **Asakkatā casmāti** annapānaṃ na labhāma, iminā ca na sakkatamhāti attho.

Taṃ sutvā rādho dutiyaṃ gāthamāha –

114. “Lābho alābho yaso ayaso ca, nindā pasamsā ca sukhañca dukkhaṃ;  
Ete aniccā manujesu dhammā, mā soci kiṃ socasi poṭṭhapādā”ti.

Tattha **yasoti** issariyaparivāro. **Ayasoti** tassābhāvo. **Ete** ete aṭṭha lokadhammā manujesu aniccā, lābhaggayasaggappattā hutvāpi aparena samayena appalābhā appasakkārā honti, niccalābhino nāma na honti. Yasādīsipi eseva nayo.

Taṃ sutvā poṭṭhapādo makkaṭe usūyaṃ apanetuṃ asakkonto tatiyaṃ gāthamāha –

115. “Addhā tuvaṃ paṇḍitakosi rādha, jānāsi atthāni anāgatāni;  
Kathaṃ nu sākhamigaṃ dakkhisāma, niddhāvitaṃ rājakulatova jamma”nti.

Tattha **kathaṃ nūti** kena nu kho upāyena. **Dakkhisāmāti** dakkhissāma. **Niddhāvitaṃ** nivuṭṭhapitaṃ nikkadḍhāpitaṃ. **Jammanti** lāmakam.

Taṃ sutvā rādho catutthaṃ gāthamāha –

116. “Cāleti kaṇṇaṃ bhakuṭiṃ karoti, muhuṃ muhuṃ bhāyayate kumāre;  
Sayameva taṃ kāhati kāḷabāhu, yenārakā ṭhassati annapānā”ti.

Tattha **bhāyayate kumāreti** rājakumāre utrāseti. **Yenārakā ṭhassati annapānāti** yena kāraṇena imamhā annapānā dūre ṭhassati, sayameva taṃ kāraṇaṃ karissati, mā tvaṃ etassa cintayīti attho.

Kāḷabāhupi katipāheneva rājakumārānaṃ purato ṭhatvā kaṇṇacalanādīni karonto kumāre bhāyāpesi. Te bhītatasitā vissaramakaṃsu. Rājā “kiṃ eta”nti pucchitvā tamatthaṃ sutvā “nikkadḍhatha na”nti makkaṭaṃ nikkadḍhāpesi. Sukānaṃ lābhasakkāro puna pākatiko ahosi.

Satthā imaṃ dhammadesanaṃ āharitvā jātakam samodhānesi – “tadā kāḷabāhu devadatto ahosi, poṭṭhapādo ānando, rādho pana ahameva ahosi”nti.

Kāḷabāhujātakavaṇṇanā navamā.

[330] 10. Sīlavīmaṃsajātakavaṇṇanā

**Sīlaṃ kireva kalyāṇanti** idaṃ satthā jetavane viharanto sīlavīmaṃsakabrāhmaṇaṃ ārabha katesi. Dvepi vatthūni heṭṭhā kathitāneva. Idha pana bodhisatto bārāṇasirañño purohito ahosi. So attano sīlaṃ vīmaṃsanto tīni divasāni heraññīkaphalakato kahāpaṇaṃ gaṇhi. Taṃ “coro”ti gahetvā rañño

dassesuṃ. So rañño santike ʘhito –

**117.** “Sīlaṃ kireva kalyāṇaṃ, sīlaṃ loke anuttaraṃ;  
Passa ghoraviso nāgo, sīlavāti na haññatī”ti. –

Imāya paṭhamagāthāya sīlaṃ vaṇṇetvā rājānaṃ pabbajjaṃ anujānāpetvā pabbajituṃ gacchati.

Athekasmiṃ divase sūnāpaṇato seno maṃsapesiṃ gahetvā ākāsaṃ pakkhandi. Tamaññe sakuṇā parivāretvā pādanakhatuṇḍakādīhi paharanti. So taṃ dukkhaṃ sahituṃ asakkonto maṃsapesiṃ chaḍḍesi, aparo gaṇhi. Sopi tatheva viheṭṭhiyamāno chaḍḍesi, athañño gaṇhi. Evaṃ yo yo gaṇhi, taṃ taṃ sakuṇā anubandhiṃsu. Yo yo chaḍḍesi, so so sukhito ahosi. Bodhisatto taṃ disvā “ime kāmā nāma maṃsapesūpamā, ete gaṇhantānaṃyeva dukkhaṃ, vissajjentānaṃ sukha”nti cintetvā dutiyaṃ gāthamāha –

**118.** “Yāvadevassahū kiñci, tāvadeva akhādisuṃ;  
Saṅgama kulalā loke, na hiṃsanti akiñcana”nti.

Tassattho – yāvadeva assa senassa ahu kiñci mukhena gahitaṃ maṃsakhaṇḍaṃ, tāvadeva naṃ imasmiṃ loke kulalā samāgantvā akhādiṃsu. Tasmīṃ pana vissatṭhe tamenāṃ akiñcanaṃ nippalibodhaṃ pakkhiṃ sesapakkhino na hiṃsantīti.

So nagarā nikkhamitvā antarāmagge ekasmiṃ gāme sāyaṃ ekassa gehe nipajji. Tattha pana piṅgalā nāma dāsī “asukavelāya āgaccheyyāsī”ti ekena purisena saddhiṃ saṅketamakāsi. Sā sāmikānaṃ pāde dhovitvā tesu nipannesu tassāgamaṇaṃ oloketi ummāre nisīditvā “idāni āgamissati, idāni āgamissati”ti paṭhamayāmaṃpi majjhimayāmaṃpi vītināmesi. Paccūsasamaye pana “na so idāni āgamissati”ti chinnāsā hutvā nipajjitvā niddaṃ okkami. Bodhisatto idaṃ kāraṇaṃ disvā “ayaṃ dāsī ‘so puriso āgamissati’ti āsāya ettakaṃ kālaṃ nisinnā, idāni anāgamaṇabhāvaṃ ṇatvā chinnāsā hutvā sukhaṃ supati. Kilesesu hi āsā nāma dukkhaṃ, nirāsabhāvova sukha”nti cintetvā tatiyaṃ gāthamāha –

**119.** “Sukhaṃ nirāsā supati, āsā phalavatī sukhā;  
Āsaṃ nirāsaṃ katvāna, sukhaṃ supati piṅgalā”ti.

Tattha **phalavatīti** yassā āsāya phalaṃ laddhaṃ hoti, sā tassa phalassa sukhatāya sukhā nāma. **Nirāsaṃ katvānāti** anāsaṃ katvā chinditvā pajahitvāti attho. **Piṅgalāti** esā piṅgaladāsī idāni sukhaṃ supatīti.

So punadivase tato gāmā araññaṃ pavisanto araññe ekaṃ tāpasā jhānaṃ appetvā nisinnaṃ disvā “idhaloke ca paraloke ca jhānasukhato uttaritaraṃ sukhaṃ nāma natthī”ti cintetvā catutthaṃ gāthamāha –

**120.** “Na samādhiparo atthi, asmiṃ loke paramhi ca;  
Na paraṃ nāpi attānaṃ, vihiṃsati samāhito”ti.

Tattha **na samādhiparoti** samādhito paro añño sukhadhammo nāma natthīti.

So araññaṃ pavisitvā isipabbajjaṃ pabbajitvā jhānābhīññā uppādetvā brahmalokaparāyaṇo ahosi.

Satthā imaṃ dhammaḍesaṇaṃ āharitvā jātaṃ samodhānesi – “tadā purohito ahameva ahosi”nti.

Sīlavīmaṃsajātakavaṇṇanā dasamā.

Kuṭṭidūsakavaggo tatiyo.

#### 4. Kokilavaggo

[331] 1. Kokilajātakavaṇṇanā

**Yo ve kāle asampatteti** idaṃ satthā jetavane viharanto kokālikam ārabba kathesi. Vatthu takkāriyajātake vitthāritameva.

Atīte bārānasiyaṃ brahmadatte rajjaṃ kārente bodhisatto tassa amacco ovādako ahoṣi, rājā bahubhānī ahoṣi. Bodhisatto “tassa bahubhānitaṃ nisedhessāmi”ti ekaṃ upamaṃ upadhārento vicarati. Athekadivasaṃ rājā uyyānaṃ gato maṅgalasilāpaṭṭe nisīdi, tassupari ambarukkho atthi. Tatrekasmim kākakulāvake kālakokilā attano aṇḍakaṃ nikkhipitvā agamāsi. Kākī taṃ kokilaṇḍakaṃ paṭijaggi, aparabhāge tato kokilapotako nikkhami. Kākī “putto me”ti saññāya mukhatuṇḍakena gocaraṃ āharitvā taṃ paṭijaggi. So avirūḷhapakkho akāleyeva kokilaravaṃ ravi. Kākī “ayaṃ idāneva tāva aññaṃ ravaṃ ravati, vaḍḍhanto kiṃ karissatī”ti tuṇḍakena koṭṭetvā māretvā kulāvakā pātesi. So rañño pādamūle pati.

Rājā bodhisattaṃ pucchi “kimetaṃ sahāyā”ti? Bodhisatto “ahaṃ rājānaṃ nivāretuṃ ekaṃ upamaṃ pariyesāmi, laddhā dāni me sā”ti cintetvā “mahārāja, atimukharā akāle bahubhānino evarūpaṃ labhanti. Ayaṃ mahārāja, kokilapotako kākiyā puṭṭho avirūḷhapakkho akāleyeva kokilaravaṃ ravi. Atha naṃ kākī ‘nāyaṃ mama puttako’ti ñatvā mukhatuṇḍakena koṭṭetvā māretvā kulāvakā pātesi. Manussā vā hontu tīracchānā vā, akāle bahubhānino evarūpaṃ dukkhaṃ labhanti”ti vatvā imā gāthā abhāsi –

121. “Yo ve kāle asampatte, ativelaṃ pabhāsati;  
Evaṃ so nihato seti, kokilāyiva atrajo.
122. “Na hi satthaṃ sunisitaṃ, visaṃ halāhalāmiva;  
Evaṃ nikaṭṭhe pātetī, vācā dubbhāsītā yathā.
123. “Tasmā kāle akāle vā, vācaṃ rakkheyya paṇḍito;  
Nātivelaṃ pabhāseyya, api attasamamhi vā.
124. “Yo ca kāle mitaṃ bhāse, matipubbo vicakkhaṇo;  
Sabbe amitte ādeti, supaṇṇo uragāmivā”ti.

Tattha **kāle asampatteti** attano vacanakāle asampatte. **Ativelanti** velātikantaṃ katvā atirekappamaṇaṃ bhāsati. **Halāhalāmivāti** halāhalaṃ iva. **Nikaṭṭheti** tasmimyeva khaṇe appamattake kāle. **Tasmāti** yasmā sunisitasatthahalāhalavisatopi khippataraṃ dubbhāsītavacanameva pātesi, tasmā. **Kāle akāle vāti** vattuṃ yuttakāle ca akāle ca **vācaṃ rakkheyya**, ativelaṃ na bhāseyya api attanā same ninnānākaraṇepi puggaleti attho.

**Matipubboti** matim purecārikaṃ katvā kathanena matipubbo. **Vicakkhaṇoti** ñāṇena vicāretvā atthavindanapuggalo vicakkhaṇo nāma. **Uragāmivāti** uragaṃ iva. Idaṃ vuttaṃ hoti – yathā supaṇṇo samuddaṃ khobhetvā mahābhogaṃ uragaṃ **ādeti** gaṇhāti, ādiyitvā ca taṅkhaṇaññaeva naṃ simbalim āropetvā maṃsaṃ khādati, evameva yo matipubbaṅgamo vicakkhaṇo vattuṃ yuttakāle mitaṃ bhāsati, so sabbe amitte ādeti gaṇhāti, attano vase vattetīti.

Rājā bodhisattassa dhammadesanaṃ sutvā tato paṭṭhāya mitabhānī ahoṣi, yasañcassa vaḍḍhetvā mahantataraṃ adāsi.

Satthā imaṃ dhammadesanaṃ āharitvā jātakaṃ samodhānesi – “tadā kokilapotako kokāliko ahoṣi, paṇḍitāmacco pana ahameva ahoṣi”nti.



## Kokilajātakavaṇṇanā paṭhamā.

[332] 2. Rathalaṭṭhiajātakavaṇṇanā

**Api hantvā hato brūti** idaṃ satthā jetavane viharanto kosalarañño purohitaṃ ārabba kathesi. So kira rathena attano bhogagāmaṃ gacchanto sambādhe magge rathaṃ pājento ekaṃ sakaṭasatthaṃ disvā “tumhākaṃ sakaṭaṃ apanethā”ti gacchanto sakaṭe anapanīyamāne kujjhivā patodalatṭhiyā purimasakaṭe sākaṭikassa rathadhure pahari. Sā rathadhure paṭihatā nivattivā tasseva nalāṭaṃ pahari. Tāvadevassa nalāṭe gaṇḍo uṭṭhahi. So nivattivā “sākaṭikehi pahaṭomhī”ti rañño ārocesi. Sākaṭike pakkosāpetvā vinicchinantā tasseva dosaṃ addasaṃsu. Atheskadivasam bhikkhū dhammasabhāyaṃ kathaṃ samuṭṭhāpesuṃ “āvuso, rañño kira purohito ‘sākaṭikehi pahaṭomhī’ti aḍḍaṃ karonto sayameva parajjī”ti. Satthā āgantvā “kāya nuttha, bhikkhave, etarahi kathāya sannisinnā”ti pucchivā “imāya nāmā”ti vutte “na, bhikkhave, idāneva, pubbepeṣa evarūpaṃ akāsiyevā”ti vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto tasseva vinicchayāmacco ahoṣi. Atha rañño purohito rathena attano bhogagāmaṃ gacchantoti sabbaṃ purimasadisameva. Idha pana tena rañño ārocite rājā sayam vinicchaye nisīditvā sākaṭike pakkosāpetvā kammaṃ asodhetvāva “tumhehi mama purohitaṃ koṭṭetvā nalāṭe gaṇḍo uṭṭhāpito”ti vatvā “sabbassaharaṇaṃ tesam karothā”ti āha. Atha naṃ bodhisatto “tumhe, mahārāja, kammaṃ asodhetvāva etesaṃ sabbassaṃ harāpetha, ekacce pana attanāva attānaṃ paharivāpi ‘parena pahaṭamhā’ti vadanti, tasmā avicinitvā kātuṃ na yuttaṃ, rajjaṃ kārentena nāma nisāmetvā kammaṃ kātuṃ vaṭṭatī”ti vatvā imā gāthā abhāsi.

125. “Api hantvā hato brūti, jetvā jitoti bhāsati;  
Pubbamakkhāyino rāja, aññadatthu na saddahe.

126. “Tasmā paṇḍitajātiyo, suṇeyya itarassapi;  
Ubhinnaṃ vacanaṃ sutvā, yathā dhammo tathā kare.

127. “Alaso gihī kāmabhogī na sādhu, asaññato pabbajito na sādhu;  
Rājā na sādhu anisammakārī, yo paṇḍito kodhano taṃ na sādhu.

128. “Nisamma khattiyō kayirā, nānisamma disampati;  
Nisammakārino rāja, yaso kitti ca vaḍḍhatī”ti.

Tattha **api hantvā**ti api eko attanāva attānaṃ hantvā “parena pahaṭomhī”ti **brūti** katheti. **Jetvā jitoti** sayam vā pana paraṃ jivā “ahaṃ jitomhī”ti bhāsati. **Aññadatthūti** mahārāja, pubbameva rājakulaṃ gantvā akkhāyantassa **pubbamakkhāyino** aññadatthu **na saddahe**, ekaṃsena vacanaṃ na saddaheyya. **Tasmāti** yasmā paṭhamataraṃ āgantvā kathentassa ekaṃsena vacanaṃ na saddahātabbaṃ, tasmā. **Yathā dhammoti** yathā vinicchayasabhāvo ṭhito, tathā kareyya.

**Asaññatoti** kāyādīhi asaññato dussīlo. **Taṃ na sādhu**ti yaṃ tassa paṇḍitassa ñāṇavato puggalassa ādhānaggāhivasena dalhākopasaṅkhātaṃ kodhanaṃ, taṃ na sādhu. **Nānisammāti** na nisāmetvā. **Disampatīti** disānaṃ pati, mahārāja. **Yaso kitti cāti** issariyaparivāro ceva kittisaddo ca vaḍḍhatīti.

Rājā bodhisattassa vacanaṃ sutvā dhammena vinicchini, dhammena vinicchiyamāne brāhmaṇasseva doso jātoti.

Satthā imaṃ dhammadesanaṃ āharitvā jātaṃ samodhānesi – “tadā brāhmaṇo etarahi brāhmaṇova ahoṣi, paṇḍitāmacco pana ahameva ahoṣi”nti.

## Rathalaṭṭhiajātakavaṇṇanā dutiyā.

[333] 3. Pakkagodhajātakavaṇṇanā

**Tadeva me tvanti** idam sathā jetavane viharanto ekaṃ kuṭumbikaṃ ārabha kathesi. Vatthu heṭṭhā vitthāritameva. Idha pana tesam uddhāraṃ sādhetvā āgacchantānaṃ antarāmagge luddako “ubhopi khādathā”ti ekaṃ pakkagodham adāsi. So puriso bhariyaṃ pānīyathāya pesetvā sabbaṃ godham khādītvā tassā āgatakāle “bhadde, godhā palātā”ti āha. “Sādhu, sāmi, pakkagodhāya palāyantiyā kiṃ sakkā kātu”nti? Sā jetavane pānīyaṃ pivītvā satthu santike nisinnā sathārā “kiṃ upāsike, ayaṃ te hitakāmo sasineho upakārako”ti pucchitā “bhante, aham etassa hitakāmā sasinehā, ayaṃ pana mayi nissineho”ti āha. Sathā “hotu mā cintayi, evaṃ nāmesa karoti. Yadā pana te guṇaṃ sarati, tadā tuyhameva sabbissariyaṃ detī”ti vatvā tehi yācito atītaṃ āhari.

Atītampi heṭṭhā vuttasadisameva. Idha pana tesam nivattantānaṃ antarāmagge luddako kilantabhāvaṃ disvā “dvepi janā khādathā”ti ekaṃ pakkagodham adāsi. Rājadhītā taṃ valliyaṃ bandhitvā ādāya maggaṃ paṭipajji. Te ekaṃ saraṃ disvā maggā okkamma assatthamūle nisīdīsu. Rājaputto “gaccha bhadde, sarato paduminipattena udakaṃ āhara, maṃsaṃ khādissāmā”ti āha. Sā godham sakhāya laggetvā pānīyathāya gatā. Itaro sabbaṃ godham khādītvā aggaṇaṅguṭṭhaṃ gahetvā parammukho nisīdi. So tāya pānīyaṃ gahetvā āgatāya “bhadde, godhā sakhāya otarivā vammikaṃ pāvīsi, aham dhāvītvā aggaṇaṅguṭṭhaṃ aggaheṣiṃ, gahitaṭṭhānaṃ hattheyeva katvā chijjītvā bilaṃ pavīṭṭhā”ti āha. “Hotu, deva, pakkagodhāya palāyantiyā kiṃ karissāma, ehi gacchāmā”ti. Te pānīyaṃ pivītvā bārāṇasiṃ agamaṃsu.

Rājaputto rajjaṃ patvā taṃ aggamahesiṭṭhānamatte ṭhapesi, sakkārasammāno panassā natthi. Bodhisatto tassā sakkāraṃ kāretukāmo rañño santike ṭhatvā “nanu mayaṃ ayye tumhākaṃ santikā kiñci na labhāma, kiṃ no na olokethā”ti āha. “Tāta, ahameva rañño santikā kiñci na labhāmi, tuyhaṃ kiṃ dassāmi, rājāpi mayhaṃ idāni kiṃ dassati, so araññato āgamanakāle pakkagodham ekakova khādī”ti. “Ayye, na devo evarūpaṃ karissati, mā evaṃ avacutthā”ti. Atha naṃ devī “tuyhaṃ taṃ, tāta, na pākaṃ, rañño yeva mayhañca pākaṃ”nti vatvā paṭhamam gāthamāha –

**129.** “Tadeva me tvam vidito, vanamajjhe rathesabha;  
Yassa te khaggabaddhassa, sannaddhassa tirīṭṭino;  
Assatthadumasākhāya, pakkagodhā palāyathā”ti.

Tattha **tadevā**ti tasmimyeva kāle “ayaṃ mayhaṃ adāyako”ti evaṃ tvam vidito. Aññe pana tava sabhāvaṃ na jānantīti atho. **Khaggabaddhassā**ti baddhakhaggassa. **Tirīṭṭinoti** tirīṭṭavatthanivatthassa maggāgamanakāle. **Pakkagodhā**ti āṅgārapakkā godhā palāyathāti.

Evaṃ raññā katadosaṃ parisamajjhe pākaṃ katvā kathesi. Taṃ sutvā bodhisatto “ayye, devassa appiyakālato pabhuti ubhinnaṃ aphāsukaṃ katvā kasmā idha vasathā”ti vatvā dve gāthā abhāsi –

**130.** “Name namantassa bhaje bhajantaṃ, kiccānukubbassa kareyya kiccaṃ;  
Nānatthakāmassa kareyya atthaṃ, asambhajantampi na sambhajeyya.

**131.** “Caje cajantaṃ vanathaṃ na kayirā, apetacittena na sambhajeyya;  
Dijo dumaṃ khīṇaphalanti ñatvā, aññaṃ samekkheyya mahā hi loko”ti.

Tattha **name namantassā**ti yo attani muducittena namati, tasseva paṭinameyya. **Kiccānukubbassā**ti attano uppannaṃ kiccaṃ anukubbantasseva. **Anatthakāmassā**ti avaḍḍhikāmassa. **Vanathaṃ na kayirā**ti tasmim cajante taṇhāsnehaṃ na kareyya. **Apetacittena**ti apagatacittena virattacittena. **Na sambhajeyyā**ti na samāgaccheyya. **Aññaṃ samekkheyyā**ti aññaṃ olokeyya, **yathā dijo khīṇaphalaṃ dumaṃ** rukkhaṃ ñatvā aññaṃ phalabharitaṃ rukkhaṃ gacchati, tathā khīṇarāgaṃ purisaṃ ñatvā aññaṃ sasinehaṃ upagaccheyyāti adhippāyo.

Rājā bodhisatte kathente eva tassā guṇaṃ saritvā “bhadde, ettakaṃ kālaṃ tava guṇaṃ na

sallakkhesiṃ, paṇḍitassayeva kathāya sallakkhesiṃ, mama aparādhaṃ sahanṭiyā idaṃ sakalarajjaṃ tuyhameva dammī”ti vatvā catutthaṃ gāthamāha –

**132.** “So te karissāmi yathānubhāvaṃ, kataññutaṃ khattiye pekkhamāno;  
Sabbāñca te issariyaṃ dadāmi, yassicchasi tassa tuvaṃ dadāmi”ti.

Tattha **soti** so ahaṃ. **Yathānubhāvanti** yathāsatti yathābalaṃ. **Yassicchasi**ti yassa icchasi, tassa idaṃ rajjaṃ ādiṃ katvā yaṃ tvaṃ icchasi, taṃ dadāmi.

Evañca pana vatvā rājā deviyā sabbissariyaṃ adāsi, “imināhaṃ etissā guṇaṃ sarāpito”ti paṇḍitassapi mahantaṃ issariyaṃ adāsi.

Satthā imaṃ dhammadesanaṃ āharitvā saccāni pakāsetvā jātaṃ samodhānesi, saccapariyosāne ubho jayampatikā sotāpattiphale patiṭṭhahimsu.

Tadā jayampatikā etarahi jayampatikāva ahesuṃ, paṇḍitāmacco pana ahameva ahosinti.

Pakkagodhajātakavaṇṇanā tatiyā.

[334] 4. Rājovādajātakavaṇṇanā

**Gavaṃ ce taramānānanti** idaṃ satthā jetavane viharanto rājovādaṃ ārabba kathesi. Vatthu **tesakuṇajātake** (jā. 2.17.1 ādayo) āvi bhavissati. Idha pana satthā “mahārāja, porāṇakarājānopi paṇḍitānaṃ kathaṃ sutvā dhammena samena rajjaṃ kārentā saggapuraṃ pūrayamānā gamiṃsū”ti vatvā raññā yācito atītaṃ āhari.

Atīte bārānasiyaṃ brahmadatte rajjaṃ kārente bodhisatto brāhmaṇakule nibbattitvā vayappatto sikkhitasabbasippo isipabbajjaṃ pabbajitvā abhiññā ca samāpattiyo ca nibbattetvā ramaṇīye himavantapadese vanamūlaphalāhāro vihāsi. Atha rājā aguṇapariyesako hutvā “atthi nu kho me koci aguṇaṃ kathento”ti pariyesanto antojane ca bahijane ca antonagare ca bahinagare ca kañci attano avaṇṇavādiṃ adisvā “janapade nu kho katha”nti aññātakavesena janapadaṃ cari. Tatrāpi avaṇṇavādiṃ apassanto attano guṇakathameva sutvā “himavantapadese nu kho katha”nti araññaṃ pavisitvā vicaranto bodhisattassa assamaṃ patvā taṃ abhivādetvā katapaṭisanthāro ekamantaṃ nisīdi.

Tadā bodhisatto araññato paripakkāni nigrodhaphalāni āharitvā paribhuñji, tāni honti madhurāni ojavantāni sakkharacuṇṇasamarasāni. So rājānampi āmantetvā “imaṃ mahāpuñña, nigrodhapakkaphalaṃ khāditvā pānīyaṃ pivā”ti āha. Rājā tathā katvā bodhisattaṃ pucchi “kiṃ nu kho, bhante, imaṃ nigrodhapakkaṃ ati viya madhura”nti? “Mahāpuñña, nūna rājā dhammena samena rajjaṃ kāreti, tenetaṃ madhuranti. Rañño adhammikakāle amadhuraṃ nu kho, bhante, hotī”ti. “Āma, mahāpuñña, rājūsu adhammikesu telamadhuphāṇitādīnipi vanamūlaphalānipi amadhurāni honti nirojāni, na kevalaṃ etāni, sakalampi raṭṭhaṃ nirojaṃ kasaṭaṃ hoti. Tesu pana dhammikesu sabbāni tāni madhurāni honti ojavantāni, sakalampi raṭṭhaṃ ojavantameva hotī”ti. Rājā “evaṃ bhavissati, bhante”ti attano rājabhāvaṃ ajānāpetvāva bodhisattaṃ vanditvā bārānasiṃ gantvā “tāpasassa vacanaṃ vīmaṃsissāmi”ti adhammena rajjaṃ kāretvā “idāni jānissāmi”ti kiñci kālaṃ vītināmetvā puna tattha gantvā taṃ vanditvā ekamantaṃ nisīdi.

Bodhisattopissa tatheva vatvā nigrodhapakkaṃ adāsi, taṃ tassa tittakarasaṃ ahosi. Rājā “amadhuraṃ nirasa”nti saha kheḷena chaḍḍetvā “tittakaṃ, bhante”ti āha. Bodhisatto “mahāpuñña, nūna rājā adhammiko bhavissati. Rājūnañhi adhammikakāle araññe phalāphalaṃ ādiṃ katvā sabbhaṃ amadhuraṃ nirojaṃ jāta”nti vatvā imā gāthā abhāsi –

**133.** “Gave ce taramānānaṃ, jīmaṃ gacchati puṅgavo;

Sabbā tā jimhaṃ gacchanti, nette jimhaṃ gate sati.

134. “Evameva manussesu, yo hoti seṭṭhasammato;  
So ce adhammaṃ caratī, pageva itarā pajā;  
Sabbam raṭṭham dukham seti, rājā ce hoti adhammiko.

135. “Gavaṃ ce taramānānaṃ, ujuṃ gacchati puṅgavo;  
Sabbā gāvī ujuṃ yanti, nette ujuṃ gate sati.

136. “Evameva manussesu, yo hoti seṭṭhasammato;  
So sace dhammaṃ caratī, pageva itarā pajā;  
Sabbam raṭṭham sukham seti, rājā ce hoti dhammiko”’ti.

Tattha **gavanti** gunnaṃ. **Taramānānanti** nadiṃ otarantānaṃ. **Jimhanti** kuṭilaṃ vaṅkaṃ. **Netteti** nāyake gahetvā gacchante gavajeṭṭhake usabhe puṅgave. **Pageva itarā pajāti** itare sattā puretameva adhammaṃ carantīti attho. **Dukham setīti** na kevalaṃ seti, catūsipi iriyāpathesu dukkameva vindati. **Adhammikoti** yadi rājā chandādiagatigamanavasena adhammiko hoti. **Sukham setīti** sace rājā agatigamaṇaṃ pahāya dhammiko hoti, sabbam raṭṭham catūsu iriyāpathesu sukhappattameva hotīti.

Rājā bodhisattassa dhammaṃ sutvā attano rājabhāvaṃ jānāpetvā “bhante, pubbe nigrodhapakkaṃ ahameva madhuraṃ katvā tittakaṃ akāsiṃ, idāni puna madhuraṃ karissāmi”’ti bodhisattaṃ vanditvā nagaraṃ gantvā dhammena rajjaṃ kārento sabbam paṭipākatikaṃ akāsi.

Satthā imaṃ dhammadešanaṃ āharitvā jātakaṃ samodhānesi – “tadā rājā ānando ahosi, tāpaso pana ahameva ahosi”’nti.

Rājovādajātakavaṇṇanā catutthā.

[335] 5. Jambukajātakavaṇṇanā

**Brahā** pavaḍḍhakāyo soti idaṃ satthā veḷuvane viharanto devadattassa sugatālayakaraṇaṃ ārabha kathesi. Vatthu heṭṭhā vitthāritameva, ayaṃ panettha saṅkhepo. Satthārā “sāriputta, devadatto tumhe disvā kiṃ akāsi”’ti vutto thero āha “bhante, so tumhākaṃ anukaronto mama hatthe bījanaṃ datvā nipajji. Atha naṃ kokāliko ure jaṇṇunā pahari, iti so tumhākaṃ anukaronto dukkhaṃ anubhavī”’ti. Taṃ sutvā satthā “na kho, sāriputta, devadatto idāneva mama anukaronto dukkhaṃ anubhoti, pubbepesa anubhosiyeva”’ti vatvā tena yācito atītaṃ āhari.

Atīte bārānasiyaṃ brahmadatte rajjaṃ kārente bodhisatto sīhayoniyaṃ nibbattitvā himavante guhāyaṃ vasanto ekadivasam mahimsaṃ vadhitvā maṃsaṃ khāditvā pānīyaṃ pivitvā guhaṃ āgacchati. Eko siṅgālo taṃ disvā palāyituṃ asakkonto urena nipajji, “kiṃ jambukā”’ti ca vutte “upaṭṭhahissāmi taṃ, bhaddante”’ti āha. Sīho “tena hi ehī”’ti taṃ attano vasanaṭṭhānaṃ netvā divase divase maṃsaṃ āharitvā posesi. Tassa sīhaviḥāsena thūlasarīrataṃ pattassa ekadivasam māno uppajji. So sīhaṃ upasaṅkamitvā āha “ahaṃ, sāmi, nicca kālaṃ tumhākaṃ palibodho, tumhe niccaṃ maṃsaṃ āharitvā maṃ posetha, ajja tumhe idheva hotha, ahaṃ ekaṃ vāraṇaṃ vadhitvā maṃsaṃ khāditvā tumhākampi āharissāmi”’ti. Sīho “mā te, jambuka, etaṃ rucci, na tvaṃ vāraṇaṃ vadhitvā maṃsakhādakayoniyaṃ nibbatto, ahaṃ te vāraṇaṃ vadhitvā dassāmi, vāraṇo nāma mahākāyo pavaḍḍhakāyo, mā vāraṇaṃ gaṇhi, mama vacanaṃ karohī”’ti vatvā paṭhamam gāthamāha.

137. “Brahā pavaḍḍhakāyo so, dīghadāṭho ca jambuka;  
Na tvaṃ tattha kule jāto, yattha gaṇhanti kuñjara”’nti.

Tattha **brahāti** mahanto. **Pavaḍḍhakāyoti** uddham ugatakāyo. **Dīghadāṭhoti** dīghadanto tehi

dantehi tumhādise paharivā jīvitakkhaye pāpeti. **Yatthā**ti yasmim sīhakule jātā mattavāraṇaṃ gaṇhanti, tvaṃ na tattha jāto, siṅgālakule pana jātosīti attho.

Siṅgālo sīhena vāritoyeva guhā nikkhamitvā tikkhattuṃ “bukka bukkā”ti siṅgālikaṃ nadaṃ naditvā pabbatakūṭe ʒhito pabbatapādaṃ olokeno ekaṃ kālavāraṇaṃ pabbatapādena āgacchantaṃ disvā ullāṅghitvā “tassa kumbhe patissāmī”ti parivattitvā pādamūle pati. Vāraṇo purimaṃpādaṃ ukkhipitvā tassa matthake patiṭṭhāpesi, sīsaṃ bhijjivā cuṇṇavicuṇṇaṃ jātaṃ. So tattheva anutthunanto sayi, vāraṇo koṅcanādaṃ karonto pakkāmi. Bodhisatto gantvā pabbatamatthake ʒhito taṃ vināsappattaṃ disvā “attano mānaṃ nissāya naṭṭho siṅgālo”ti tisso gāthā abhāsi –

138. “Asīho sīhamānena, yo attānaṃ vikubbati;  
Kotthūva gajamāsajja, seti bhūmyā anutthunaṃ.

139. “Yasassino uttamapuggalassa, sañjātakhandhassa mahabbalassa;  
Asamekkhiya thāmabalūpapattiṃ, sa seti nāgena hatoyaṃ jambuko.

140. “Yo cīdha kammaṃ kurute pamāya, thāmabalaṃ attani saṃviditvā;  
Jappena mantena subhāsitena, parikkhavā so vipulaṃ jinātī”ti.

Tattha **vikubbatī**ti parivatteti. **Kotthūvā**ti siṅgālo viya. **Anutthunanti** anutthunanto. Idaṃ vuttaṃ hoti – yathā ayaṃ kotthu mahantaṃ gajaṃ patvā anutthunanto bhūmiyaṃ seti, evaṃ yo añño dubbalo balavatā viggahaṃ karoti, sopi evarūpova hotīti.

**Yasassinoti** issariyavato. **Uttamapuggalassā**ti kāyabalena ca ñāṇabalena ca uttamapuggalassa. **Sañjātakhandhassā**ti susaṅghitamahākhandhassa. **Mahabbalassā**ti mahāthāmassa. **Thāmabalūpapatti**nti evarūpassa sīhassa thāmasaṅkhātaṃ balañceva sīhajātisaṅkhātaṃ upapattiṅca ajānitvā, kāyathāmañca ñāṇabalañca sīhaupapattiṅca ajānitvāti attho. **Sa setī**ti attānampi sīhena sadisaṃ maññamāno, so ayaṃ jambuko nāgena hato matasayanaṃ seti.

**Pamāyā**ti paminitvā upaparikkhitvā. “Pamāṇā”tipi pāṭho, attano pamāṇaṃ gahetvā yo attano pamāṇena kammaṃ kuruteti attho. **Thāmabballanti** thāmasaṅkhātaṃ balaṃ, kāyathāmañca ñāṇabalañcātipi attho. **Jappenā**ti japena, ajjheneṇāti attho. **Mantenā**ti aññehi paṇḍitehi saddhiṃ mantetvā karaṇena. **Subhāsitenā**ti saccādiguṇayuttana anavajjavacanena. **Parikkhavā**ti parikkhāsampanno. **So vipulaṃ jinātī**ti yo evarūpo hoti, yaṃ kiñci kammaṃ kurumāno attano thāmañca balañca ñatvā jappamantavasena paricchinditvā subhāsitaṃ bhāsanto karoti, so vipulaṃ mahantaṃ atthaṃ jinātī na parihāyatīti.

Evaṃ bodhisatto imāhi tīhi gāthāhi imasmim loke kattabbayuttakaṃ kammaṃ kathesi.

Satthā imaṃ dhammadesanaṃ āharitvā jātaṃ samodhānesi – “tadā siṅgālo devadatto ahosi, sīho pana ahameva ahosi”nti.

Jambukajātakavaṇṇanā pañcamā.

[336] 6. Brahāchattajātakavaṇṇanā

**Tiṇaṃ tiṇanti lapasī**ti idaṃ satthā jetavane viharanto kuhakabhikkhuṃ ārabba kathesi. Paccuppannavatthu kathitameva.

Atīte pana bārāṇasiyaṃ brahmadatte rajjaṃ kārente bodhisatto tassa atthadhammānusāsako amacco ahosi. Bārāṇasirājā mahatiyā senāya kosalarājānaṃ abbhuggantvā sāvattiṃ patvā yuddhena nagaraṃ pavisitvā rājānaṃ gaṇhi. Kosalarañño pana putto chatto nāma kumāro atthi. So aññātakavesena

nikkhamitvā takkasilam gantvā tayo vede ca aṭṭhārasa sippāni ca uggaṇhitvā takkasilato nikkhamma sabbasamayassippāni sikkhanto ekaṃ paccantagāmaṃ pāpuṇi. Taṃ nissāya pañcasatāpasā araṇṇe paṇṇasālāsu vasanti. Kumāro te upasaṅkamitvā “imesampi santike kiñci sikkhissāmī”ti pabbajitvā yaṃ te jānanti, taṃ sabbaṃ uggaṇhi. So aparabhāge gaṇasatthā jāto.

Athekadivasam isigaṇam āmantetvā “mārisā, kasmā majjhimadesam na gacchathā”ti pucchi. “Mārisa, majjhimadesa manussā nāma paṇḍitā, te pañham pucchanti, anumodanam kārapenti, maṅgalaṃ bhaṇāpenti, asakkante garahanti, mayaṃ tena bhayena na gacchāmā”ti. “Mā tumhe bhāyatha, ahametaṃ sabbaṃ karissāmī”ti. “Tena hi gacchāmā”ti sabbe attano attano khārivividhamādāya anupubbena bārānasim pattā. Bārānasirājāpi kosalarajjam attano hatthagatam katvā tattha rājayutte ṭhapetvā sayam tattha vijjamānam dhanam gahetvā bārānasim gantvā uyyāne lohacāṭiyo pūrāpetvā nidahitvā tasmim samaye bārānasiyameva vasati. Atha te isayo rājuyyāne rattim vasitvā punadivase nagaram bhikkhāya pavisitvā rājadvāram agamaṃsu. Rājā tesam iriyāpathesu pasīditvā pakkosāpetvā mahātale nisīdāpetvā yāgukhajjakam datvā yāva bhattakālā taṃ taṃ pañham pucchi. Chatto raṇṇo cittam ārādhento sabbapañhe vissajjetvā bhattakiccavasāne vicitraṃ anumodanam akāsi. Rājā suṭṭhutam pasanno paṭiñṇam gahetvā sabbepi te uyyāne vāsāpesi.

Chatto nidhiuddharanamantaṃ jānāti. So tattha vasanto “kham nu kho iminā mama pitu santakam dhanam nidahita”nti mantam parivattetvā olokeno uyyāne nidahitabhāvam ṇatvā “idaṃ dhanam gahetvā mama rajjam gaṇhissāmī”ti cintetvā tāpase āmantetvā “mārisā, aham kosalaraṇṇo putto, bārānasiraṇṇā amhākam rajje gahite aṇṇātakavesena nikkhamitvā ettakam kālam attano jīvitam anurakkhim, idāni kulasantakam dhanam laddham, aham etaṃ ādāya gantvā attano rajjam gaṇhissāmi, tumhe kiṃ karissathā”ti āha. “Mayampi tayāva saddhim gamissāmā”ti. So “sādhū”ti mahante mahante cammapasibbake kāretvā rattibhāge bhūmim khaṇitvā dhanacāṭiyo uddharitvā pasibbakesu dhanam pakkhipitvā cāṭiyo tiṇassa pūrāpetvā pañca ca isatāni aṇṇe ca manusse dhanam gāhāpetvā palāyitvā sāvattim gantvā sabbe rājayutte gāhāpetvā rajjam gahetvā pākāraaṭṭalākādipaṭisaṅkharanam kārapetvā puna sapattaraṇṇā yuddhena aggahetabbaṃ katvā nagaram ajjhāvasati. Bārānasiraṇṇopi “tāpasā uyyānato dhanam gahetvā palātā”ti ārocayimṃsu. So uyyānam gantvā cāṭiyo vivarāpetvā tiṇameva passi, tassa dhanam nissāya mahanto soko uppajji. So nagaram gantvā “tiṇam tiṇa”nti vippalapanto carati, nāssa koci sokaṃ nibbāpetum sakkoti.

Bodhisatto cintesi “raṇṇo mahanto soko, vippalapanto carati, ṭhapetvā kho pana maṃ nāssa aṇṇo koci sokaṃ vinodetum samattho, nissokaṃ naṃ karissāmī”ti. So ekadivasam tena saddhim sukhanisino tassa vippalapanakāle paṭhamam gāthamāha –

141. “Tiṇam tiṇanti lapasi, ko nu te tiṇamāhari;  
Kiṃ nu te tiṇakiccatti, tiṇameva pabhāsasī”ti.

Tattha **kiṃ nu te tiṇakiccatti**ti kiṃ nu tava tiṇena kiccaṃ kātabbam atthi. **Tiṇameva pabhāsasī**ti tvaṇhi kevalam “tiṇam tiṇa”nti tiṇameva pabhāsasi, “asukatiṇam nāmā”ti na kathesi, tiṇanāmaṃ tāvassa kathehi “asukatiṇam nāmā”ti, mayaṃ te āharissāma, atha pana te tiṇenattho natthi, nikkāraṇā mā vippalapīti.

Taṃ sutvā rājā dutiyam gāthamāha –

142. “Idhāgamā brahmacārī, brahā chatto bahussuto;  
So me sabbam samādāya, tiṇam nikkhippa gacchatī”ti.

Tattha **brahā**ti dīgho. **Chattoti** tassa nāmaṃ. **Sabbam samādāyāti** sabbam dhanam gahetvā. **Tiṇam nikkhippa gacchatī**ti cāṭisu tiṇam nikkhipitvā gatoti dassento evamāha.

Taṃ sutvā bodhisatto tatiyaṃ gāthamāha –

143. “Evetam hoti kattabbaṃ, appena bahumicchata;  
Sabbam sakassa ādānaṃ, anādānaṃ tiṇassa cā”ti.

Tassattho – appena tiṇena bahudhanaṃ icchatā evaṃ etaṃ kattabbaṃ hoti, yadidaṃ pitu santakattā sakassa dhanassa sabbam ādānaṃ agayhūpagassa tiṇassa ca anādānaṃ. Iti, mahārāja, so brahā chatto gahetabbayuttakaṃ attano pitu santakaṃ dhanam gahetvā aggahetabbayuttakaṃ tiṇam cāṭisu pakkhipivā gato, tattha kā paridevanāti.

Taṃ sutvā rājā catuttham gāthamāha –

144. “Sīlavanto na kubbanti, bālo sīlāni kubbati;  
Aniccasīlam dussīyam, kiṃ paṇḍiccaṃ karissatī”ti.

Tattha **sīlavantoti** ye sīlasampannā brahmacārayo, te evarūpaṃ na kubbanti. **Bālo sīlāni kubbatīti** bālo pana durācāro evarūpāni attano anācārasaṅkhātāni sīlāni karoti. **Aniccasīlanti** addhvena dīgharattaṃ appavattena sīlena samannāgataṃ. **Dussīlyanti** dussīlam. **Kiṃ paṇḍiccaṃ karissatīti** evarūpaṃ puggalaṃ bāhusaccaparibhāvitaṃ paṇḍiccaṃ kiṃ karissati kiṃ sampādessati, vipattimevassa karissatīti. Taṃ garahanto vatvā so tāya bodhisattassa kathāya nissoko hutvā dhammena rajjam kāresi.

Satthā imaṃ dhammaḍḍanaṃ āharitvā jātaṃ samodhānesi – “tadā brahāchatto kuhakabhikkhu ahoṣi, paṇḍitāmacco pana ahameva ahoṣi”nti.

Brahāchattajātakavaṇṇanā chaṭṭhā.

[337] 7. Pīṭhajātakavaṇṇanā

Na te pīṭhamadāyimhāti idaṃ satthā jetavane viharanto aññataraṃ bhikkhuṃ ārabba katesi. So kira janapadato jetavanaṃ gantvā pattacīvaraṃ paṭisāmetvā satthāraṃ vanditvā sāmaṇeradahare pucchi “āvuso, sāvatthiyaṃ āgantukabhikkhūnaṃ ke upakārakā”ti. “Āvuso, anāthapiṇḍiko nāma mahāseṭṭhi, visākhā nāma mahāupāsikā ete bhikkhusaṅghassa upakārakā mātāpituṭṭhāniyā”ti. So “sādhū”ti punadivase pātova ekabhikkhussapi apaviṭṭhakāle anāthapiṇḍikassa gharadvāraṃ agamāsi. Taṃ avelāya gatattā koci na olokesi. So tato kiñci alabhivā visākhāya gharadvāraṃ gato. Tatrāpi atipātova gatattā kiñci na labhi. So tattha tattha vicaritvā punāgacchanto yāgyā niṭṭhitāya gato, punapi tattha tattha vicaritvā bhatte niṭṭhite gato. So vihāraṃ gantvā “dvepi kulāni assaddhāni appasannāni eva, ime bhikkhū pana ‘saddhāni pasannāni’ti kathenti”ti tāni kulāni paribhavanto carati.

Athekadivasaṃ dhammasabhāyaṃ bhikkhū kathaṃ samuṭṭhāpesuṃ – “āvuso, asuko kira jānapado bhikkhu atikālasseva kuladvāraṃ gato bhikkhaṃ alabhivā kulāni paribhavanto carati”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte taṃ bhikkhuṃ pakkosāpetvā “saccaṃ kira bhikkhū”ti pucchitvā “saccaṃ, bhante”ti vutte “kasmā tvaṃ bhikkhu kujjhasi, pubbe anuppanne buddhe tāpasāpi tāva kuladvāraṃ gantvā bhikkhaṃ alabhivā na kujjihimsū”ti vatvā atītaṃ āhari.

Atīte bārāṇasiyaṃ brahmadatte rajjam kārente bodhisatto brāhmaṇakule nibbattitvā vayappatto takkasīlāyaṃ sabbasippāni uggaṇhitvā aparabhāge tāpasapabbajjam pabbajitvā himavante ciram vasitvā loṇambilasevanatthāya bārāṇasiṃ patvā uyyāne vasitvā punadivase nagaraṃ bhikkhāya pāvīsi. Tadā bārāṇasiseṭṭhi saddho hoti pasanno. Bodhisatto “kataraṃ kulagharaṃ saddha”nti pucchitvā “seṭṭhigara”nti sutvā seṭṭhino gharadvāraṃ agamāsi. Tasmim khāṇe seṭṭhi rājupatṭhānaṃ gato, manussāpi naṃ na passimsu, so nivattitvā gacchati. Atha naṃ seṭṭhi rājakulato nivattanto disvā vanditvā bhikkhābhājanaṃ gahetvā gharaṃ netvā nisīdāpetvā pādadhovanatelamakkhanayāgukhajjakādīhi

santappetvā antarābhatte kiñci kāraṇaṃ apucchitvā katabhattakiccaṃ vanditvā ekamantaṃ nisinno “bhante, amhākaṃ gharadvāraṃ āgatā nāma yācakā vā dhammikasamaṇabrāhmaṇā vā sakkārasammānaṃ alabhitvā gatapubbā nāma natthi, tumhe pana ajja amhākaṃ dārahehi adiṭṭhattā āsanaṃ vā pānīyaṃ vā pādadhovanaṃ vā yāgubhattaṃ vā alabhitvāva gatā, ayaṃ amhākaṃ doso, taṃ no khamituṃ vaṭṭatī” ti vatvā paṭhamaṃ gāthamāha –

145. “Na te pīṭhamadāyimhā, na pānaṃ napi bhojanaṃ;  
Brahmacāri khamassu me, etaṃ passāmi accaya” ti.

Tattha **na te pīṭhamadāyimhāti** pīṭhampi te na dāpayimha.

Taṃ sutvā bodhisatto dutiyaṃ gāthamāha –

146. “Nevābhisajjāmi na cāpi kuppe, na cāpi me appiyamāsi kiñci;  
Athopi me āsi manovitakko, etādiso nūna kulassa dhammo” ti.

Tattha **nevābhisajjāmīti** neva laggāmi. **Etādisoti** “imassa kulassa etādiso nūna sabhāvo, adāyakavaṃso esa bhavissatī” ti evaṃ me manovitakko uppanno.

Taṃ sutvā seṭṭhi itarā dve gāthā abhāsi –

147. “Esasmākaṃ kule dhammo, pitupitāmaho sadā;  
Āsanaṃ udakaṃ pajjaṃ, sabbetaṃ nipadāmase.

148. “Esasmākaṃ kule dhammo, pitupitāmaho sadā;  
Sakkaccaṃ upatiṭṭhāma, uttamaṃ viya ñātaka” ti.

Tattha **dhammoti** sabhāvo. **Pitupitāmahoti** pitūnañca pitāmahānañca santako. **Udakanti** pādadhovanaudakaṃ. **Pajjanti** pādamaṃkhanatelaṃ. **Sabbetanti** sabbaṃ etaṃ. **Nipadāmaseti** **nikārapakārā** upasaggā, dāmaseti attho, dadāmāti vuttaṃ hoti. Iminā yāva sattaṃ kulaparivaṭṭā dāyakavaṃso amhākaṃ vaṃsoti dasseti. **Uttamaṃ viya ñātakanti** mātaraṃ viya pitaraṃ viya ca mayaṃ dhammikaṃ samaṇaṃ vā brāhmaṇaṃ vā disvā sakkaccaṃ sahatthena upaṭṭhahāmāti attho.

Bodhisatto pana katipāhaṃ bārāṇasiseṭṭhino dhammaṃ desento tattha vasitvā puna himavantameva gantvā abhiññā ca samāpattiyo ca nibbattvā brahmalokaparāyaṇo ahosi.

Satthā imaṃ dhammadesanaṃ āharitvā saccāni pakāsetvā jātaṃ samodhānesi, saccapariyosāne so bhikkhu sotāpattiphale patiṭṭhahi. Tadā bārāṇasiseṭṭhi ānando ahosi, tāpaso pana ahameva ahosinti.

Pīṭhajātakavaṇṇanā sattamā.

[338] 8. Thusajātakavaṇṇanā

**Viditaṃ thusanti** idaṃ satthā veḷuvane viharanto ajātasattaṃ ārabha kathesi. Tasmai kira mātukucchigate tassa mātu kosalarājadhītāya bimbisārarañño dakkhiṇajāṇulohitapivanadohaḷo uppajjitvā paṇḍu ahosi. Sā paricārikāhi pucchitā tasmaṃ tamatthaṃ ārocesi. Rājāpi sutvā nemittake pakkosāpetvā “deviyā kira evarūpo dohaḷo uppanno, tassa kā nipphattī” ti pucchi. Nemittakā “deviyā kucchimhi nibbattakasatto tumhe māretvā rajjaṃ gaṇhissatī” ti āhaṃsu. Rājā “sace mama putto maṃ māretvā rajjaṃ gaṇhissati, ko ettha doso” ti dakkhiṇajāṇuṃ satthena phālāpetvā lohitaṃ suvaṇṇataṭṭakena gāhāpetvā deviyā pāyesi. Sā cintesi “sace mama kucchiyaṃ nibbatto putto pitaraṃ māressati, kiṃ me tenā” ti. Sā gabbhapātanatthaṃ kucchiṃ maddāpesi.



Rājā ñatvā taṃ pakkosāpetvā “bhadde mayhaṃ kira putto maṃ māretvā rajjaṃ gaṇhissati, na kho paṇāhaṃ ajaro amaro, puttamukhaṃ passitvaṃ me dehi, mā ito pabhuti evarūpaṃ kammaṃ akāsi”ti āha. Sā tato paṭṭhāya uyyānaṃ gantvā kucchiṃ maddāpesi. Rājā ñatvā tato paṭṭhāya uyyānagamaṇaṃ nivāresi. Sā paripuṇṇagabbhā puttāṃ vijāyi. Nāmaggaṇadivase cassa ajātasappa pītu sattubhāvato “ajātasattu”tveva nāmamakaṃsu. Tasmīṃ kumārāparihārena vaḍḍhante satthā ekadivasaṃ pañcasatabhikkhuparivuto rañño nivesanaṃ gantvā nisīdi. Rājā buddhappamukhaṃ bhikkhusaṅghaṃ paṇītena khādanīyabhojanīyena parivisitvā satthāraṃ vanditvā dhammaṃ suṇanto nisīdi. Tasmīṃ khaṇe kumāraṃ maṇḍetvā rañño adamsu. Rājā balavasinehena puttāṃ gahetvā ūrumhi nisīdāpetvā puttāgatena pemena puttameva mamāyanto na dhammaṃ suṇāti. Satthā tassa pamādabhāvaṃ ñatvā “mahārāja, pubbe rājāno putte āsaṅkamānā paṭicchane kāretvā ‘amhākaṃ accayena nīharitvā rajje patiṭṭhāpeyyāthā’ti āṇāpesu”nti vatvā tena yācito atītaṃ āhari.

Atīte bārāṇasiyaṃ brahmadatte rajjaṃ kārente bodhisatto takkasīlāyaṃ disāpāṃmokkaācariyo hutvā bahū rājakumāre ca brāhmaṇakumāre ca sippaṃ vācesi. Bārāṇasiraññopi putto soḷasavassakāle tassa santikaṃ gantvā tayo vede ca sabbasippāni ca uggaṇhitvā paripuṇṇasippo ācariyaṃ āpucchi. Ācariyo aṅgavijjāvasena taṃ olovento “imassa puttāṃ nissāya antarāyo paññāyati, tamahaṃ attano ānubhāvena harissāmi”ti cintetvā catasso gāthā bandhitvā rājakumārassa adāsi, evaṅca pana taṃ vadesi “tāta, paṭṭhamaṃ gāthaṃ rajje patiṭṭhāya tava puttassa soḷasavassakāle bhattaṃ bhuñjanto vadeyyāsi, dutiyaṃ mahāupaṭṭhānakāle, tatiyaṃ pāsādaṃ abhiruhamāno sopānasise ṭhatvā, catutthaṃ sayanasirigabbhaṃ pavasanto ummāre ṭhatvā”ti. So “sādhū”ti sampāṭicchitvā ācariyaṃ vanditvā gato oparajje patiṭṭhāya pītu accayena rajje patiṭṭhāsi. Tassa putto soḷasavassakāle rañño uyyānakīlādīnaṃ atthāya nikkhamantassa sirivibhavaṃ disvā pītaṃ māretvā rajjaṃ gahetukāmo hutvā attano upaṭṭhākānaṃ kathesi. Te “sādhū deva, mahallakakāle laddhena issariyena ko attho, yena kenaci upāyena rājānaṃ māretvā rajjaṃ gaṇhitvaṃ vaṭṭati”ti vadīsu. Kumāro “visaṃ khādāpetvā māressāmi”ti pītarā saddhiṃ sāyamāsaṃ bhuñjanto visaṃ gahetvā nisīdi. Rājā bhattapātiyaṃ bhatte acchupanteyeva paṭṭhamaṃ gāthamāha –

**149.** “Viditaṃ thusaṃ undurānaṃ, viditaṃ pana taṇḍulaṃ;  
Thusaṃ thusaṃ vivajjetvā, taṇḍulaṃ pana khādare”ti.

Tattha **viditanti** kāḷavaddalepi andhakāre undurānaṃ thuso thusabhāvena taṇḍulo ca taṇḍulabhāvena vidito pākaṭoyeva. Idha pana līṅgavipallāsavasena “thusaṃ taṇḍula”nti vuttaṃ. **Khādareti** thusaṃ thusaṃ vajjetvā taṇḍulameva khādanti. Idaṃ vuttaṃ hoti – tāta kumāra, yathā undurānaṃ andhakārepi thuso thusabhāvena taṇḍulo ca taṇḍulabhāvena pākaṭo, te thusaṃ vajjetvā taṇḍulameva khādanti, evameva mamaṃ tava visaṃ gahetvā nisinnabhāvo pākaṭoti.

Kumāro “ñātomhī”ti bhīto bhattapātiyaṃ visaṃ pātetvaṃ avisahitvā utthāya rājānaṃ vanditvā gato. So tamatthaṃ attano upaṭṭhākānaṃ ārocetvā “ajja tāvamhi ñāto, idāni kathaṃ māressāmi”ti pucchi. Te tato paṭṭhāya uyyāne paṭicchannā hutvā nikaṇṇikavasena mantayamānā “attheko upāyo, khaggaṃ sannayhitvā mahāupaṭṭhānaṃ gatakāle amaccānaṃ antare ṭhatvā rañño pamattabhāvaṃ ñatvā khaggena paharitvā māretvaṃ vaṭṭati”ti vavatthapesuṃ. Kumāro “sādhū”ti sampāṭicchitvā mahāupaṭṭhānakāle sannaddhakhaggo hutvā gantvā ito cito ca rañño paharaṇokāsaṃ upadhāreti. Tasmīṃ khaṇe rājā dutiyaṃ gāthamāha –

**150.** “Yā mantanā araṇṇasmīṃ, yā ca gāme nikaṇṇikā;  
Yañcetvaṃ iti cīti ca, etampi viditaṃ mayā”ti.

Tattha **araṇṇasmīnti** uyyāne. **Nikaṇṇikāti** kaṇṇamūle mantanā. **Yañcetvaṃ iti cīti cāti** yaṅca etaṃ idāni mama paharaṇokāsapariyesanaṃ. Idaṃ vuttaṃ hoti – tāta kumāra, yā eṣā tava attano upaṭṭhākehi saddhiṃ uyyāne ca gāme ca nikaṇṇikā mantanā, yañcetvaṃ idāni mama māraṇatthāya iti cīti ca karaṇaṃ, etampi sabbaṃ mayā ñātanti.

Kumāro “jānāti me veribhāvaṃ pitā”ti tato palāyitvā upaṭṭhākānaṃ ārocesi. Te sattaṭṭha divase atikkamitvā “kumāra, na te pitā, veribhāvaṃ jānāti, takkamattena tvaṃ evaṃsaññī ahoṣi, mārehi na”nti vadimsu. So ekadivasam khaggaṃ gahetvā sopānamatthake gabbhadvāre aṭṭhāsi. Rājā sopānamatthake ṭhito tatiyaṃ gāthamāha –

151. “Dhammena kira jātassa, pitā puttassa makkaṭo;  
Daharasseva santassa, dantehi phalamacchidā”ti.

Tattha **dhammenā**ti sabhāvena. **Pitā puttassa makkaṭo**ti pitā makkaṭo puttassa makkaṭapotakassa. Idaṃ vuttaṃ hoti – yathā araññe jāto makkaṭo attano yūthapariharaṇaṃ āsaṅkanto taruṇassa makkaṭapotakassa dantehi phalaṃ chinditvā purisabhāvaṃ nāseti, tathā tava atirajjakāmassa phalāni uppāṭṭepetvā purisabhāvaṃ nāsessāmīti.

Kumāro “gaṇhāpetukāmo maṃ pitā”ti bhīto palāyitvā “pitarāmi santajjito”ti upaṭṭhākānaṃ ārocesi. Te aḍḍhamāsamatte vītivatte “kumāra, sace rājā jāneyya, ettakaṃ kālaṃ nādhivāseyya, takkamattena tayā kathitaṃ, mārehi na”nti vadimsu. So ekadivasam khaggaṃ gahetvā uparipāsāde sirisayaṇaṃ pavisitvā “āgacchantameva naṃ māressāmī”ti heṭṭhāpallanke nisīdi. Rājā bhuttasāyamāso pariyaṇaṃ uyyojetvā “nipajjissāmī”ti sirigabbhaṃ pavisanto ummāre ṭhatvā catutthaṃ gāthamāha –

152. “Yametaṃ parisappasi, ajakāṇova sāsape;  
Yopāyaṃ heṭṭhato seti, etampi viditaṃ mayā”ti.

Tattha **parisappasī**ti bhayena ito cito ca sappasi. **Sāsape**ti sāsapakhette. **Yopāyanti** yopi ayaṃ. Idaṃ vuttaṃ hoti – yampi etaṃ tvaṃ sāsapavaṇaṃ pavīṭṭhakāṇaeḷako viya bhayena ito cito ca saṃsappasi, paṭhamaṃ viyaṃ gahetvā āgatosi, dutiyaṃ khaggena paharitukāmo hutvā āgatosi, tatiyaṃ khaggaṃ ādāya sopānamatthake aṭṭhāsi, idāni maṃ “māressāmī”ti heṭṭhāsāyane nipannosi, sabbametaṃ jānāmi, na taṃ idāni vissajjemi, gahetvā rājāṇaṃ kārapessāmīti. Evaṃ tassa ajānantasseva sā sā gāthā taṃ taṃ atthaṃ dīpeti.

Kumāro “ñātomhi pitarā, idāni maṃ nāsessatī”ti bhayappatto heṭṭhāsāyanaṃ nikkhamitvā khaggaṃ rañño pādamaḷe chaḍḍetvā “khamāhi me, devā”ti pādamaḷe urena nipajji. Rājā “na mayhaṃ koci kammaṃ jānātīti tvaṃ cintesī”ti taṃ tajjetvā saṅkhalikabandhanena bandhāpetvā bandhanāgāraṃ pavesāpetvā ārakkhaṃ ṭhapesi. Tadā rājā bodhisattassa guṇaṃ sallakkhesi. So aparabhāge kālamakāsi, tassa sarīrakiccaṃ katvā kumāraṃ bandhanāgārā nīharitvā rajje patiṭṭhapesuṃ.

Satthā imaṃ dhammadesanaṃ āharitvā jātaṃ samodhānesi – “tadā takkasīlayaṃ disāpāmokkha ācariyo ahameva ahoṣi”nti.

Thusajātakavaṇṇanā aṭṭhamā.

[339] 9. Bāverujātakavaṇṇanā

**Adassanena morassā**ti idaṃ satthā jetavane viharanto hatalābhasakkāre titthiye ārabba kathesi. Titthiyā hi anuppanne buddhe lābhino ahesuṃ, uppanne pana buddhe hatalābhasakkārā sūriyuggamane khajjopanakā viya jāta. Tesam taṃ pavattiṃ ārabba bhikkhū dhammasabhāyaṃ kathaṃ samuṭṭhāpesuṃ. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepi yāva guṇavantā na uppajjanti, tāva nigguṇā lābhaggaṃ yāsaṃ gappattā ahesuṃ, guṇavantesu pana uppannesu nigguṇā hatalābhasakkārā jāta”ti vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto morayoniyam nibbattitvā vuḍḍhimanvāya sobhaggaṃ upaṭṭhāpetvā araññe vicari. Tadā ekacce vāṇijā disākākaṃ gahetvā nāvāya bāveruraṭṭhaṃ agamaṃsu.

Tasmim kira kâle bāveruraṭṭhe sakuṇā nāma natthi. Āgatāgatā raṭṭhavāsino taṃ pañjare nisinnaṃ disvā “passathimassa chavivaṇṇaṃ galapariyosānaṃ mukhatuṇḍakaṃ maṇiguḷasadisāni akkhīni” ti kākameva pasamsitvā te vāṇijake āhaṃsu “imaṃ, ayyā, sakuṇaṃ amhākaṃ detha, amhākaṃ iminā attho, tumhe attano raṭṭhe aññaṃ labhissathā” ti. “Tena hi mūlena gaṇhathā” ti. “Kahāpaṇena no dethā” ti. “Na demā” ti. Anupubbena vaḍḍhitvā “satena dethā” ti vutte “amhākaṃ esa bahūpakāro, tumhehi saddhim metti hotū” ti kahāpaṇasataṃ gahetvā adamsu. Te taṃ netvā suvaṇṇapañjare pakkhipitvā nānappakārena macchamaṃsena ceva phalāphalena ca paṭijaggimsu. Aññesaṃ sakuṇānaṃ avijjamānaṭṭhāne dasahi asaddhammehi samannāgato kāko lābhaggayasaggappatto ahosi.

Punavāre te vāṇijā ekaṃ morarājānaṃ gahetvā yathā accharasaddena vassati, pañippaharaṇasaddena naccati, evaṃ sikkhāpetvā bāveruraṭṭhaṃ agamaṃsu. So mahājane sannipatite nāvāya dhure ṭhatvā pakkhe vidhunitvā madhurassaraṃ nicchāretvā nacci. Manussā taṃ disvā somanassajātā “etaṃ, ayyā, sobhaggappattaṃ susikkhitaṃ sakuṇarājānaṃ amhākaṃ dethā” ti āhaṃsu. Amhehi paṭhamaṃ kāko ānīto, taṃ gaṇhittha, idāni ekaṃ morarājānaṃ ānayimhā, etampī yācatha, tumhākaṃ raṭṭhe sakuṇaṃ nāma gahetvā āgantum na sakkāti. “Hotu, ayyā, attano raṭṭhe aññaṃ labhissatha, imaṃ no dethā” ti mūlaṃ vaḍḍhetvā sahassena gaṇhimsu. Atha naṃ sattaratanavicitte pañjare ṭhapetvā macchamaṃsaphalāphalehi ceva madhulājasakkarapānakādīhi ca paṭijaggimsu, mayūrarājā lābhaggayasaggappatto jāto, tassāgatakālato paṭṭhāya kākassa lābhasakkāro parihāyi, koci naṃ oloketumpi na icchi. Kāko khādanīyabhojanīyaṃ alabhamāno “kākā” ti vassanto gantvā ukkārabhūmiyaṃ otarivā gocaraṃ gaṇhi.

Satthā dve vatthūni ghaṭetvā sambuddho hutvā imā gāthā abhāsi –

153. “Adassanena morassa, sikhino mañjubhāṇino;  
Kākaṃ tattha apūjesuṃ, maṃsena ca phalena ca.
154. “Yadā ca sarasampanno, moro bāverumāgamā;  
Atha lābho ca sakkāro, vāyasassa ahāyatha.
155. “Yāva nuppajjati buddho, dhammarājā pabhaṅkaro;  
Tāva aññe apūjesuṃ, puthū samaṇabrāhmaṇe.
156. “Yadā ca sarasampanno, buddho dhammaṃ adesayi;  
Atha lābho ca sakkāro, titthiyānaṃ ahāyathā” ti.

Tattha **sikhinoti** sikhāya samannāgatassa. **Mañjubhāṇinoti** madhurassarassa. **Apūjesunti** apūjayimsu. **Maṃsena ca phalena cāti** nānappakārena maṃsena phalāphalena ca. **Bāverumāgamāti** bāveruraṭṭhaṃ āgato. “Bhāverū” tipī pāṭho. **Ahāyathāti** parihīno. **Dhammarājāti** navahi lokuttaradhammehi pariṣaṃ rañjetīti dhammarājā. **Pabhaṅkaroti** sattalokaokāsalokasaṅkhāralokesu ālokassa katattā pabhaṅkaro. **Sarasampannoti** brahmassarena samannāgato. **Dhammaṃ adesayīti** catusaccadhammaṃ pakāsesīti.

Iti imā catasso gāthā bhāsivā jātakaṃ samodhānesi – “tadā kāko nigaṇṭho nāṭaputto ahosi, morarājā pana ahameva ahosi” nti.

Bāverujātakavaṇṇanā navamā.

[340] 10. Visayahajātakavaṇṇanā

**Adāsi dānānīti** idaṃ satthā jetavane viharanto anāthapiṇḍikaṃ ārabba kathesi. Vatthu heṭṭhā khadirāṅgarājātake (jā. 1.1.40) vitthāritameva. Idha pana satthā anāthapiṇḍikaṃ. Āmantetvā “porāṇakapaṇḍitāpi gahapati ‘dānaṃ mā dadāsī’ ti ākāse ṭhatvā vārentaṃ sakkāṃ devānamindaṃ

paṭibāhitvā dānaṃ adamsuyevā’’ti vatvā tena yācito atītaṃ āhari.

Atīte bārānasiyaṃ brahmadatte rajjaṃ kārente bodhisatto asītikotiṅgavibhavo visayho nāma seṭṭhi hutvā pañcahi sīlehi samannāgato dānājñhāsayo dānābhīrato ahosi. So catūsu nagaradvāresu, nagaramajjhe, attano gharadvāreti chasu ṭhānesu dānasālāyo kāretvā dānaṃ pavattesi, divase divase cha sataśassāni vissajjeti. Bodhisattassa ca vanibbakayācakānañca ekasadisameva bhattaṃ hoti. Tassa jambudīpaṃ unnaṅgalaṃ katvā dānaṃ dadato dānānubhāvena sakkassa bhavaṇaṃ kampi, sakkassa devarañño paṇḍukambalasilāsaṇaṃ uṇhākāraṃ dassesi. Sakko ‘‘ko nu kho maṃ ṭhānā cāvetukāmo’’ti upadhārento mahāseṭṭhiṃ disvā ‘‘ayaṃ visayho ativiya pattharivā sakalajambudīpaṃ unnaṅgalaṃ karonto dānaṃ deti, iminā dānena maṃ cāvetvā sayāṃ sakko bhavissati maññe, dhanamassa nāsetvā etaṃ daliddaṃ katvā yathā dānaṃ na deti, tathā karissāmī’’ti cintetvā sabbaṃ dhanadhaññaṃ telamadhuphāṇitasakkarādīni antamaso dāsakammakaraporiṣampi antaradhāpesi.

Tadā dānabyāvaṭā āgantvā ‘‘sāmi dānaggaṃ pacchinnāṃ, ṭhapitaṭhapitaṭṭhāne na kiñci passāmā’’ti ārocayimṣu. ‘‘Ito paribbayaṃ haratha, mā dānaṃ pacchindathā’’ti bhariyaṃ pakkosāpetvā ‘‘bhadde, dānaṃ pavattāpehī’’ti āha. Sā sakalagehaṃ vicinitvā aḍḍhamāsakamattampi adisvā ‘‘ayya, amhākaṃ nivatthavattaṃ ṭhapetvā aññaṃ kiñci na passāmi, sakalagehaṃ tuccha’’nti āha. Sattaratanagabbhesu dvāraṃ vivarāpetvā na kiñci addasa, seṭṭhiñca bhariyañca ṭhapetvā aññe dāsakammakarāpi na paññāyimṣu. Puna mahāsatto. Bhariyaṃ āmantetvā ‘‘bhadde, na sakkā dānaṃ pacchinditūṃ, sakalanivesanaṃ vicinitvā kiñci upadhārehī’’ti āha. Tasmimṃ khaṇe eko tiṇahārako asitañca kājañca tiṇabandhanarajjuñca dvārāntare chaḍḍetvā palāyi. Seṭṭhibhariyā taṃ disvā ‘‘sāmi, idaṃ ṭhapetvā aññaṃ na passāmī’’ti āharitvā adāsi. Mahāsatto ‘‘bhadde, mayā ettakaṃ kālaṃ tiṇaṃ nāma na lāyitapubbaṃ, ajja pana tiṇaṃ lāyitvā āharitvā vikkīnitvā yathānucchavikaṃ dānaṃ dassāmī’’ti dānupacchedabhayena asitañceva kājañca rajjuñca gahetvā nagarā nikkhamitvā tiṇavattūṃ gantvā tiṇaṃ lāyitvā ‘‘eko amhākaṃ bhavissati, ekena dānaṃ dassāmī’’ti dve tiṇakalāpe bandhitvā kāje laggetvā ādāya gantvā nagaradvāre vikkīnitvā māsake gahetvā ekaṃ koṭṭhāsaṃ yācakānaṃ adāsi. Yācakā bahū, tesāṃ ‘‘mayhampi dehi, mayhampi dehī’’ti vadantānaṃ itarampi koṭṭhāsaṃ datvā taṃ divasaṃ saddhimṃ bhariyāya anāhāro vītinaṃsesi. Iminā niyāmena cha divasā vītivattā.

Athassa sattame divase tiṇaṃ āharamānassa sattāhaṃ nirāhārassa atisukhumālassa nalāṭe sūriyātapena paḥaṭamatte akkhīni bhamimṣu. So satimṃ paccupaṭṭhāpetūṃ asakkonto tiṇaṃ avattharivā pati. Sakko tassa kiriyaṃ upadhārayamāno vicarati. So taṅkhaṇaṇñeva āgantvā ākāse ṭhatvā paṭthamaṃ gāthamāha –

**157.** ‘‘Adāsi dānāni pure visayha, dadato ca te khayadhammo ahosi;  
Ito paraṃ ce na dadeyya dānaṃ, tiṭṭheyyuṃ te saṃyamantassa bhogā’’ti.

Tassattho – ambho visayha tvaṃ ito pubbe tava gehe dhane vijjamāne sakalajambudīpaṃ unnaṅgalaṃ karitvā dānāni adāsi. Tassa ca te evaṃ dadato bhogānaṃ khayadhammo khayasabhāvo ahosi, sabbaṃ sāpateyyaṃ khīṇaṃ, ito paraṃ cepi tvaṃ dānaṃ na dadeyya, kassaci kiñci na dadeyyāsi, tava saṃyamantassa adadantassa bhogā tatheva tiṭṭheyyuṃ, ‘‘ito paṭṭhāya na dassāmī’’ti tvaṃ mayhaṃ paṭiññaṃ dehi, ahaṃ te bhoge dassessāmīti.

Mahāsatto tassa vacanaṃ sutvā ‘‘kosi tva’’nti āha. ‘‘Sakkohamasmī’’ti. Bodhisatto ‘‘sakko nāma sayāṃ dānaṃ datvā sīlaṃ samādiyitvā uposathakammaṃ katvā satta vattapadāni pūretvā sakkattaṃ patto, tvaṃ pana attano issariyakāraṇaṃ dānaṃ vāresi, anariyaṃ vata karosī’’ti vatvā tisso gāthā abhāsi

**158.** ‘‘Anariyamariyena sahasanetta, suduggatenāpi akiccamāhu;  
Mā vo dhanāṃ taṃ ahu devarāja, yaṃ bhogahetu vijahemu saddhaṃ.

159. “Yena eko ratho yāti, yāti tenaparo ratho;  
Porāṇaṃ nihitaṃ vattaṃ, vattataññeva vāsava.

160. “Yadi hessati dassāma, asante kiṃ dadāmasa;  
Evaṃbhūtāpi dassāma, mā dānaṃ pamadamhase”ti.

Tattha **anariyanti** lāmakam pāpakammaṃ. **Ariyenāti** parisuddhācārena ariyena. **Suduggatenāpīti** sudaliddenāpi. **Akiccamaḥūti** akattabbanti buddhādayo ariyā vadanti, tvaṃ pana maṃ anariyaṃ maggaṃ ārocesīti adhippāyo. **Voti** nipātamattaṃ. **Yaṃ bhogahetūti** yassa dhanassa paribhuñjanahetu mayam dānasaddhaṃ vijahemu pariccajeyyāma, taṃ dhanameva mā ahu, na no tena dhanena atthoti dīpeti.

**Rathoti** yaṃkiñci yānaṃ. Idaṃ vuttaṃ hoti – yena maggena eko ratho yāti, aññopi ratho “rathassa gatamaggo eso”ti teneva maggena yāti. **Porāṇaṃ nihitaṃ vattaṃ** yaṃ mayā pubbe nihitaṃ vattaṃ, taṃ mayi dharante vattatuyeva, mā tiṭṭhatūti attho. **Evaṃbhūtāpi** evaṃ tiṇahārahakabhūtāpi mayam yāva jīvāma, tāva dassāmayeva. Kiṃkāraṇā? **Mā dānaṃ pamadamhase**ti. Adadanto hi dānaṃ pamajjati nāma na sarati na sallakkheti, ahaṃ pana jīvamāno dānaṃ pamussituṃ na icchāmi, tasmā dānaṃ dassāmiyevāti dīpeti.

Sakko taṃ paṭibāhituṃ asakkonto “kimatthāya dānaṃ dadāsī”ti pucchi. Bodhisatto “neva sakkattaṃ, na brahmattaṃ patthayamāno, sabbaññutaṃ patthento panāhaṃ dadāmi”ti āha. Sakko tassa vacanaṃ sutvā tuṭṭho hatthena piṭṭhiṃ parimajji. Bodhisattassa taṅkhaṇaṃñeva parimajjitamattasseva sakalasarīraṃ paripūri. Sakkānubhāvena cassa sabbo vibhavaparicchedo paṭipākatikova ahosi. Sakko “mahāseṭṭhi, tvaṃ ito paṭṭhāya divase divase dvādasa satasahassāni vissajjento dānaṃ dadāhī”ti tassa gehe aparimāṇaṃ dhanam katvā taṃ uyyojetvā sakaṭṭhānameva gato.

Satthā imaṃ dhammadesanaṃ āharitvā jātakam samodhānesi – “tadā seṭṭhibhariyā rāhulamātā ahosi, visayho pana seṭṭhi ahameva ahosi”nti.

Visayahajātakavaṇṇanā dasamā.

Kokilavaggo catuttho.

### 5. Cūḷakuṇālavaggo

[341] 1. Kaṇḍarījātakavaṇṇanā

**Narānamārāmakarāsūti** imassa jātakassa vitthārahakathā **kuṇārajātake** (jā. 2.21.kuṇārajātaka) āvi bhavissati.

Kaṇḍarījātakavaṇṇanā paṭhamā.

[342] 2. Vānarajātakavaṇṇanā

**Asakkhiṃ vata attānanti** idaṃ satthā veḷuvane viharanto devadattassa vadhāya parisakkaṇaṃ ārabha katesi. Vatthu (jā. aṭṭha. 2.2.susumārājātakavaṇṇanā) heṭṭhā vitthāritameva.

Atīte pana bārāṇasiyaṃ brahmadatte rajjaṃ kārente bodhisatto himavantapadesa kapiyoniyaṃ nibbattitvā vayappatto gaṅgātīre vasi. Athekā antogaṅgāyaṃ saṃsumārī bodhisattassa hadayamaṃsaṃ dohaḷaṃ uppādetvā saṃsumārassa katesi. So “taṃ kapiṃ udake nimujjāpetvā māretvā hadayamaṃsaṃ gahetvā saṃsumārīyā dassāmi”ti cintetvā mahāsattaṃ āha – “ehi, samma, antaradīpake phalāphale khādītuṃ gacchāmā”ti. “Kathaṃ, samma, ahaṃ gamissāmi”ti. “Ahaṃ taṃ mama piṭṭhiyaṃ nisīdāpetvā nessāmi”ti. So tassa cittaṃ ajānanto laṅghitvā piṭṭhiyaṃ nisīdi. Saṃsumāro thokaṃ gantvā

nimujjituṃ ārabhi. Atha naṃ vānaro “kiṃkāraṇā, bho, maṃ udake nimujjāpesī”ti āha. “Ahaṃ taṃ māretvā tava hadayamaṃsaṃ mama bhariyāya dassāmi”ti. “Dandha tvaṃ mama hadayamaṃsaṃ ure atthīti maññasī”ti? “Atha kahaṃ te ṭhapita”nti? “Etaṃ udumbare olambantaṃ na passasī”ti? “Passāmi, dassasi pana me”ti. “Āma, dassāmi”ti. Saṃsumāro dandhatāya taṃ gahetvā nadītīre udumbaramūlaṃ gato. Bodhisatto tassa piṭṭhito laṅghitvā udumbararukkhe nisinno imā gāthā abhāsi –

161. “Asakkhiṃ vata attānaṃ, uddhātuṃ udakā thalaṃ;  
Na dānāhaṃ puna tuyhaṃ, vasaṃ gacchāmi vārija.

162. “Alameteḥi ambehi, jambūhi panasehi ca;  
Yāni pāraṃ samuddassa, varaṃ mayhaṃ udumbaro.

163. “Yo ca uppatitaṃ atthaṃ, na khippamanubujjhati;  
Amittavasamanveti, pacchā ca anutappati.

164. “Yo ca uppatitaṃ atthaṃ, khippameva nibodhati;  
Muccate sattusambādā, na ca pacchānutappati”ti.

Tattha **asakkhiṃ vatāti** samattho vata ahosiṃ. **Uddhātunti** uddharituṃ. **Vārijāti** saṃsumāraṃ ālapati. **Yāni pāraṃ samuddassāti** gaṅgaṃ samuddanāmenālapanto “yāni samuddassa pāraṃ gantvā khāditabbāni, alaṃ tehi”ti vadati. **Pacchā ca anutappatīti** uppannaṃ atthaṃ khippaṃ aṅānanto amittavasamaṃ gacchati, pacchā ca anutappati.

Iti so catūhi gāthāhi lokiyakiccānaṃ nipphattikāraṇaṃ kathetvā vanasaṅḍameva pāvīsi.

Satthā imaṃ dhammadešanaṃ āharitvā jātaṃ samodhānesi – “tadā saṃsumāro devadatto ahosi, vānaro pana ahameva ahosi”nti.

Vānarajātakavaṇṇanā dutiyā.

[343] 3. Kuntinījātakavaṇṇanā

**Avasimha tavāgāreti** idaṃ satthā jetavane viharanto kosalarañño gehe nivutthaṃ kuntinīsakuṇikaṃ ārabha kathesi. Sā kira rañño dūteyyahārikā ahosi. Dve potakāpissā atthi, rājā taṃ sakuṇikaṃ ekassa rañño paṇṇaṃ gāhāpetvā pesesi. Tassā gatakāle rājakule dārakā te sakuṇapotake hatthehi parimaddantā māresuṃ. Sā āgantvā te potake mate passantī “kena me puttakā māritā”ti pucchi. “Asukena ca asukena cā”ti. Tasmaiṃcā kāle rājakule posāvanikabyaggho atthi kakkhaḷo pharuso, bandhanabalena tiṭṭhati. Atha te dārakā taṃ byagghaṃ dassanāya agamaṃsu. Sāpi sakuṇikā tehi saddhiṃ gantvā “yathā imehi mama puttakā māritā, tatheva ne karissāmi”ti te dārake gahetvā byagghassa pādāmūle khipi, byaggho murāmurāpetvā khādi. Sā “idāni me manoratho paripuṇṇo”ti uppatitvā himavantameva gatā. Taṃ kāraṇaṃ sutvā bhikkhū dhammasabhāyaṃ kathaṃ samuṭṭhāpesuṃ “āvuso, rājakule kira asukā nāma kuntinī sakuṇikā ye hissā potakā māritā, te dārake byagghassa pādāmūle khipitvā himavantameva gatā”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepeṣā attano potakaghātake dārake gahetvā byagghassa pādāmūle khipitvā himavantameva gatā”ti vatvā atītaṃ āhari.

Atīte bārānasiyaṃ bodhisatto dhammena samena rajjaṃ kāresi. Tassa nivesane ekā kuntinī sakuṇikā dūteyyahārikāti sabbhaṃ purimasadisameva. Ayaṃ pana viṣeso. Ayaṃ kuntinī byagghena dārake mārapetvā cintesi “idāni na sakkā mayā idha vasituṃ, gamissāmi, gacchantī ca pana rañño anārocetvā na gamissāmi, ārocetvāva gamissāmi”ti. Sā rājānaṃ upasaṅkamitvā vanditvā ekamantaṃ ṭhitā “sāmi, tumhākaṃ pamādena mama puttake dārakā māresuṃ, ahaṃ kodhavasikā hutvā te dārake paṭimāresuṃ, idāni mayā idha vasituṃ na sakkā”ti vatvā paṭhamāṃ gāthamāha –

165. “Avasimha tavāgāre, niccaṃ sakkatapūjītā,  
Tvameva dānimakari, handa rāja vajāmaha”nti.

Tattha **tvameva dānimakarī**ti maṃ paṇṇaṃ gāhāpetvā pesetvā attano pamādena mama piyaputtake arakkhanto tvaññeva idāni etaṃ mama domanassakāraṇaṃ akari. **Handā**ti vavassaggaṭṭhe nipāto. **Rājā**ti bodhisattaṃ ālapati. **Vajāmahanti** ahaṃ himavantaṃ gacchāmīti.

Taṃ sutvā rājā dutiyaṃ gāthamāha –

166. “Yo ve kate paṭikate, kibbise paṭikibbise;  
Evaṃ taṃ sammatī veraṃ, vasa kuntini māgamā”ti.

Tassattho – yo puggalo parena kate kibbise attano puttamāraṇādike dāruṇe kamme kate puna attano tassa puggalassa paṭikate paṭikibbise “paṭikataṃ mayā tassā”ti jānāti. **Evaṃ taṃ sammatī veranti** ettakena taṃ veraṃ sammatī vūpasantaṃ hoti, tasmā vasa kuntini māgamāti.

Taṃ sutvā kuntinī tatiyaṃ gāthamāha –

167. “Na katassa ca kattā ca, metti sandhīyate puna;  
Hadayaṃ nānujānāti, gacchaññeva rathesabhā”ti.

Tattha **na katassa ca kattā cāti** katassa ca abhibhūtassa upapīlitassa puggalassa, idāni vibhattivipariṇāmaṃ katvā yo kattā tassa cāti imesaṃ dvinnaṃ puggalānaṃ puna mittabhāvo nāma na sandhīyati na ghaṭīyatīti attho. **Hadayaṃ nānujānāti**tena kāraṇena mama hadayaṃ idha vāsaṃ nānujānāti. **Gacchaññeva rathesabhāti** tasmā ahaṃ mahārāja gamissāmiyevāti.

Taṃ sutvā rājā catutthaṃ gāthamāha –

168. “Katassa ceva kattā ca, metti sandhīyate puna;  
Dhīraṇaṃ no ca bālānaṃ, vasa kuntini māgamā”ti.

Tassattho – katassa ceva puggalassa, yo ca kattā tassa metti sandhīyate puna, sā pana dhīraṇaṃ, no ca bālānaṃ. Dhīraṇaṃhi metti bhinnāpi puna ghaṭīyati, bālānaṃ pana sakiṃ bhinnā bhinnāva hoti, tasmā vasa kuntini māgamāti.

Sakuṇikā “evaṃ santepi na sakkā mayā idha vasitūṃ sāmī”ti rājānaṃ vanditvā uppatitvā himavantameva gatā.

Satthā imaṃ dhammadesanaṃ āharitvā jātaṃ samodhānesi – “tadā kuntinīyeva etarahi kuntinī ahoṣi, bārāṇasirājā pana ahameva ahoṣi”nti.

Kuntinījātakavaṇṇanā tatiyā.

[344] 4. Ambajātakavaṇṇanā

**Yo nīliyaṃ maṇḍayatī**ti idaṃ satthā jetavane viharanto ekaṃ ambagopakattheraṃ ārabha katesi. So kira mahallakakāle pabbajitvā jetavanapaccante ambavane paṇṇasālaṃ kāretvā ambe rakkhanto patitāni ambapakkāni khādanto vicarati, attano sambandhamanussānampi deti. Tasmīṃ bhikkhācāraṃ pavīṭṭhe ambacorakā ambāni pātetvā khādītva ca gahetvā ca gacchanti. Tasmīṃ khaṇe catasso seṭṭhidhītaro aciravatiyaṃ nhāyitvā vicarantiyo taṃ ambavanaṃ pavisiṃsu. Mahallako āgantvā tā disvā “tumhehi me ambāni khādītāni”ti āha. “Bhante, mayaṃ idāneva āgatā, na tumhākaṃ ambāni khādāmā”ti. “Tena hi sapathaṃ karoṭhā”ti? “Karoma, bhante”ti sapathaṃ kariṃsu. Mahallako tā

sapatham kāretvā lajjāpetvā vissajjesi. Tassa taṃ kiriyaṃ sutvā bhikkhū dhammasabhāyaṃ kathaṃ samuṭṭhāpesuṃ “āvuso, asuko kira mahallako attano vasanakam ambavanam pavittā seṭṭhidhītarō sapatham kāretvā lajjāpetvā vissajjesī”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepesa ambagopako hutvā catasso seṭṭhidhītarō sapatham kāretvā lajjāpetvā vissajjesī”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto sakkattaṃ kāresi. Tadā eko kūṭajaṭilo bārānasiṃ upanissāya nadītīre ambavane paṇṇasālaṃ māpetvā ambe rakkhanto patitāni ambapakkāni khādanto sambandhamanussānampi dento nānappakārena micchājīvena jīvikam kappento vicarati. Tadā sakko devarājā “ke nu kho loke mātāpitaro upaṭṭhahanti, kule jeṭṭhāpacayanakammaṃ karonti, dānam denti, sīlam rakkhanti, uposathakammaṃ karonti, ke pabbajitā samaṇadhamme yuttapayuttā viharanti, ke anācāraṃ caranti”ti lokam volokento imaṃ ambagopakam anācāraṃ kūṭajaṭilaṃ disvā “ayaṃ kūṭajaṭilo kaṣiṇaparikkammādiṃ attano samaṇadhammaṃ pahāya ambavanam rakkhanto vicarati, saṃvejessāmi na”nti tassa gāmaṃ bhikkhāya pavittāhakāle attano ānubhāvena ambe pātetvā corehi vilumbite viya akāsi.

Tadā bārānasito catasso seṭṭhidhītaro taṃ ambavanam pavisiṃsu. Kūṭajaṭilo tā disvā “tumhehi me ambāni khādītāni”ti palibuddhi. “Bhante, mayaṃ idāneva āgatā, na te ambāni khādāmā”ti. “Tena hi sapatham karothā”ti? “Katvā ca pana gantum labhissāmā”ti? “Āma, labhissathā”ti. “Sādhu, bhante”ti tāsu jeṭṭhikā sapatham karontī paṭhamam gāthamāha –

**169.** “Yo nīliyaṃ maṇḍayati, saṇḍāsena vihaññati;  
Tassa sā vasamanvetu, yā te ambe avāharī”ti.

Tassattho – yo puriso palitānam kāḷavaṇṇakaraṇatthāya nīlaphalādīni yojetvā kataṃ nīliyaṃ maṇḍayati, nīlakesantare ca utṭhitaṃ palitaṃ uddharanto saṇḍāsena vihaññati kilamati, tassa evarūpassa mahallakassa sā vasaṃ anvetu, tathārūpaṃ patim labhatu, yā te ambe avāharīti.

Tāpaso “tvaṃ ekamantaṃ tiṭṭhāhī”ti vatvā dutiyaṃ seṭṭhidhītaram sapatham kāresi. Sā sapatham karontī dutiyaṃ gāthamāha –

**170.** “Vīsaṃ vā pañcavīsaṃ vā, ūnatimsaṃva jātiyā;  
Tādisā pati mā laddhā, yā te ambe avāharī”ti.

Tassattho – nāriyo nāma pannarasasoḷasavassikkakāle purisānam piyā honti. Yā pana tava ambāni avāhari, sā evarūpe yobbane patim alabhitvā jātiyā vīsaṃ vā pañcavīsaṃ vā ekena dvīhi ūnatāya ūnatimsaṃ vā vassāni patvā tādisā paripakkavayā hutvāpi patim mā laddhāti.

Tāyapi sapatham katvā ekamantaṃ ṭhitāya tatiyā tatiyaṃ gāthamāha –

**171.** “Dīgham gacchatu addhānam, ekikā abhisārikā;  
Saṅkete pati mā adda, yā te ambe avāharī”ti.

Tassattho – yā te ambe avāhari, sā patim patthayamānā tassa santikam abhisaraṇatāya abhisārikā nāma hutvā ekikā adutiyaṃ gāvutadvigāvutamattaṃ dīgham addhānam gacchatu, gantvāpi ca tasmim asukaṭṭhānam nāma āgaccheyyāsīti kate saṅkete taṃ patim mā addasāti.

Tāyapi sapatham katvā ekamantaṃ ṭhitāya catutthā catuttham gāthamāha –

**172.** “Alaṅkatā suvasanā, mālinī candanussadā;  
Ekikā sayane setu, yā te ambe avāharī”ti. – sā uttānatthāyeva;



Tāpaso “tumhehi atibhāriyā sopathā katā, aññehi ambāni khāditāni bhavissanti, gacchatha dāni tumhe”ti tā uyyojesi. Sakko bheravarūpārammaṇaṃ dassavā kūṭatāpasam tato palāpesi.

Satthā imaṃ dhammadesanaṃ āharitvā jātaṃ samodhānesi – “tadā kūṭajaṭilo ayaṃ ambagopako mahallako ahosi, catasso seṭṭhidhītarō etāyeva, sakko pana ahameva ahosi”nti.

Ambajātakavaṇṇanā catutthā.

[345] 5. Rājakumbhajātakavaṇṇanā

**Vanaṃ yadaggi dahatī**ti idaṃ satthā jetavane viharanto ekaṃ alasabhikkhum ārabba kathesi. So kira sāvatthivāsī kulaputto sāsane uraṃ datvā pabbajitvāpi alaso ahosi uddesaparipucchāyonisomanasikāravattapaṭivattādīhi paribāhiro nīvaraṇābhībhūto. Nisinnatṭhānādīsū iriyāpathesu tathā eva hoti. Tassa taṃ ālasiyabhāvaṃ ārabba bhikkhū dhammasabhāyaṃ kathaṃ samuṭṭhāpesuṃ “āvuso, asuko nāma bhikkhu evarūpe niyyānikasāsane pabbajitvā ālasiyo kusīto nīvaraṇābhībhūto viharatī”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepesa ālasiyoyevā”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto tassa amaccarataṃ ahosi, bārānasirājā ālasiyājātiko ahosi. Bodhisatto “rājānaṃ pabodhessāmī”ti ekaṃ upamaṃ upadhārento vicarati. Athekadivasaṃ rājā uyyānaṃ gantvā amaccagaṇaparivuto tattha vicaranto ekaṃ rājakumbhaṃ nāma ālasiyaṃ passi. Tathārūpā kira ālasiyā sakaladivasaṃ gacchantāpi ekadvaṅgulamattameva gacchanti. Rājā taṃ disvā “vayassa ko nāma so”ti bodhisattaṃ pucchi. Mahāsatto “rājakumbho nāmesa, mahārāja, ālasiyo. Evarūpo hi sakaladivasaṃ gacchantopi ekaṅguladvaṅgulamattameva gacchatī”ti vatvā tena saddhiṃ sallapanto “ambho, rājakumbha, tumhākaṃ dandhagamaṇaṃ imasmim āraññe dāvaggimhi utṭhite kiṃ karothā”ti vatvā paṭhamam gāthamāha –

173. “Vanaṃ yadaggi dahati, pāvako kaṇhavattanī;  
Kathaṃ karosī pacalaka, evaṃ dandhaparakkamo”ti.

Tattha **yadaggī**ti yadā aggi. **Pāvako kaṇhavattanī**ti aggino vevacanaṃ. **Pacalakā**ti taṃ ālapati. So hi calanto calanto gacchati, niccaṃ vā pacalāyati, tasmā “pacalako”ti vuccati. **Dandhaparakkamoti** garuvīriyo.

Taṃ sutvā rājakumbho dutiyaṃ gāthamāha –

174. “Bahūni rukkhachiddāni, pathabyā vivarāni ca;  
Tāni ce nābhisambhoma, hoti no kālapariyāyo”ti.

Tassattho – paṇḍita, amhākaṃ ito uttarigamaṇaṃ nāma natthi. Imasmim pana araññe rukkhachiddāni pathaviyaṃ vivarāni ca bahūni. Yadi tāni na pāpuṇāma, **hoti no kālapariyāyoti** maraṇameva no hotīti.

Taṃ sutvā bodhisatto itarā dve gāthā abhāsi –

175. “Yo dandhakāle tarati, taraṇīye ca dandhati;  
Sukkhapaṇṇava akkamma, atthaṃ bhañjati attano.

176. “Yo dandhakāle dandheti, taraṇīye ca tārayi;  
Sasīva rattim vibhajaṃ, tassattho paripūrati”ti.

Tattha **dandhakā**leti tesam tesam kammānaṃ saṅikaṃ kattabbakāle. **Taratī**ti turitaturito vegena

tāni kammāni karoti. **Sukkhapaṇṇamvāti** yathā vātātapasukkham tālapaṇṇam balavā puriso akkamitvā bhañjeyya, tattheva cuṇṇavicuṇṇam kareyya, evaṃ so attano atthaṃ vuddhiṃ bhañjati. **Dandhetī** dandhayati dandhakātabbāni kammāni dandhameva karoti. **Tārayī** turitakātabbāni kammāni turitova karoti. **Sasīva rattim vibhajanti** yathā cando juṇhapakkham rattim jotayamāno kālapakkharattito rattim vibhajanto divase divase paripūrati, evaṃ tassa purisassa attho paripūrati vuttam hoti.

Rājā bodhisattassa vacanaṃ sutvā tato paṭṭhāya analaso jāto.

Satthā imaṃ dhammadesanaṃ āharitvā jātakam samodhānesi – “tadā rājakumbho ālasiyabhikkhu ahoṣi, paṇḍitamacco pana ahameva ahoṣi”nti.

Rājakumbhajātakavaṇṇanā pañcamā.

[346] 6. Kesavajātakavaṇṇanā

**Manussindam jahitvānā**ti idaṃ satthā jetavane viharanto vissāsabhojanaṃ ārabha kathesi. Anāthapaṇḍikassa kira gehe pañcannaṃ bhikkhusatānaṃ nibaddhabhattaṃ hoti, gehaṃ niccakālaṃ bhikkhusaṅghassa opānabhūtaṃ kāsāvapajjotaṃ isivātapaṭivātaṃ. Atheadivasam rājā nagaraṃ padakkhiṇaṃ karonto seṭṭhino nivesane bhikkhusaṅghaṃ disvā “ahampi ariyasaṅghassa nibaddham bhikkham dassāmī”ti vihāraṃ gantvā satthāraṃ vanditvā pañcannaṃ bhikkhusatānaṃ nibaddham bhikkham paṭṭhapesi. Tato paṭṭhāya rājanivesane nibaddham bhikkhā diyyati, tivassikagandhasālibhojanaṃ paṇītaṃ. Vissāsenapi sinehenapi sahatthā dāyakā natthi, rājayutte dāpesi. Bhikkhū nisīditvā bhuñjitum na icchanti, nānaggarasabhataṃ gahetvā attano attano upaṭṭhākakulaṃ gantvā taṃ bhataṃ tesam datvā tehi dinnam lūkham vā paṇītaṃ vā bhuñjanti.

Atheadivasam rañño bahuṃ phalāphalaṃ āhariṃsu. Rājā “saṅghassa dethā”ti āha. Manussā bhataṃ gantvā ekabhikkhumpi adisvā “eko bhikkhupi natthī”ti rañño ārocesum. “Nanu velāyeva tāvā”ti? “Āma, velā, bhikkhū pana tumhākaṃ gehe bhataṃ gahetvā attano attano vissāsikānaṃ upaṭṭhākānaṃ gehaṃ gantvā tesam datvā tehi dinnam lūkham vā paṇītaṃ vā bhuñjanti”ti. Rājā “amhākaṃ bhataṃ paṇītaṃ, kena nu kho kāraṇena abhutvā aññaṃ bhuñjanti, satthāraṃ pucchissāmī”ti cintitvā vihāraṃ gantvā satthāraṃ vanditvā pucchi. Satthā “mahārāja, bhojanaṃ nāma vissāsaparamaṃ, tumhākaṃ gehe vissāsaṃ paccupaṭṭhāpetvā sinehena dāyakānaṃ abhāvā bhikkhū bhataṃ gahetvā attano attano vissāsikaṭṭhāne paribhuñjanti. Mahārāja, vissāasadiso añño raso nāma natthi, avissāsikena dinnam catumadhurampi hi vissāsikena dinnam sāmākabhataṃ na agghati. Porāṇakapaṇḍitāpi roge uppanne raññā pañca vejjakulāni gahetvā bhesajje kāritepi roge avūpasante vissāsikānaṃ santikaṃ gantvā aloṇakaṃ sāmākanīvārayāguñceva udakamattasittaṃ aloṇakapaṇṇaṇca paribhuñjitvā nirogā jāta”ti vatvā tena yācito atītaṃ āhari.

Atīte bārāṇasiyaṃ brahmadatte rajjaṃ kārente bodhisatto kāsiraṭṭhe brāhmaṇakule nibbatti, “kappakumāro”tissa nāmaṃ akaṃsu. So vayappatto takkasīlāyaṃ sabbasippāni uggaṇhitvā aparabhāge isipabbajjaṃ pabbajī. Tadā kesavo nāma tāpaso pañcahi tāpasasatehi parivuto gaṇasatthā hutvā himavante vasati. Bodhisatto tassa santikaṃ gantvā pañcannaṃ antevāsikasatānaṃ jeṭṭhantevāsiko hutvā vihāsi, kesavatāpasassa hitajjhāsayo sasineho ahoṣi. Te aññaṃaññaṃ ativiya vissāsikā ahesum. Aparabhāge kesavo te tāpase ādāya loṇambilasevanatthāya manussapathaṃ gantvā bārāṇasiyaṃ patvā rājuyyāne vasitvā punadvase nagaraṃ bhikkhāya pavisitvā rājadvāraṃ agamāsi. Rājā isigaṇaṃ disvā pakkosāpetvā antonivesane bhojetvā paṭiññaṃ gahetvā uyyāne vasāpesi. Atha vassāratte atikkante kesavo rājānaṃ apucchi. Rājā “bhante, tumhe mahallakā, amhe tāva upanissāya vasatha, daharatāpase himavantaṃ pesethā”ti āha. So “sādhū”ti jeṭṭhantevāsikena saddhiṃ te himavantaṃ pesetvā sayam ekakova ohiyi. Kappo himavantaṃ gantvā tāpasehi saddhiṃ vasi.

Kesavo kappena vinā vasanto ukkaṇḥitvā taṃ daṭṭhukāmo hutvā niddam na labhati, tassa niddam

alabhantassa sammā āhāro na pariṇāmaṃ gacchati, lohitaṃ pakkhandikā ahoṣi, bālā vedanā vattanti. Rājā pañca vejjakulāni gahetvā tāpasam paṭijaggi, rogo na vūpasammati. Kesavo rājānaṃ āha “mahārāja, kiṃ mayhaṃ maraṇaṃ icchatha, udāhu arogabhāva”nti? “Arogabhāvaṃ, bhante”ti. “Tena hi maṃ himavantaṃ pesethā”ti. “Sādhu, bhante”ti rājā nāradaṃ nāma amaccaṃ pakkāsāpetvā “nārada, amhākaṃ bhadantaṃ gahetvā vanacarakehi saddhiṃ himavantaṃ yāhī”ti pesesi. Nārado taṃ tattha netvā paccāgamāsi. Kesavassapi kappe diṭṭhamatṭeṃ cetasaṃkarogā vūpasanto, ukkaṇṭhā paṭippassambhi. Athassa kappo aloṇakena adhūpanena udakamattasittapaṇṇena saddhiṃ sāmākanīvārayāguṃ adāsi, tassa taṅkhaṇaṅṅeva lohitaṃ pakkhandikā paṭippassambhi.

Puna rājā nāradaṃ pesesi “gaccha kesavassa tāpasassa pavattiṃ jānāhī”ti. So gantvā taṃ arogaṃ disvā “bhante, bārāṇasirājā pañca vejjakulāni gahetvā paṭijagganto tumhe aroge kātuṃ nāsakkhi, kathaṃ te kappo paṭijaggi”ti vatvā paṭhamam gāthamāha –

177. “Manussindaṃ jahitvāna, sabbakāmasamiddhinaṃ;  
Kathaṃ nu bhagavā kesī, kappassa ramati assame”ti.

Tattha **manussindanti** manussānaṃ indaṃ bārāṇasirājānaṃ. **Kathaṃ nu bhagavā kesī** kena nu kho upāyena ayaṃ amhākaṃ bhagavā kesavatāpasā kappassa assame ramatīti.

Evaṃ aññehi saddhiṃ sallapanto viya kesavassa abhiraṭṭikāraṇaṃ pucchi. Taṃ sutvā kesavo dutiyaṃ gāthamāha –

178. “Sādūni ramaṇīyāni, santi vakkhā manoramā;  
Subhāsītāni kappassa, nārada ramayanti ma”nti.

Tattha **vakkhāti** rukkhā. Pāḷiyaṃ pana “rukkhā”tveva likhitaṃ. **Subhāsītāni** kappena kathitāni subhāsītāni maṃ ramayantīti attho.

Evaṃ pana vatvā “evaṃ maṃ abhiraṭṭikāraṇaṃ kappo aloṇakaṃ adhūpanaṃ udakasittapaṇṇamissaṃ sāmākanīvārayāguṃ pāyesi, tāya me sarīre byādhi vūpasamito, arogo jātomhī”ti āha. Taṃ sutvā nārado tatiyaṃ gāthamāha –

179. “Sālīnaṃ odanaṃ bhuñje, suciṃ maṃsūpasecanaṃ;  
Kathaṃ sāmākanīvāraṃ, aloṇaṃ chādayanti ta”nti.

Tattha **bhuñjeti** bhuñjasi, ayameva vā pāṭho. **Chādayantīti** chādayati pīṇeti toseti. Gāthābandhasukhatthaṃ pana anuāsiko kato. Idaṃ vuttaṃ hoti – yo tvaṃ suciṃ maṃsūpasecanaṃ rājakule rājārahaṃ sālībhattaṃ bhuñjasi, taṃ kathamidaṃ sāmākanīvāraṃ aloṇaṃ pīṇeti toseti, kathaṃ te etaṃ rucchatīti.

Taṃ sutvā kesavo catutthaṃ gāthamāha –

180. “Sādum vā yadi vāsādum, appaṃ vā yadi vā bahum;  
Vissattho yattha bhuñjeyya, vissāsaparamā rasā”ti.

Tattha **yadi vāsādunti** yadi vā asādum. **Vissattho** nirāsaṅko vissāsapatto hutvā. **Yattha bhuñjeyyāti** yasmim nivesane evaṃ bhuñjeyya, tattha evaṃ bhuttaṃ yaṃkiñci bhojanaṃ sādumeva. Kasmā? Yasmā **vissāsaparamā rasā**, vissāso paramo uttamo etesanti vissāsaparamā rasā. Vissāasadiso hi añño raso nāma natthi. Avissāsikena hi dinnam catumadhurampi vissāsikena dinnam ambilakañjiyaṃ na agghatīti.

Nārado tassa vacanaṃ sutvā rañño santikaṃ gantvā “kesavo idaṃ nāma kathesi” ti ācikkhi.

Satthā imaṃ dhammadesanaṃ āharitvā jātaṃ samodhānesi – “tadā rājā ānando ahosi, nārado sāriputto, kesavo bakabrahmā, kappo pana ahameva ahosi” nti.

Kesavajātakavaṇṇanā chaṭṭhā.

[347] 7. Ayakūṭajātakavaṇṇanā

**Sabbāyasanti** idaṃ satthā jetavane viharanto lokatthacariyaṃ ārabha kathesi. Vatthu **mahākaṇḍajātaka** (jā. 1.12.61 ādayo) āvi bhavissati.

Atīte bārānasiyaṃ brahmadatte rajjaṃ kārente bodhisatto tassa aggamaheṣiyā kucchimhi nibbattivā vayappatto uggahitasabbasippo pitu accayena rajje patiṭṭhāya dhammena rajjaṃ kāresi. Tadā manussā devamaṅgalikā hutvā bahū ajeḷakādayo māretvā devatānaṃ balikammaṃ karonti. Bodhisatto “pāṇo na hantabbo” ti bheriṃ carāpesi. Yakkhā balikammaṃ alabhamānā bodhisattassa kujjhivā himavante yakkhasamāgamaṃ gantvā bodhisattassa māraṇatthāya ekaṃ kakkhaḷaṃ yakkhaṃ pesesuṃ. So kaṇṇikamattaṃ mahantaṃ ādittaṃ ayakūṭaṃ gahetvā “iminā naṃ paharivā māressāmī” ti āgantvā majjhimayāmasamanantare bodhisattassa sayanamatthake aṭṭhāsi. Tasmīṃ khaṇe sakkassa āsanaṃ uṇhākāraṃ dassesi. So āvajjamāno taṃ kāraṇaṃ ñatvā indavajiraṃ ādāya gantvā yakkhassa upari aṭṭhāsi. Bodhisatto yakkhaṃ disvā “kiṃ nu kho esa maṃ rakkhamāno ṭhito, udāhu māretukāmo” ti tena saddhiṃ sallapanto paṭhamaṃ gāthamāha –

**181.** “Sabbāyasaṃ kūṭamatippamānaṃ, paggayha yo tiṭṭhasi antalikkhe;  
Rakkhāya me tvaṃ vihito nusajja, udāhu me cetayase vadhāyā” ti.

Tattha **vihito nusajjāti** vihito nu asi ajja.

Bodhisatto pana yakkhameva passati, na sakkam. Yakkho sakkassa bhayena bodhisattaṃ paharituṃ na sakkoti. So bodhisattassa kathaṃ sutvā “mahārāja, nāhaṃ tava rakkhaṇatthāya ṭhito, iminā pana jalitena ayakūṭena paharivā taṃ māressāmīti āgatomhi, sakkassa bhayena taṃ paharituṃ na sakkomī” ti etamatthaṃ dīpento dutiyaṃ gāthamāha –

**182.** “Dūto ahaṃ rājidha rakkhasānaṃ, vadhāya tuyhaṃ pahitohamasmi;  
Indo ca taṃ rakkhati devarājā, tenuttamaṅgaṃ na te phālayāmī” ti.

Taṃ sutvā bodhisatto itarā dve gāthā abhāsi –

**183.** “Sace ca maṃ rakkhati devarājā, devānamindo maghavā sujampati;  
Kāmaṃ pisācā vinadantu sabbe, na santase rakkhasiyā pajāya.

**184.** “Kāmaṃ kandantu kumbhaṇḍā, sabbe paṃsupisācakā;  
Nālaṃ pisācā yuddhāya, mahatī sā vibhiṃsikā” ti.

Tattha **rakkhasiyā pajāyāti** rakkhasisaṅkhātāya pajāya, rakkhasasattānanti attho. **Kumbhaṇḍāti** kumbhamattarahassaṅgā mahodarā yakkhā. **Paṃsupisācakāti** saṅkaraṭṭhāne pisācā. **Nālanti** pisācā nāma mayā saddhiṃ yuddhāya na samatthā. **Mahatī sā vibhiṃsikāti** yaṃ panete yakkhā sannipatitvā vibhiṃsikaṃ dassenti, sā mahatī vibhiṃsikā bhayakāraṇadassanamattameva mayhaṃ, na paṇāhaṃ bhāyāmīti attho.

Sakko yakkhaṃ palāpetvā mahāsattaṃ ovaditvā “mā bhāyi, mahārāja, ito paṭṭhāya tava rakkhā mamāyattā” ti vatvā sakaṭṭhānameva gato.

Satthā imaṃ dhammadesanaṃ āharitvā jātakam samodhānesi – “tadā sakko anuruddho ahosi, bārāṇasirājā ahameva ahosi”nti.

Ayakūṭajātakavaṇṇanā sattamā.

[348] 8. Araññajātakavaṇṇanā

**Araññā gāmamāgammā**ti idaṃ satthā jetavane viharanto thullakumārikāpalobhanaṃ ārabha kathesi. Vatthu **cūlanāradakassapajātake** (jā. 1.13.40 ādayo) āvi bhavissati.

Atīte bārāṇasiyaṃ brahmadatte rajjaṃ kārente bodhisatto brāhmaṇakule nibbattitvā vayappatto takkasīlāyaṃ uggahitasippo bhariyāya kālakatāya puttam gahetvā isipabbajjaṃ pabbajitvā himavante vasanto puttam assamapade ṭhapetvā phalāphalattāya gacchati. Tadā coresu paccantagāmaṃ paharitvā karamare gahetvā gacchantesu ekā kumārikā palāyitvā taṃ assamapadaṃ patvā tāpasakumāraṃ palobhetvā sīlavināsaṃ pāpetvā “ehi gacchāmā”ti āha. “Pitā tāva me āgacchatu, taṃ passitvā gamissāmi”ti. “Tena hi disvā āgacchā”ti nikkhamitvā antarāmagge nisīdi. Tāpasakumāro pitari āgate paṭhamam gāthamāha –

185. “Araññā gāmamāgamma, kiṃsīlam kiṃvataṃ aham;  
Purisaṃ tāta seveyyaṃ, taṃ me akkhāhi pucchito”ti.

Tattha **araññā gāmamāgammā**ti tāta aham ito araññato manussapathaṃ vasanatthāya gato vasanagāmaṃ patvā kiṃ karomīti.

Athassa pitā ovādam dadanto tisso gāthā abhāsi –

186. “Yo taṃ vissāsaya tāta, vissāsaṅca khameyya te;  
Sussūsī ca titikkhī ca, taṃ bhajehi ito gato.

187. “Yassa kāyena vācāya, manasā natthi dukkaṭam;  
Urasīva patiṭṭhāya, taṃ bhajehi ito gato.

188. “Haliddirāgaṃ kpicittam, purisaṃ rāgavirāginam;  
Tādisaṃ tāta mā sevi, nimmanussampi ce siyā”ti.

Tattha **yo taṃ vissāsayeti** yo puriso taṃ vissāseyya na parisāṅkeyya. **Vissāsaṅca khameyya teti** yo ca attani kayīramānaṃ tava vissāsaṃ patto nirāsaṅko taṃ khameyya. **Sussūsīti** yo ca tava vissāsavacanaṃ sotumicchati. **Titikkhīti** yo ca tayā kataṃ aparādham khamati. **Taṃ bhajehīti** taṃ purisaṃ bhajeyyāsi payirupāseyyāsi. **Urasīva patiṭṭhāyāti** yathā tassa urasi patiṭṭhāya vaḍḍhito orasaputto tvampi tādiso urasi patiṭṭhitaputto viya hutvā evarūpaṃ purisaṃ bhajeyyāsīti attho.

**Haliddirāganti** haliddirāgasadisam athiracittam. **Kpicittanti** lahuparivattitāya makkaṭacittam. **Rāgavirāginanti** muhutteneva rajjanavirajjanasabhāvaṃ. **Nimmanussampi ce siyāti** sacepi sakalam jambudīpatalam kāyaduccaritādivirahitassa manussassa abhāvena nimmanussaṃ siyā, tathāpi, tāta, tādisam lahucittam mā sevi, sabbampi manussapathaṃ vicinitvā heṭṭhā vuttaguṇasampannameva bhajeyyāsīti attho.

Taṃ sutvā tāpasakumāro “aham, tāta, imehi guṇehi samannāgataṃ purisaṃ kattha labhissāmi, na gacchāmi, tumhākaññeva santike vasissāmi”ti vatvā nivatti. Athassa pitā kaṣiṇaparikkammaṃ ācikkhi. Ubhopi aparihīnājñhānā brahmalokaparāyaṇā ahesuṃ.

Satthā imaṃ dhammadesanaṃ āharitvā jātakam samodhānesi – “tadā putto ca kumārikā ca eteyeva

ahesuṃ, pitā tāpaso pana ahameva ahosi’’nti.

Araññajātakavaṇṇanā aṭṭhamā.

[349] 9. Sandhibhedajātakavaṇṇanā

**Neva itthīsu sāmāññanti** idaṃ satthā jetavane viharanto pesuññasikkhāpadaṃ ārabba kathesi. Ekasmiṃ kira samaye satthā “chabbaggiyā bhikkhū pesuññaṃ upasaṃharanti’’ti sutvā te pakkosāpetvā “saccaṃ kira tumhe, bhikkhave, bhikkhūnaṃ bhaṇḍanaajātānaṃ kalahajātānaṃ vivādāpanānaṃ pesuññaṃ upasaṃharatha, tena anuppannāni ceva bhaṇḍanāni uppajanti, uppannāni ca bhīyyobhāvāya saṃvattanti’’ti pucchitvā “sacca’’nti vutte te bhikkhū garahitvā “bhikkhave, piṣuṇā vācā nāma tikhiṇasattipahārasadisā, daḷho vissāsopi tāya khippaṃ bhijjati, tañca pana gahetvā attano mettibhīndanakajano sīhausaḥsadiso hoti’’ti vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto tassa putto hutvā vayappatto takkasilāyaṃ uggahitasippo pitu accayena dhammena rajjaṃ kāresi. Tadā eko gopālako araññe gokulesu gāvo paṭijaggitvā āgacchanto ekaṃ gabbhinaṃ asallakkhetvā pahāya āgato. Tassā ekāya sīhiyā saddhiṃ vissāso uppajji. Tā ubhopi daḷhamittā hutvā ekato vicaranti. Aparabhāge gāvī vacchakaṃ, sīhi sīhapotakaṃ vijāyi. Te ubhopi janā kulena āgatamettiyā daḷhamittā hutvā ekato vicaranti. Atheko vanacarako araññaṃ pavisitvā tesam vissāsaṃ disvā araññe uppajjanakabhaṇḍaṃ ādāya bārāṇasiṃ gantvā rañño datvā “api te, samma, kiñci araññe acchariyaṃ diṭṭhapubba’’nti rañña puṭṭho “deva, aññaṃ kiñci na passāmi, ekaṃ pana sīhañca usabhañca aññaṃaññaṃ vissāsike ekato vicarante addasa’’nti āha. “Etesaṃ tatiye uppanne bhayaṃ bhavissati, yadā tesam tatiyaṃ passati, atha me ācikkheyyāsi’’ti. “Sādhu, devā’’ti.

Vanacarake pana bārāṇasiṃ gate eko siṅgālo sīhañca usabhañca upaṭṭhahi. Vanacarako araññaṃ gantvā taṃ disvā “tatiyassa uppannabhāvaṃ rañño kathessāmi’’ti nagaraṃ gato. Siṅgālo cintesi “mayā ṭhapetvā sīhamaṃsañca usabhamāsañca aññaṃ akhāditapubbaṃ nāma natthi, ime bhinditvā imesaṃ maṃsaṃ khādissāmi’’ti. So “ayaṃ taṃ evaṃ vadati, ayaṃ taṃ evaṃ vadati’’ti ubhopi te aññaṃaññaṃ bhinditvā na cirasseva kalahaṃ kāretvā maraṇākārapatte akāsi. Vanacarakopi gantvā rañño “tesaṃ, deva, tatiyo uppanno’’ti āha. “Ko so’’ti? “Siṅgālo, devā’’ti. Rājā “so ubho mitte bhinditvā mārāpessati, mayaṃ tesam matakāle sampāpuṇissāma’’ti vatvā rathaṃ abhiruyha vanacarakena maggadesakena gacchanto tesu aññaṃaññaṃ kalahaṃ katvā jīvitakkhayaṃ pattesu sampāpuṇi. Siṅgālo pana haṭṭhatuṭṭho ekavāraṃ sīhassa maṃsaṃ khādati, ekavāraṃ usabhassa maṃsaṃ khādati. Rājā te ubhopi jīvitakkhayaṃ pattesu disvā rathe ṭhitova sārathinā saddhiṃ sallapanto imā gāthā abhāsi –

189. “Neva itthīsu sāmāññaṃ, nāpi bhakkhesu sārathi;  
Athassa sandhibhedassa, passa yāva sucintitaṃ.

190. “Asi tikkhova maṃsamhi, pesuññaṃ parivattati;  
Yatthūsabhañca sīhañca, bhakkhayanti migādhamaṃ.

191. “Imaṃ so sayanaṃ seti, yamimaṃ passasi sārathi;  
Yo vācaṃ sandhibhedassa, piṣuṇassa nibodhati.

192. “Te janā sukhamedhanti, narā saggatāriva;  
Ye vācaṃ sandhibhedassa, nāvabodhanti sārathi’’ti.

Tattha **neva itthīsūti** samma sārathi, imesaṃ dvinnaṃ janānaṃ neva itthīsu sāmāññaṃ atthi na, bhakkhesupi. Aññaṃeva hi itthiṃ sīho sevati, aññaṃ usabho, aññaṃ bhakkhaṃ sīho khādati, aññaṃ usabhoti attho. **Athassāti** evaṃ kalahakāraṇe avijjamānepi atha imassa mittasandhibhedakassa duṭṭhasiṅgālassa “ubhinnaṃ maṃsaṃ khādissāmi’’ti cintetvā ime mārentassa **passa yāva sucintitaṃ**,

sucintitaṃ jātanti adhippāyo. **Yatthā**ti yasmaṃ pesuññe parivattamāne. Usabhañca sīhañca migādhamā siṅgālā khādanti, taṃ pesuññaṃ maṃsamhi tikhiṇo asi viya mittabhāvaṃ chindantameva parivattatīti dīpeti.

**Yamimaṃ passasī**ti samma sārathi, yaṃ imaṃ passasi imesaṃ dvinnaṃ matasayanaṃ, aññopi yo puggalo sandhibhedassa piṣuṇassa piṣuṇavācaṃ nibodhati gaṇhāti, so imaṃ sayanaṃ seti, evamevaṃ maratīti dasseti. **Sukhamedhantī**ti sukhaṃ vindanti labhanti. **Narā saggagatārivāti** saggagatā dībbabhogasamaṅgino narā viya te sukhaṃ vindanti. **Nāvabodhantī**ti na sārato paccenti, tādisaṃ pana vacanaṃ sutvā codetvā sāretvā mettiṃ abhinditvā pākatikāva hontīti.

Rājā imā gāthā bhāsivā sīhassa kesaracammaṃnakhadāṭhā gāhāpetvā nagarameva gato.

Satthā imaṃ dhammadešanaṃ āharitvā jātaṃ samodhānesi – “tadā bārāṇasirājā ahameva ahosi”nti.

Sandhibhedajātakavaṇṇanā navamā.

[350] 10. Devatāpañhajātakavaṇṇanā

**Hanti hatthehi pādehī**ti ayaṃ devatāpucchā **umaṅgajātake** (jā. 2.22.590 ādayo) āvi bhavissati.

Devatāpañhajātakavaṇṇanā dasamā.

Cūḷakuṇālavaggo pañcamo.

Jātakuddānaṃ –

Kāliṅgo assāroho ca, ekarājā ca daddaro;  
Sīlavīmaṃsasujātā, palāso sakuṇo chavo;  
Seyyoti dasa jātakā.

Pucimando kassapo ca, khantivādī lohakumbhī;  
Sabbamaṃsalābhī saso, matārodakaṇaverā;  
Tittiro succajo dasa.

Kuṭidūso duddabhāyo, brahmadattacammaṃsāṭako;  
Godharājā ca kakkāru, kākavatī nanu sociyo;  
Kālabāhu sīlavīmaṃso dasa.

Kokāliko rathalaṭṭhi, pakkagodharājovādā;  
Jambukabrahāchatto ca, pīṭhathusā ca bāveru;  
Visayhaseṭṭhi dasadhā.

Kinnarīvānarakuntinī, ambahārī gajakumbho;  
Kesavāyakūṭṭhāraññaṃ, sandhibhedo devatāpañhā.

Vagguddānaṃ –

Kāliṅgo pucimando ca, kuṭidūsakakokilā;  
Cūḷakuṇālavaggotī, pañcavaggā catukkamhi;  
Honti paññāsa jātakā.

Catukkanipātavaṇṇanā niṭṭhitā.

## 5. Pañcakanipāto

### 1. Maṇikuṇḍalavaggo

[351] 1. Maṇikuṇḍalajātakavaṇṇanā

**Jīno rathassaṃ maṇikuṇḍale cāti** idaṃ satthā jetavane viharanto kosalarāñño antepure sabbatthasādhakaṃ paduṭṭhāmaccaṃ ārabba kathesi. Vatthu heṭṭhā vitthāritameva. Idha pana bodhisatto bārāṇasirājā ahosi. Paduṭṭhāmacco kosalarājānaṃ ānetvā kāsirajjaṃ gāhāpetvā bārāṇasirājānaṃ bandhāpetvā bandhanāgāre pakkhipāpesi. Rājā jhānaṃ uppādetvā ākāse pallaṅkena nisīdi, corarañño sarīre dāho uppajji. So bārāṇasirājānaṃ upasaṅkamitvā paṭhamāṃ gāthamāha –

1. “Jīno rathassaṃ maṇikuṇḍale ca, putte ca dāre ca tatheva jīno;  
Sabbesu bhogesu asesakesu, kasmā na santappasi sokakāle”ti.

Tattha **jīno rathassaṃ maṇikuṇḍale cāti** mahārāja, tvaṃ rathaṅca assaṅca maṇikuṇḍalāni ca jīno, “jīno rathasse ca maṇikuṇḍale cā”tipi pāṭho. **Asesakesūti** nissesakesu.

Taṃ sutvā bodhisatto imā dve gāthā abhāsi –

2. “Pubbeva maccaṃ vijahanti bhogā, macco vā te pubbataraṃ jahāti;  
Asassatā bhogino kāmakāmi, tasmā na socāmahaṃ sokakāle.
3. “Udeti āpūراتi veti cando, atthaṃ tapetvāna paleti sūriyo;  
Viditā mayā sattuka lokadhammā, tasmā na socāmahaṃ sokakāle”ti.

Tattha **pubbeva maccanti** maccaṃ vā bhogā pubbeva paṭhamataraññeva vijahanti, macco vā te bhoge pubbataraṃ jahāti. **Kāmakāmīti** corarājānaṃ ālapati. Ambho, kāme kāmayaṃāna kāmakāmi bhogino nāma loke asassatā, bhogesu vā naṭṭhesu jīvamānāva abhogino honti, bhoge vā pahāya sayāṃ nassanti, tasmā ahaṃ mahājanassa sokakālepi na socāmīti attho. **Viditā mayā sattuka lokadhammāti** corarājānaṃ ālapati. Ambho, sattuka, mayā lābho alābho yaso ayasotiādayo lokadhammā viditā. Yatheva hi cando udeti ca pūراتi ca puna ca khīyati, yathā ca sūriyo andhakāraṃ vidhamanto mahantaṃ ālokaṃ tapetvāna puna sāyaṃ atthaṃ paleti atthaṃ gacchati na dissati, evameva bhogā uppajjanti ca nassanti ca, tattha kiṃ sokena, tasmā na socāmīti attho.

Evāṃ mahāsatto corarañño dhammaṃ desetvā idāni tameva coraṃ garahanto āha –

4. “Alaso gihī kāmabhogī na sādhu, asaṅñato pabbajito na sādhu;  
Rājā na sādhu anisammakārī, yo paṇḍito kodhano taṃ na sādhu.
5. “Nisamma khattiyo kayirā, nānisamma disampati;  
Nisammakārino rāja, yaso kitti ca vaḍḍhatī”ti.

Imā pana dve gāthā heṭṭhā vitthāritāyeva. Corarājā bodhisattaṃ khamāpetvā rajjaṃ paṭicchāpetvā attano janapadameva gato.

Satthā imaṃ dhammaḍesaṇaṃ āharitvā jātaṃ samodhānesi – “tadā kosalarājā ānando ahosi, bārāṇasirājā pana ahameva ahosi”nti.



## Maṅḍikūḍalajātakavaṇṇanā paṭhamā.

[352] 2. Sujātajātakavaṇṇanā

**Kim nu santaramānovāti** idaṃ satthā jetavane viharanto matapitikaṃ kuṭumbikaṃ ārabha kathesi. So kira pitari mate paridevamāno vicarati, sokaṃ vinodetuṃ na sakkoti. Atha satthā tassa sotāpattiphalūpanissayaṃ disvā sāvathim piṇḍāya caritvā pacchāsamaṇaṃ ādāya tassa gehaṃ gantvā paññattāsane nisinno taṃ vanditvā nisinnaṃ “kim, upāsaka, socasī”ti vatvā “āma, bhante”ti vutte “āvuso, porāṇakapaṇḍitā paṇḍitānaṃ vacanaṃ sutvā pitari kālakate na socimsū”ti vatvā tena yācito atītaṃ āhari.

Atīte bārānasiyaṃ brahmadatte rajjaṃ kārente bodhisatto kuṭumbikagehe nibbatti, “sujātakumāro”tissa nāmaṃ kariṃsu. Tassa vayappattassa pitāmaho kālamakāsī. Athassa pitā pitu kālakiriyato paṭṭhāya sokasamappito ālāhanaṃ gantvā ālāhanato aṭṭhīni āharitvā attano ārāme mattikāthūpaṃ katvā tāni tattha nidahitvā gatagatavelāya thūpaṃ pupphehi pūjetvā cetiyaṃ āvijjhanto paridevati, neva nhāyati na limpati na bhuñjati na kammante vicāreti. Taṃ disvā bodhisatto “pitā me ayyakassa matakālato paṭṭhāya sokābhībūto carati, ṭhapetvā pana maṃ añño etaṃ saññāpetuṃ na sakkoti, ekena naṃ upāyena nissokaṃ karissāmi”ti bahigāme ekaṃ matagoṇaṃ disvā tiṇaṅca pānīyaṅca āharitvā tassa purato ṭhapetvā “khāda, khāda, piva, pivā”ti āha. Āgatāgatā naṃ disvā “samma sujāta, kim ummattakosi, matagoṇassa tiṇodakaṃ desī”ti vadanti. So na kiñci paṭivadati. Athassa pitu santikaṃ gantvā “putto te ummattako jāto, matagoṇassa tiṇodakaṃ detī”ti āhaṃsu. Taṃ sutvā kuṭumbikassa pitusoko apagato, puttasoko patitṭhito. So vegenāgantvā “nanu tvaṃ, tāta sujāta, paṇḍitosi, kimkāraṇā matagoṇassa tiṇodakaṃ desī”ti vatvā dve gāthā abhāsī –

6. “Kim nu santaramānova, lāyitvā haritaṃ tiṇaṃ;  
Khāda khādāti lapasī, gatasattaṃ jaraggavaṃ.
7. “Na hi annena pānena, mato goṇo samuṭṭhahe;  
Tvaṅca tucchaṃ vilapasī, yathā taṃ dummatī tathā”ti.

Tattha **santaramānovāti** turito viya hutvā. **Lāyitvāti** lunitvā. **Lapasīti** vilapasī. **Gatasattaṃ jaraggavanti** vigatajīvitāṃ jīṇṇagoṇaṃ. **Yathā tanti** ettha **tanti** nipātamattaṃ, yathā dummatī appapañño vilapeyya, tathā tvaṃ tucchaṃ vilapasīti.

Tato bodhisatto dve gāthā abhāsī –

8. “Tatheva tiṭṭhati sīsaṃ, hatthapādā ca vāladhi;  
Sotā theveva tiṭṭhanti, maññe goṇo samuṭṭhahe.
9. “Nevayyakassa sīsaṅca, hatthapādā ca dissare;  
Rudaṃ mattikathūpasmim, nanu tvaññeva dummatī”ti.

Tattha **tathevāti** yathā pubbe ṭhitaṃ, theveva tiṭṭhati. **Maññeti** etesaṃ sīsādīnaṃ theveva ṭhitattā ayaṃ goṇo samuṭṭhaheyyāti maññāmi. **Nevayyakassa sīsaṅcāti** ayyakassa pana sīsaṅca hatthapādā ca na dissanti. “Piṭṭhipādā na dissare”tipi pāṭho. **Nanu tvaññeva dummatīti** ahaṃ tāva sīsādīni passanto evaṃ karomi, tvaṃ pana na kiñci passasi, jhāpitaṭṭhānato aṭṭhīni āharitvā mattikāthūpaṃ katvā paridevasi. Iti maṃ paṭicca satagaṇena saḥassagaṇena satasahassagaṇena nanu tvaññeva dummatī. Bhijjanadhammā nāma saṅkhārā bhijjanti, tattha kā paridevanāti.

Taṃ sutvā bodhisattassa pitā “mama putto paṇḍito idhalokaparalokakiccaṃ jānāti, mama saññāpanatthāya etaṃ kammaṃ akāsī”ti cintetvā “tāta sujātaṇḍita, ‘sabbe saṅkhārā anicca’ti me ñātā, ito paṭṭhāya na socissāmi, pitusokaharaṇakaputtana nāma tādīsena bhavitabba”nti vatvā puttassa thutim

karonto āha –

10. “Ādittam vata maṃ santam, ghatasittamva pāvakaṃ;  
Vārinā viya osiñcaṃ, sabbam nibbāpaye daram.
11. “Abbahī vata me sallam, yamāsi hadayassitam;  
Yo me sokaparetassa, pitusokaṃ apānudi.
12. “Sohaṃ abbūḷhasallosmi, vītasoko anāvilo;  
Na socāmi na rodāmi, tava sutvāna māṇava.
13. “Evaṃ karonti sappaññā, ye honti anukampakā;  
Vinivattenti sokamhā, sujāto pitaram yathā”ti.

Tattha **nibbāpayeti** nibbāpayi. **Daranti** sokadaratham. **Sujāto pitaram yathāti** yathā mama putto sujāto maṃ pitaram samānaṃ attano sappaññatāya sokamhā vinivattayi, evaṃ aññepi sappaññā sokamhā vinivattayantīti.

Satthā imaṃ dhammadesanaṃ āharitvā saccāni pakāsetvā jātakaṃ samodhānesi, saccapariyosāne kuṭumbiko sotāpattiphale patiṭṭhahi. Tadā sujāto ahameva ahosinti.

Sujātajātakavaṇṇanā dutiyā.

[353] 3. Venasākhajātakavaṇṇanā

**Nayidaṃ niccaṃ bhavitabbanti** idaṃ satthā bhaggesu saṃsumāragiraṃ nissāya bhesakaḷāvane viharanto bodhirājakumāraṃ ārabha kathesi. Bodhirājakumāro nāma udenassa rañño putto tasmim kāle saṃsumāragire vasanto ekaṃ pariyodātasippaṃ vaḍḍhakaṃ pakkosāpetvā aññehi rājūhi asadisam katvā kokanadaṃ nāma pāsādaṃ kārāpesi. Kārāpetvā ca pana “ayaṃ vaḍḍhakī aññassapi rañño evarūpaṃ pāsādaṃ kareyyā”ti maccharāyanto tassa akkhīni uppāṭāpesi. Tenassa akkhīnaṃ uppāṭitabhāvo bhikkhusaṅghe pākaṭo jāto. Tasmā bhikkhū dhammasabhāyaṃ kathaṃ samuṭṭhāpesuṃ “āvuso, bodhirājakumāro kira tathārūpassa vaḍḍhakino akkhīni uppāṭāpesi, aho kakkhaḷo pharuso sāhasiko”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepesa kakkhaḷo pharuso sāhasikova. Na kevalaṅca idāneva, pubbepesa khattiyasahassānaṃ akkhīni uppāṭāpetvā māretvā tesam maṃsena balikammaṃ kāresi”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto takkasilāyaṃ disāpāmokkho ācariyo ahoṣi. Jambudīpatale khattiyamāṇavā brāhmaṇamāṇavā ca tasseva santike sippaṃ uggaṇhiṃsu. Bārānasirañño putto brahmadattakumāro nāma tassa santike tayo vede uggaṇhi. So pana pakatiyāpi kakkhaḷo pharuso sāhasiko ahoṣi. Bodhisatto āṅgavijjāvasena tassa kakkhaḷapharusasāhasikabhāvaṃ ñatvā “tāta, tvaṃ kakkhaḷo pharuso sāhasiko, pharusena nāma laddhaṃ issariyaṃ aciraṭṭhitikaṃ hoti, so issariye vinaṭṭhe bhinnanāvo viya samudde patiṭṭhaṃ na labhati, tasmā mā evarūpo ahoṣi”ti taṃ ovdanto dve gāthā abhāsi –

14. “Nayidaṃ niccaṃ bhavitabbaṃ brahmadatta, khemaṃ subhikkhaṃ sukhatā ca kāye;  
Athaccaye mā ahu sampamūḷho, bhinnaplavo sāgarasseva majjhe.
15. “Yāni karoti puriso, tāni attani passati;  
Kalyāṇakārī kalyāṇaṃ, pāpakārī ca pāpakaṃ;  
Yādisaṃ vapate bījaṃ, tādisaṃ harate phala”nti.

Tattha **sukhatā ca kāyeti** tāta brahmadatta, yadetaṃ khemaṃ vā subhikkhaṃ vā yā vā esā sukhatā kāye, idaṃ sabbaṃ imesaṃ sattānaṃ niccaṃ sabbakālamaeva na bhavati, idaṃ pana aniccaṃ hutvā abhāvadhammaṃ. **Atthaccayeti** so tvaṃ aniccatāvāsena issariye vigate attano atthassa accaye yathā nāma bhinnaplavo bhinnanāvo manusso sāgaramajjhe patiṭṭhaṃ alabhanto sampamūḷho hoti, evaṃ mā ahu sampamūḷho. **Tāni attani passatīti** tesāṃ kammānaṃ vipākaṃ vindanto tāni attani passati nāma.

So ācariyaṃ vanditvā bārāṇasiṃ gantvā pitu sippaṃ dassetvā oparajje patiṭṭhāya pitu accayena rajjaṃ pāpuṇi. Tassa piṅgiyo nāma purohito ahosi kakkhaḷo pharuso sāhasiko. So yasalobhena cintesi “yaṃnūnāhaṃ iminā rañña sakalajambudīpe sabbe rājāno gāhāpeyyaṃ, evamesa ekarājā bhavissati, ahampi ekapurohito bhavissāmi”ti. So taṃ rājānaṃ attano kathaṃ gāhāpesi. Rājā mahatiyā senāya nagarā nikkhamitvā ekassa rañño nagaraṃ rundhitvā taṃ rājānaṃ gaṇhi. Etenupāyena sakalajambudīpe rajjaṃ gahetvā rājasahassaparivuto “takkasilāyaṃ rajjaṃ gaṇhissāmi”ti agamāsi. Bodhisatto nagaraṃ paṭisaṅkharitvā parehi appadhaṃsiyaṃ akāsi.

Bārāṇasirājā gaṅgānadītīre mahato nigrodharukkhasssa mūle sāṇiṃ parikkhipāpetvā upari vitānaṃ kārāpetvā sayanaṃ pañṇāpetvā nivāsaṃ gaṇhi. So jambudīpatale sahasarājāno gahetvā yujjhamānopi takkasilāṃ gahetuṃ asakkonto attano purohitaṃ pucchi “ācariya, mayaṃ ettakehi rājūhi saddhiṃ āgantvāpi takkasilāṃ gahetuṃ na sakkoma, kiṃ nu kho kātabba”nti. “Mahārāja, sahasarājūnaṃ akkhīni uppātetvā māretvā kucchim phāletvā pañcamadhuramaṃsaṃ ādāya imasmiṃ nigrodhe adhivatthāya devatāya balikammaṃ katvā antavaṭṭhi rukkaṃ parikkhipitvā lohitapañcaṅgulikāni karoma, evaṃ no khippameva jayo bhavissati”ti. Rājā “sādhū”ti paṭissuṇitvā antosāṇiyaṃ mahābale malle ṭhapetvā ekamekaṃ rājānaṃ pakkosāpetvā nippīlanena visaññaṃ kāretvā akkhīni uppātetvā māretvā maṃsaṃ ādāya kaḷavarāni gaṅgāyaṃ pavāhetvā vuttappakāraṃ balikammaṃ kāretvā balibheriṃ ākoṭāpetvā yuddhāya gato.

Athassa aṭṭālakato eko yakkho āgantvā dakkhiṇakkhiṃ uppātetvā agamāsi, athassa mahatī vedanā uppajji. So vedanāppatto āgantvā nigrodharukkhamūle pañṇattāsane uttānako nipajji. Tasmim khaṇe eko gijjho ekaṃ tikhiṇakoṭikaṃ aṭṭhiṃ gahetvā rukkhagge nisino maṃsaṃ khādītva aṭṭhiṃ vissajjesi, aṭṭhikoṭi āgantvā rañño vāmaṅkhiṃhi ayasūlaṃ viya patitvā akkhiṃ bhindī. Tasmim khaṇe bodhisattassa vacanaṃ sallakkhesi. So “amhākaṃ ācariyo ‘ime sattā bījānurūpaṃ phalaṃ viya kammānurūpaṃ vipākaṃ anubhonti”ti kathento idaṃ disvā kathesi mañña”ti vatvā vilapanto dve gāthā abhāsi –

16. “Idaṃ tadācariyavaco, pārāsariyo yadabravi;  
‘Mā su tvaṃ akari pāpaṃ, yaṃ tvaṃ pacchā kataṃ tape’.
17. “Ayameva so piṅgiya venasākho, yamhi ghātayaṃ khattiyānaṃ sahasssaṃ;  
Alaṅkate candanasārānulitte, tameva dukkhaṃ paccāgataṃ mama”nti.

Tattha **idaṃ tadācariyavacoti** idaṃ taṃ ācariyassa vacanaṃ. **Pārāsariyoti** taṃ gottena kitteti. **Pacchā katanti** yaṃ pāpaṃ tayā kataṃ, pacchā taṃ tapeyya kilameyya, taṃ mā karīti ovādaṃ adāsi, ahaṃ panassa vacanaṃ na karinti. **Ayamevāti** nigrodharukkhaṃ dassento vilapati. **Venasākhoti** patthaṭasākho. **Yamhi ghātayinti** yamhi rukke khattiyasahassaṃ māresim. **Alaṅkate candanasārānulitteti** rājālaṅkārehi alaṅkate lohitacandanasārānulitte te khattiyē yatthāhaṃ ghātesim, ayameva so rukkho idāni mayhaṃ kiñci parittānaṃ kātuṃ na sakkotīti dīpeti. **Tameva dukkhanti** yaṃ mayā paresaṃ akkhiuppātanadukkhaṃ kataṃ, idaṃ me tatheva paṭiāgataṃ, idāni no ācariyassa vacanaṃ matthakaṃ pattanti paridevati.

So evaṃ paridevamāno aggamaheṣiṃ anussaritvā –

18. “Sāmā ca kho candanalittagattā, laṭṭhīva sobhañjanakassa uggatā;  
Adisvā kālaṃ karissāmi ubbarim, taṃ me ito dukkhataraṃ bhavissati”ti. –

Gāthamāha –

Tassattho – mama bhariyā suvaṇṇasāmā ubbarī yathā nāma siggurukkhasa uju uggaṭā sākhā mandamāluteritā kampamānā sobhati, evaṃ itthivilāsaṃ kurumānā sobhati, tamahaṃ idāni akkhīnaṃ bhinnattā ubbariṃ adisvāva kālaṃ karissāmi, taṃ me tassā adassanaṃ ito maraṇadukkhatopi dukkhataraṃ bhavissatīti.

So evaṃ vilapantova maritvā niraye nibbatti. Na naṃ issariyaluddho purohito parittāṇaṃ kātuṃ sakkhi, na attano issariyaṃ. Tasmīṃ matamatteyeva balakāyo bhijjitvā palāyi.

Sattā imaṃ dhammadesanaṃ āharitvā jātaṃ samodhānesi – “tadā bārāṇasirājā bodhirājakumāro ahoṣi, piṅgiyo devadatto, disāpāmokkhācariyo pana ahameva ahoṣi”nti.

Venasākhajātakavaṇṇanā tatiyā.

[354] 4. Uragajātakavaṇṇanā

**Uragova tacam jīṇṇanti** idaṃ sattā jetavane viharanto mataputtakaṃ kuṭumbikaṃ ārabha katesi. Vatthu pana matabharyamatapitikavatthusadisameva. Idhāpi tatheva sattā tassa nivesanaṃ gantvā taṃ āgantvā vanditvā nisinnaṃ “kim, āvuso, socasī”ti pucchitvā “āma, bhante, puttassa me matakālato paṭṭhāya socāmi”ti vutte “āvuso, bhijjanadhammaṃ nāma bhijjati, nassanadhammaṃ nāma nassati, tañca kho na ekasmiṃyeva kule, nāpi ekasmiññeva gāme, atha kho aparimāṇesu cakkavālesu tīsu bhavesu amaraṇadhammo nāma natthi, tabbhāveneva ṭhātuṃ samattho ekasaṅkhāropi sassato nāma natthi, sabbe sattā maraṇadhammā, sabbe saṅkhārā bhijjanadhammā, porāṇakapaṇḍitāpi putte mate ‘maraṇadhammaṃ mataṃ, nassanadhammaṃ natṭha’nti na sociṃsū”ti vatvā tena yācito atītaṃ āhari.

Atīte bārāṇasiyaṃ brahmadatte rajjaṃ kārente bodhisatto bārāṇasiyaṃ dvāraḡāmake brāhmaṇakule nibbattitvā kuṭumbaṃ saṅṭhapetvā kasikkamma jīvikaṃ kappesi. Tassa putto ca dhītā cāti dve dārakā ahesuṃ. So puttassa vayappattassa samānakulato kumārikaṃ āharitvā adāsi, iti te dāsiyā saddhiṃ cha janā ahesuṃ – bodhisatto, bhariyā, putto, dhītā, suṇisā, dāsīti. Te samaggā sammodamānā piyasaṃvāsā ahesuṃ. Bodhisatto sesānaṃ pañcannaṃ evaṃ ovādaṃ deti “tumhe yathāladhaniyāmeneva dānaṃ detha, sīlaṃ rakkhatha, uposathakammaṃ karoṭha, maraṇassatiṃ bhāvettha, tumhākaṃ maraṇabhāvaṃ sallakkhetha, imesañhi sattānaṃ maraṇaṃ dhuvaṃ, jīvitaṃ addhuvaṃ, sabbe saṅkhārā aniccā khayavayadhamminova, rattiñca divā ca appamattā hothā”ti. Te “sādhū”ti ovādaṃ sampaṭicchitvā appamattā maraṇassatiṃ bhāventi.

Athekadivasāṃ bodhisatto puttana saddhiṃ khettaṃ gantvā kasati. Putto kacavaraṃ saṅkaḍḍhitvā jhāpeti. Tassāvidūre ekasmiṃ vammike āsīviso atthi. Dhūmo tassa akkhīni pahari. So kuddho nikkhamitvā “imaṃ nissāya mayhaṃ bhaya”nti catasso dāṭhā nimujjāpento taṃ ḍaṃsi, so parivattitvā patito. Bodhisatto parivattitvā taṃ patitaṃ disvā goṇe ṭhapetvā gantvā tassa matabhāvaṃ ñatvā taṃ ukkhipitvā ekasmiṃ rukkhamūle nipajjāpetvā pārūpitvā neva rodi na paridevi – “bhijjanadhammaṃ pana bhinnaṃ, maraṇadhammaṃ mataṃ, sabbe saṅkhārā aniccā maraṇanippattikā”ti aniccabhāvameva sallakkhetvā kasi. So khettsamīpena gacchantāṃ ekaṃ paṭivissakaṃ purisaṃ disvā “tāta, gehaṃ gacchasi”ti pucchitvā “āmā”ti vutte tena hi amhākampī gharaṃ gantvā brāhmaṇiṃ vadeyyāsi “ajja kira pubbe viya dvinnaṃ bhattaṃ anāharitvā ekassevāhāraṃ āhareyyātha, pubbe ca ekikāva dāsī āhāraṃ āharati, ajja pana cattāropi janā suddhavatthanivatthā gandhapupphahatthā āgaccheyyāthā”ti. So “sādhū”ti gantvā brāhmaṇiyā tatheva katesi. Kena te, tāta, imaṃ sāsanaṃ dinnanti. Brāhmaṇena, ayyeti. Sā “putto me mato”ti aññāsi, kampanamattampissā nāhoṣi. Evaṃ subhāvitacittā suddhavatthanivatthā gandhapupphahatthā dāsiṃ pana āhāraṃ āharāpetvā sesehi saddhiṃ khettaṃ agamāsi. Ekassapi roditaṃ vā paridevitaṃ vā nāhoṣi.

Bodhisatto puttassa nipannachāyāyameva nisīditvā bhuñji. Bhuttāvasāne sabbepi dārūni uddharitvā

taṃ citakaṃ āropetvā gandhapupphehi pūjetvā jhāpesuṃ. Ekassa ca ekabindupi assu nāhosi, sabbepe subhāvitamarāṇassatino honti. Tesam sīlatejena sakkassa āsanam uṇhākāram dassesi. So “ko nu kho maṃ ṭhānā cāvetukāmo”ti upadhārento tesam guṇatejena uṇhabhāvaṃ ñatvā pasannamānaso hutvā “mayā etesaṃ santikaṃ gantvā sīhanādaṃ nadāpetvā sīhanādapariyosāne etesaṃ nivesanaṃ sattaratanaparipuṇṇaṃ katvā āgantum vaṭṭati”ti vegena tattha gantvā ālāhanapasse ṭhito “tāta, kiṃ karoṭhā”ti āha. “Ekaṃ manussaṃ jhāpema, sāmī”ti. “Na tumhe manussaṃ jhāpessatha, ekaṃ pana migam māretvā pacatha maññe”ti. “Natthetaṃ sāmī, manussameva jhāpema”ti. “Tena hi verimanusso vo bhavissati”ti. Atha naṃ bodhisatto “orasaputto no sāmī, na veriko”ti āha. “Tena hi vo appiyaputto bhavissati”ti? “Ativiya piyaputto, sāmī”ti. “Atha kasmā na rodasī”ti? So arodanakāraṇaṃ kathento paṭhamam gāthamāha –

19. “Uragova tacam jīṇṇam, hitvā gacchati sam tanum;  
Evaṃ sarīre nibbhoge, pete kālakate sati.
20. “Ḍayhamāno na jānāti, ñātīnaṃ paridevitaṃ;  
Tasmā etaṃ na socāmi, gato so tassa yā gatī”ti.

Tattha **saṃ tanunti** attano sarīraṃ. **Nibbhogeti** jīvitindriyassa abhāvena bhogarahite. **Peteti** paralokaṃ paṭigate. **Kālakateti** katakāle, mateti attho. Idaṃ vuttaṃ hoti – sāmī, mama putto yathā nāma urago jīṇṇatacam nicchindivā anoloketvā anapekkho chaḍḍetvā gaccheyya, evaṃ attano sarīraṃ chaḍḍetvā gacchati, tassa jīvitindriyarahite sarīre evaṃ nibbhoge tasmīṃca me putte pete puna paṭigate maraṇakālam katvā ṭhite sati ko kāruṇṇīna vā paridevena vā attho. Ayañhi yathā sūlehi vijjhivā ḍayhamāno sukhadukkaṃ na jānāti, evaṃ ñātīnaṃ paridevitaṃ na jānāti, tena kāraṇenāhaṃ etaṃ na socāmi. Yā tassa attano gatī, taṃ so gatoti.

Sakko bodhisattassa vacanaṃ sutvā brāhmaṇiṃ pucchi “amma, tuyhaṃ so kiṃ hotī”ti? “Dasa māse kucchinā parihaṇitvā thaññaṃ pāyevā hatthapāde saṅghapetvā vaḍḍhitaputto me, sāmī”ti. “Amma, pitā tava purisabhāvena mā rodātu, mātu hadayaṃ pana mudukaṃ hoti, tvaṃ kasmā na rodasī”ti? Sā arodanakāraṇaṃ kathenti –

21. “Anavhito tato āgā, ananuññāto ito gato;  
Yathāgato tathā gato, tattha kā paridevanā.
22. “Ḍayhamāno na jānāti, ñātīnaṃ paridevitaṃ;  
Tasmā etaṃ na socāmi, gato so tassa yā gatī”ti. – gāthādvayamāha –

Tattha **anavhitoti** ayaṃ tāta mayā paralokato anavhito ayācīto. **Āgāti** amhākaṃ gehaṃ āgato. **Itoti** ito manussalokato gacchantopi mayā ananuññātova gato. **Yathāgatoti** āgacchantopi yathā attanova ruciya āgato, gacchantopi tatheva gato. **Tatthāti** tasmīṃ tassa ito gamane kā paridevanā. **Ḍayhamānoti** gāthā vuttanayena veditabbā.

Sakko brāhmaṇiyaṃ kathaṃ sutvā tassa bhaginiṃ pucchi “amma, tuyhaṃ so kiṃ hotī”ti? “Bhātā me, sāmī”ti. “Amma, bhaginiyo nāma bhātūsu sinehā honti, tvaṃ kasmā na rodasī”ti? Sā arodanakāraṇaṃ kathenti –

23. “Sace rode kisā assaṃ, tassā me kiṃ phalaṃ siyā;  
Ñātimittasuhajjānaṃ, bhiyyo no aratī siyā.
24. Ḍayhamāno na jānāti, ñātīnaṃ paridevitaṃ;  
Tasmā etaṃ na socāmi, gato so tassa yā gatī”ti. – gāthādvayamāha –

Tattha **saceti** yadi ahaṃ bhātari mate rodeyyaṃ, kisasarīrā assaṃ. Bhātu pana me tappaccayā vuḍḍhi nāma natthīti dasseti. **Tassā meti** tassā mayhaṃ rodantiyā kiṃ phalaṃ ko ānisaṃso bhaveyya. Mayhaṃ avuḍḍhi pana paññāyatīti dīpeti. **Ñātimittasuhajjānanti** ñātimittasuhadānaṃ. Ayameva vā pāṭho. **Bhiyyo notī** ye amhākaṃ ñātī ca mittā ca suhadayā ca, tesāṃ adhikatarā aratī siyā.

Sakko bhaginiyā kathaṃ sutvā bhariyaṃ pucchi “amma, tuyhaṃ so kiṃ hotī”ti? “Pati me, sāmī”ti. “Itthiyo nāma patimhi mate vidhavā honti anāthā, tvaṃ kasmā na rodasī”ti. Sāpissa arodanakāraṇaṃ kathentī –

25. “Yathāpi dārako candaṃ, gacchantamanurodati;  
Evaṃsampaḍamevetāṃ, yo petamanusocati.

26. “Ḍayhamāno na jānāti, ñātīnaṃ paridevitaṃ;  
Tasmā etaṃ na socāmi, gato so tassa yā gatī”ti. – gāthādvayamāha –

Tassattho – yathā nāma yattha katthaci yuttāyuttaṃ labbhanīyālabbhanīyaṃ ajānanto bāladārako mātu ucchaṅge nisinno puṇṇamāsiyaṃ puṇṇaṃ candaṃ ākāse gacchantāṃ dīsvā “amma, candaṃ me dehi, amma, candaṃ me dehī”ti punappunaṃ rodati, evaṃsampaḍamevetāṃ, evaṃnipphattikameva etaṃ tassa ruṇṇaṃ hoti, yo petāṃ kālakataṃ anusocati. Itopi ca bālataraṃ. Kiṃkāraṇā? So hi vijjāmānacandaṃ anurodati, mayhaṃ pana pati mato etarahi avijjāmāno sūlehi vijjhivā ḍayhamānopi na kiñci jānātīti.

Sakko bhariyāya vacanaṃ sutvā dāsiṃ pucchi “amma, tuyhaṃ so kiṃ hotī”ti? “Ayyo me, sāmī”ti. “Nanu tvaṃ iminā pīletvā pothetvā paribhuttā bhavissasi, tasmā “sumuttā aha”nti na rodasī”ti. “Sāmi, mā evaṃ avaca, na etaṃ etassa anucchavikaṃ, khantimettānuddayasampanno me ayyaputto, ure saṃvaḍḍhitaputto viya ahoṣī”ti. “Atha kasmā na rodasī”ti? Sāpissa arodanakāraṇaṃ kathentī –

27. “Yathāpi udakakumbho, bhinno appaṭisandhiyo;  
Evaṃsampaḍamevetāṃ, yo petamanusocati.

28. “Ḍayhamāno na jānāti, ñātīnaṃ paridevitaṃ;  
Tasmā etaṃ na socāmi, gato so tassa yā gatī”ti. – gāthādvayamāha –

Tassattho – yathā nāma udakakumbho ukkhipiyamāno pativā sattadhā bhinno puna tāni kapālāni paṭipāṭiyā ṭhapetvā saṃvidahitvā paṭipākatikaṃ kātuṃ na sakkoti, yo petamanusocati, tassapi etamanusocanaṃ evaṃnipphattikameva hoti, matassa puna jīvāpetuṃ asakkuṇeyyattā iddhimato vā iddhānubhāvena bhinnaṃ kumbhaṃ saṃvidahitvā udakassa pūretuṃ sakkā bhaveyya, kālakato pana iddhibalenāpi na sakkā paṭipākatitaṃ kātunti. Itarā gāthā vuttatthāyeva.

Sakko sabbesaṃ dhammakathaṃ sutvā pasīditvā “tumhehi appamattehi maraṇassati bhāvitā, tumhe ito paṭṭhāya sahatthena kammaṃ mā karittha, ahaṃ, sakko devarājā, ahaṃ vo gehe satta ratanāni aparimāṇāni karissāmi, tumhe dānaṃ detha, sīlaṃ rakkhatha, uposathakammaṃ karoṭha, appamattā hothā”ti tesāṃ ovādaṃ datvā gehaṃ aparimitadhanaṃ katvā pakkāmi.

Satthā imaṃ dhammadesanaṃ āharitvā saccāni pakāsetvā jātaṃ samodhānesi, saccapariyosāne kuṭumbiko sotāpattiphale patiṭṭhahi. Tadā dāsī khujjuttarā ahoṣi, dhītā uppalavaṇṇā, putto rāhulo, mātā khemā, brāhmaṇo pana ahameva ahoṣinti.

Uragajātakavaṇṇanā catutthā.

[355] 5. Ghaṭajātakavaṇṇanā

**Aññe socanti rodantī**ti idaṃ satthā jetavane viharanto kosalarañño ekaṃ amaccaṃ ārabha kthesi. Vatthu heṭṭhā kathitasadisameva. Idha pana rājā attano upakārassa amaccassa mahantaṃ yasaṃ datvā paribhedakānaṃ kathaṃ gahetvā taṃ bandhāpetvā bandhanāgāre pavesesi. So tattha nisinnova sotāpattimaggaṃ nibbatesi. Rājā tassa guṇaṃ sallakkhetvā mocāpesi. So gandhamālaṃ ādāya satthu santikaṃ gantvā vanditvā nisīdi. Atha naṃ satthā “anatto kira te uppanno”ti pucchitvā “āma, bhante, anathena pana me attho āgato, sotāpattimaggo nibbatto”ti vutte “na kho, upāsaka, tvaññeva anathena atthaṃ āhari, porāṇakapaṇḍitāpi āharimsū”ti vatvā tena yācito atītaṃ āhari.

Atīte bārāṇasiyaṃ brahmadatte rajjaṃ kārente bodhisatto tassa aggamaheṣiyā kucchimhi nibbatti, “ghaṭakumāro”tissa nāmaṃ kariṃsu. So aparena samayena takkasilāyaṃ uggahitasippo dhammena rajjaṃ kāresi. Tassa antepure eko amacco dubbhi. So taṃ paccakkhato ñatvā raṭṭhā pabbājesi. Tadā sāvatthiyaṃ dhaṅkarājā nāma rajjaṃ kāresi. So tassa santikaṃ gantvā taṃ upaṭṭhahitvā heṭṭhā vuttanayena attano vacanaṃ gāhāpetvā bārāṇasirajjaṃ gaṇhāpesi. Sopi rajjaṃ gahetvā bodhisattaṃ saṅkhalikāhi bandhāpetvā bandhanāgāraṃ pavesesi. Bodhisatto jhānaṃ nibbattetvā ākāse pallaṅkena nisīdi, dhaṅkassa sarīre dāho uppajji. So gantvā bodhisattassa suvaṇṇādāsaphullapadumasassirikaṃ mukhaṃ disvā bodhisattaṃ pucchanto paṭhamaṃ gāthamāha –

29. “Aññe socanti rodanti, aññe assumukhā janā;  
Pasannamukhavaṇṇosi, kasmā ghaṭa na socasī”ti.

Tattha **aññeti** taṃ ṭhapetvā sesamanussā.

Athassa bodhisatto asocanakāraṇaṃ kathento catasso gāthā abhāsi –

30. “Nābbhatītaḥaro soko, nānāgatasukhāvaho;  
Tasmā dhaṅka na socāmi, natthi soke dutīyatā.
31. “Socaṃ paṇḍu kiso hoti, bhattañcassa na ruccati;  
Amittā sumanā honti, sallavidhassa ruppato.
32. “Gāme vā yadi vāraññe, ninne vā yadi vā thale;  
Ṭhitaṃ maṃ nāgamissatī, evaṃ diṭṭhapado ahaṃ.
33. “Yassattā nālamekova, sabbakāmarasāharo;  
Sabbāpi pathavī tassa, na sukhaṃ āvahissatī”ti.

Tattha **nābbhatītaḥaroti** nābbhatītāhāro, ayameva vā pāṭho. Soko nāma abbatītaṃ atikkantaṃ niruddhaṃ atthaṅgataṃ puna nāharatī. **Dutīyatā**ti sahāyatā. Atītāharaṇena vā anāgatāharaṇena vā soko nāma kassaci sahāyo na hoti, tenāpi kāraṇenāhaṃ na socāmīti vadati. **Socanti** socanto. **Sallavidhassa ruppato**ti sokasallena vidhassa teneva ghaṭṭiyamānassa “diṭṭhā vata no paccāmittassa piṭṭhī”ti amittā sumanā hontīti attho.

**Ṭhitaṃ maṃ nāgamissatī**ti samma dhaṅkarāja, etesu gāmādīsu yattha katthaci ṭhitaṃ maṃ paṇḍukisabhāvādikāṃ sokamūlakaṃ byasanaṃ na āgamissati. **Evaṃ diṭṭhapadoti** yathā taṃ byasanaṃ nāgacchati, evaṃ mayā jhānapadaṃ diṭṭhaṃ. “Aṭṭhalokadhammapada”ntipi vadantiyeva. Pāḷiyaṃ pana “na mattaṃ nāgamissatī”ti likhitaṃ, taṃ aṭṭhakathāyaṃ natthi. Pariyosānagāthāya icchitapatthitathena jhānasukhasaṅkhātāṃ sabbakāmarasaṃ āharatīti **sabbakāmarasāharo**. Idaṃ vuttaṃ hoti – yassa rañño pahāya aññasahāye attāva eko sabbakāmarasāharo nālaṃ, sabbāṃ jhānasukhasaṅkhātāṃ kāmarasaṃ āharitūṃ asamatto, tassa rañño sabbāpi pathavī na sukhaṃ āvahissati. Kāmāturassa hi sukhaṃ nāma natthi, yo pana kilesadaratharahaṃ jhānasukhaṃ āharitūṃ samatto, so rājā sukhī hotīti. Yo panetāya gāthāya “yassatthā nālameko”tipi pāṭho, tassattho na dissati.

Iti dhañko imā catasso gāthā sutvā bodhisattam khamāpetvā rajjam paṭicchāpetvā pakkāmi.  
Bodhisattopi rajjam amaccānam paṭiniyyādetvā himavantapadesam gantvā isipabbajjam pabbajitvā  
aparihīnajjhāno brahmalokaparāyaṇo ahoṣi.

Satthā imaṃ dhammadesanaṃ āharitvā jātakam samodhānesi – “tadā dhañkarājā ānando ahoṣi,  
ghaṭarājā pana ahameva ahoṣi”nti.

Ghaṭajātakavaṇṇanā pañcamā.

[356] 6. Koraṇḍiyajātakavaṇṇanā

**Eko araṇṇeti** idaṃ satthā jetavane viharanto dhammasenāpatiṃ ārabba kathesi. Thero kira  
āgatāgatānam dussīlānam migaluddakamacchabandhādīnam diṭṭhadiṭṭhānaññeva “sīlam gaṇhatha,  
sīlam gaṇhathā”ti sīlam deti. Te there garubhāvena tassa katham bhindituṃ asakkontā sīlam gaṇhanti,  
gahetvā ca pana na rakkhanti, attano attano kammameva karonti. Thero saddhivihārike āmantetvā  
“āvuso, ime manussā mama santike sīlam gaṇhiṃsu, gaṇhitvā ca pana na rakkhanti”ti āha. “Bhante,  
tumhe etesaṃ aruciya sīlam detha, ete tumhākaṃ katham bhindituṃ asakkontā gaṇhanti,  
tumhe ito paṭṭhāya evarūpānam sīlam mā adatthā”ti. Thero anattamano ahoṣi. Tam pavattiṃ  
suvā bhikkhū dhammasabhāyaṃ katham samuṭṭhāpesuṃ – “āvuso, sārīputtatthero kira  
diṭṭhadiṭṭhānaññeva sīlam deti”ti. Satthā āgantvā “kāya nuttha, bhikkhave,  
etarahi kathāya sannisinnā”ti pucchitvā “imāya nāmā”ti vutte “na, bhikkhave,  
idāneva, pubbepesa diṭṭhadiṭṭhānam ayācantānaññeva sīlam deti”ti vatvā  
atītam āhari.

Atīte bārāṇasiyaṃ brahmadatte rajjam kārente bodhisatto brāhmaṇakule nibbattitvā  
vayappatto takkasilāyaṃ disāpāmokkhasa ācariyassa jeṭṭhantevāsiko koraṇḍiyo nāma ahoṣi.  
Tadā so ācariyo diṭṭhadiṭṭhānam kevaṭṭādīnam ayācantānaññeva “sīlam gaṇhatha,  
sīlam gaṇhathā”ti sīlam deti. Te gahetvāpi na rakkhanti ācariyo tamattham  
antevāsikānam ārocesi. Antevāsikā “bhante, tumhe etesaṃ aruciya sīlam  
detha, tasmā bhindanti, ito dāni paṭṭhāya yācantānaññeva dadeyyātha,  
mā ayācantāna”nti vadīsu. So vippaṭisārī ahoṣi, evaṃ santepi diṭṭhadiṭṭhānam  
sīlam detiyeva.

Athekadivasam ekasmā gāmā manussā āgantvā brāhmaṇavācanakathāya ācariyaṃ  
nimantayīsu. So koraṇḍiyamāṇavaṃ pakkosivā “tāta, aham na gacchāmi,  
tvam ime pañcasate māṇave gahetvā tattha gantvā vācanakāni sampaṭicchitvā  
amhākaṃ dinnakoṭṭhāsaṃ āharā”ti pesesi. So gantvā paṭinivattanto  
antarāmagge ekaṃ kandaraṃ disvā cintesi “amhākaṃ ācariyo diṭṭhadiṭṭhānam  
ayācantānaññeva sīlam deti, ito dāni paṭṭhāya yathā yācantānaññeva deti,  
tathā naṃ karissāmi”ti. So tesu māṇavesu sukhanisennesu utṭhāya  
mahantaṃ mahantaṃ selaṃ ukkhipitvā kandarāyaṃ khiṇi, punappunaṃ  
khiṇiyeva. Atha naṃ te māṇavā utṭhāya “ācariya, kiṃ karosī”ti āhaṃsu.  
So na kiñci kathesi, te vegena gantvā ācariyassa ārocesuṃ. Ācariyo  
āgantvā tena saddhiṃ sallapanto paṭhamam gāthamāha –

34. “Eko araṇṇe girikandarāyaṃ, paggayha paggayha sīlam pavecchasi;  
Punappunaṃ santaramānarūpo, koraṇḍiya ko nu tava yidhattho”ti.

Tattha **ko nu tava yidhattho**ti ko nu tava idha kandarāyaṃ silākhipanena attho.

So tassa vacanam sutvā ācariyaṃ pabodhetukāmo dutiyaṃ gāthamāha –

35. “Ahañhimaṃ sāgarasevitaṃ, samaṃ karissāmi yathāpi pāṇi;  
Vikiriya sānūni ca pabbatāni ca, tasmā sīlam dariyā pakkhipāmi”ti.

Tattha **ahañhimanti** ahañhi imaṃ mahāpathaviṃ. **Sāgarasevitaṃ** sāgarehi sevitaṃ  
cāturaṃ. **Yathāpi pāṇi**ti hatthalaṃ viya samaṃ karissāmi. **Vikiriya**ti vikiritvā. **Sānūni ca pabbatāni cāti**  
paṃsupabbate ca silāpabbate ca.



Taṃ sutvā brāhmaṇo tatiyaṃ gāthamāha –

36. “Nayimaṃ mahiṃ arahati pāṇikappaṃ, samaṃ manusso karaṇāya meko;  
Maññāmimaññeva dariṃ jigīsaṃ, koraṇḍiya hāhasi jīvaloka”nti.

Tattha **karaṇāya meko** karaṇāya eko kātuṃ na sakkotīti dīpeti. **Maññāmimaññeva dariṃ jigīsaṃ** ahaṃ maññāmi tiṭṭhatu pathavī, imaññeva ekaṃ dariṃ jigīsaṃ pūraṇatthāya vāyamanto silā pariyesanto upāyaṃ vicinantova tvaṃ imaṃ jīvalokaṃ hāhasi jahissasi, marissasīti attho.

Taṃ sutvā māṇavo catutthaṃ gāthamāha –

37. “Sace ayaṃ bhūtaḍharaṃ na sakkā, samaṃ manusso karaṇāya meko;  
Evameva tvaṃ brahme ime manusse, nānādīṭṭhike nānayissasi te”ti.

Tassattho – sace ayaṃ eko manusso imaṃ bhūtaḍharaṃ pathaviṃ samaṃ kātuṃ na sakkā na samattho, evameva tvaṃ ime dussīlamanusse nānādīṭṭhike nānayissasi, te evaṃ “sīlaṃ gaṇhatha, sīlaṃ gaṇhathā”ti vadanto attano vasaṃ na ānayissasi, paṇḍitapurisāyeva hi paṇātipātaṃ “akusala”nti garahanti. Saṃsāramocakādayo panettha kusalasaññino, te tvaṃ kathaṃ ānayissasi, tasmā dīṭṭhadīṭṭhānaṃ sīlaṃ adavā yācantaññeva dehīti.

Taṃ sutvā ācariyo “yuttaṃ vadati koraṇḍiyo, idāni na evarūpaṃ karissāmi”ti attano viraddhabhāvaṃ ñatvā pañcamaṃ gāthamāha –

38. “Saṃkhittarūpena bhavaṃ mamatthaṃ, akkhāsi koraṇḍiya evametam;  
Yathā na sakkā pathavī samāyaṃ, kattuṃ manussena tathā manussa”ti.

Tattha **samāyanti** samaṃ ayaṃ. Evaṃ ācariyo māṇavassa thutiṃ akāsi, sopi naṃ bodhetvā sayam gharaṃ nesi.

Satthā imaṃ dhammadesanaṃ āharitvā jātaṃ samodhānesi – “tadā brāhmaṇo sārīputto ahoṣi, koraṇḍiyamāṇavo pana ahameva ahoṣi”nti.

Koraṇḍiyajātakavaṇṇanā chaṭṭhā.

[357] 7. Laṭukikajātakavaṇṇanā

**Vandāmi taṃ kuñjara saṭṭhihāyananti** idaṃ satthā veḷuvane viharanto devadattaṃ ārabha katesi. Ekasmiñhi divase bhikkhū dhammasabhāyaṃ kathaṃ samuṭṭhāpesuṃ “āvuso, devadatto kakkhaḷo pharuso sāhasiko, sattesu karuṇāmetampissa natthi”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepesa nikkaruṇoyevā”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto hatthiyoniyaṃ nibbattitvā vayappatto pāsādiko mahākāyo asītisahassavāraṇaparivāro yūthapati hutvā himavantaḍḍese vihāsi. Tadā ekā laṭukikā sakuṇikā hatthīnaṃ vicaraṇatṭhāne aṇḍāni nikkhipi, tāni pariṇatāni bhinditvā sakuṇapotakā nikkhamiṃsu. Tesu avirūḷhapakkhesu uppatitūṃ asakkontesuyeva mahāsatto asītisahassavāraṇaparivuto gocarāya caranto taṃ padesaṃ patto. Taṃ disvā laṭukikā cintesi “ayaṃ hatthirājā mama potake madditvā māressati, handa naṃ puttakānaṃ parittānatthāya dhammikārakkhaṃ yācāmi”ti. Sā ubho pakkhe ekato katvā tassa purato ṭhatvā paṭhamam gāthamāha –

39. “Vandāmi taṃ kuñjara saṭṭhihāyanaṃ, āraññakaṃ yūthapatiṃ yasassiṃ;  
Pakkhehi taṃ pañjalikaṃ karomi, mā me vadhī puttake dubbalāyā”ti.

Tattha **saṭṭhihāyananti** saṭṭhivassakāle hāyanabalaṃ. **Yasassinti** parivārasampannaṃ. **Pakkhehi taṃ pañcalikaṃ karomīti** ahaṃ pakkhehi taṃ añjalikaṃ karomīti attho.

Mahāsatto “mā cintayi laṭukike, ahaṃ te puttake rakkhissāmī”ti sakuṇapotakānaṃ upari ṭhatvā asītiyā hatthisahassesu gatesu laṭukikaṃ āmantetvā “laṭukike amhākaṃ pacchato eko ekacāriko hatthī āgacchati, so amhākaṃ vacanaṃ na karissati, tasmim āgate tampi yācitvā puttakānaṃ sotthibhāvaṃ kareyyāsī”ti vatvā pakkāmi. Sāpi tassa paccuggamaṃ katvā ubhoḥi pakkhehi añjaliṃ katvā dutiyaṃ gāthamāha –

40. “Vandāmi taṃ kuñjara ekacāriṃ, āraññakaṃ pabbatasānugocaraṃ;  
Pakkhehi taṃ pañjalikaṃ karomi, mā me vadhī puttake dubbalāyā”ti.

Tattha **pabbatasānugocaranti** ghanaselapabbatesu ca paṃsupabbatesu ca gocaraṃ gaṇhantaṃ.

So tassā vacanaṃ sutvā tatiyaṃ gāthamāha –

41. “Vadhissāmi te laṭukike puttakāni, kiṃ me tuvaṃ kāhasi dubbalāsi;  
Sataṃ sahasānipi tādisīnaṃ, vāmena pādena papothayeyya”nti.

Tattha **vadhissāmi teti** tvaṃ kasmā mama vicaraṇamagge puttakāni ṭhapesi, yasmā ṭhapesi, tasmā vadhissāmi te puttakānīti vadati. **Kiṃ me tuvaṃ kāhasīti** mayhaṃ mahāthāmassa tvaṃ dubbalā kiṃ karissasi. **Papothayeyyanti** ahaṃ tādisīnaṃ laṭukikānaṃ sataśahassampi vāmena pādena sañcuṇṇeyyaṃ, dakkhiṇapādena pana kathāva natthīti.

Evañca pana vatvā so tassā puttake pādena sañcuṇṇetvā muttena pavāhetvā nadantova pakkāmi. Laṭukikā rukkhasākhāya nilīyitvā “idāni tāva vāraṇa nadanto gacchasi, katipāheneva me kiriyaṃ passissasi, kāyabalato ñāṇabalassa mahantabhāvaṃ na jānāsi, hotu, jānāpessāmi na”nti taṃ santajjayamānāva catutthaṃ gāthamāha –

42. “Na heva sabbattha balena kiccaṃ, balañhi bālassa vadhāya hoti;  
Karissāmi te nāgarājā anattaṃ, yo me vadhī puttake dubbalāyā”ti.

Tattha **balenāti** kāyabalena. **Anatthanti** avuḍḍhiṃ. **Yo meti** yo tvaṃ mama dubbalāya puttake vadhī ghātesi.

Sā evaṃ vatvā katipāhaṃ ekaṃ kākaṃ upaṭṭhahitvā tena tuṭṭhena “kiṃ te karomī”ti vuttā “sāmi, aññaṃ me kātappaṃ natthi, ekassa pana ekacārikavāraṇassa tuṇḍena paharivā tumhehi akkhīni bhinnāni paccāsīsāmī”ti āha. Sā tena “sādhū”ti sampaṭicchitā ekaṃ nīlamakkhikaṃ upaṭṭhahi. Tāyapi “kiṃ te, karomī”ti vuttā “iminā kākena ekacārikavāraṇassa akkhīsu bhinnesu tumhehi tattha āsāṭikaṃ pātetuṃ icchāmī”ti vatvā tāyapi “sādhū”ti vutte ekaṃ maṇḍūkaṃ upaṭṭhahitvā tena “kiṃ te, karomī”ti vuttā “yadā ekacārikavāraṇo andho hutvā pānīyaṃ pariyesati, tadā pabbatamatthake ṭhito saddaṃ katvā tasmim pabbatamatthakaṃ abhiruhante otarivā papāte saddaṃ kareyyātha, ahaṃ tumhākaṃ santikā ettakaṃ paccāsīsāmī”ti āha. Sopi tassā vacanaṃ “sādhū”ti sampaṭicchī.

Athekadivasam kāko vāraṇassa dvepi akkhīni tuṇḍena bhindi, nīlamakkhikā āsāṭikaṃ pātesi. So puḷavehi khajjanto vedanāppatto pipāsābhībhūto pānīyaṃ pariyesamāno vicari. Tasmim kāle maṇḍūko pabbatamatthake ṭhatvā saddamakāsi. Vāraṇo “ettha pānīyaṃ bhavissatī”ti pabbatamatthakaṃ abhiruhi. Atha maṇḍūko otarivā papāte ṭhatvā saddamakāsi. Vāraṇo “ettha pānīyaṃ bhavissatī”ti papātābhīmukho gacchanto parigaḷitvā pabbatapāde patitvā jīvitakkhayaṃ pāpuṇi. Laṭukikā tassa matabhāvaṃ ñatvā “diṭṭhā me paccāmittassa piṭṭhī”ti haṭṭhatuṭṭhā tassa khandhe caṅkamitvā yathākammaṃ gatā.

Satthā “na, bhikkhave, kenaci saddhiṃ veram nāma kātabbam, evaṃ balasampannampi vāraṇaṃ ime cattāro janā ekato hutvā vāraṇassa jīvitakkhayaṃ pāpesu”nti –

43. “Kākañca passa laṭukikaṃ, maṇḍukaṃ nīlamakkhikaṃ;  
Ete nāgaṃ aghātesuṃ, passa verassa verinaṃ;  
Tasmā hi veram na kayirātha, appiyenapi kenacī”ti. –

Imaṃ abhisambuddhagāthaṃ vatvā jātaṃ samodhānesi.

Tattha **passāti** aniyāmitālanametam, bhikkhū pana sandhāya vuttattā passatha bhikkhaveli vuttam hoti. **Eteti** ete cattāro ekato hutvā. **Aghātesunti** tam vadhimsu. **Passa verassa verinanti** passatha verikānaṃ verassa gatinti attho.

Tadā ekacārikahatthī devadatto ahosi, yūthapati pana ahameva ahosinti.

Laṭukikajātakavaṇṇanā sattamā.

[358] 8. Cūḷadhammapāḷajātakavaṇṇanā

**Ahameva dūsiyā bhūnahatāti** idam satthā veḷuvane viharanto devadattassa vadhāya parisakkanam ārabha katesi. Aññesu jātakesu devadatto bodhisattassa tāsamattampi kātuṃ nāsakkhi, imasmim pana cūḷadhammapāḷajātake bodhisattassa sattamāsikakāle hatthapāde ca sīsañca chedāpetvā asimālakaṃ nāma kāresi. **Daddarajātake** (jā. 1.2.43-44) gīvaṃ gahetvā māretvā uddhane maṃsam pacitvā khādi. **Khantivādijātake** (jā. 1.4.49 ādayo) dvīhipi kasāhi pahārasahashehi tālāpetvā hatthapāde ca kaṇṇanāsañca chedāpetvā jaṭāsu gahetvā kaḍḍhāpetvā uttānakaṃ nipajjāpetvā ure pādena paharivā gato. Bodhisatto tam divasaṃyeva jīvitakkhayaṃ pāpuṇi. **Cūlanandiyajātakepi** (jā. 1.2.143-144) **mahākapijātakepi** (jā. 1.7.83 ādayo) māresiyeva. Evameva so dīgharattam vadhāya parisakkanto buddhakālepi parisakkiyeva. Athesadivasam bhikkhū dhammasabhāyaṃ katham samuṭṭhāpesuṃ – “āvuso, devadatto buddhānaṃ māraṇatthameva upāyaṃ karoti, ‘sammāsambuddham mārāpessāmī’ti dhanuggahe payojesi, silam pavijjhi, nāḷagirim vissajjāpesi”ti. Satthā āgantvā ‘kāya nuttha, bhikkhave, etarahi kathāya sannisinnā’ti pucchitvā “imāya nāmā”ti vutte “na, bhikkhave, idāneva, pubbepesa mayham vadhāya parisakkiyeva, idāni pana tāsamattampi kātuṃ na sakkoti, pubbe maṃ cūḷadhammapāḷakumārakāle attano puttam samānaṃ jīvatakkhayaṃ pāpetvā asimālakaṃ kāresī”ti vatvā atītam āhari.

Atīte bārānasiyaṃ mahāpatāpe nāma rajjam kārente bodhisatto tassa aggamaheṣiyā candādeviyā kucchimhi nibbatti, “dhammapālo”tissa nāmaṃ kariṃsu. Tameṇaṃ sattamāsikakāle mātā gandhodakena nhāpetvā alaṅkaritvā kīḷāpayamānā nisīdi. Rājā tassā vasanaṭṭhānaṃ agamāsi. Sā puttam kīḷāpayamānā puttasinehena samappitā hutvā rājānaṃ passitvāpi na utṭhahi. So cintesi “ayaṃ idāneva tāva puttam nissāya mānaṃ karoti, maṃ kismiñci na maññati, putte pana vadḍhante mayi ‘manusso’tipi saññaṃ na karissati, idāneva naṃ ghātessāmī”ti. So nivattitvā rājāsane nisīditvā “attano vidhānena āgacchatū”ti coraghātaṃ pakkosāpesi. So kāśāvatthanivattho rattamālādharo pharasuṃ amse ṭhapetvā upadhānaghaṭikaṃ hatthapādaṭṭhapanadaṇḍakañca ādāya āgantvā rājānaṃ vanditvā “kiṃ karomi, devā”ti atṭhāsi. Deviyā sirigabbham gantvā dhammapālaṃ ānehīti. Devīpi rañño kujjhivā nivattanabhāvaṃ ṇatvā bodhisattam ure nipajjāpetvā rodamañā nisīdi. Coraghātako gantvā tam piṭṭhiyaṃ hatthena paharivā hatthato kumāraṃ acchinditvā ādāya rañño santikaṃ āgantvā “kiṃ karomi, devā”ti āha. Rājā ekaṃ phalakaṃ āharāpetvā purato nikkhipāpetvā “idha naṃ nipajjāpehī”ti āha. So tathā akāsi.

Candādevī puttassa pacchatova paridevamānā āgacchi. Puna coraghātako “kiṃ karomī, devā”ti āha. Dhammapālassa hatthe chindāti. Candādevī “mahārāja, mama putto sattamāsiko bālako na kiñci jānāti, natthetassa doso, doso pana honto mayi bhavēyya, tasmā mayham hatthe chedāpehī”ti

imamatthaṃ pakāsentī paṭhamam gāthamāha –

44. “Ahameva dūsiyā bhūnahatā, rañño mahāpatāpassa;  
Etaṃ muñcatu dhammapālaṃ, hatthe me deva chedehī”ti.

Tattha **dūsiyā**ti dūsikā, tumhe disvā anuṭṭhahamānā dosakārikāti attho. “Dūsikā”tipi pāṭho, ayamevattho. **Bhūnahatā**ti hatabhūnā, hatavuḍḍhīti attho. **Raññoti** idaṃ “dūsiyā”ti padena yojetabbaṃ. Ahaṃ rañño mahāpatāpassa aparādhakārikā, nāyaṃ kumāro, tasmā niraparādhaṃ etaṃ bālakaṃ muñcatu dhammapālaṃ, sacepi hatthe chedāpetukāmo, dosakārikāya hatthe me, deva, chedehīti ayamettha attho.

Rājā coraghātakaṃ olokesi. “Kiṃ karomi, devā”ti? “Papañcaṃ akatvā hatthe chedā”ti. Tasmim khaṇe coraghātako tikhiṇapharasuṃ gahetvā kumārassa taruṇavaṃsakaḷire viya dve hatthe chindī. So dvīsu hatthesu chijjamānesu neva rodi na paridevī, khantiñca mettañca purecārikaṃ katvā adhivāsesi. Candā pana devī chinnahatthakoṭiṃ gahetvā ucchaṅge katvā lohitalittā paridevamānā vicari. Puna coraghātako “kiṃ karomi, devā”ti pucchi. “Dvepi pāde chindā”ti. Taṃ sutvā candādevī dutiyaṃ gāthamāha –

45. “Ahameva dūsiyā bhūnahatā, rañño mahāpatāpassa;  
Etaṃ muñcatu dhammapālaṃ, pāde me deva chedehī”ti.

Tattha adhippāyo vuttanayeneva veditabbo.

Rājāpi puna coraghātakaṃ āṇāpesi. So ubhopi pāde chindī. Candādevī pādakoṭimpi gahetvā ucchaṅge katvā lohitalittā paridevamānā “sāmi mahāpatāpa, chinnahatthapādā nāma dārakā mātarā posetabbā honti, ahaṃ bhatiṃ katvā mama puttakaṃ possessāmi, dehi me eta”nti āha. Coraghātako “kiṃ deva katā rājāṇā, niṭṭhitaṃ mama kicca”nti pucchi. “Na tāva niṭṭhita”nti. “Atha kiṃ karomi, devā”ti? “Sīsamma chindā”ti. Taṃ sutvā candādevī tatiyaṃ gāthamāha –

46. “Ahameva dūsiyā bhūnahatā, rañño mahāpatāpassa;  
Etaṃ muñcatu dhammapālaṃ, sīsaṃ me deva chedehī”ti.

Vatvā ca pana attano sīsaṃ upanesi.

Puna coraghātako “kiṃ karomi, devā”ti pucchi. “Sīsamma chindā”ti. So sīsaṃ chinditvā “katā, deva, rājāṇā”ti pucchi. “Na tāva katā”ti. “Atha kiṃ karomi, devā”ti? “Asituṇḍena naṃ sampaṭicchitvā asimālakam nāma karohī”ti. So tassa kaḷevaram ākāse khipitvā asituṇḍena sampaṭicchitvā asimālakam nāma katvā mahātale vippakiri. Candādevī bodhisattassa maṃse ucchaṅge katvā mahātale rodamānā paridevamānā imā gāthā abhāsi –

47. “Na hi nūnimassa rañño, mittāmaccā ca vijjare suhadā;  
Ye na vadanti rājānaṃ, mā ghātayī orasaṃ puttaṃ.
48. “Na hi nūnimassa rañño, ñātī mittā ca vijjare suhadā;  
Ye na vadanti rājānaṃ, mā ghātayī atrajaṃ putta”nti.

Tattha **mittāmaccā ca vijjare suhadā**ti nūna imassa rañño daḷhamittā vā sabbakiccesu sahabhāvino amaccā vā muduhadayatāya suhadā vā keci na vijjanti. **Ye na vadantī**ti ye adhunā āgantvā “attano piyaputtaṃ mā ghātayī”ti na vadanti, imaṃ rājānaṃ paṭisedhenti, te natthiyevāti maññe. Dutiyagāthāyaṃ **ñātī**ti ñatakā.

Imā pana dve gāthā vatvā candādevī ubhohi hatthehi hadayamaṃsaṃ dhārayamānā tatiyaṃ gāthamāha –

49. “Candanasārānulittā, bāhā chijjanti dhammapālassa;  
Dāyādassa pathabyā, pāṇā me deva rujjhantī”’ti.

Tattha **dāyādassa pathabyā**ti pitusantakāya cāturantāya pathaviyā dāyādassa lohitacandanasārānulittā hatthā chijjanti, pādā chijjanti, sīsaṅca chijjati, asimālakopi kato, tava vaṃsaṃ pacchinditvā gatosi dānīti evamādīni vilapanti evamāha. **Pāṇā me deva rujjhantī**ti deva, mayhampi imaṃ sokaṃ sandhāretuṃ asakkontiyā jīvitāṃ rujjhatīti.

Tassā evaṃ paridevamānāya eva ḍayhamāne veḷuvane veḷu viya hadayaṃ phali, sā tattheva jīvitakkhayaṃ pattā. Rājāpi pallaṅke thātuṃ asakkonto mahātale pati, padaratalaṃ dvidhā bhijji, so tatopi bhūmiyaṃ pati. Tato catunahutādhikadviyojanasatasahassabahalāpi ghanapathavī tassa aguṇaṃ dhāretuṃ asakkontī bhijjitvā vivaramadāsi, avīcīto jālā uṭṭhāya kuladattikena kambalena parikkhipantī viya taṃ gahetvā avīcimhi khipi. Candāya ca bodhisattassa ca amaccā sarīrakiccaṃ karimsu.

Satthā imaṃ dhammadesanaṃ āharitvā jātakaṃ samodhānesi – “tadā rājā devadatto ahosi, candādevī mahāpajāpatigotamī, dhammapālakumāro pana ahameva ahosi”’nti.

Cūḷadhammapālaajātakavaṇṇanā aṭṭhamā.

[359] 9. Suvaṇṇamigajātakavaṇṇanā

**Vikkama re haripādā**ti idaṃ satthā jetavane viharanto sāvatthiyaṃ ekaṃ kuladhītaṃ ārabha kathesi. Sā kira sāvatthiyaṃ dvinnāṃ aggasāvakanāṃ upaṭṭhākakulassa dhītā saddhā pasannā buddhamāmakā dhammamāmakā saṅghamāmakā ācārasampannā paṇḍitā dānādipuññābhiratā. Taṃ aññaṃ sāvatthiyameva samānājatikaṃ micchādīṭṭhikakulaṃ vāresi. Athassā mātāpitaro “amhākaṃ dhītā saddhā pasannā tīṇi ratanāni mamāyati dānādipuññābhiratā, tumhe micchādīṭṭhikā imissāpi yathāruciya dānaṃ vā dātuṃ dhammaṃ vā sotuṃ vihāraṃ vā gantuṃ sīlaṃ vā rakkhituṃ uposathakammaṃ vā kātuṃ na dassatha, na mayaṃ tumhākaṃ dema, attanā sadisaṃ micchādīṭṭhikakulāva kumārikaṃ gaṇhathā”’ti āhaṃsu. Te tehi paṭikkhittā “tumhākaṃ dhītā amhākaṃ gharaṃ gantvā yathādhippāyena sabbametaṃ karotu, mayaṃ na vāressāma, detha no eta”’nti vatvā “tena hi gaṇhathā”’ti vuttā bhaddakena nakkhattena maṅgalaṃ katvā taṃ attano gharaṃ nayiṃsu. Sā vattācārasampannā patidevatā ahosi, sassusurasāmikavattāni katāneva honti.

Sā ekadivasaṃ sāmikaṃ āha – “icchāmaṃ, ayyaputta, amhākaṃ kulūpakattherānaṃ dānaṃ dātu”’nti. Sādhu, bhadda, yathājjhāsayena dānaṃ dehīti. Sā there nimantāpetvā mahantaṃ sakkāraṃ katvā paṇītabhojanaṃ bhojetvā ekamantaṃ nisīditvā “bhante, imaṃ kulaṃ micchādīṭṭhikaṃ assaddhaṃ tiṇṇaṃ ratanānaṃ guṇaṃ na jānāti, sādhu, ayyā, yāva imaṃ kulaṃ tiṇṇaṃ ratanānaṃ guṇaṃ jānāti, tāva idheva bhikkhaṃ gaṇhathā”’ti āha. Therā adhvāsetvā tattha nibaddhaṃ bhujjanti. Puna sāmikaṃ āha “ayyaputta, therā idha nibaddhaṃ āgacchanti, kiṃkāraṇā tumhe na passathā”’ti. “Sādhu, passissāmī”’ti. Sā punadivase therānaṃ bhattakiccapariyosāne tassa ārocesi. So upasaṅkamitvā therehi saddhiṃ paṭisanthāraṃ katvā ekamantaṃ nisīdi. Athassa dhammasenāpati dhammakathaṃ kathesi. So therassa dhammakathāya ca iriyāpathesu ca pasīditvā tato paṭṭhāya therānaṃ āsanaṃ paññāpeti, pāṇiyāṃ parissāveti, antarābhatte dhammakathaṃ suṇāti, tassa aparabhāge micchādīṭṭhi bhijji.

Athekadivasaṃ thero dvinnampi dhammakathaṃ kathento saccāni pakāsesi, saccapariyosāne ubhopi jayampatikā sotāpattiphale patiṭṭhahimsu. Tato paṭṭhāya tassa mātāpitaro ādiṃ katvā antamaso dāsakammakarāpi sabbe micchādīṭṭhiṃ bhinditvā buddhadhammasaṅghamāmakāyeva jātā. Athekadivasaṃ dārikā sāmikaṃ āha – “ayyaputta, kiṃ me gharāvāsena, icchāmaṃ pabbajitu”’nti. So “sādhu bhadda, ahampi pabbajissāmī”’ti mahantena parivārena taṃ bhikkhunupassayaṃ netvā

pabbājetvā sayampi satthāraṃ upasaṅkamtivā pabbajjaṃ yāci. Taṃ satthā pabbājesi. Ubhopi vipassanaṃ vadḍhettvā na cirasseva arahattaṃ pāpuṇṇimsu. Athekadivasaṃ bhikkhū dhammasabhāyaṃ kathaṃ samuṭṭhāpesuṃ “āvuso, asukā nāma daharabhikkhunī attano ceva paccayā jātā sāmikassa ca, attanāpi pabbajitvā arahattaṃ patvā tampi pāpesī”ti. Satthā āgantvā “kāya nuttha, bhikkhave, etarahi kadhāya sannisinnā”ti pucchitvā “imāya nāmā”ti vutte “na, bhikkhave, idāneva tāva esā sāmikaṃ rāgapāsā mocesi, pubbepeṣā porāṇakapaṇḍite pana maraṇapāsā mocesi”ti vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto migayoniyaṃ nibbattitvā vayappatto abhirūpo ahoṣi pāsādiko dassanīyo suvaṇṇavaṇṇo lākhārasaparikkammakatehi viya hatthapādehi rajatadāmasadisehi visāṇehi maṇigulīkapaṭibhāgehi akkhīhi rattakambalageṇḍusadisena mukhena samannāgato. Bhariyāpissa taruṇamigī abhirūpā ahoṣi dassanīyā. Te samaggavāsaṃ vasimsu, asītisahassacitramigā bodhisattaṃ upaṭṭhahimsu. Tadā luddakā migavīthīsu pāse oḍḍesuṃ. Athekadivasaṃ bodhisatto migānaṃ purato gacchanta pāde pāsena bajjhitvā “chindissāmi na”nti ākaḍḍhi, cammaṃ chijji, puna ākaḍḍhantassa maṃsaṃ chijji, puna nhāru chijji, pāso aṭṭhimāhacca aṭṭhāsi. So pāsaṃ chindituṃ asakkonto maraṇabhayaṭajjito baddharavaṃ ravi. Taṃ sutvā bhīto migagaṇo palāyi. Bhariyā panassa palāyitvā migānaṃ antare oloketi taṃ adisvā “idaṃ bhayaṃ mayhaṃ piyasāmikassa uppannaṃ bhavissati”ti vegena tassa santikaṃ gantvā assumukhī rodamānā “sāmi, tvaṃ mahabbalo, kiṃ etaṃ pāsaṃ sandhāretuṃ na sakkhissasi, vegaṃ janetvā chindāhi na”nti tassa ussāhaṃ janenti paṭhamāṃ gāthamāha –

50. “Vikkama re haripāda, vikkama re mahāmiga;  
Chinda vārattikaṃ pāsaṃ, nāhaṃ ekā vane rame”ti.

Tattha **vikkamāti** parakkama, ākaḍḍhāti attho. **Reti** āmantane nipāto. **Haripādāti** suvaṇṇapāda. Sakalasarīrampi tassa suvaṇṇavaṇṇaṃ, ayaṃ pana gāravenevamāha. **Nāhaṃ ekāti** ahaṃ tayā vinā ekikā vane na ramissāmi, tiṇodakaṃ pana aggahettvā sussitvā marissāmīti dasseti.

Taṃ sutvā migo dutiyaṃ gāthamāha –

51. “Vikkamāmi na pāremi, bhūmiṃ sumbhāmi vegasā;  
Daḷho vārattiko pāso, pādaṃ me parikantati”ti.

Tattha **vikkamāmīti** bhadde, ahaṃ vīriyaṃ karomi. **Na pāremīti** pāsaṃ chindituṃ pana na sakkomīti attho. **Bhūmiṃ sumbhāmīti** api nāma chijjeyyāti pādenāpi bhūmiṃ paharāmi. **Vegasāti** vegena. **Parikantatīti** cammādīni chindanto samantā kantatīti.

Atha naṃ migī “mā bhāyi, sāmi, ahaṃ attano balena luddakaṃ yācitvā tava jīvitāṃ āharissāmi. Sace yācanāya na sakkhissāmi, mama jīvitampi datvā tava jīvitāṃ āharissāmī”ti mahāsattaṃ assāsetvā lohitalittaṃ bodhisattaṃ pariggahettvā aṭṭhāsi. Luddakopi asiñca sattiñca gahettvā kappuṭṭhānaggi viya āgacchati. Sā taṃ disvā “sāmi, luddako āgacchati, ahaṃ attano balaṃ karissāmi, tvaṃ mā bhāyī”ti migāṃ assāsetvā luddakassa paṭipathaṃ gantvā paṭikkamtivā ekamantaṃ ṭhitā taṃ vanditvā “sāmi, mama sāmiko suvaṇṇavaṇṇo sīlacārasampanno, asītisahassānaṃ migānaṃ rājā”ti bodhisattassa guṇaṃ kathettvā migarāje ṭhiteyeva attano vadhaṃ yācantī tatiyaṃ gāthamāha –

52. “Attharassu palāsāni, asim nibbāha luddaka;  
Paṭhamāṃ maṃ vadhitvāna, hana pacchā mahāmiga”nti.

Tattha **palāsānīti** maṃsaṭṭhapanatthaṃ palāsapaṇṇāni attharassu. **Asim nibbāhāti** asim kosato nīhara.

Taṃ sutvā luddako “manussabhūtā tāva sāmikassa atthāya attano jīvitāṃ na pariccajanti, ayaṃ

tiracchānagatā jīvitam pariccajati, manussabhāsāya ca madhurena sarena katheti, ajja imissā ca patino cassā jīvitam dassāmī”ti pasannacitto catuttham gāthamāha –

53. “Na me sutam vā diṭṭham vā, bhāsantiṃ mānusiṃ migiṃ;  
Tvañca bhadde sukhī hohi, eso cāpi mahāmigo”ti.

Tattha **sutam vā diṭṭham vā**ti mayā ito pubbe evarūpaṃ diṭṭham vā sutam vā natthi. **Bhāsantiṃ mānusiṃ migiṃ**ti ahañhi ito pubbe mānusiṃ vācam bhāsantiṃ migiṃ neva addasaṃ na assosiṃ. Yesaṃ pana “na me sutā vā diṭṭhā vā, bhāsanti mānusi migi”ti pāli, tesam yathāpālimeva attho dissati. **Bhaddeti** bhaddake paṇḍike upāyakusale. Iti tam ālapitvā puna “tvañca eso cāpi mahāmigoti dvepi janā sukhī niddukkā hothā”ti tam samassāsetvā luddako bodhisattassa santikaṃ gantvā vāsiyā cammaṃpāsaṃ chinditvā pāde laggapāsakaṃ saṇikaṃ nīharitvā nhārunā nhāruṃ, maṃsena maṃsaṃ, cammena cammaṃ paṭipāṭetvā pādaṃ hatthena parimajji. Taṅkhaṇaṇīeva mahāsattassa pūritapāramitānubhāvena luddakassa ca mettacittānubhāvena migiyā ca mettadhammānubhāvena nhārumaṃsacammāni nhārumaṃsacammehi ghaṭayimsu. Bodhisatto pana sukhī niddukkho aṭṭhāsi.

Migī bodhisattaṃ sukhitam disvā somanassajātā luddakassa anumodanaṃ karontī pañcamaṃ gāthamāha –

54. “Evaṃ luddaka nandassu, saha sabbehi ñātibhi;  
Yathāhamajja nandāmi, muttam disvā mahāmiga”nti.

Tattha **luddakā**ti dāruṇakammakiriyāya laddhanāmasena ālapati.

Bodhisatto “ayaṃ luddo mayham avassayo jāto, mayāpissa avassayeneva bhavitum vaṭati”ti gocarabhūmiyam diṭṭham ekaṃ maṇikkhandham tassa datvā “samma, ito paṭṭhāya pāṇātipātādīni mā kari, iminā kuṭumbaṃ saṅghapetvā dārake posento dānasīlādīni puññāni karohī”ti tassovādam datvā araṇṇam pāvīsi.

Satthā imaṃ dhammadesanaṃ āharitvā jātaṃ samodhānesi – “tadā luddako channo ahosi, migī daharabhikkhunī, migarājā pana ahameva ahosi”nti.

Suvaṇṇamigajātakavaṇṇanā navamā.

[360] 10. Suyonandījātakavaṇṇanā

**Vāti gandho timirānanti** idam satthā jetavane viharanto ukkaṅṭhitabhikkhuṃ ārabha kathesi. Tañhi satthā “saccaṃ kira tvam bhikkhu ukkaṅṭhitosī”ti pucchitvā “sacca”nti vutte “kiṃ disvā”ti vatvā “alaṅkatamātugāma”nti vutte “mātugāmo nāmesa bhikkhu na sakkā rakkhitum, porāṇakapaṇḍitā supaṇṇabhavane katvā rakkhantāpi rakkhitum nāsakkhimsū”ti vatvā tena yācito atītam āhari.

Atīte bārāṇasiyam tambarājā nāma rajjam kāresi. Tassa suyonandī nāma aggamaheśi ahosi uttamarūpadharā. Tadā bodhisatto supaṇṇayoniyam nibbatti, tasmim kāle nāgadīpo sedumadīpo nāma ahosi. Bodhisatto tasmim dīpe supaṇṇabhavane vasati. So bārāṇasiṃ gantvā tambarājena saddhim māṇavakavesena jūtam kīlati. Tassa rūpasampattiṃ disvā paricārikā “amhākaṃ raññā saddhim evarūpo nāma māṇavako jūtam kīlati”ti suyonandiyā ārocesum. Sā sutvā tam daṭṭhukāmā hutvā ekadivasam alaṅkaritvā jūtaṃḍalam āgantvā paricārikānaṃ antare ṭhitā naṃ olokesi. Sopi devim olokesi. Dvepi aññamaññaṃ paṭibaddhacittā ahesum. Supaṇṇarājā attano ānubhāvena nagare vātam samuṭṭhāpesi, gehapatanabhayena rājanivesanā manussā nikkhamimsu. So attano ānubhāvena andhakāram katvā devim gahetvā ākāse āgantvā nāgadīpe attano bhavanaṃ pāvīsi suyonandiyā gataṭṭhānam jānantā nāma nāhesum. So tāya saddhim abhiramamāno gantvā raññā saddhim jūtam kīlati.

Raño pana saggo nāma gandhabbo atthi, so deviyā gatattḥānaṃ ajānanto taṃ gandhabbaṃ āmantetvā “gaccha, tāta, gandhabba sabbam thalajalalpatham anuvicaritvā deviyā gatattḥānaṃ passā”ti uyyojesi. So paribbayaṃ gahetvā dvāragāmato paṭṭhāya vicinanto kurukacchaṃ pāpuṇi. Tadā kurukacchavāṇijā nāvāya suvaṇṇabhūmiṃ gacchanti. So te upasaṅkamitvā “ahaṃ gandhabbo nāvāya vetanaṃ khaṇḍetvā tumhākaṃ gandhabbaṃ karissāmi, mampi nethā”ti āha. Te “sādhū”ti tampi āropetvā nāvaṃ vissajjesuṃ. Te sukhapayātāya nāvāya taṃ pakkositvā “gandhabbaṃ no karohī”ti āhaṃsu. “Ahaṃ ce gandhabbaṃ kareyyaṃ, mayi pana gandhabbaṃ karonte macchā calissanti, atha vo nāvo bhijjissatī”ti. “Manussamatte gandhabbaṃ karonte macchānaṃ calanaṃ nāma natthi, karohī”ti. “Tena hi mā mayhaṃ kujjhitthā”ti vīṇaṃ mucchitvā tantissarena gītassaraṃ, gītassarena tantissaraṃ anatikkamitvā gandhabbaṃ akāsi. Tena saddena sammattā hutvā macchā calīṃsu.

Atheko makaro uppatitvā nāvāya patanto nāvaṃ bhindi. Saggo phalake nipajjitvā yathāvātaṃ gacchanto nāgadīpe supaṇṇabhavanassa nigrodharukkassa santikaṃ pāpuṇi. Suyonandīpi devī supaṇṇarājassa jūtaṃ kīḷitūṃ gatakāle vimānā otaritvā velante vicarantī saggaṃ gandhabbaṃ disvā sañjānitvā “kathaṃ āgatosī”ti pucchi. So sabbam kathesi. “Tena hi mā bhāyī”ti taṃ assāsetvā bāhāhi pariggahetvā vimānaṃ āropetvā sayanapitṭhe nipajjāpetvā samassatthakāle dibbabhōjanaṃ datvā dibbagandhodakena nhāpetvā dibbavatthehi acchādetvā dibbagandhapupphehi alaṅkaritvā puna dibbasayane nipajjāpesi. Evaṃ divasaṃ pariggahamānā supaṇṇaraño āgamanavelāya paṭicchādetvā gatakāle tena saddhiṃ kilesavasena abhirami. Tato māsaddhamāsaccayena bārāṇasivāsino vāṇijā dārudakagahaṇatthāya tasmīṃ dīpe nigrodharukkhamūlaṃ sampattā. So tehi saddhiṃ nāvaṃ abhiruyha bārāṇasiṃ gantvā rājānaṃ disvā tassa jūtakīḷanavelāya vīṇaṃ gahetvā raño gandhabbaṃ karonto paṭhamaṃ gāthamāha –

55. “Vāti gandho timirānaṃ, kusamuddo ca ghosavā;  
Dūre ito suyonandī, tamba kāmā tudanti ma”nti.

Tattha **timirānanti** timirarukkhapupphānaṃ. Taṃ kira nigrodhaṃ parivāretvā timirarukkā atthi, te sandhāyevaṃ vadati. **Kusamuddoti** khuddakasamuddo. **Ghosavāti** mahāravo. Tasseva nigrodhassa santike samuddaṃ sandhāyevamāha. **Itoti** imamahā nagarā. **Tambāti** rājānaṃ ālapati. Atha vā **tambakāmāti** tambena kāmītakāmā tambakāmā nāma. Te maṃ hadaye vijjhantīti dīpeti.

Taṃ sutvā supaṇṇo dutiyaṃ gāthamāha –

56. “Kathaṃ samuddamatari, kathaṃ addakkhi sedumaṃ;  
Kathaṃ tassā ca tuyhañca, ahu sagga samāgamo”ti.

Tattha **sedumanti** sedumadīpaṃ.

Tato saggo tisso gāthā abhāsi –

57. “Kurukacchā payātānaṃ, vāṇijānaṃ dhanesinaṃ;  
Makarehi abhidā nāvā, phalakenāhamaplavim.
58. “Sā maṃ saṇhena mudunā, niccaṃ candanagandhinī;  
Aṅgena uddharī bhaddā, mātā puttaṃva orasaṃ.
59. “Sā maṃ annena pānena, vatthena sayanena ca;  
Attanāpi ca mandakkhī, evaṃ tamba vijānahī”ti.

Tattha **sā maṃ saṇhena mudunāti** evaṃ phalakena tīraṃ uttiṇṇaṃ maṃ samuddatīre vicarantī sā disvā “mā bhāyī”ti saṇhena mudunā vacanena samassāsetvāti attho. **Aṅgenāti** bāhuyugaḷaṃ idha



“aṅgenā”ti vuttaṃ. **Bhaddā**ti dassanīyā pāsādikā. **Sā maṃ annenā**ti sā maṃ etena annādinā santappesīti attho. **Attanāpi cāti** na kevalaṃ annādīheva, attanāpi maṃ abhiraṃenti santappesīti dīpeti. **Mandakkhī**ti mandadassanī, mudunā ākārena olokanasīlāti vuttaṃ hoti. “Mattakkhī”tipi pātho, madamattehi viya akkhīhi samannāgatāti attho. **Evam tambā**ti evaṃ tambarāja jānāhīti.

Supaṇṇo gandhabbassa kathentasseva vippaṭṭisārī hutvā “ahaṃ supaṇṇabhavane vasantopi rakkhituṃ nāsakkhiṃ, kiṃ me tāya dussīlāyā”ti taṃ ānetvā rañño paṭidatvā pakkāmi, tato paṭṭhāya puna nāgacchīti.

Satthā imaṃ dhammadesanaṃ āharitvā saccāni pakāsetvā jātakam samodhānesi, saccapariyosāne ukkaṇṭhitabhikkhu sotāpattiphale patiṭṭhahi. Tadā rājā ānando ahosi, supaṇṇarājā pana ahameva ahosinti.

Suyonandījātakavaṇṇanā dasamā.

Maṇikuṇḍalavaggo paṭhamo.

## 2. Vaṇṇārohavaggo

[361] 1. Vaṇṇārohajātakavaṇṇanā

**Vaṇṇārohenā**ti idaṃ satthā jetavane viharanto dve aggasāvake ārabba kathesi. Ekasmiñhi samaye ubhopi mahātherā “imaṃ antovassaṃ suññāgāraṃ anubrūhessāmā”ti satthāraṃ āpucchitvā gaṇaṃ pahāya sayameva pattacīvaraṃ ādāya jetavanā nikkhamitvā ekaṃ paccantagāmaṃ nissāya araññe viharimsu. Aññataropi vighāsādapuriso therānaṃ upaṭṭhānaṃ karonto tattheva ekamante vasi. So therānaṃ samaggavāsaṃ disvā “ime ativiya samaggā vasanti, sakkā nu kho ete aññamaññaṃ bhindītu”nti cintetvā sārīputtatheraṃ upasaṅkamtivā “kiṃ nu kho, bhante, ayyena mahāmoggallānattherena saddhiṃ tumhākaṃ kiñci veraṃ atthī”ti pucchi. “Kiṃ panāvuso”ti. Esa, bhante, mama āgatakāle “sārīputto nāma jātigottakulapadesehi vā sutaganthapaṭivedhaidhīhi vā mayā saddhiṃ kiṃ pahotī”ti tumhākaṃ aguṇameva kathesīti. Thero sitaṃ katvā “gaccha tvam āvuso”ti āha.

So aparasmimpi divase mahāmoggallānattherampi upasaṅkamtivā tatheva kathesi. Sopi naṃ sitaṃ katvā “gaccha, tvam, āvuso”ti vatvā sārīputtatheraṃ upasaṅkamtivā “āvuso, eso vighāsādo tumhākaṃ santike kiñci kathesī”ti pucchi. “Āmāvuso, mayhampi santike kathesi, imaṃ nīharitūṃ vaṭṭatī”ti. “Sādhu, āvuso, nīharā”ti vutte thero “mā idha vasi”ti accharaṃ paharivā taṃ nīhari. Te ubhopi samaggavāsaṃ vasitvā satthu santikaṃ gantvā vanditvā nisīdīmsu. Satthā paṭisanthāraṃ katvā “sukhena vassaṃ vasitthā”ti pucchitvā “bhante, eko vighāsādo amhe bhinditukāmo hutvā bhinditūṃ asakkonto palāyī”ti vutte “na kho so, sārīputta, idāneva, pubbepesa tumhe ‘bhindissāmī’ti bhinditūṃ asakkonto palāyī”ti vatvā tehi yācito atītaṃ āhari.

Atīte bārāṇasiyaṃ brahmadatte rajjaṃ kārente bodhisatto araññe rukkhadevatā ahosi. Tadā sīho ca byaggho ca araññe pabbataguhāyaṃ vasanti. Eko siṅgālo te upaṭṭhahanto tesam vighāsaṃ khādītva mahākāyo hutvā ekadivasaṃ cintesi “mayā sīhabyagghānaṃ maṃsaṃ na khādītapubbaṃ, mayā ime dve jane bhinditūṃ vaṭṭati, tato nesam kalahaṃ katvā matānaṃ maṃsaṃ khādissāmī”ti. So sīhaṃ upasaṅkamtivā “kiṃ, sāmī, tumhākaṃ byagghena saddhiṃ kiñci veraṃ atthī”ti pucchi. “Kiṃ pana, sammā”ti? Esa, bhante, mamāgatakāle “sīho nāma sarīravaṇṇena vā ārohapariñāhena vā jātibalavīriyehi vā mama kalabhāgampi na pāpuṇāti”ti tumhākaṃ aguṇameva kathesīti. Atha naṃ sīho “gaccha tvam, na so evaṃ kathessatī”ti āha. Byagghampi upasaṅkamtivā eteneva upāyena kathesi. Taṃ sutvā byagghopi sīhaṃ upasaṅkamtivā “samma, tvam kira idañcidañca vadesī”ti pucchanto paṭhamam gāthamāha –

60. “Vaṇṇārohena jātiyā, balanikkamanena ca;  
Subāhu na mayā seyyo, sudāṭha iti bhāsasī”ti.

Tattha **balanikkamanena cāti** kāyabalena ceva vīriyabalena ca. **Subāhu na mayā seyyoti** ayam subāhu nāma byaggho etehi kāraṇehi mayā neva sadiso na uttaritaroti saccaṃ kira tvaṃ sobhanāhi dāṭhāhi samannāgata sudāṭha migarāja, evaṃ vadesīti.

Taṃ sutvā sudāṭho sesā catasso gāthā abhāsi –

61. “Vaṇṇārohena jātiyā, balanikkamanena ca;  
Sudāṭho na mayā seyyo, subāhu iti bhāsasi.
62. “Evaṃ ce maṃ viharantaṃ, subāhu samma dubbhasi;  
Na dānāhaṃ tayā saddhiṃ, saṃvāsamaḥhirocaye.
63. “Yo paresaṃ vacanāni, saddaheyya yathātathaṃ;  
Khippaṃ bhijjetha mittasmiṃ, verañca pasave bahuṃ.
64. “Na so mitto yo sadā appamatto, bhedāsaṅkī randhamevānupassī;  
Yasmiñca setī urasīva putto, sa ve mitto yo abhejjo parehī”ti.

Tattha **sammāti** vayassa. **Dubbhasīti** yadi evaṃ tayā saddhiṃ samaggavāsaṃ vasantaṃ maṃ siṅgālassa kathaṃ gahetvā tvaṃ dubbhasi hanituṃ icchasi, ito dāni paṭṭhāya ahaṃ tayā saddhiṃ saṃvāsaṃ na abhirocaye. **Yathātathanti** tathato yathātathaṃ yathātacchaṃ avisaṃvādakena ariyena vuttavacanaṃ saddhātappaṃ. Evaṃ yo yesaṃ kesañci paresaṃ vacanāni saddahethāti attho. **Yo sadā appamattoti** yo niccaṃ appamatto hutvā mittassa viśāsaṃ na deti, so mitto nāma na hotīti attho. **Bhedāsaṅkīti** “ajja bhijjissati, sve bhijjissatī”ti evaṃ mittassa bhedameva āsaṅkati. **Randhamevānupassīti** chiddaṃ vivarameva passanto. **Urasīva puttoti** yasmimṃ mitte mātu hadaye putto viya nirāsaṅko nibbhayo seti.

Iti imāhi catūhi gāthāhi sīhena mittaguṇe kathite byaggho “mayhaṃ doso”ti sīhaṃ khamāpesi. Te tattheva samaggavāsaṃ vasiṃsu. Siṅgālo pana palāyitvā aññattha gato.

Satthā imaṃ dhammaḍesaṇaṃ āharitvā jātaṃ samodhānesi – “tadā siṅgālo vighāsādo ahosi, sīho sārīputto, byaggho moggallāno, taṃ kāraṇaṃ paccakkhato diṭṭhā tasmimṃ vane nivuttharukkhadavatā pana ahameva ahosi”nti.

Vaṇṇārohajātakavaṇṇanā paṭhamā.

[362] 2. Sīlavīmaṃsajātakavaṇṇanā

**Sīlaṃ seyyoti** idaṃ satthā jetavane viharanto ekaṃ sīlavīmaṃsakabrāhmaṇaṃ ārabha kathesi. Taṃ kira rājā “esa sīlasampanno”ti aññehi brāhmaṇehi atirekaṃ katvā passati. So cintesi “kiṃ nu kho maṃ rājā ‘sīlasampanno’ti aññehi atirekaṃ katvā passati, udāhu ‘sutadharayutto’ti, vīmaṃsissāmi tāva sīlassa vā sutassa vā mahantabhāva”nti. So ekadivasaṃ heraññīkaphalakato kahāpaṇaṃ gaṇhi. Heraññīko garubhāvena na kiñci āha, dutiyavārepi na kiñci āha. Tatiyavāre pana taṃ “vilopakhādako”ti gāhāpetvā rañño dassetvā “kiṃ iminā kata”nti vutte “kuṭumbaṃ vilumpatī”ti āha. “Saccaṃ kira, brāhmaṇā”ti? “Na, mahārāja, kuṭumbaṃ vilumpāmi, mayhaṃ pana ‘sīlaṃ nu kho mahantaṃ, sutamaṃ nu kho’ti kukkucchaṃ ahosi, svāhaṃ ‘etesu kataramaṃ nu kho mahanta’nti vīmaṃsanto tayo vāre kahāpaṇaṃ gaṇhiṃ, taṃ maṃ esa bandhāpetvā tumhākaṃ dasseti. Idāni me sutato sīlassa mahantabhāvo ñāto, na me gharāvāsenattho, pabbajissāmaḥ”nti pabbajjaṃ anujānāpetvā gharadvāraṃ anoloketvāva jetavanaṃ gantvā satthāraṃ pabbajjaṃ yāci. Tassa satthā pabbajjañca upasampadañca dāpesi. So acirūpasampanno vipassanaṃ vipassitvā aggaphale patitṭhahi. Bhikkhū dhammasabhāyaṃ kathaṃ samutṭhāpesuṃ “āvuso, asukabrāhmaṇo attano sīlaṃ vīmaṃsitvā pabbajito vipassitvā arahattaṃ patto”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na,

bhikkhave, idāni ayameva, pubbe paṇḍitāpi sīlaṃ vīmaṃsitvā pabbajitvā attano patitṭhaṃ karimsuyevā”ti vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto brāhmaṇakule nibbattitvā vayappatto takkasīlayaṃ sabbasippāni uggaṇhitvā bārāṇasiṃ āgantvā rājānaṃ passi. Rājā tassa purohitatṭhānaṃ adāsi. So pañca sīlāni rakkhati. Rājāpi naṃ “sīlavā”ti gaṇṇaṃ katvā passi. So cintesi “kiṃ nu kho rājā ‘sīlavā’ti maṃ gaṇṇaṃ katvā passati, udāhu ‘sutadharayutto’”ti. Sabbaṃ paccuppannavatthusadisameva. Idha pana so brāhmaṇo “idāni me sutato sīlassa mahantabhāvo ñāto”ti vatvā imā pañca gāthā abhāsi –

65. “Sīlaṃ seyyo sutāṃ seyyo, iti me saṃsayo ahu;  
Sīlameva sutā seyyo, iti me natthi saṃsayo.
66. “Moghā jāti ca vaṇṇo ca, sīlameva kiruttamaṃ;  
Sīlena anupetassa, sutenattho na vijjati.
67. “Khattiyo ca adhammaṭṭho, vesso cādhammanissito;  
Te pariccajjubho loka, upapajjanti duggatiṃ.
68. “Khattiyā brāhmaṇā vessā, suddā caṇḍālapukkusā;  
Idha dhammaṃ caritvāna, bhavanti tidive samā.
69. “Na vedā samparāyāya, na jāti nāpi bandhavā;  
Sakañca sīlaṃ saṃsuddhaṃ, samparāyāya sukhāya cā”ti.

Tattha **sīlameva sutā seyyoti** sutapariyattito satagaṇeṇa sahaṃsagaṇeṇa sīlameva uttaritaranti. Evañca pana vatvā sīlaṃ nāmetāṃ ekavidhaṃ saṃvaravasena, duvidhaṃ cārittavārittavasena, tividhaṃ kāyikavācasikamānasikavasena, catubbidhaṃ pātimokkhasaṃvaraindriyasaṃvaraājīvapārisuddhipaccayasannissitavasenāti mātikaṃ ṭhapetvā vitthārento sīlassa vaṇṇaṃ abhāsi.

**Moghāti** aphaḷā tucchā. **Jātīti** khattiyakulādīsu nibbatti. **Vaṇṇoti** sarīravaṇṇo abhirūpabhāvo. Yā hi yasmā sīlarahitassa jātisampadā vā vaṇṇasampadā vā saggasukhaṃ dātuṃ na sakkoti, tasmā ubhayampi taṃ “mogha”nti āha. **Sīlameva kirāti** anussavavasena vadati, na pana sayāṃ jānāti. **Anupetassāti** anupagatassa. **Sutenattho na vijjati**ti sīlarahitassa sutapariyattimattena idhaloke vā paraloke vā kāci vaḍḍhi nāma natthi.

Tato parā dve gāthā jātiyā moghabhāvadassanattaṃ vuttā. Tattha **te pariccajjubho loketi** te dussīlā devalokañca manussalokañcāti ubhopi loka pariccajjetvā duggatiṃ upapajjanti. **Caṇḍālapukkusāti** chavachaḍḍakacaṇḍālā ca pupphachaḍḍakapukkusā ca. **Bhavanti tidive samāti** ete sabbepi sīlānubhāvena devaloke nibbattā samā honti nibbisesā, devātveva saṅkhyāṃ gacchanti.

Pañcamagāthā sabbesampi sutādīnaṃ moghabhāvadassanattaṃ vuttā. Tassattho – mahārāja, ete vedādayo ṭhapetvā idhaloke yasamattadānaṃ samparāye dutiye vā tatiye vā bhava yasaṃ vā sukhaṃ vā dātuṃ nāma na sakkonti, parisuddhaṃ pana attano sīlameva taṃ dātuṃ sakkotīti.

Evāṃ mahāsatto sīlagaṇe thometvā rājānaṃ pabbajjaṃ anujānāpetvā taṃ divasameva himavantāṃ pavisitvā isipabbajjaṃ pabbajitvā abhiññā ca samāpattiyo ca nibbattetvā aparihīnājjhāno brahmalokaparāyaṇo ahoṣi.

Satthā imaṃ dhammaḍḍesaṇaṃ āharitvā jātaṃ samodhānesi – “tadā sīlaṃ vīmaṃsitvā isipabbajjaṃ pabbajito ahameva ahoṣi”nti.

Sīlavīmaṃsajātakavaṇṇanā dutiyā.

[363] 3. Hirijātakavaṇṇanā

**Hiriṃ tarantanti** idaṃ sathā jetavane viharanto anāthapiṇḍikassa sahāyaṃ paccantavāsiseṭṭhiṃ ārabha kathesi. Dvepi vatthūni ekakanipāte navamavaggassa pariyoṣānajātake vitthāritāneva. Idha pana “paccantavāsiseṭṭhino manussā acchinnasabbasāpateyyā attano santakassa assāmino hutvā palātā”ti bārāṇasiseṭṭhissa ārocite bārāṇasiseṭṭhi “attano santikaṃ āgatānaṃ kattabbaṃ akarontā nāma paṭikārake na labhantiyevā”ti vatvā imā gāthā abhāsi –

70. “Hiriṃ tarantaṃ vijjucchamaṇaṃ, tavāhamasmī iti bhāsamānaṃ;  
Seyyāni kammāni anādiyantaṃ, neso mamanti iti naṃ vijaññā.
71. “Yañhi kayirā tañhi vade, yaṃ na kayirā na taṃ vade;  
Akarontaṃ bhāsamānaṃ, pariṇanti paṇḍitā.
72. “Na so mitto yo sadā appamatto, bhedāsaṅkī randhamevānupassī;  
Yasmiṅca setī urasīva putto, sa ve mitto yo abhejjo parehi.
73. “Pāmojjakaraṇaṃ thānaṃ, pasamsāvahanaṃ sukhaṃ;  
Phalānisamsa bhāveti, vahanto porisaṃ dhuraṃ.
74. “Pavivekaraṇaṃ pitvā, rasaṃ upasamassa ca;  
Niddaro hoti nippāpo, dhammappītiraṇaṃ piva”nti.

Tattha **hiriṃ tarantanti** lajjaṃ atikkantaṃ. **Vijjucchamaṇanti** mittabhāvena jiggucchayamaṇaṃ. **Tavāhamasmīti** “tava ahaṃ mitto”ti kevalaṃ vacanamatteneva bhāsamānaṃ. **Seyyāni kammāniti** “dassāmi karissāmi”ti vacanassa anurūpāni uttamakammāni. **Anādiyantanti** akarontaṃ. **Neso mamanti** evarūpaṃ puggalaṃ “na eso mama mitto”ti vijaññā.

**Pāmojjakaraṇaṃ thānanti** dānampi sīlampi bhāvanāpi paṇḍitehi kalyāṇamittehi saddhiṃ mittabhāvopi. Idha pana vuttappakāraṃ mittabhāvameva sandhāyevamāha. Paṇḍitena hi kalyāṇamittena saddhiṃ mittabhāvo pāmojjampi karoti, pasamsampi vahati. Idhalokaparalokesu kāyikacetasikasukhahetuto “sukha”ntipi vuccati, tasmā etaṃ phalaṅca ānisamsaṅca sampassamāno phalānisamsa kulaputto purisehi vahitabbaṃ dānasīlabhāvanāmittabhāvasaṅkhātaṃ catubbidhampi porisaṃ dhuraṃ vahanto etaṃ mittabhāvasaṅkhātaṃ pāmojjakaraṇaṃ thānaṃ pasamsāvahanaṃ sukhaṃ bhāveti vaḍḍheti, na paṇḍitehi mittabhāvaṃ bhindatīti dīpeti.

**Pavivekaraṇanti** kāyacittaupadhivivekānaṃ rasaṃ te viveke nissāya uppannaṃ somanassaraṇaṃ. **Upasamassa cāti** kilesūpasamena laddhasomanassassa. **Niddaro hoti nippāpoti** sabbakilesadarathābhāvena niddaro, kilesābhāvena nippāpo hoti. **Dhammappītiraṇanti** dhammapītiraṇānaṃ rasaṃ, vimuttipītiṃ pivantoti attho.

Iti mahāsatto pāpamittasamsaggato ubbiggo pavivekaraṇena amatamahānibbānaṃ pāpetvā desanāya kūṭaṃ gaṇhi.

Sathā imaṃ dhammadeṣanaṃ āharitvā jātaṃ samodhānesi – “tadā paccantavāsī idāni paccantavāsīyeva, tadā bārāṇasiseṭṭhi ahameva ahosi”nti.

Hirijātakavaṇṇanā tatiyā.

[364] 4. Khajjopanakajātakavaṇṇanā

~~75-79~~ santamhi pajjoteti ayam khajjopanakapañho mahāumaṅge vitthārato āvi bhavissati.

Khajjopanakajātakavaṇṇanā catutthā.

[365] 5. Ahituṇḍikajātakavaṇṇanā

**Dhuttomhī**ti idaṃ satthā jetavane viharanto ekaṃ mahallakabhikkhuṃ ārabba kathesi. Vatthu heṭṭhā **sālūkajātake** (jā. 1.3.106 ādayo) vitthāritaṃ. Idhāpi so mahallako ekaṃ gāmadārakaṃ pabbājetvā akkosati paharati. Dārako palāyitvā vibbhami. Dutiyampi naṃ pabbājetvā tathevākāsi. Dutiyampi vibbhamitvā puna yāciyamāno oloketumpi na icchi. Bhikkhū dhammasabhāyaṃ kathaṃ samuṭṭhāpesuṃ “āvuso, asuko nāma mahallako attano sāmaṇerena sahāpi vināpi vattituṃ na sakkoti, itaro tassa dosaṃ disvā puna oloketumpi na icchi, suhadayo kumārako”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepesa sāmaṇero suhadayo, sakiṃ dosaṃ disvā puna oloketumpi na icchi”ti vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto dhaññavāṇijakule nibbattitvā vayappatto dhaññavikkayena jīvikam kappesi. Atheko ahituṇḍiko makkaṭaṃ gahetvā sikkhāpetvā ahim kīlāpento bārāṇasiyaṃ ussave ghuṭṭhe taṃ makkaṭaṃ dhaññavāṇijakassa santike ṭhapetvā ahim kīlāpento satta divasāni vicari. Sopi vāṇijo makkaṭassa khādanīyaṃ bhojanīyaṃ adāsi. Ahituṇḍiko sattame divase ussavakīlanato āgantvā taṃ makkaṭaṃ veḷupesikāya tikkhattuṃ paharitvā taṃ ādāya uyyānaṃ gantvā bandhitvā niddaṃ okkami. Makkaṭo bandhanaṃ mocetvā ambarukkhaṃ āruya ambāni khādanto nisīdi. So pabuddho rukke makkaṭaṃ disvā “etaṃ mayā upalāpetvā gahetuṃ vaṭṭatī”ti tena saddhim sallapanto paṭhamaṃ gāthamāha –

80. “Dhuttomhi samma sumukha, jūte akkharājito;  
Harehi ambapakkāni, vīriyaṃ te bhakkhayāmasa”ti.

Tattha **akkharājitoti** akkhehi parājito. **Harehīti** pātehi. Ayameva vā pāṭho.

Taṃ sutvā makkaṭo sesagāthā abhāsi –

81. “Alikam vata maṃ samma, abhūtena pasamsasi;  
Ko te suto vā diṭṭho vā, sumukho nāma makkaṭo.

82. “Ajjāpi me taṃ manasi, yaṃ maṃ tvaṃ ahituṇḍika;  
Dhaññāpaṇaṃ pavisitvā, matto chātaṃ hanāsi maṃ.

83. “Tāhaṃ saraṃ dukkhaseyyaṃ, api rajjampi kāraye;  
Nevāhaṃ yācito dajjaṃ, tathā hi bhayatajjito.

84. “Yañca jaññā kule jātaṃ, gabbhe tittaṃ amaccharim;  
Tena sakhiñca mittañca, dhīro sandhātumarahatī”ti.

Tattha **alikaṃ vatāti** musā vata. **Abhūtenāti** avijjamānena. **Ko teti** kva tayā. **Sumukhoti** sundaramukho. **Ahituṇḍikāti** taṃ ālapati. “Ahikoṇḍikā”tipi pāṭho. **Chātanti** jighacchābhībhūtaṃ dubbalaṃ kapaṇaṃ. **Hanāsīti** veḷupesikāya tikkhattuṃ paharasi. **Tāhanti** taṃ ahaṃ. **Saranti** saranto. **Dukkhaseyyanti** tasmiṃ āpaṇe dukkhasayanaṃ. **Api rajjampi kārayeti** sacepi bārāṇasirajjaṃ gahetvā mayhaṃ datvā maṃ rajjaṃ kāreyyāsi, evampi taṃ nevāhaṃ yācito dajjaṃ, taṃ ekampi ambapakkam ahaṃ tayā yācito na dadeyyaṃ. Kiṃkāraṇā? **Tathā hi bhayatajjitoti**, tathā hi ahaṃ tayā bhayena tajjitoti attho.

**Gabbhe tittanti** subhojanarasena mātukucchiyaṃyeva alaṅkatapaṭiyatte sayanagabbheya vā

tittam bhogāsāya akapaṇaṃ. **Sakhiṇca mittaṇcāti** sakhibhāvaṇca mittabhāvaṇca tathārūpena kulajātena tittena akapaṇena amaccharinā saddhiṃ paṇḍito sandhātum puna ghaṭetum arahati, tayā pana kapaṇena ahituṇḍikena saddhiṃ ko mittabhāvaṃ puna ghaṭetunti attho. Evaṇca pana vatvā vānaro vanaṃ sahasā pāvīsi.

Satthā imaṃ dhammadesanaṃ āharitvā jātakam samodhānesi – “tadā ahituṇḍiko mahallako ahosi, makkāto sāmaṇero, dhañṇavāṇijo pana ahameva ahosi”nti.

AhITUṆḌIKAJĀTAKAVAṆṆANĀ PAṆCAMĀ.

[366] 6. Gumbiyajātakavaṇṇanā

**Madhuvaṇṇaṃ madhurasanti** idaṃ satthā jetavane viharanto ukkaṇṭhitabhikkhuṃ ārabba katesi. Tañhi satthā “saccaṃ kira tvaṃ bhikkhu ukkaṇṭhito”ti pucchitvā “saccaṃ, bhante”ti vutte “kiṃ disvā”ti vatvā “alaṅkatamātugāma”nti vutte “bhikkhu ime pañca kāmagaṇā nāma ekena gumbiyena yakkhena halāhalavisam pakkhipitvā magge ṭhapitamadhusadisā”ti vatvā tena yācito atītam āhari.

Atīte bārāṇasiyaṃ brahmadatte rajjaṃ kārente bodhisatto satthavāhakule nibbattitvā vayappatto bārāṇasito pañcahi sakaṭasatehi bhaṇḍaṃ ādāya vohāratthāya gacchanto mahāvattaniatavidvāraṃ patvā satthake sannipātāpetvā “ambho, imasmim magge visapaṇṇapupphaphalādīni atthi, tumhe kiñci akhāditaṃpubbaṃ khādantā maṃ apucchitvā mā khāditha, amanussāpi visam pakkhipitvā bhattapuṭamadhukaphalāni magge ṭhapenti, tānipi maṃ anāpucchitvā mā khādithā”ti ovādaṃ datvā maggaṃ paṭipajji. Atheke gumbiyo nāma yakkho aṭaviyā majjhaṭṭhāne magge paṇṇāni attharivā halāhalavisasamuyuttāni madhupiṇḍāni ṭhapetvā sayam maggasāmate madhum gaṇhanto viya rukkhe koṭṭento vicarati. Ajānantā “puññatthāya ṭhapitāni bhavissanti”ti khādītva jīvitakkhayaṃ pāpuṇanti. Amanussā āgantvā te khādanti. Bodhisattassa satthakamanussāpi tāni disvā ekacce lolajātikā adhivāsetum asakkontā khādīmsu, paṇḍitajātikā “pucchitvā khādissāmā”ti gahetvā aṭṭhaṃsu. Bodhisatto te disvā hatthagatāni chaḍḍāpesi, yehi paṭhamataraṃ khādītāni, te marīmsu. Yehi aḍḍhakhādītāni, tesam vamanavirecanaṃ datvā vantakāle catumadhuraṃ adāsi. Iti te tassa ānubhāvena jīvitam paṭilabhiṃsu. Bodhisatto sotthinā icchitaṭṭhānaṃ gantvā bhaṇḍaṃ vissajjetvā attano gehameva agamāsi. Tamatthaṃ kathento satthā imā abhisambuddhagāthā abhāsi –

85. “Madhuvaṇṇaṃ madhurasam, madhugandhaṃ visam ahu;  
Gumbiyo ghāsamesāno, araṇṇe odahī visam.
86. “Madhu iti mañṇamānā, ye taṃ visamakhādisuṃ;  
Tesaṃ taṃ kaṭukaṃ āsi, maraṇaṃ tenupāgamuṃ.
87. “Ye ca kho paṭisaṅkhāya, visam taṃ parivajjayuṃ;  
Te āturesu sukhītā, ḍayhamānesu nibbutā.
88. “Evameva manussesu, visam kāmā samohitā;  
Āmisam bandhanañcetam, maccuveso guhāsayo.
89. “Evameva ime kāme, āturā paricārike;  
Ye sadā parivajjenti, saṅgaṃ loke upaccagu”nti.

Tattha **gumbiyoti** tasmim vanagumbe vicaraṇena evaṃladdhanāmo yakkho. **Ghāsamesānoti** “taṃ visam khādītva mate khādissāmī”ti evaṃ attano ghāsam pariyesanto. **Odahīti** taṃ madhunā samānavaṇṇagandharasaṃ visam nikkhipi. **Kaṭukaṃ āsīti** tikhiṇaṃ ahosi. **Maraṇaṃ tenupāgamunti** tena visena te sattā maraṇaṃ upagatā.

**Āturesūti** visavegena āsannamaraṇesu. **Ḍayhamānesūti** visatejeneva ḍayhamānesu. **Visaṃ kāmā samohitāti** yathā tasmim vattanimahāmagge visaṃ samohitaṃ nikkhitaṃ, evaṃ manussesupi ye ete rūpādayo pañca vatthukāmā tattha tattha samohitā nikkhittā, te “visa”nti veditabbā. **Āmisaṃ bandhanañcetanti** ete pañca kāmaguṇā nāma evaṃ imassa macchabhūtassa lokassa mārabālisikena pakkhitaṃ āmisañceva, bhavābhavato nikkhamituṃ appadānena anduādippabhedam nānappakāraṃ bandhanañca. **Maccuveso guhāsayoti** sarīraguhāya vasanako maraṇamaccuveso.

**Evameva ime kāmēti** yathā vattanimahāmagge visaṃ nikkhitaṃ, evaṃ tattha tattha nikkhitte ime kāmē. **Āturāti** ekantamaraṇadhammatāya āturā āsannamaraṇā paṇḍitamanussā. **Paricāriketi** kilesapāricārike kilesabandhake. **Ye sadā parivajjenti** ye vuttappakārā paṇḍitapurisā niccam evarūpe kāmē vajjenti. **Saṅgaṃ loketi** loke saṅganatthēna “saṅga”nti laddhanāmaṃ rāgādibhedam kilesajātāṃ. **Upaccagunti** atītā nāmāti veditabbā, atikkamantīti vā attho.

Satthā saccāni pakāsetvā jātakam samodhānesi, saccapariyosāne ukkaṇṭhitabhikkhu sotāpattiṭṭhale patiṭṭhahi. Tadā satthavāho ahameva ahosinti.

Gumbiyajātakavaṇṇanā chaṭṭhā.

[367] 7. Sāḷiyajātakavaṇṇanā

**Yvāyaṃ sāḷiyachāpotīti** idaṃ satthā veḷuvane viharanto “āvuso, devadatto tāsakārakopi bhavitum nāsakkhī”ti vacanam ārabba kathesi. Tadā hi satthā “na, bhikkhave, idāneva, pubbepesa mama tāsakārakopi bhavitum nāsakkhī”ti vatvā atītam āhari.

Atīte bārānasiyaṃ brahmadatte rajjam kārente bodhisatto gāmake kuṭumbikakule nibbattivā taruṇakāle paṃsukīlakehi dārakehi saddhim gāmadvāre nigrodharukkhamūle kīlati. Tadā eko dubbalavejjo gāme kiñci alabhitvā nikkhamanto tam thānam patvā ekaṃ sappam viṭapabbhantarena sīsam nīharitvā niddāyantam disvā “mayā gāme kiñci na laddham, ime dārake vañcivā sappena ḍaṃsāpetvā tikicchitvā kiñciveva gaṇhissāmī”ti cintetvā bodhisattam āha “sace sāḷiyachāpam passeyyāsi, gaṇheyyāsi”ti. “Āma, gaṇheyya”nti. “Passeso viṭapabbhantare sayito”ti. So tassa sappabhāvam ajānanto rukkham āruya tam gīvāyaṃ gahetvā “sappo”ti ṇatvā nivattitum adento suggahitam gahetvā vegena khipi. So gantvā vejjassa gīvāyaṃ patito gīvam paliveṭhetvā “kara karā”ti ḍaṃsitvā tattheva nam pātetvā palāyi. Manussā parivārayimsu.

Mahāsatto sampattaparisāya dhammam desento imā gāthā abhāsi –

90. “Yvāyaṃ sāḷiyachāpoti, kaṇhasappam agāhayi;  
Tena sappenayam daṭṭho, hato pāpānusāsako.
91. “Ahantāramahantāram, yo naro hantumicchati;  
Evaṃ so nihato seti, yathāyaṃ puriso hato.
92. “Ahantāramaghātentaṃ, yo naro hantumicchati;  
Evaṃ so nihato seti, yathāyaṃ puriso hato.
93. “Yathā paṃsumuṭṭhim puriso, paṭivātam paṭikkhipe;  
Tameva so rajo hanti, tathāyaṃ puriso hato.
94. “Yo appaduṭṭhassa narassa dussati, suddhassa posassa anaṅgaṇassa;  
Tameva bālam pacceti pāpam, sukhumo rajo paṭivātamva khitto”ti.

Tattha **yvāyanti** yo ayam, ayameva vā pāṭho. **Sappenayanti** so ayam tena sappena daṭṭho.

**Pāpānusāsakoti** pāpakam anusāsako.

**Ahantāranti** apaharantaṃ. **Ahantāranti** amārentaṃ. **Setīti** matasayanaṃ sayati. **Aghātentanti** amārentaṃ. **Suddhassāti** niraparādhassa. **Posassāti** sattassa. **Anaṅgaṇassāti** idampi niraparādhabhāvaññeva sandhāya vuttaṃ. **Paccefīti** kamma sarikkhakaṃ hutvā patieti.

Satthā imaṃ dhammadesanaṃ āharitvā jātakaṃ samodhānesi – “tadā dubbalavejjo devadatto ahosi, paṇḍitadārako pana ahameva ahosi”nti.

Sāliyajātakavaṇṇanā sattamā.

[368] 8. Tacasārajātakavaṇṇanā

**Amittahatthahagatā**ti idaṃ satthā jetavane viharanto paññāpāramiṃ ārabha kathesi. Tadā hi satthā “na, bhikkhave, idāneva, pubbepi tathāgato paññāvā upāyakusaloyevā”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto gāmake kuṭumbikakule nibbattitvāti sabbaṃ purimajātakaniyāmeneva kathetabbaṃ. Idha pana vejje mate gāma vāsino manussā “manussamārakā”ti te dārake kudaṇḍakehi bandhitvā “rañño dassessāmā”ti bārānasiṃ nayiṃsu. Bodhisatto antarāmaggeyeva sesadārakānaṃ ovādaṃ adāsi “tumhe mā bhāyatha, rājānaṃ disvāpi abhītā tuṭṭhındriyā bhavyeyātha, rājā amhehi saddhiṃ paṭhamataraṃ kathessati, tato paṭṭhāya ahaṃ jānissāmi”ti. Te “sādhū”ti sampaṭicchitvā tathā kariṃsu. Rājā te abhīte tuṭṭhındriye disvā “ime ‘manussamārakā’ti kudaṇḍakabaddhā ānītā, evarūpaṃ dukkhaṃ pattāpi na bhāyanti, tuṭṭhındriyāyeva, kiṃ nu kho etesaṃ asocanakāraṇaṃ, pucchissāmi ne”ti pucchanto paṭhamam gāthamāha –

95. “Amittahatthahagatā, tacasārasamappitā;  
Pasannamukhavaṇṇāṭṭha, kasmā tumhe na socathā”ti.

Tattha **amittahatthahagatā**ti kudaṇḍakehi gīvāyaṃ bandhitvā ānentānaṃ amittānaṃ hatthahagatā. **Tacasārasamappitā**ti veḷudaṇḍakehi baddhattā evamāha. **Kasmā**ti “evarūpaṃ byasanaṃ pattāpi tumhe kiṃkāraṇā na socathā”ti pucchati.

Taṃ sutvā bodhisatto sesagāthā abhāsi –

96. “Na socanāya paridevanāya, atthova labbho api appakopi;  
Socantameṇaṃ dukhitaṃ viditvā, paccatthikā attamanā bhavanti.
97. “Yato ca kho paṇḍito āpadāsu, na vedhatī atthavinicchayaññū;  
Paccatthikāssa dukhitā bhavanti, disvā mukhaṃ avikāraṃ purāṇaṃ.
98. “Jappena mantena subhāsitena, anuppadānena paveniyā vā;  
Yathā yathā yattha labhetha atthaṃ, tathā tathā tattha parakkameyya.
99. “Yato ca jāneyya alabbhaneyyo, mayāva aññena vā esa attho;  
Asocamāno adhivāsayeyya, kammaṃ dalhaṃ kinti karomi dānī”ti.

Tattha **atthoti** vuḍḍhi. **Paccatthikā attamanā**ti etaṃ purisaṃ socantaṃ dukkhitaṃ viditvā paccāmittā tuṭṭhacittā honti. Tesam tussanakāraṇaṃ nāma paṇḍitena kātuṃ na vaṭṭatīti dīpeti. **Yatoti** yadā. **Na vedhatī**ti cittutrāsabhayena na kampati. **Atthavinicchayaññū**ti tassa tassa atthassa vinicchayakusalo.

**Jappenā**ti mantaparijappanena. **Mantenā**ti paṇḍitehi saddhiṃ mantaggahaṇena. **Subhāsitenā**ti



piyavacanena. **Anuppadānenāti** lañjadānena. **Paveṇiyāti** kulavaṃsena. Idaṃ vuttaṃ hoti – mahārāja, paṇḍitena nāma āpadāsu uppannāsu na socitabbaṃ na kilamitabbaṃ, imesu pana pañcasu kāraṇesu aññataravasena paccāmittā jinitabbā. Sace hi sakkoti, mantāṃ pariḷappitvā mukhabandhanaṃ katvāpi te jinitabbā, tathā asakkontena paṇḍitehi saddhiṃ mantetvā ekaṃ upāyaṃ sallakkhetvā jinitabbā, piyavacanaṃ vattum sakkontena piyaṃ vatvāpi te jinitabbā, tathā asakkontena vinicchayāmaccānaṃ lañjaṃ datvāpi jinitabbā, tathā asakkontena kulavaṃsaṃ kathetvā “mayāṃ asukapaveṇiyā āgatā, tumhākañca amhākañca ekova pubbapuriso”ti evaṃ vijjamānaññātikotiṃ ghaṭetvāpi jinitabbā evāti. **Yathā yathāti** etesu pañcasu kāraṇesu yena yena kāraṇena yattha yattha attano vuḍḍhiṃ labheyya. **Tathā tathāti** tena tena kāraṇena tattha tattha parakkameyya, parakkamaṃ katvā paccatthike jineyyāti adhippāyo.

**Yato ca jāneyyāti** yadā pana jāneyya, mayā vā aññena vā esa attho alabbhaneyyo nānappakārena vāyamitvāpi na sakkā laddhum, tadā paṇḍito puriso asocamāno akilamamāno “mayā pubbe katakammaṃ daḷhaṃ thiraṃ na sakkā paṭibāhitum, idāni kiṃ sakkā kātu”nti adhivāsayeyyāti.

Rājā bodhisattassa dhammakathaṃ sutvā kammaṃ sodhetvā niddosabhāvaṃ ñatvā kudaṇḍake harāpetvā mahāsattassa mahantaṃ yasaṃ datvā attano atthadhammaanusāsakaṃ amaccarataṃ akāsi, sesadāraṇānampi yasaṃ datvā ṭhānantarāni adāsi.

Satthā imaṃ dhammadešanaṃ āharitvā jātaṃ samodhānesi “tadā bārāṇasirājā ānando ahoṣi, dārakā therānuthera, paṇḍitadārako pana ahameva ahoṣi”nti.

Tacasārajātakavaṇṇanā aṭṭhamā.

[369] 9. Mittavindakajātakavaṇṇanā

**Kyāhaṃ devānamakaranti** idaṃ satthā jetavane viharanto ekaṃ dubbacabhikkhum ārabha katesi. Vatthu **mahāmittavindakajātake** (jā. 1.5.100 ādayo) āvi bhavissati. Ayaṃ pana mittavindako samudde khitto atriccho hutvā purato gantvā nerayikasattānaṃ paccanaṭṭhānaṃ ussadanirayaṃ disvā “ekaṃ nagara”nti saññāya pavisitvā khuracakkaṃ assādesi. Tadā bodhisatto devaputto hutvā ussadanirayacārikaṃ carati. So taṃ disvā pucchanto paṭhamāṃ gāthamāha –

100. “Kyāhaṃ devānamakaraṃ, kiṃ pāpaṃ pakataṃ mayā;  
Yaṃ me sirasmiṃ ohacca, cakkaṃ bhamati matthake”ti.

Tattha **kyāhaṃ devānamakaranti** sāmi devaputta, kiṃ nāma ahaṃ devānaṃ akariṃ, kiṃ maṃ devā pothentīti. **Kiṃ pāpaṃ pakataṃ mayāti** dukkhamahantatāya vedanāppatto attanā kataṃ pāpaṃ asallakkhento evamāha. **Yaṃ meti** yena pāpena mama sirasmiṃ ohacca ohanitvā idaṃ khuracakkaṃ mama matthake bhamati, taṃ kiṃ nāmāti?

Taṃ sutvā bodhisatto dutiyaṃ gāthamāha –

101. “Atikkamma ramaṇakaṃ, sadāmattañca dūbhakaṃ;  
Brahmattarañca pāsādaṃ, kenatthena idhāgato”ti.

Tattha **ramaṇakanti** phalikapāsādaṃ. **Sadāmattanti** rajatapāsādaṃ. **Dūbhakanti** maṇipāsādaṃ. **Brahmattarañca pāsādanti** suvaṇṇapāsādañca. **Kenatthenāti** tvaṃ etesu ramaṇakādīsu catasso aṭṭha soḷasa dvattiṃsāti etā devadhītarō pahāya te pāsāde atikkamitvā kena kāraṇena idha āgatoti.

Tato mittavindako tatiyaṃ gāthamāha –

102. “Ito bahutarā bhogā, atra maññe bhavissare;

Iti etāya saññāya, passa maṃ byasaṇaṃ gata’’nti.

Tattha **ito bahutarā**ti imesu catūsu pāsādesu bhogehi atirekatarā bhavissanti.

Tato bodhisatto sesagāthā abhāsi –

**103.** ‘‘Catubbhi aṭṭhājḥagamā, aṭṭhāhipi ca soḷasa;  
Soḷasāhi ca bāttimsa, atricchaṃ cakkamāsado;  
Icchāhatassa posassa, cakkam bhamati matthake.

**104.** ‘‘Uparivisālā duppūrā, icchā visaṭṭagāminī;  
Ye ca taṃ anugijjhanti, te honti cakkadhārino’’ti.

Tattha **uparivisālā**ti mittavindaka taṇhā nāmesā āseviyamānā uparivisālā hoti patthaṭṭā, mahāsamuddo viya duppūrā, rūpādīsu ārammaṇesu taṃ taṃ ārammaṇaṃ icchamānāya icchāya patthaṭṭāya visaṭṭagāminī, tasmā ye purisā taṃ evarūpaṃ taṇhaṃ anugijjhanti, punappunaṃ giddhā hutvā gaṇhanti. **Te honti cakkadhārinoti** te etaṃ khuracakkaṃ dhārentīti vadati.

Mittavindakaṃ pana kathentameva nipisamānaṃ taṃ khuracakkaṃ bhassi, tena so puna kathetuṃ nāsakkhi. Devaputto attano devaṭṭhānameva gato.

Satthā imaṃ dhammadeṣanaṃ āharitvā jātakaṃ samodhānesi – ‘‘tadā mittavindako dubbacabhikkhu ahoṣi, devaputto pana ahameva ahoṣi’’nti.

Mittavindakajātakavaṇṇanā navamā.

[370] 10. Palāsajātakavaṇṇanā

**Haṃso palāsamavacā**ti idaṃ satthā jetavane viharanto kilesaniggahaṃ ārabba kathesi. Vatthu paññāsajātake āvi bhavissati. Idha pana satthā bhikkhū āmantetvā ‘‘bhikkhave, kilesa nāma āsaṅkitabbova, appamattako samānopi nigrodhagaccho viya vināsaṃ pāpeti, porāṇakapaṇḍitāpi āsaṅkitabbaṃ āsaṅkiṃsuyevā’’ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto suvaṇṇahaṃsayoniyaṃ nibbattitvā vayappatto cittaṃ kūṭapabbate suvaṇṇaguhāyaṃ vasanto himavantapadese jātassare sayamaṃ jātasāliṃ khādītva āgacchati. Tassa gamanāgamanamagge mahāpalāsarukkho ahoṣi. So gacchantopi tattha vissamitvā gacchati, āgacchantopi tattha vissamitvā āgacchati. Athassa tasmim rukkhe nibbattadevatāya saddhiṃ vissāso ahoṣi. Aparabhāge ekā sakuṇikā ekasmim nigrodharukkhe nigrodhapakkaṃ khādītva āgantvā tasmim palāsarukkhe nisīditvā viṭṭapantare vaccaṃ pātesi. Tattha nigrodhagaccho jāto, so caturaṅgulamattakāle rattaṅkurapalāsātāya sobhati. Haṃsarājā taṃ disvā rukkhadavatāṃ āmantetvā ‘‘samma palāsa, nigrodho nāma yamhi rukkhe jāyati, vaḍḍhanto taṃ nāseti, imassa vaḍḍhituṃ mā deti, vimānaṃ te nāsessati, paṭikacceva naṃ uddharitvā chaḍḍehi, āsaṅkitabbayuttakaṃ nāma āsaṅkituṃ vaṭṭati’’ti palāsadevatāya saddhiṃ mantento paṭhamāṃ gāthamāha –

**105.** ‘‘Haṃso palāsamavaca, nigrodho samma jāyati;  
Aṅkasmim te nisinnova, so te mammāni checchatī’’ti.

Paṭhamapādo panettha abhisambuddhena hutvā satthārā vutto. **Palāsanti** palāsadevatāṃ. **Sammāti** vayassa. **Aṅkasminti** viṭṭabhiyaṃ. **So te mammāni checchatī**ti so te aṅke saṃvaḍḍho sapatto viya jīvitaṃ chindissatīti attho. Jīvitasāṅkhārā hi idha ‘‘mammāni’’ti vuttā.

Taṃ sutvā tassa vacanaṃ agaṇhantī palāsadevatā dutiyaṃ gāthamāha –

**106.** “Vaḍḍhatāmeva nigrodho, paṭiṭṭhassa bhavāmaham;  
Yathā pitā ca mātā ca, evaṃ me so bhavissatī”’ti.

Tassattho – samma, na tvaṃ jānāsi vaḍḍhatameva esa, ahamassa yathā bālakāle puttānaṃ māṭāpitaro paṭiṭṭhā honti, tathā bhavissāmi, yathā pana saṃvaḍḍhā puttā pacchā mahallakakāle māṭāpitūnaṃ paṭiṭṭhā honti, mayhampi pacchā mahallakakāle evameva so paṭiṭṭho bhavissatīti.

Tato haṃso tatiyaṃ gāthamāha –

**107.** “Yaṃ tvaṃ aṅkasmim vaḍḍhesi, khīrarukkhaṃ bhayānakaṃ;  
Āmanta kho taṃ gacchāma, vuḍḍhi massa na rucati”’ti.

Tattha **yaṃ tvanti** yasmā tvaṃ etañca bhayaḍāyakattena bhayānakaṃ khīrarukkhaṃ sapattaṃ viya aṅke vaḍḍhesi. **Āmanta kho tanti** tasmā mayam taṃ āmantetvā jānāpetvā gacchāma. **Vuḍḍhi massāti** assa vuḍḍhi mayham na rucati.

Evañca pana vatvā haṃsarājā pakkhe pasāretvā cittakūṭapabbatameva gato. Tato paṭṭhāya puna nāgacchi. Aparabhāge nigrodho vaḍḍhim, tasmim ekā rukkhadavatāpi nibbatti. So vaḍḍhanto palāsaṃ bhañji, sākāhi saddhimyeva devatāya vimānaṃ pati. Sā tasmim kāle haṃsarañño vacanaṃ sallakkhetvā “idaṃ anāgatabhayaṃ disvā haṃsarājā kathesi, aham panassa vacanaṃ nākāsi”’nti paridevamānā catutthaṃ gāthamāha –

**108.** “Idāni kho maṃ bhāyeti, mahānerunidassanaṃ;  
Haṃsassa anabhiññāya, mahā me bhayamāgata”’nti.

Tattha **idāni kho maṃ bhāyeti**ti ayaṃ nigrodho taruṇakāle tosetvā idāni maṃ bhāyāpeti santāseti. **Mahānerunidassanaṃ**ti sinerupabbatasadisam mahantaṃ haṃsarājassa vacanaṃ sutvā ajānitvā taruṇakāleyeva etassa anuddhaṭattā. **Mahā me bhayamāgata**nti idāni mayham mahantaṃ bhayaṃ āgataṃti paridevi.

Nigrodhopi vaḍḍhanto sabbam palāsaṃ bhañjitvā khāṇukamattameva akāsi. Devatāya vimānaṃ sabbam antaradhāyi.

**109.** “Na tassa vuḍḍhi kusalappasatthā, yo vaḍḍhamāno ghasate paṭiṭṭhaṃ;  
Tassūparodhaṃ parisankamāno, patārayī mūlavadhāya dhīro”’ti. –

Pañcamā abhisambuddhagāthā.

Tattha **kusalappasatthā**ti kusalehi pasatthā. **Ghasateti** khādati, vināsetīti attho. **Patārayī**ti patarati vāyamati. Idaṃ vuttaṃ hoti – bhikkhave, yo vaḍḍhamāno attano paṭiṭṭhaṃ nāseti, tassa vuḍḍhi paṇḍītehi na pasatthā, tassa pana abbhantarassa vā bāhirassa vā parissayassa “ito me uparodho bhavissatī”’ti evaṃ uparodhaṃ vināsaṃ parisankamāno vīro ñāṇasampanno mūlavadhāya parakkamatīti.

Satthā imaṃ dhammesanaṃ āharitvā saccāni pakāsetvā jātakaṃ samodhānesi, saccapariyosāne pañcasatā bhikkhū arahattaṃ pāpuṇṇisu. Tadā suvaṇṇahaṃso ahameva ahosinti.

Palāsajātakavaṇṇanā dasamā.

Vaṇṇārohavaggo dutiyo.

### 3. Adḍhavaggo

[371] 1. Dīghītikosalajātakavaṇṇanā

**Evambhūtassa te rājā**ti idaṃ satthā jetavane viharanto kosambake bhaṇḍanakārake ārabba kathesi. Tesañhi jetavanaṃ āgantvā khamāpanakāle satthā te āmantetvā “bhikkhave, tumhe mayhaṃ orasā mukhato jātā puttā nāma, puttehi ca pitarā dinnam ovādam bhindituṃ na vaṭṭati, tumhe pana mama ovādam na karittha, porāṇakapaṇḍitā attano mātāpitaro ghātetvā rajjam gahetvā ṭhitacorepi araññe hatthapathaṃ āgate mātāpitūhi dinnam ovādam na bhindissāmāti na mārayiṃsū”ti vatvā atītaṃ āhari.

Imasmiṃ pana jātake dvepi vatthūni. **Saṅghabhedakakkhandhake** vitthārato āvi bhavissanti. So pana dīghāvukumāro araññe attano añke nipannaṃ bārāṇasirājānaṃ cūḷāya gahetvā “idāni mayhaṃ mātāpitughātakam coraṃ khaṇḍākhaṇḍam katvā chindissāmī”ti asiṃ ukkhipanto tasmiṃ khaṇe mātāpitūhi dinnam ovādam saritvā “jīvitaṃ cajantopi tesam ovādam na bhindissāmi, kevalaṃ imaṃ tajjessāmī”ti cintetvā paṭhamam gāthamāha –

110. “Evambhūtassa te rāja, āgatassa vase mama;  
Atthi nu koci pariyāyo, yo taṃ dukkhā pamocaye”ti.

Tattha **vase mamāti** mama vasaṃ āgatassa. **Pariyāyoti** kāraṇam.

Tato rājā dutiyaṃ gāthamāha –

111. “Evambhūtassa me tāta, āgatassa vase tava;  
Natthi no koci pariyāyo, yo maṃ dukkhā pamocaye”ti.

Tattha **noti** nipātamattaṃ, natthi koci pariyāyo, yo maṃ etasmā dukkhā pamocayeti attho.

Tato bodhisatto avasesagāthā abhāsi –

112. “Nāññaṃ sucaritaṃ rāja, nāññaṃ rāja subhāsitaṃ;  
Tāyate maraṇakāle, evamevitarāṃ dhanam.

113. “Akkocchi maṃ avadhi maṃ, ajini maṃ ahāsi me;  
Ye ca taṃ upanayhanti, veraṃ tesam na sammāti.

114. “Akkocchi maṃ avadhi maṃ, ajini maṃ ahāsi me;  
Ye ca taṃ nupanayhanti, veraṃ tesūpasammāti.

115. “Na hi verena verāni, sammantīdha kudācanaṃ;  
Averena ca sammanti, esa dhammo sanantano”nti.

Tattha **nāññaṃ sucaritanti** nāññaṃ sucaritā, ayameva vā pāṭho, ṭhapetvā sucaritaṃ aññaṃ na passāmīti attho. Idha “sucarita”ntipi “subhāsita”ntipi mātāpitūhi dinnam ovādamyeva sandhāyāha. **Evamevāti** niratthakameva. Idaṃ vuttaṃ hoti – mahārāja, aññatra ovādānusiṭṭhisāṅkhātā sucaritasubhāsītā maraṇakāle tāyituṃ rakkhituṃ samattho nāma añño natthi, yaṃ etaṃ itaraṃ dhanam, taṃ evameva niratthakameva hoti, tvañhi idāni mayhaṃ koṭisatasahassamattampi dhanam dadanto jīvitaṃ na labheyyāsi, tasmā veditabbametaṃ “dhanato sucaritasubhāsitameva uttaritara”nti.

Sesagāthāsupi ayaṃ saṅkhepattho – mahārāja, ye purisā “ayaṃ maṃ akkosi, ayaṃ maṃ pahari, ayaṃ maṃ ajini, ayaṃ mama santakam ahāsi”ti evaṃ veraṃ upanayhanti bandhitvā viya hadaye ṭhapenti, tesam veraṃ na upasammāti. Ye ca panetaṃ na upanayhanti hadaye na ṭhapenti, tesam vūpasammāti. Verāni hi na kadāci verena sammanti, avereneva pana sammanti. **Esa dhammo**

**sanantanoti** eso porāṇako dhammo cirakālapavatto sabhāvoti.

Evañca pana vatvā bodhisatto “ahaṃ, mahārāja, tayi na dubbhāmi, tvaṃ pana maṃ mārehi” ti tassa hatthe asiṃ ṭhapesi. Rājāpi “nāhaṃ tayi dubbhāmi” ti sapaṭhaṃ katvā tena saddhiṃ nagaraṃ gantvā taṃ amaccānaṃ dassetvā “ayaṃ, bhaṇe, kosalarañño putto dīghāvukumāro nāma, iminā mayhaṃ jīvitaṃ dinnāṃ, na labbhā imaṃ kiñci kātu” nti vatvā attano dhītaraṃ datvā pitu santake rajje patiṭṭhapesi. Tato paṭṭhāya ubhopi samaggā sammodamānā rajjaṃ kāresuṃ.

Satthā imaṃ dhammadesanaṃ āharitvā jātaṃ samodhānesi – “tadā mātāpitāro mahārājakulāni ahesuṃ, dīghāvukumāro pana ahameva ahosi” nti.

Dīghītikosalajātakavaṇṇanā paṭhamā.

[372] 2. Migapotakajātakavaṇṇanā

**Agārā paccupetassāti** idaṃ satthā jetavane viharanto ekaṃ mahallakaṃ ārabba kathesi. So kirekaṃ dārakaṃ pabbājesi. Sāmaṇero taṃ sakkaccaṃ upaṭṭhahitvā aparabhāge aphāsukena kālamakāsi. Tassa kālakiriyāya mahallako sokābhibhūto mahantena saddena paridevanto vicari. Bhikkhū saññāpetuṃ asakkontā dhammasabhāyaṃ kathaṃ samuṭṭhāpesuṃ “āvuso, asuko nāma mahallako sāmaṇerassa kālakiriyāya paridevanto vicarati, maraṇassatibhāvanāya paribāhiro eso bhavissati” ti. Satthā āgantvā “kāya nuttha, bhikkhave, etarahi kathāya sannisinnā” ti pucchitvā “imāya nāmā” ti vutte “na, bhikkhave, idāneva, pubbepesa etasmiṃ mate paridevanto vicari” ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto sakkattaṃ kāresi. Tadā eko kāsiraṭṭhavāsī brāhmaṇo himavantaṃ pavisitvā isipabbajjaṃ pabbajitvā phalāphalehi yāpesi. So ekadivasam araññe ekaṃ matamātikaṃ migapotakaṃ disvā assamaṃ ānetvā gocaraṃ datvā posesi. Migapotako vaḍḍhanto abhirūpo ahosi sobhaggappatto. Tāpaso taṃ attano puttakaṃ katvā pariharati. Ekadivasam migapotako bahuṃ tiṇaṃ khādītva ajīrakena kālamakāsi. Tāpaso “putto me mato” ti paridevanto vicarati. Tadā sakko devarājā lokaṃ pariggaṇhanto taṃ tāpasaṃ disvā “saṃvejessāmi na” nti āgantvā ākāse ṭhito paṭthamaṃ gāthamāha –

116. “Agārā paccupetassa, anagārassa te sato;  
Samaṇassa na taṃ sādhu, yaṃ petamanusocasi” ti.

Taṃ sutvā tāpaso dutiyaṃ gāthamāha –

117. “Saṃvāsena have sakka, manussassa migassa vā;  
Hadaye jāyate pemaṃ, na taṃ sakkā asocitu” nti.

Tattha **na taṃ sakkāti** taṃ manussaṃ vā tiracchānaṃ vā na sakkā asocituṃ, socāmiyevāhanti.

Tato sakko dve gāthā abhāsi –

118. “Mataṃ marissaṃ rodanti, ye rudanti lapanti ca;  
Tasmā tvaṃ isi mā rodi, roditaṃ moghamāhu santo.

119. “Roditena have brahme, mato peto samuṭṭhahe;  
Sabbe saṅgamma rodāma, aññamaññassa ñātake” ti.

Tattha **marissanti** yo idāni marissati, taṃ. **Lapanti cāti** vilapanti ca. Idaṃ vuttaṃ hoti – ye loke matañca marissantañca rodanti, te rudanti ceva vilapanti ca, tesam assupacchijjanadivaso nāma natthi. Kimkāraṇā? Sadāpi matānañca marissantānañca atthitāya. **Tasmā tvaṃ isi mā rodi.** Kimkāraṇā?

**Roditaṃ moghamāhu santoti**, buddhādayo pana paṇḍitā roditaṃ “mogha”nti vadanti. **Mato petoti** yo esa mato petoti vuccati, yadi so roditena samuṭṭhaheyya, evaṃ sante kiṃ nikkammā acchāma, sabbeva samāgama aññaṃaññaṃ nātake rodāma. Yasmā pana te roditakāraṇā na uṭṭhahanti, tasmā roditassa moghabhāvaṃ sādheti.

Evam sakkassa kathentassa tāpaso “niratthakaṃ rodita”nti sallakkhetvā sakkassa thutiṃ karonto tisso gāthā abhāsi –

120. “Ādittaṃ vata maṃ santaṃ, ghasattaṃva pāvakaṃ;  
Vāriṇā viya osiṇcaṃ, sabbam nibbāpaye daram.

121. “Abbahi vata me sallaṃ, yamāsi hadayassitaṃ;  
Yo me sokaparetassa, puttasokaṃ apānudi.

122. “Sohaṃ abbūḷhasallosmi, vītasoko anāvilo;  
Na socāmi na rodāmi, tava sutvāna vāsavā”ti.

Tattha **yamāsīti** yaṃ me āsi. **Hadayassitanti** hadaye nissitaṃ. **Apānudīti** nīhari. Sakko tāpasassa ovādaṃ datvā sakaṭṭhānameva gato.

Satthā idhaṃ dhammadesanaṃ āharitvā jātakam samodhānesi – “tadā tāpaso mahallako ahosi, migo sāmaṇero, sakko pana ahameva ahosi”nti.

Migapotakajātakavaṇṇanā dutiyā.

[373] 3. Mūsikajātakavaṇṇanā

**Kuhiṃ gatā kattha gatāti** idaṃ satthā veḷuvane viharanto ajātasattaṃ ārabha kathesi. Vatthu heṭṭhā **thusajātake** (jā. 1.4.149 ādayo) vitthāritameva. Idhāpi satthā tatheva rājānaṃ sakiṃ puttena saddhiṃ kīḷamānaṃ sakiṃ dhammaṃ suṇantaṃ disvā “taṃ nissāya rañño bhayaṃ uppajjissatī”ti ṇatvā “mahārāja, porāṇakarājāno āsaṅkitabbaṃ āsaṅkitvā attano puttaṃ ‘amhākaṃ dhūmakāle rajjaṃ kāretū”ti ekamante akaṃsū”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto takkasilāyaṃ brāhmaṇakule nibbattitvā disāpāmokkhācariyo ahosi. Tassa santike bārānasirañño putto yavakumāro nāma sabbasippāni uggaṇhitvā anuyogaṃ datvā gantukāmo taṃ āpucchī. Ācariyo “puttaṃ nissāya tassa antarāyo bhavissatī”ti aṅgavijjāvasena ṇatvā “etamassa harissāmī”ti ekaṃ upamaṃ upadhāretuṃ ārabhi. Tadā panassa eko asso ahosi, tassa pāde vaṇo uṭṭhahi, taṃ vaṇānurakkhaṇatthaṃ geheyyeva kariṃsu. Tassāvidūre eko udapāno atthi. Athekā mūsikā gehā nikkhamitvā assassa pāde vaṇaṃ khādati, asso vāretuṃ na sakkoti. So ekadivasaṃ vedanaṃ adhivāsetuṃ asakkonto mūsikaṃ khādituṃ āgataṃ pādena paharitvā māretvā udapāne pātesi. Assagopakā mūsikaṃ apassantā “aññesu divasesu mūsikā āgantvā vaṇaṃ khādati, idāni na paññāyati, kahaṃ nu kho gatā”ti vadīṃsu.

Bodhisatto taṃ kāraṇaṃ paccakkhaṃ katvā “aññe ajānantā ‘kahaṃ mūsikā gatā’ti vadanti, mūsikāya pana māretvā udapāne khittabhāvaṃ ahameva jānāmī”ti idameva kāraṇaṃ upamaṃ katvā paṭhamaṃ gāthaṃ bandhitvā rājakumārassa adāsi. So aparaṃ upamaṃ upadhārento tameva assaṃ paruḷhavaṇaṃ nikkhamitvā ekaṃ yavavatthuṃ gantvā “yavaṃ khādissāmī”ti vaticchiddena mukhaṃ pavesentaṃ disvā tameva kāraṇaṃ upamaṃ katvā dutiyaṃ gāthaṃ bandhitvā tassa adāsi. Tatiyagāthaṃ pana attano paññābaleneva bandhitvā tampi tassa datvā “tāta, tvaṃ rajje patiṭṭhāya sāyaṃ nhānapokkharāṇiṃ gacchanto yāva dhurasopānā paṭhamaṃ gāthaṃ sajjhāyanto gaccheyyāsi, tava nivasanapāsādaṃ pavisanto yāva sopānapādamaṃ dutiyaṃ gāthaṃ sajjhāyanto gaccheyyāsi, tato yāva sopānamatthakā tatiyaṃ gāthaṃ sajjhāyanto gaccheyyāsi”ti vatvā pesesi.

So kumāro gantvā uparājā hutvā pitu accayena rajjam kāresi, tasseko putto jāyi. So soḷasavassakāle rajjalobhena “pitarāṃ māressāmī”ti cintevā upaṭṭhāke āha “mayhaṃ pitā taruṇo, ahaṃ etassa dhūmakālaṃ olokeno mahallako bhavissāmi jarājīṇṇo, tādise kāle laddhenapi rajjena ko attho”ti. Te āhaṃsu “deva, na sakkā paccantaṃ gantvā corattaṃ kātuṃ, tava pitarāṃ kenaci upāyena māretvā rajjam gaṇhā”ti. So “sādhū”ti antonivesane rañño sāyaṃ nhānapokkharāṇīsamīpaṃ gantvā “ettha naṃ māressāmī”ti khaggaṃ gahetvā aṭṭhāsi. Rājā sāyaṃ mūsikaṃ nāma dāsīṃ “gantvā pokkharāṇīpiṭṭhiṃ sodhetvā ehi, nhāyissāmī”ti pesesi. Sā gantvā pokkharāṇīpiṭṭhiṃ sodhentī kumāraṃ passi. Kumāro attano kammaṃ pākāṭabhāvabhayaena taṃ dvidhā chinditvā pokkharāṇīyaṃ pātesi. Rājā nhāyitūṃ agamāsi. Sesajano “ajjāpi mūsikā dāsī na punāgacchati, kuhiṃ gatā kattha gatā”ti āha. Rājā –

- 123.** “Kuhiṃ gatā kattha gatā, iti lālappatī jano;  
Ahameveko jānāmi, udapāne mūsikā hatā”ti. –

Paṭhamaṃ gāthaṃ bhaṇanto pokkharāṇītīraṃ agamāsi.

Tattha **kuhiṃ gatā kattha gatā**ti aññamaññavevacanāni. **Iti lālappatī**ti evaṃ vippalapati. Iti ayaṃ gāthā “ajānanto jano mūsikā dāsī kuhiṃ gatāti vippalapati, rājakumārena dvidhā chinditvā mūsikāya pokkharāṇīyaṃ pātītabhāvaṃ ahameva eko jānāmi”ti rañño ajānantasseva imamatthaṃ dīpeti.

Kumāro “mayā katakammaṃ mayhaṃ pitarā nāta”nti bhīto palāyitvā tamatthaṃ upaṭṭhākānaṃ ārocesi. Te sattaṭṭhadivasaccayena puna taṃ āhaṃsu “deva, sace rājā jāneyya, na tuṅhī bhaveyya, takkagāhena pana tena taṃ vuttaṃ bhavissati, mārehi na”nti. So punekadivasam khaggahattho sopānapādamūle ṭhatvā rañño āgamanakāle ito cito ca paharaṇokāsaṃ olokesi. Rājā –

- 124.** “Yañcetaṃ iti cīti ca, gadrabhova nivattasi;  
Udapāne mūsikaṃ hantvā, yavaṃ bhakkhetumicchasi”ti. –

Dutiyam gāthaṃ sajjhāyanto agamāsi. Ayampi gāthā “yasmā tvaṃ iti cīti ca ito cito ca paharaṇokāsaṃ olokeno gadrabhova nivattasi, tasmā taṃ jānāmi ‘purimadivase pokkharāṇīyaṃ mūsikaṃ dāsīṃ hantvā ajja maṃ yavarājānaṃ bhakkhetuṃ māretuṃ icchasi”ti rañño ajānantasseva imamatthaṃ dīpeti.

Kumāro “diṭṭhomhi pitarā”ti utraṃ palāyi. So puna aḍḍhamāsamattaṃ atikkamitvā “rājānaṃ dabbīyā paharitvā māressāmī”ti ekaṃ dīghadaṇḍakaṃ dabbīpaharaṇaṃ gahetvā olumbitvā aṭṭhāsi. Rājā –

- 125.** “Daharo cāsi dummedha, paṭhamuppattiko susu;  
Dīghañcetaṃ samāsajja, na te dassāmi jīvita”nti. –

Tatīyam gāthaṃ sajjhāyanto sopānapādamatthakaṃ abhiruhi.

Tattha **paṭhamuppattikoti** paṭhamavayena uppattito upeto, paṭhamavaye ṭhitoti attho. **Susūti** taruṇo. **Dīghanti** dīghadaṇḍakaṃ dabbīpaharaṇaṃ. **Samāsajjāti** gahetvā, olumbitvā ṭhitoṣīti attho. Ayampi gāthā “dummedha, attano vayaṃ paribhuñjitūṃ na labhissasi, na te dāni nillajjassa jīvitaṃ dassāmi, māretvā khaṇḍākhaṇḍaṃ chinditvā sūleyeva āvuṇāpessāmī”ti rañño ajānantasseva kumāraṃ santajjayamānā imamatthaṃ dīpeti.

So taṃ divasaṃ palāyitūṃ asakkonto “jīvitaṃ me dehi, devā”ti rañño pādamūle nipajji. Rājā taṃ tajjetvā saṅkhalikāhi bandhāpetvā bandhanāgāre kāretvā setacchattassa heṭṭhā alaṅkatarājāsane nisīditvā “amhākaṃ ācariyo disāpāmokkho brāhmaṇo imaṃ mayhaṃ antarāyaṃ disvā imā tisso gāthā abhāsi”ti haṭṭhatuṭṭho udānaṃ udānento sesagāthā abhāsi –

126. “Nāntalikkhabhavanena, nāṅgaputtapinenena vā;  
Puttena hi patthayito, silokehi pamocito.

127. “Sabbam sutamadhīyetha, hīnamukkaṭṭhamajjhimam;  
Sabbassa attham jāneyya, na ca sabbam payojaye;  
Hoti tādisako kālo, yattha atthāvaham suta”nti.

Tattha **nāntalikkhabhavanenā**ti antalikkhabhavanam vuccati dibbavimānam, aham ajja antalikkhabhavanampi na āruḷho, tasmā antalikkhabhavanenāpi ajja maraṇato na pamocito. **Nāṅgaputtapinenena vā**ti aṅgasarikkhakena vā puttapinenapi na pamocito. **Puttena hi patthayitoti** aham pana attano putteneva ajja māretum patthito. **Silokehi pamocitoti** soham ācariyena bandhitvā dinnāhi gāthāhi pamocito.

**Sutanti** pariyattim. **Adhīyethā**ti gaṇheyya sikkheyya. **Hīnamukkaṭṭhamajjhimanti** hīnam vā hotu uttamam vā majjhimam vā, sabbam adhīyitabbamevāti dīpeti. **Na ca sabbam payojayeti** hīnam mantam vā sippam vā majjhimam vā na payojaye, uttamameva payojayeyyāti attho. **Yattha atthāvaham sutanti** yasmim kāle mahosadhapaṇḍitassa kumbhakārakammakaraṇam viya yaṃkiñci sikkhitasippam atthāvaham hoti, tādisopi kālo hotiyevāti attho. Aparabhāge rañño accayena kumāro rajje patiṭṭhāsi.

Satthā imam dhammadesanam āharitvā jātakam samodhānesi – “tadā disāpāmokkho ācariyo ahameva aho”nti.

Mūsikajātakavaṇṇanā tatiyā.

[374] 4. Cūḷadhanuggahajātakavaṇṇanā

**Sabbam bhaṇḍanti** idam satthā jetavane viharanto purāṇadutiyaikāpalobhanam ārabha kathesi. Tena bhikkhunā “purāṇadutiyaikā maṃ, bhante, ukkaṇṭhāpeti”ti vutte satthā “esā bhikkhu, itthi na idāneva tuyham anattakārikā, pubbepe te etaṃ nissāya asinā sīsam chinna”nti vatvā bhikkhūhi yācito atītam āhari.

Atīte bārāṇasiyam brahmadatte rajjam kārente bodhisatto sakkattam kāresi. Tadā eko bārāṇasivāsī brāhmaṇamaṇavo takkasīlāyam sabbasippāni uggaṇhitvā dhanukamme nipphattim patto cūḷadhanuggahapaṇḍito nāma aho. Athassa ācariyo “ayam mayā sadisaṃ sippam uggaṇhi”ti attano dhītarāṃ adāsi. So tam gahetvā “bārāṇasiṃ gamissāmi”ti maggam paṭipajji. Antarāmagge eko vāraṇo ekaṃ padesam suññamakāsi, tam ṭhānam abhiruhitum na koci ussahi. Cūḷadhanuggahapaṇḍito manussānam varentānaññeva bhariyam gahetvā aṭavimukham abhiruhi. Athassa aṭavimajjhe vāraṇo utṭhahi, so tam kumbhe sarena vijjhi. Saro vinivijjhitvā pacchābhāgena nikkhami. Vāraṇo tattveva pati, dhanuggahapaṇḍito tam ṭhānam khemaṃ katvā purato aññaṃ aṭaviṃ pāpuṇi. Tatthāpi paññāsa corā maggam hananti. Tampi so manussehi vāriyamāno abhiruyha tesam corānam mige vadhitvā maggasaṃpe maṃsam pacitvā khādantānam ṭhitaṭṭhānam pāpuṇi.

Tadā tam corā alaṅkatapaṭiyattāya bhariyāya saddhim āgacchantam disvā “gaṇhissāma na”nti ussāham karimṣu. Coraṇṭṭhako purisalakkhaṇakusalo, so tam oloketvā “uttamapuriso aya”nti ṇatvā ekassapi utṭhahitum nādāsi. Dhanuggahapaṇḍito “gaccha ‘amhākampi ekaṃ maṃsasūlam dethā’ti vatvā maṃsam āharā”ti tesam santikaṃ bhariyam pesesi. Sā gantvā “ekaṃ kira maṃsasūlam dethā”ti āha. Coraṇṭṭhako “anaggho puriso”ti maṃsasūlam dāpesi. Corā “amhehi kira pakkam khādita”nti apakkamaṃsasūlam adamsu. Dhanuggaho attānam sambhāvetvā “mayham apakkamaṃsasūlam dadanti”ti corānam kujjhi. Corā “kiṃ ayameveko puriso, mayam itthiyo”ti kujjhitvā utṭhahimṣu. Dhanuggaho ekūnapaññāsa jane ekūnapaññāsakaṇḍehi vijjhitvā pātesi. Coraṇṭṭhakaṃ vijjhitum kaṇḍam nāhosi. Tassa kira kaṇḍanāliyam samapaṇṇāsayaeva kaṇḍāni. Tesu ekena vāraṇam vijjhi, ekūnapaññāsakaṇḍehi core vijjhitvā coraṇṭṭhakaṃ pātetvā tassa ure nisanno “sīsamassa chindissāmi”ti



bharyāya hatthato asim āharāpesi. Sā taṅkhaṇaññaeva corajeṭṭhake lobhaṃ katvā corassa hatthe tharuṃ, sāmikassa hatthe dhāraṃ ṭhapesi. Coro tharudaṇḍaṃ parāmasitvā asim nīharitvā dhanuggahassa sīsaṃ chindī.

So taṃ ghātetvā itthim ādāya gacchanto jātigottaṃ pucchi. Sā “takkaṣilāyaṃ disāpāmokkhācariyassa dhītāmhī”ti āha. “Kathaṃ tvaṃ iminā laddhā”ti. Mayhaṃ pitā “ayaṃ mayā sadisaṃ katvā sippaṃ sikkhī”ti tussitvā imassa maṃ adāsi, sāhaṃ tayi sinehaṃ katvā attano kuladattiyaṃ sāmikaṃ mārāpesinti. Corajeṭṭhako “kuladattiyaṃ tāvesā sāmikaṃ māresi, aññaṃ panaṃkaṃ disvā mampi evamevaṃ karissati, imaṃ chaḍḍetuṃ vaṭṭati”ti cintetvā gacchanto antarāmagge ekaṃ kunnadiṃ uttānataṃ taṅkhaṇodakapūraṃ disvā “bhadda, imissaṃ nadiyaṃ susumārā kakkhaḷā, kiṃ karomā”ti āha. “Sāmi, sabbhaṃ ābharaṇabhaṇḍaṃ mama uttarāsāṅgena bhaṇḍikaṃ katvā paratīraṃ netvā puna āgantvā maṃ gahetvā gacchā”ti. So “sādhū”ti sabbhaṃ ābharaṇabhaṇḍaṃ ādāya nadiṃ otarivā taranto viya paratīraṃ patvā taṃ chaḍḍetvā pāyāsi. Sā taṃ disvā “sāmi, kiṃ maṃ chaḍḍetvā viya gacchasi, kasmā evaṃ karosi, ehi mampi ādāya gacchā”ti tena saddhiṃ sallapantī paṭhamāṃ gāthamāha –

128. “Sabbhaṃ bhaṇḍaṃ samādāya, pāraṃ tiṇṇosi brāhmaṇa;  
Paccāgaccha lahuṃ khippaṃ, mampi tārehi dānito”ti.

Tattha **lahuṃ khippanti** lahuṃ paccāgaccha, khippaṃ mampi tārehi dāni itoti attho.

Coro taṃ sutvā paratīre ṭhitoyeva dutiyaṃ gāthamāha –

129. “Asanthutaṃ maṃ cirasanthutena, nimīni bhotī adhuvaṃ dhuvena;  
Mayāpi bhotī nimineyya aññaṃ, ito ahaṃ dūratarāṃ gamissa”nti.

Sā heṭṭhā vuttatthāyeva –

Coro pana “ito ahaṃ dūratarāṃ gamissaṃ, tiṭṭha tva”nti vatvā tassā viravantiyāva ābharaṇabhaṇḍikaṃ ādāya palāto. Tato sā bālā atricchatāya evarūpaṃ byasaṃ pattā anāthā hutvā avidūre ekaṃ eḷagalāgumbaṃ upagantvā rodamānā nisīdī. Tasmim khaṇe sakko devarājā lokaṃ olokento taṃ atricchatāhataṃ sāmikā ca jārā ca parihīnaṃ rodamānaṃ disvā “etaṃ niggaṇhitvā lajjāpetvā āgamissāmi”ti mātaliṅca pañcasikhaṅca ādāya tattha gantvā nadītīre ṭhatvā “mātali, tvaṃ maccho bhava, pañcasikha tvaṃ sakuṇo bhava, ahaṃ pana siṅgālo hutvā mukhena maṃsapiṇḍaṃ gahetvā etissā sammukhaṭṭhānaṃ gamissāmi, tvaṃ mayi tattha gate udakato ullaṅghitvā mama purato pata, athāhaṃ mukhena gahitamāṃsapiṇḍaṃ chaḍḍetvā macchaṃ gahetuṃ pakkhandissāmi, tasmim khaṇe tvaṃ, pañcasikha, taṃ maṃsapiṇḍaṃ gahetvā ākāse uppata, tvaṃ mātali, udake patā”ti añāpesi. “Sādhū, devā”ti, mātali, maccho ahoṣi, pañcasikho sakuṇo ahoṣi. Sakko siṅgālo hutvā maṃsapiṇḍaṃ mukhenādāya tassā sammukhaṭṭhānaṃ agamāsi. Maccho udakā uppatitvā siṅgālassa purato pati. So mukhena gahitamāṃsapiṇḍaṃ chaḍḍetvā macchassatthāya pakkhandi. Maccho uppatitvā udake pati, sakuṇo maṃsapiṇḍaṃ gahetvā ākāse uppata, siṅgālo ubhopi alabhitvā eḷagalāgumbaṃ olokento dummukho nisīdī. Sā taṃ disvā “ayaṃ atricchatāhato neva maṃsaṃ, na macchaṃ labhī”ti kuṭaṃ bhindantī viya mahāhasitaṃ hasi. Taṃ sutvā siṅgālo tatiyaṃ gāthamāha –

130. “Kāyaṃ eḷagalāgumbe, karoti ahuhāsiyaṃ;  
Nayīdha naccagītaṃ vā, tāḷaṃ vā susamāhitaṃ;  
Anamhikāle susoṇi, kinnu jagghasi sobhane”ti.

Tattha **kāyanti** kā ayaṃ. **Eḷagalāgumbeti** kambojigumbe. **Ahuhāsiyanti** dantavidamaṃsakam mahāhasitaṃ vuccati, taṃ kā eṣā etasmim gumbe karotīti pucchati. **Nayīdha naccagītaṃ vāti** imasmim ṭhāne kassaci naccantassa naccam vā gāyantassa gītaṃ vā hatthe susamāhite katvā vādentassa

susamāhitaṃ hatthatālaṃ vā natthi, kaṃ disvā tvaṃ haseyyāsīti dīpeti. **Anamhikā**leti rodanakāle. **Susoṇī**ti sundarasoṇi. **Kim nu jagghasī**ti kena kāraṇena tvaṃ rodituṃ yuttakāle arodamānāva mahāhasitaṃ hasasi. **Sobhaneti** taṃ pasamsanto ālapati.

Taṃ sutvā sā catutthaṃ gāthamāha –

**131.** “Siṅgāla bāla dummedha, appapaññosi jambuka;  
Jīno macchañca pesiñca, kapaṇo viya jhāyasi”’ti.

Tattha **jīnoti** jānippatto hutvā. **Pesinti** maṃsapesiṃ. **Kapaṇo viya jhāyasī**ti sahassabhaṇḍikaṃ parājito kapaṇo viya jhāyasi socasi cintesi.

Tato siṅgālo pañcamaṃ gāthamāha –

**132.** “Sudassaṃ vajjamaññesaṃ, attano pana duddasaṃ;  
Jīnā patiñca jārañca, maññe tvaññeva jhāyasi”’ti.

Tattha **tvaññeva jhāyasī**ti pāpadhamme dussīle ahaṃ tāva mama gocaraṃ na labhissāmi, tvaṃ pana atricchatāya hatā taṃmuhuttadiṭṭhake core paṭibaddhacittā hutvā tañca jāraṃ kuladattiyañca patiṃ jīnā, maṃ upādāya sataguṇena sahassaguṇena kapaṇatarā hutvā jhāyasi rodasi paridevasīti lajjāpetvā vippakāraṃ pāpento mahāsatto evamāha.

Sā tassa vacanaṃ sutvā gāthamāha –

**133.** “Evametaṃ migarāja, yathā bhāsasi jambuka;  
Sā nūnāhaṃ ito gantvā, bhattu hessaṃ vasānugā”’ti.

Tattha **nūnā**ti ekamsatthe nipāto. Sā ahaṃ ito gantvā puna aññaṃ bhattāraṃ labhitvā ekamseneva tassa bhattu vasānugā vasavattinī bhavissāmīti.

Athassā anācārāya dussīlāya vacanaṃ sutvā sakko devarājā osānagāthamāha –

**134.** “Yo hare mattikaṃ thālaṃ, kaṃsathālampi so hare;  
Kataṃyeva tayā pāpaṃ, punapevaṃ karissasī”’ti.

Tassattho – anācāre kiṃ kathesi, yo mattikaṃ thālaṃ harati, suvaṇṇathālarajatathālādippabhedam kaṃsathālampi so harateva, idañca tayā pāpaṃ katameva, na sakkā tava saddhātuṃ, sā tvaṃ punapi evaṃ karissasiyevāti. Evaṃ so taṃ lajjāpetvā vippakāraṃ pāpetvā sakaṭṭhānameva agamāsī.

Satthā imaṃ dhammadezanaṃ āharitvā saccāni pakāsetvā jātaṃ samodhānesi, saccapariyosāne ukkaṇṭhitabhikkhu sotāpattiphale patiṭṭhahi.

Tadā dhanuggaho ukkaṇṭhitabhikkhu ahosi, sā itthī purāṇadutiyikā, sakko devarājā pana ahameva ahosinti.

Cūladhanuggahajātakavaṇṇanā catutthā.

[375] 5. Kapotajātakavaṇṇanā

**Idāni khomhī**ti idaṃ satthā jetavane viharanto ekaṃ lolabhikkhuṃ ārabha kathesi. Lolavatthu anekaso vitthāritameva. Taṃ pana satthā “saccaṃ kira tvaṃ bhikkhu, lolo”’ti pucchitvā “āma, bhante”’ti vutte “na kho bhikkhu idāneva, pubbepi tvaṃ lolosi, lolatāya pana jīvitakkhayaṃ patto”’ti

vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto pārāvatayoniyaṃ nibbattivā bārāṇasiṣeṭṭhino mahānase nīlapacchiyaṃ vasati. Atheko kāko macchamaṃsaluddho tena saddhiṃ mettīṃ katvā tattheva vasi. So ekadivasaṃ bahuṃ macchamaṃsaṃ disvā “imaṃ khādissāmi”ti nitthunanto nīlapacchiyaṃyeva nipajjitvā pārāvataena “ehi, samma, gocarāya gamissāma”ti vuccamānopi “ajīrakena nipannomhi, gaccha tva”nti vatvā tasmiṃ gate “gato me paccāmittakaṇṭako, idāni yathārucci macchamaṃsaṃ khādissāmi”ti cintento paṭhamaṃ gāthamāha –

**135.** “Idāni khomhi sukhito arogo, nikkāṇṭako nippatito kapoto;  
Kāhāmi dānī hadayassa tuṭṭhiṃ, tathā hi maṃ maṃsasākaṃ baletī”ti.

Tattha **nippatitoti** niggato. **Kapototi** pārāvato. **Kāhāmi dānī**ti karissāmi dāni. **Tathā hi maṃ maṃsasākaṃ baletī**ti tathā hi maṃsaṅca avasesaṃ sākaṅca mayhaṃ balaṃ karoti, uṭṭhehi khādāti vadamānaṃ viya ussāhaṃ mamaṃ karotīti attho.

So bhattakārake macchamaṃsaṃ pacitvā mahānasā nikkhamma sarīrato sedaṃ pavāhente pacchito nikkhamitvā rasakaroṭiyaṃ nīlyitvā “kiri kirī”ti saddamakāsi. Bhattakārake vegenāgantvā kākaṃ gahetvā sabbapattāni luṅṅitvā allasiṅṅiveraṅca siddhatthake ca pisitvā lasuṇaṃ pūtitakkena madditvā sakalasarīraṃ makkhetvā ekaṃ kaṭhalaṃ ghaṃsitvā vijjhivā suttakena tassa gīvāyaṃ bandhitvā nīlapacchiyaṃyeva taṃ pakkhipitvā agamāsi. Pārāvato āgantvā taṃ disvā “kā esā balākā mama sahāyassa pacchiyaṃ nipannā, caṇḍo hi so āgantvā ghāteyyāpi na”nti parihāsaṃ karonto dutiyaṃ gāthamāha –

**136.** “Kāyaṃ balākā sikhinī, corī laṅghipitāmahā;  
Oraṃ balāke āgaccha, caṇḍo me vāyaso sakhā”ti.

Sā heṭṭhā (jā. aṭṭha. 2.3.70) vuttatthāyeva.

Taṃ sutvā kāko tatiyaṃ gāthamāha –

**137.** “Alañhi te jagghitāye, mamaṃ disvāna edisaṃ;  
Vilūnaṃ sūdaputtana, piṭṭhamaṇḍena makkhita”nti.

Tattha **alanti** paṭisedhatthe nipāto. **Jagghitāyeti** hasitūṃ. Idaṃ vuttaṃ hoti – idāni maṃ edisaṃ evaṃ dukkhappattaṃ disvā tava alaṃ hasitūṃ, mā edise kāle parihāsakeḷiṃ karohīti.

So parihāsakeḷiṃ karontova puna catutthaṃ gāthamāha –

**138.** “Sunhāto suvilittosi, annapānena tappito;  
Kaṇṭhe ca te veḷuriyo, agamā nu kajaṅgala”nti.

Tattha **kaṇṭhe ca te veḷuriyoti** ayaṃ te veḷuriyamaṇipi kaṇṭhe piḷandho, tvamaṃ ettakaṃ kālaṃ ambhākaṃ etaṃ na dassesīti kapālaṃ sandhāyevamāha. **Kajaṅgalanti** idha bārāṇasiyeva “kajaṅgalā”ti adhippetā. Ito nikkhamitvā kacci antonagaraṃ gatosīti pucchati.

Tato kāko pañcamaṃ gāthamāha –

**139.** “Mā te mitto amitto vā, agamāsi kajaṅgalaṃ;  
Piñchāni tattha lāyitvā, kaṇṭhe bandhanti vaṭṭana”nti.

Tattha **piñchānī**ti pattāni. **Tattha lāyivā**ti tasmim̄ bārāṇasinagare luñcitvā. **Vatṭananti** kaṭhalikaṃ.

Taṃ sutvā pārāvato osānagāthamāha –

**140.** “Punapāpajjasī samma, sīlañhi tava tādisaṃ;  
Na hi mānusakā bhogā, subhuñjā honti pakkhinā”ti.

Tattha **punapāpajjasī**ti punapi evarūpaṃ āpajjissasi. Evarūpañhi te sīlanti.

Iti naṃ so ovaditvā tattha avasitvā pakkhe pasāretvā aññattha agamāsi. Kākopi tattheva jīvitakkhayaṃ pāpuṇi.

Satthā imaṃ dhammadesanaṃ āharitvā saccāni pakāsetvā jātakam̄ samodhānesi, saccapariyosāne lolabhikkhu anāgāmiphale patiṭṭhahi. Tadā kāko lolabhikkhu ahosi, kapoto pana ahameva ahosinti.

Kapotajātakavaṇṇanā pañcamā.

Aḍḍhavaggo tatiyo.

Jātakuddānaṃ –

Maṇikuṇḍala sujātā, venasākhañca oragaṃ;  
Ghaṭaṃ koraṇḍi laṭuki, dhammapālaṃ miḡaṃ tathā.

Suyonandī vaṇṇāroha, sīlaṃ hirī khajjopanaṃ;  
Ahi gumbiya sāliyaṃ, tacaśāraṃ mittavindaṃ.

Palāsañceva dīghiti, miḡapotaka mūsikaṃ;  
Dhanuggaho kapotañca, jātakā pañcavīsati.

Pañcakanipātavaṇṇanā niṭṭhitā.

## 6. Chakkanipāto

### 1. Avāriyavaggo

[376] 1. Avāriyajātakavaṇṇanā

**Māsu kujjha bhūmipatī**ti idaṃ satthā jetavane viharanto ekaṃ titthanāvikaṃ ārabha katesi. So kira bālo ahosi aññāṇo, neva so buddhādīnaṃ ratanānaṃ, na aññesaṃ puggalānaṃ guṇaṃ jānāti, caṇḍo pharusō sāhasiko. Atheke jānapado bhikkhu “buddhupaṭṭhānaṃ karissāmī”ti āgacchanto sāyaṃ aciravatītitthaṃ patvā taṃ evamāha “upāsaka, paratīraṃ gamissāmi, nāvaṃ me dehi”ti. “Bhante, idāni akālo, ekasmim̄ ṭhāne vasassū”ti. “Upāsaka, idha kuhiṃ vasissāmi, maṃ gaṇhitvā gacchā”ti. So kujjhivā “ehi re samaṇa, vahāmī”ti therāṃ nāvaṃ āropetvā ujukaṃ agantvā heṭṭhā nāvaṃ netvā ulloḷaṃ katvā tassa pattacīvaraṃ temetvā kilametvā tīraṃ patvā andhakārelāyaṃ uyyojesi. Atha so vihāraṃ gantvā taṃ divasaṃ buddhupaṭṭhānassa okāsaṃ alabhivā punadivase satthāraṃ upasaṅkamtivā vanditvā ekamantaṃ nisīditvā satthārā katapaṭṭisanthāro “kadā āgatosī”ti vutte “hiyyo, bhante”ti vatvā “atha kasmā ajja buddhupaṭṭhānaṃ āgatosī”ti vutte tamatthaṃ ārocesi. Taṃ sutvā satthā “na kho bhikkhu idāneva, pubbepesa caṇḍo pharusō sāhasiko, idāni pana tena tvaṃ kilamito, pubbepesa paṇḍite kilamesī”ti vatvā tena yācito atītaṃ āhari.

Atīte bārāṇasiyaṃ brahmadatte rajjaṃ kārente bodhisatto brāhmaṇakule nibbattitvā vayappatto takkasilāyaṃ sabbasippāni uggaṇhitvā isipabbajjaṃ pabbajitvā dīghamaddhānaṃ himavante phalāphalena yāpetvā loṇambilasevanatthāya bārāṇasiṃ patvā rājuyyāne vasitvā punadivase nagaraṃ bhikkhāya pāvīsī. Atha naṃ rājaṅgaṇappattaṃ rājā disvā tassa iriyāpathe pasīditvā antepuraṃ ānetvā bhojetvā paṭiññaṃ gahetvā rājuyyāne vasāpesī, devasikaṃ upaṭṭhānaṃ agamāsī. Tameṇaṃ bodhisatto “rañña nāma, mahārāja, cattāri agatigamaṇāni vajjetvā appamattena khantimettānuddayasampanna hutvā dhammena rajjaṃ kāretabba”nti vatvā devasikaṃ ovadanto –

1. “Māsu kujjha bhūmipati, māsu kujjha rathesabha;  
Kuddhaṃ appaṭikujjhanto, rājā raṭṭhassa pūjito.
2. “Gāme vā yadi vāraññe, ninne vā yadi vā thale;  
Sabbattha anusāsāmi, māsu kujjha rathesabhā”ti. – dve gāthā abhāsi;

Tattha **raṭṭhassa pūjito** evarūpo rājā raṭṭhassa pūjanīyo hotīti attho. **Sabbattha anusāsāmī**ti etesu gāmādīsu yattha katthaci vasantopāhaṃ mahārāja, imāya eva anusitṭhiyā tamanusāsāmi, etesu vā gāmādīsu yattha katthaci ekasmimpi ekasatthepi anusāsāmi. **Māsu kujjha rathesabhā**ti evamevāhaṃ taṃ anusāsāmi, rañña nāma kujjhatuṃ na vaṭṭati. Kiṃkāraṇā? Rājāno nāma vācāvudhā, tesuṃ kuddhānaṃ vacanamatteneva bahū jīvitakkhayaṃ pāpuṇantīti.

Evam bodhisatto rañño āgatāgatadivase imā dve gāthā abhāsi. Rājā anusitṭhiyā pasannacitto mahāsattassa satasahassuṭṭhānaṃ ekaṃ gāmavaraṃ adāsī, bodhisatto paṭikkhipī. Iti so tattheva dvādasasaṃvaccharaṃ vasitvā “aticiraṃ nivutthomhi, janapadacārikaṃ tāva caritvā āgamissāmī”ti rañño akathetvā uyyānapālaṃ āmantetvā “tāta, ukkaṇṭhitarūposmi, janapadaṃ caritvā āgamissāmi, tvaṃ rañño katheyyāsī”ti vatvā pakkanto gaṅgāya nāvātittuṃ pāpuṇi. Tattha avāriyapitā nāma nāviko ahoṣi. So bālo neva guṇavantānaṃ guṇaṃ jānāti, na attano āyāpāyaṃ jānāti, so gaṅgaṃ taritukāmaṃ janaṃ paṭhamam tāretvā pacchā vetanaṃ yācati, vetanaṃ adentehi saddhiṃ kalahaṃ karonto akkosappahāreyeva bahū labhati, appaṃ lābhaṃ, evarūpo andhabālo. Taṃ sandhāya satthā abhisambuddho hutvā tatiyaṃ gāthamāha –

3. “Avāriyapitā nāma, ahu gaṅgāya nāviko;  
Pubbe janaṃ tāretvāna, pacchā yācati vetanaṃ;  
Tenassa bhaṇḍanaṃ hoti, na ca bhogehi vaḍḍhatī”ti.

Tattha **avāriyapitā nāmā**ti avāriyā nāma tassa dhītā, tassā vasena avāriyapitā nāma jāto. **Tenassa bhaṇḍananti** tena kāraṇena, tena vā pacchā yāciyamānena janena saddhiṃ tassa bhaṇḍanaṃ hoti.

Bodhisatto taṃ nāvikaṃ upasaṅkamitvā “āvuso, paratīraṃ maṃ nehī”ti āha. Taṃ sutvā so āha “samaṇa, kiṃ me nāvāvetanaṃ dassasī”ti? “āvuso, ahaṃ bhogavaḍḍhiṃ atthavaḍḍhiṃ dhammavaḍḍhiṃ nāma te kathessāmī”ti. Taṃ sutvā nāviko “dhuvaṃ esa mayhaṃ kiñci dassatī”ti taṃ paratīraṃ netvā “dehi me nāvāya vetana”nti āha. So tassa “sādhu, āvuso”ti paṭhamam bhogavaḍḍhiṃ kathento –

4. “Atiṇṇaṃyeva yācassu, apāraṃ tāta nāvika;  
Añño hi tiṇṇassa mano, añño hoti pāresino”ti. – gāthamāha;

Tattha **apāranti** tāta, nāvika paratīraṃ atiṇṇameva janaṃ orimatīre ṭhitaññeva vetanaṃ yācassu, tato laddhaṅca gahetvā guttaṭṭhāne ṭhapetvā pacchā manusse paratīraṃ neyyāsī, evaṃ te bhogavaḍḍhi bhavissati. **Añño hi tiṇṇassa manoti** tāta nāvika, paratīraṃ gatassa añño mano bhavati, adatvāva gantukāmo hoti. Yo panesa pāresī nāma paratīraṃ esati, paratīraṃ gantukāmo hoti, so atirekampi datvā gantukāmo hoti, iti pāresino añño mano hoti, tasmā tvaṃ atiṇṇameva yāceyyāsī, ayaṃ tāva te bhogānaṃ

vaḍḍhi nāmāti.

Taṃ sutvā nāviko cintesi “ayaṃ tāva me ovādo bhavissati, idāni panesa aññaṃ kiñci mayhaṃ dassatī”ti. Atha naṃ bodhisatto “ayaṃ tāva te, āvuso, bhogavaḍḍhi, idāni atthadhammavaḍḍhiṃ suṇāhī”ti vatvā oবাদanto –

5. “Gāme vā yadi vāraññe, ninne vā yadi vā thale;  
Sabbattha anusāsāmi, māsu kujjhittha nāvikā”ti. – gāthamāha;

Itissa imāya gāthāya atthadhammavaḍḍhiṃ kathetvā “ayaṃ te atthavaḍḍhi ca dhammavaḍḍhi cā”ti āha. So pana dandhapuriso taṃ ovādaṃ na kiñci maññaṃāno “idaṃ, samaṇa, tayā mayhaṃ dinnāṃ nāvāvetana”nti āha. “Āmāvuso”ti. “Mayhaṃ iminā kammaṃ natthi, aññaṃ me dehi”ti. “Āvuso, idaṃ ṭhapetvā mayhaṃ aññaṃ natthī”ti. “Atha tvaṃ kasmā mama nāvaṃ āruḥhosī”ti tāpasāṃ gaṅgātīre pātetvā ure nisīditvā mukhamevassa pothesi.

Satthā “iti so, bhikkhave, tāpaso yaṃ ovādaṃ datvā rañño santikā gāmavaraṃ labhi, tameva ovādaṃ andhabālassa nāvikkassa kathetvā mukhapothanaṃ pāpuṇi, tasmā ovādaṃ dentena yuttajanasseva dātabbo, na ayuttajanassā”ti vatvā abhisambuddho hutvā tadanantaraṃ gāthamāha –

6. “Yāyevānusāsaniyā, rājā gāmavaraṃ adā;  
Tāyevānusāsaniyā, nāviko paharī mukha”nti.

Tassa taṃ paharantasseva bhariyā bhattaṃ gahetvā āgatā pāpapurisaṃ disvā “sāmi, ayaṃ tāpaso nāma rājakulūpako, mā paharī”ti āha. So kujjhitvā “tvaṃ me imaṃ kūṭatāpasāṃ paharituṃ na desī”ti utthāya taṃ paharivā pātesi. Atha bhattapāti patitvā bhijji, tassā ca pana garugabbhāya gabbho bhūmiyaṃ pati. Atha naṃ manussā samparivāretvā “purisaghātakacoro”ti gahetvā bandhitvā rañño dassesuṃ. Rājā vinicchinitvā tassa rājāṇaṃ kāresi. Satthā abhisambuddho hutvā tamatthaṃ pakāsento osānagāthamāha –

7. “Bhattaṃ bhinnaṃ hatā bhariyā, gabbho ca patito chamā;  
Migova jātarūpena, na tenatthaṃ abandhi sū”ti.

Tattha **bhattaṃ bhinnanti** bhattapāti bhinnā. **Hatāti** pahatā. **Chamāti** bhūmiyaṃ. **Migova jātarūpenāti** yathā migo suvaṇṇaṃ vā hiraññaṃ vā muttāmaṇiādāni vā madditvā gacchantopi attharivā nipajjantopi tena jātarūpena attano atthaṃ vaḍḍhetuṃ nibbattetuṃ na sakkoti, evameva so andhabālo paṇḍitehi dinnāṃ ovādaṃ sutvāpi attano atthaṃ vaḍḍhetuṃ nibbattetuṃ nāsakkhīti vuttaṃ hoti. **Abandhi sūti** ettha abandhi soti evamattho daṭṭhabbo. Sa-oiti imesaṃ padānañhi sūti sandhi hoti.

Satthā imaṃ dhammadesanaṃ āharitvā saccāni pakāsetvā jātakāṃ samodhānesi, saccapariyosāne so bhikkhu sotāpattiphale patiṭṭhahi. Tadā nāviko idāni nāvikova ahosi, rājā ānando, tāpaso pana ahameva ahosinti.

Avāriyajātakavaṇṇanā paṭhamā.

[377] 2. Setaketujātakavaṇṇanā

**Mā tāta kujjhi na hi sādhu kodhoti** idaṃ satthā jetavane viharanto kuhakabhikkhuṃ ārabha kathesi, paccuppannavatthu **uddāla jātake** (jā. 1.14.62 ādayo) āvi bhavissati.

Atīte bārāṇasiyaṃ brahmadatte rajjaṃ kārente bodhisatto bārāṇasiyaṃ disāpāmokkho ācariyo hutvā pañcasate māṇave mante vācesi. Tesāṃ jeṭṭhako setaketu nāma udiccabrāhmaṇakule nibbattamāṇavo, tassa jātiṃ nissāya mahanto māno ahosi. So ekadivasaṃ aññehi māṇavehi saddhiṃ nagarā nikkhamanto

nagaram pavisantam ekam caṇḍālam disvā “kosi tva”nti pucchitvā “caṇḍālohamasmī”ti vutte tassa sarīram paharivā āgatavātassa attano sarīre phusanabhayena “nassa, caṇḍāla, kāḷakaṇṇī, adhovātam yāhī”ti vatvā vegena tassa uparivātam agamāsi. Caṇḍālo sīghataram gantvā tassa uparivāte aṭṭhāsi. Atha nam so “nassa kāḷakaṇṇī”ti suṭṭhutam akkosi paribhāsi. Tam sutvā caṇḍālo “tvam kosi”ti pucchi. “Brāhmaṇamāṇavohamasmī”ti. “Brāhmaṇo hotu, mayā pana puṭṭhapañham kathetum sakkhissasī”ti. “Āma, sakkhissāmī”ti. “Sace na sakkosi, pādantarena tam gamemī”ti. So attānam takketvā “gamehī”ti āha.

Caṇḍālaputto tassa katham parisam gāhāpetvā “māṇava, disā nāma katarā”ti pañham pucchi. “Disā nāma puratthimādayo catasso disā”ti. Caṇḍālo “nāham tam etam disam pucchāmi, tvam ettakampi ajānanto mama sarīre pahaṭavātam jigucchasī”ti tam khandhaṭṭhike gahetvā onametvā attano pādantarena gamesi. Māṇavā tam pavattim ācariyassa ācikkhimsu. Tam sutvā ācariyo “saccam kira, tāta, setaketu caṇḍālenāsi pādantarena gamito”ti? “Āma, ācariya, so mam caṇḍāladāsiputto disāmattampi na jānāsī”ti attano pādantarena gamesi, idāni disvā kattabham assa jānissāmīti kuddho caṇḍālaputtam akkosi paribhāsi. Atha nam ācariyo “tāta, setaketu mā tassa kujjhi, paṇḍito caṇḍāladāsiputto, na so tam etam disam pucchati, aññam disam pucchi, tayā pana diṭṭhasutaviññātato adiṭṭhasutaviññātameva bahutara”nti ovdanto dve gāthā abhāsi –

8. “Mā tāta kujjhi na hi sādhu kodho, bahumpi te adiṭṭhamassutañca;  
Mātā pitā disatā setaketu, ācariyamāhu disatam pasatthā.
9. “Agārino annadapānavatthadā, avhāyikā tampi disam vadanti;  
Esā disā paramā setaketu, yam patvā dukkhī sukhino bhavanti”ti.

Tattha **na hi sādhu kodhoti** kodho nāma uppajjamāno subhāsidadubbhāsitam atthānattham hitāhitam jānitum na detīti na sādhu na laddhako. **Bahumpi te adiṭṭhanti** tayā cakkhunā adiṭṭham sotena ca assutameva bahutaram. **Disatāti** disā. Mātāpitaro puttānam purimataram uppānattā puratthimadisā nāma jātāti vadati. **Ācariyamāhu disatam pasatthāti** ācariyā pana dakkhiṇeyyattā disatam pasatthā dakkhiṇā disāti buddhādayo ariyā āhu kathenti dīpeti.

**Agārinoti** gahaṭṭhā. **Annadapānavatthadāti** annadā, pānadā, vatthadā ca. **Avhāyikāti** “etha deyyadhammam paṭiggaṇhathā”ti pakkosanakā. **Tampi disam vadantīti** tampi buddhādayo ariyā ekam disam vadanti. Iminā catupaccayadāyakā gahaṭṭhā paccaye apadisitvā dhammikasamaṇabrāhmaṇehi upagantabbattā ekā disā nāmāti dīpeti. Aparo nayo – ye ete agārino annapānavatthadā, tesam chakāmasaggasampattidāyakaṭṭhena uparūpari avhāyanato ye avhāyikā dhammikasamaṇabrāhmaṇā, tampi disam vadanti, buddhādayo ariyā uparimadisam nāma vadantīti dīpeti. Vuttampi cetam –

“Mātā pitā disā pubbā, ācariyā dakkhiṇā disā;  
Puttadārā disā pacchā, mittāmaccā ca uttarā.

“Dāsakammakarā heṭṭhā, uddham samaṇabrāhmaṇā;  
Etā disā namasseyya, alamatto kule gihī”ti. (dī. nī. 3.273);

**Esā disāti** idam pana nibbānam sandhāya vuttam. Jātiādinā hi nānappakārena dukkhena dukkhitā sattā yam patvā niddukkā sukhino bhavanti, esā eva ca sattehi agatapubbā disā nāma. Teneva ca nibbānam “paramā”ti āha. Vuttampi cetam –

“Samatittikam anavasesakam, telapattam yathā parihareyya;  
Evaṃ sacittamanurakkhe, pathayāno disam agatapubba”nti. (jā. 1.1.96);

Evaṃ mahāsatto mānavassa disā kathesi. So pana “caṇḍālenamhi pādantarena gamito”ti tasmim

thāne avasitvā takkasilaṃ gantvā disāpāmokkhācariyassa santike sabbasippāni uggaṇhitvā ācariyena anuññāto takkasilato nikkhamitvā sabbasamayasippaṃ sikkhanto vicari. So ekaṃ paccantagāmaṃ patvā taṃ nissāya vasante pañcasate tāpase disvā tesam santike pabbajitvā yaṃ te jānanti sippamantacaraṇaṃ, taṃ uggaṇhitvā gaṇasatthā hutvā tehi parivārito bārāṇasiṃ gantvā punadivase bhikkhaṃ caranto rājaṅgaṇaṃ agamāsi. Rājā tāpasānaṃ iriyāpathe pasīditvā antonivesane bhojetvā te attano uyyāne vasāpesi. So ekadivasam tāpase parivisitvā “ajja sāyanhe uyyānaṃ gantvā ayye vandissāmī”ti āha.

Setaketu uyyānaṃ gantvā tāpase sannipātetvā “mārisā, ajja rājā āgamissati, rājāno ca nāma sakiṃ ārādhettvā yāvātāyukaṃ sukhaṃ jīvitum sakkā, ajja ekacce vaggulivataṃ caratha, ekacce kaṇṭakaseyyaṃ kappetha, ekacce pañcātaṃ tappetha, ekacce ukkuṭikappadhānaṃ manuyuñjatha, ekacce udakoroḥaṇakammaṃ karoṭha, ekacce mante sajjhāyathā”ti vicāretvā sayam pakkasāladvāre apassayapīṭhake nisīditvā pañcavaṇṇaraṅgasamujjalavāsanaṃ ekaṃ potthakaṃ vicitravaṇṇe ādhārake ṭhapetvā susikkhitehi catūhi pañcahi māṇavehi pucchite pucchite pañhe kathesi. Tasmaṃ khaṇe rājā āgantvā te micchātaṃ karonte disvā tuṭṭho setaketuṃ upasaṅkamitvā vanditvā ekamantaṃ nisinna purohitena saddhiṃ sallapanto tatiyaṃ gāthamāha –

10. “Kharājīnā jaṭilā paṅkadantā, dummakkharūpā yeme jappanti mante;  
Kacci nu te mānusake payoge, idaṃ vidū parimuttā apāyā”ti.

Tattha **kharājīnā**ti sakhurehi ajinacammehi samannāgatā. **Paṅkadantā**ti dantakaṭṭhassa akhādanena malaggahitadantā. **Dummakkharūpā**ti anañjitāmaṇḍitalūkhanivāsanapārūpanā mālāgandhavilepanavajjitā, kilīṭṭharūpāti vuttaṃ hoti. **Yeme jappantī**ti ye ime mante sajjhāyanti. **Mānusake payogeti** manussehi kattabbapayoge ṭhitā. **Idaṃ vidū parimuttā apāyā**ti imasmiṃ payoge ṭhatvā imaṃ lokaṃ viditvā pākaṃ katvā “kacci ete isayo catūhi apāyehi muttā”ti pucchati.

Taṃ sutvā purohito catutthaṃ gāthamāha –

11. “Pāpāni kammāni karitva rāja, bahussuto ce na careyya dhammaṃ;  
Sahassavedopi na taṃ paṭicca, dukkhā pamañce caraṇaṃ apatvā”ti.

Tattha **karitvā**ti katvā. **Caraṇanti** saha sīlena aṭṭha samāpattiyo. Idaṃ vuttaṃ hoti. Mahārāja, “ahaṃ bahussutomhī”ti sahassavedopi ce tividdhaṃ sucaritadhammaṃ na careyya, pāpāneva kareyya, so tāni pāpāni kammāni katvā taṃ bāhusaccaṃ paṭicca sīlasamāpattisaṅkhātaṃ caraṇaṃ appatvā dukkhā na pamañce, apāyadukkhato na muccatevāti.

Taṃ sutvā rājā tāpasesu pasādaṃ hari. Tato setaketu cintesi “imassa rañño tāpasesu pasādo udapādi, taṃ panesa purohito vāsīyā paharivā viya chindi, mayā etena saddhiṃ kathetuṃ vaṭṭatī”ti. So tena saddhiṃ kathento pañcamaṃ gāthamāha –

12. “Sahassavedopi na taṃ paṭicca, dukkhā pamañce caraṇaṃ apatvā;  
Maññāmi vedā aphaḷā bhavanti, sasamyaṃ caraṇameva sacca”nti.

Tassattho – sace sahassavedopi taṃ bāhusaccaṃ paṭicca caraṇaṃ appatvā attānaṃ dukkhā na pamañce, evaṃ sante ahaṃ maññāmi “tayo vedā aphaḷā honti, sasīlaṃ samāpatticaraṇameva saccaṃ hotī”ti.

Taṃ sutvā purohito chaṭṭhaṃ gāthamāha –

13. “Na heva vedā aphaḷā bhavanti, sasamyaṃ caraṇameva saccaṃ;  
Kittiñhi pappoti adhicca vede, santiṃ puṇeti caraṇena danto”ti.



Tassattho – tayo vedā aphaḷā na bhavanti, saṁyamamaṁ caraṇameva saccamaṁ seyyamaṁ uttamaṁ pavaraṁ na heva hoti. Kimkāraṇā? **Kittiṅhi pappoti adhicca vedeti** tayo vede adhicca diṭṭhadhamme kittimattaṁ yasamattaṁ lābhamattaṁ labhati, ito paraṁ aññaṁ natthi, tasmā na te aphaḷā. **Santiṁ puṇeti caraṇena dantoti** sīle patiṭṭhāya samāpattiyo nibbattetvā samāpattipadaṭṭhānaṁ vipassanaṁ vadḍhento accantaṁ santaṁ nibbānaṁ nāma taṁ eti pāpuṇāti.

Iti purohito setaketuno vādaṁ bhinditvā te sabbe gihī kāretvā phalakāvudhāni gāhāpetvā mahantatarake katvā rañño upaṭṭhāke kāresi. Ayaṁ kira mahantatarakānaṁ vaṁso.

Satthā imaṁ dhammadesanaṁ āharitvā jātakaṁ samodhānesi – “tadā setaketu kuhakabhikkhu ahosi, caṇḍālo sārīputto, rājā ānando, purohito pana ahameva ahosi”nti.

Setaketujātakavaṇṇanā dutiyā.

[378] 3. Darīmukhajātakavaṇṇanā

**Paṅko ca kāmāti** idamaṁ satthā jetavane viharanto mahābhinnikkhamaṇaṁ ārabba kathesi. Paccuppannavatthu heṭṭhā kathitameva.

Atīte rājagahanagare magadharājā nāma rajjaṁ kāresi. Tadā bodhisatto tassa aggamahesiyā kucchimhi nibbatti, brahmadattakumārotissa nāmaṁ akaṁsu. Tassa jātadvaseyeva purohitassapi putto jāyi, tassa mukhaṁ ativiya sobhati, tenassa darīmukhoti nāmaṁ akaṁsu. Te ubhopi rājakuleyeva saṁvaḍḍhā aññamaññaṁ piyasahāyā hutvā soḷasavassakāle takkasilamaṁ gantvā sabbasippāni uggaṇhitvā “sabbasamayasiippaṅca sikkhissāma, desacārittaṅca jānissāma”ti gāmanigamādīsu carantā bārāṇasiṁ patvā devakule vasitvā punadvase bārāṇasiṁ bhikkhāya pavisiṁsu. Tattha ekasmiṁ kule “brāhmaṇe bhojetvā vācanakaṁ dassāma”ti pāyāsaṁ pacitvā āsanāni paññattāni honti. Manussā te ubhopi bhikkhāya carante disvā “brāhmaṇā āgatā”ti gehamaṁ pavesetvā mahāsattassa āsane suddhavatthamaṁ paññāpesuṁ, darīmukhassa āsane rattakambalaṁ. Darīmukho taṁ nimittaṁ disvā “ajja mayhaṁ sahāyo bārāṇasirājā bhavissati, ahaṁ senāpati”ti aññāsi. Te tattha bhuñjitvā vācanakaṁ gahetvā maṅgalaṁ vatvā nikkhamaṁ taṁ rājuyyānaṁ agamaṁsu. Tattha mahāsatto maṅgalasilāpaṭṭe nipajji, darīmukho panassa pāde parimajjanto nisīdi.

Tadā bārāṇasirañño matassa sattamo divaso hoti. Purohito rañño sarīrakiccaṁ katvā aputtake rajje sattame divase phussarathaṁ vissajjesi. Phussarathavissajjanakiccaṁ **mahājanakajātaka** (jā. 2.22.123 ādayo) āvi bhavissati. Phussaratho nagarā nikkhamitvā caturaṅginiyā senāya parivuto anekasatehi tūriyehi vajjamānehi uyyānavāraṁ pāpuṇi. Darīmukho tūriyasaddamaṁ sutvā “sahāyassa me phussaratho āgacchati, ajjevessa rājā hutvā mayhaṁ senāpatiṭṭhānaṁ dassati, ko me gharāvāsenattho, nikkhamitvā pabbajissāmi”ti bodhisattaṁ anāmantetvāva ekamantaṁ gantvā paṭicchanne aṭṭhāsi. Purohito uyyānavāre rathaṁ ṭhapetvā uyyānaṁ pavitṭho bodhisattaṁ maṅgalasilāpaṭṭe nipannaṁ disvā pādesu lakkhaṇāni oloketvā “ayaṁ puñṇavā satto dvisahassadīpaparivārānaṁ catunnampi mahādīpānaṁ rajjaṁ kāretuṁ samattho, dhiti panassa kīdisā”ti sabbatūriyāni paggaṇhāpesi. Bodhisatto pabujjhivā mukhato sāṭakaṁ apanetvā mahājanaṁ oloketvā puna sāṭakena mukhaṁ paṭicchādetvā thokaṁ nipajjitvā passaddhadaratho uṭṭhāya silāpaṭṭe pallaṅkena nisīdi. Purohito jāṇukena patiṭṭhāya “deva, rajjaṁ tumhākaṁ pāpuṇāti”ti āha. “Aputtakaṁ bhaṇe rajja”nti. “Āma, devā”ti. “Tena hi sādhu”ti sampācchi. Te tassa uyyāneyeva abhisekaṁ akaṁsu. So yasamahantatāya darīmukhaṁ asaritvāva rathaṁ abhiruyha mahājanaparivuto nagaraṁ pavisitvā padakkhiṇaṁ katvā rājadvāre ṭhitova amaccānaṁ ṭhānantarāni vicāretvā pāsādaṁ abhiruhi.

Tasmiṁ khaṇe darīmukho “suññaṁ dāni uyyāna”nti āgantvā maṅgalasilāya nisīdi, athassa purato paṇḍupalāsaṁ pati. So tasmiṇyeva paṇḍupalāse khayavayaṁ paṭṭhapetvā tilakkhaṇaṁ sammasitvā pathaviṁ unnādentō paccekabodhiṁ nibbattesi. Tassa taṅkhaṇaṇṇeva gihiliṅgaṁ antaradhāyi, iddhiṁ apattacīvaraṁ ākāsaṁ otarivā sarīre paṭimuṅci. Tāvadeva aṭṭhaparikkhāradharo

iriyāpathasampanno vassasaṭṭhikatthero viya hutvā iddhiyā ākāse uppativā himavantapadese nandamūlakapabbhāraṃ agamāsi. Bodhisattopi dhammena rajjaṃ kāresi, yasamahantatāya pana yasena pamatto hutvā cattālisa vassāni darīmukhaṃ na sari, cattālīse pana saṃvacchare atīte taṃ saritvā “mayhaṃ sahāyo darīmukho nāma atthi, kahaṃ nu kho so”ti taṃ daṭṭhukāmo ahosi. So tato paṭṭhāya antepurepi parisamajjhepi “kahaṃ nu kho mayhaṃ sahāyo darīmukho, yo me tassa vasanaṭṭhānaṃ katheti, mahantamassa yasaṃ dassāmī”ti vadati. Evaṃ tassa punappunaṃ taṃ sarantasseva aññāni dasa saṃvaccharāni atikkantāni.

Darīmukhapaccekabuddhopi paññāsavassaccayena āvajjento “maṃ kho sahāyo saratī”ti ñatvā “idāni so mahallako puttadhītādīhi vuddhippatto, gantvā dhammaṃ kathetvā pabbājessāmi na”nti iddhiyā ākāse āgantvā uyyāne otarivā suvaṇṇapaṭimā viya silāpaṭṭe nisīdi. Uyyānapālo taṃ disvā upasaṅkamitvā “bhante, kuto tumhe ethā”ti pucchi. “Nandamūlakapabbhārato”ti. “Ke nāma tumhe”ti? “Darīmukhapaccekabuddho nāmāhaṃ, āvuso”ti. “Bhante, amhākaṃ rājānaṃ jānāthā”ti? “Āma jānāmi, gihikāle no sahāyo”ti. “Bhante, rājā tumhe daṭṭhukāmo, kathessāmi tassa tumhākaṃ āgatabhāva”nti. “Gaccha kathehī”ti. So “sādhū”ti vatvā turitaturitova gantvā tassa silāpaṭṭe nisinnabhāvaṃ rañño kathesi. Rājā “āgato kira me sahāyo, passissāmi na”nti rathaṃ āruyha mahantena parivārena uyyānaṃ gantvā paccekabuddhaṃ vanditvā paṭisanthāraṃ katvā ekamantaṃ nisīdi. Atha naṃ paccekabuddho “kiṃ, brahmadatta, dhammena rajjaṃ kāresi, agatigamaṇaṃ na gacchasi, dhanatthāya lokaṃ na pīlesi, dānādīni puññāni karosī”tiādīni vadanto paṭisanthāraṃ katvā “brahmadatta, mahallakosī, etarahi kāme pahāya pabbajitūṃ te samayo”ti vatvā tassa dhammaṃ desento paṭhamāṃ gāthamāha –

14. “Paṅko ca kāmā palipo ca kāmā, bhayañca metaṃ timūlaṃ pavuttaṃ;  
Rajo ca dhūmo ca mayā pakāsītā, hitvā tuvaṃ pabbaja brahmadattā”ti.

Tattha **paṅkoti** udake jātāni tiṇasevālakumudagacchādīni adhippetāni. Yathā hi udakaṃ tarantaṃ tāni laggāpentī sajjāpentī, tathā saṃsārasāgaraṃ tarantassa yogāvacarassa pañca kāmagaṇā sabbe vā pana vatthukāmakilesakāmā laggāpanavasena paṅko nāma. Imasmiñhi paṅke āsattā visattā devāpi manussāpi tiracchānāpi kilamanti rodanti paridevanti. **Palipo ca kāmāti** palipo vuccati mahākaddamo, yamhi laggā sūkaramīgādayopi sīhāpi vāraṇāpi attānaṃ uddharitvā gantuṃ na sakkonti, vatthukāmakilesakāmāpi taṃsarikkhatāya “palipā”ti vuttā. Paññavantoṃ hi sattā tesu kāmesu sakim laggakālato paṭṭhāya te kāme padāletvā sīghaṃ utthāya akiñcanaṃ apalibodhaṃ ramaṇīyaṃ pabbajjaṃ upagantuṃ na sakkonti. **Bhayañca metanti** bhayañca etaṃ, ma-kāro byañjanasandhivasena vutto. **Timūlanti** tīhi mūlehi patiṭṭhitāṃ viya acalaṃ. Balavabhayassetāṃ nāmaṃ. **Pavuttanti** mahārāja, ete kāmā nāma diṭṭhadhammikasamparāyikassa attānuvādabhayādikassa ceva dvattimsakammakaraṇachanavutirogavasappavattassa ca bhayassa paccayaṭṭhena balavabhayanti buddhapaccekabuddhabuddhasāvakehi ceva sabbaññubodhisattehi ca pavuttaṃ kathitaṃ, dīpitanti attho. Atha vā **bhayañca metanti** bhayañca mayā etaṃ timūlaṃ pavuttanti evañcetta attho daṭṭhabboyeva.

**Rajo ca dhūmo cāti** rajadhūmasadisattā “rajo”ti ca “dhūmo”ti ca mayā pakāsītā. Yathā hi sunhātassa suvilittāṅkatassa purisassa sarīre sukhumarajaṃ patitaṃ, taṃ sarīraṃ dubbaṇṇaṃ sobhārahitaṃ kiliṭṭhaṃ karoti, evameva iddhibalena ākāse āgantvā cando viya ca sūriyo viya ca loke paññātāpi sakim kāmarajassa anto patitakālato paṭṭhāya guṇavaṇṇaguṇasobhāguṇasuddhīnaṃ upahatattā dubbaṇṇā sobhārahitā kiliṭṭhāyeva honti. Yathā ca dhūmena pahaṭakālato paṭṭhāya suparisuddhāpi bhitti kālavaṇṇā hoti, evaṃ atiparisuddhaññānāpi kāmadhūmena pahaṭakālato paṭṭhāya guṇavināsappattiyā mahājanamajjhe kālakāva hutvā paññāyanti. Iti rajadhūmasarikkhatāya ete kāmā “rajo ca dhūmo cā”ti mayā tuyhaṃ pakāsītā, tasmā ime kāme hitvā tuvaṃ pabbaja brahmadattāti rājānaṃ pabbajjāya ussāhaṃ janeti.

Taṃ sutvā rājā kilesehi attano baddhabhāvaṃ kathento dutiyaṃ gāthamāha –

15. “Gadhito ca ratto ca adhimucchito ca, kāmesvahaṃ brāhmaṇa bhīṃsarūpaṃ;  
Taṃ nussahe jīvikattho pahātuṃ, kāhāmi puññāni anappakāni”ti.

Tattha **gadhito** abhijjhākāyaganthena baddho. **Ratto**ti pakatijahāpanena rāgena ratto. **Adhimucchito**ti ativiya mucchito. **Kāmesvahanti** duvidhesupi kāmesu ahaṃ. **Brāhmaṇāti** darīmukhapaccekabuddhaṃ ālapati. **Bhīṃsarūpanti** balavarūpaṃ. **Taṃ nussaheti** taṃ duvidhampi kāmaṃ na ussahāmi na sakkomi. **Jīvikattho pahātunti** imāya jīvikāya atthiko ahaṃ taṃ kāmaṃ pahātuṃ na sakkomīti vadati. **Kāhāmi puññāni**ti idāni dānasīlauposathakammasaṅkhātāni puññāni anappakāni bahūni karissāmīti.

Evam kilesakāmo nāmesa sakiṃ allīnakālato paṭṭhāya apanetuṃ na sakkoti, yena saṃkiliṭṭhacitto mahāpuriso paccekabuddhena pabbajjāya guṇe kathitepi “pabbajituṃ na sakkomī”ti āha. Yoyaṃ dīpaṅkarapādamaṃ attani sambhavana nāṇena buddhakaradhamme vicinanto tatiyaṃ nekkhammapāramiṃ disvā –

“Imaṃ tvaṃ tatiyaṃ tāva, daḷhaṃ katvā samādiya;  
Nekkhammapāramitaṃ gaccha, yadi bodhiṃ pattumicchasi.

“Yathā andughare puriso, ciravuttho dukhaṭṭito;  
Na tattha rāgaṃ janeti, muttiṃyeva gavesati.

“Tatheva tvaṃ sabbabhava, passa andughare viya;  
Nekkhammābhimukho hutvā, sambodhiṃ pāpuṇissasi”ti. –

Evam nekkhamme guṇaṃ parikittesi, so paccekabuddhena pabbajjāya vaṇṇaṃ vatvā “kilese chaḍḍetvā samaṇo hohī”ti vuccamānopi “nāhaṃ kilese chaḍḍetvā samaṇo bhavituṃ sakkomī”ti vadati.

Imasmiṃ kira loke aṭṭha ummattakā nāma. Tenāhu porāṇā “aṭṭha puggalā ummattakasaññaṃ paṭilabhanti, kāmummattako lobhavasam gato, kodhummattako dosavasam gato, diṭṭhumattako vipallāsavasam gato, mohummattako aññānavasam gato, yakkhumattako yakkhavasam gato, pittummattako pittavasam gato, surummattako pānavasam gato, byasanummattako sokavasam gato”ti. Imesu aṭṭhasu ummattakesu mahāsatto imasmiṃ jātake kāmummattako hutvā lobhavasam gato pabbajjāya guṇaṃ na aññāsi.

Evam anattakāraṃ pana imaṃ guṇaparidhaṃsakaṃ lobhajātaṃ kasmā sattā parimuñcituṃ na sakkontīti? Anamatagge saṃsāre anekāni kappakoṭisatasahassāni ekato bandhitabhāvena. Evam santepi taṃ paṇḍitā “appassādā kāmā”tiādīnaṃ anekesaṃ paccavekkhaṇānaṃ vasena pajahanti. Teneva darīmukhapaccekabuddho mahāsattena “pabbajituṃ na sakkomī”ti vuttepi dhuranikkhepaṃ akatvā uttarimpi ovadanto dve gāthā āha.

16. “Yo atthakāmassa hitānukampino, ovajjamāno na karoti sāsanaṃ;  
Idameva seyyo iti maññamāno, punappunaṃ gabbhamupeti mando.
17. “So ghorarūpaṃ nirayaṃ upeti, subhāsubhaṃ muttakarīsapūraṃ;  
Sattā sakāye na jahanti gidhā, ye honti kāmesu avītarāgā”ti.

Tattha **atthakāmassāti** vuḍḍhikāmassa. **Hitānukampinoti** hitena muducittena anukampantassa. **Ovajjamānoti** ovadiyamāno. **Idameva seyyoti** yaṃ attanā gahitaṃ aseyyaṃ anuttamampi samānaṃ, taṃ idameva seyyo iti maññamāno. **Mandoti** so aññānapuggalo mātukucchiyaṃ vāsaṃ nātikkamati, punappunaṃ gabbhaṃ upetiyevāti attho.

**So ghorarūpanti** mahārāja, so mando taṃ mātukucchiṃ upento ghorarūpaṃ dāruṇajātikaṃ nirayaṃ upeti nāma. Mātukucchi hi nirassādaṭṭhena idha “nirayo”ti vutto, “catukuṭṭikanirayo”ti vuccati. “Catukuṭṭikanirayo nāma kataro”ti vutte mātukucchimeva vattuṃ vaṭṭati. Avācīmahāniraye nibbattasattassa hi aparāparaṃ ādhāvanaparidhāvanaṃ hotiyeva, tasmā taṃ “catukuṭṭikanirayo”ti vattuṃ na labbhati, mātukucchiyaṃ pana nava vā dasa vā māse catūhipi passehi ito cito ca dhāvituṃ nāma na sakkā, atisambādhe okāse catukoṭena catusaṅkuṭiteneva hutvā acchitabbaṃ, tasmā esa “catukuṭṭikanirayo”ti vuccati.

**Subhāsubhanti** subhānaṃ asubhaṃ. Subhānañhi saṃsārabhīrukānaṃ yogāvacarakulaputtānaṃ mātukucchi ekantaṃ asubhasammato. Tena vuttaṃ –

“Ajaññaṃ jaññasāṅkhātāṃ, asuciṃ sucisammataṃ;  
Nānākuṇapaparipūraṃ, jaññarūpaṃ apassato.

“Dhiratthumaṃ āturaṃ pūtikāyaṃ, jegucchiyaṃ assuciṃ byādhidhammaṃ;  
Yatthappamattā adhimucchitā pajā, hāpenti maggaṃ sugatūpapattiyā”ti. (jā. 1.3.128-129);

**Sattāti** āsattā visattā laggā laggitā **sakāye na jahantīti** taṃ mātukucchiṃ na pariccajanti. **Giddhāti** gadhitā. **Ye hontīti** ye kāmesu avītarāgā honti, te etaṃ gabbhavāsaṃ na jahantīti.

Evam darīmukhapaccekabuddho gabbhaokkantimūlakañca, parihāramūlakañca dukkhaṃ dassetvā idāni gabbhavuṭṭhānamūlakaṃ dassetuṃ diyaḍḍhagāthamāha.

18. “Mīlḥena littā ruhirena makkhitā, semhena littā upanikkhamanti;  
Yaṃ yañhi kāyena phusanti tāvade, sabbaṃ asātaṃ dukkameva kevalaṃ.

19. “Disvā vadāmi na hi aññato savaṃ, pubbenivāsaṃ bahukaṃ sarāmī”ti.

Tattha **mīlḥena littāti** mahārāja, ime sattā mātukucchito nikkhamantā na catujjātigandhehi vilimpitvā surabhimālaṃ piḷandhitvā nikkhamanti, purāṇagūthena pana makkhitā palibuddhā hutvā nikkhamanti. **Ruhirena makkhitāti** rattalohitacandanānulittāpi ca hutvā na nikkhamanti, rattalohitamakkhitā pana hutvā nikkhamanti. **Semhena littāti** na cāpi setacandanavilittā nikkhamanti, bahalapicchilasemhalittā pana hutvā nikkhamanti. Itthīnañhi gabbhavuṭṭhānakāle etā asuciyo nikkhamanti. **Tāvadeti** tasmīṃ samaye. Idaṃ vuttaṃ hoti – mahārāja, ime sattā tasmīṃ mātukucchito nikkhamanasamaye evaṃ mīlḥādilittā nikkhamantā yaṃ yaṃ nikkhamanamaggapadesaṃ vā hatthaṃ vā pādaṃ vā phusanti, taṃ sabbaṃ asātaṃ amadhuraṃ kevalaṃ asammissaṃ dukkameva phusanti, sukhaṃ nāma tesāṃ tasmīṃ samaye natthīti.

**Disvā vadāmi na hi aññato savanti** mahārāja, ahaṃ imaṃ ettakaṃ vadanto na aññato savaṃ, aññassa samaṇassa vā brāhmaṇassa vā taṃ sutvā na vadāmi, attano pana paccekabodhiñāṇena disvā paṭivijjhītvā paccakkhaṃ katvā vadāmīti attho. **Pubbenivāsaṃ bahukanti** idaṃ attano ānubhāvaṃ dassento āha. Idaṃ vuttaṃ hoti – mahārāja, ahañhi pubbe nivutthakkhandhapaṭipāṭisaṅkhātāṃ pubbenivāsaṃ bahukaṃ sarāmi, satasahassakappādhikāni dve saṅkhyeyyāni sarāmīti.

Idāni sathā abhisambuddho hutvā “evaṃ so paccekabuddho rājānaṃ subhāsītakathāya saṅgaṇhī”ti vatvā osāne upaḍḍhagāthamāha –

“Citrāhi gāthāhi subhāsītāhi, darīmukho nijjhāpayi sumedha”nti.

Tattha **citrāhīti** anekatthasannissitāhi. **Subhāsītāhīti** sukathitāhi. **Darīmukho nijjhāpayi sumedhanti** bhikkhave, so darīmukhapaccekabuddho taṃ sumedhaṃ sundarapaññaṃ kāraṇākāraṇajānanasamatthaṃ rājānaṃ nijjhāpesi saññāpesi, attano vacanaṃ gaṇhāpesīti attho.

Evam paccekabuddho kāmesu dosam dassetvā attano vacanam gāhāpetvā “mahārāja, idāni pabbaja vā mā vā, mayā pana tuyham kāmesu ādinavo pabbajjāya ca ānisaṃso kathito, tvam appamatto hohi”’ti vatvā suvaṇṇarājahaṃso viya ākāse uppatitvā valāhakagabbhaṃ maddanto nandamūlakapabbhārameva gato. Mahāsatto dasanakhasamodhānasamujjalam añjaliṃ sirasmiṃ ṭhapetvā namassamāno tasmim dassanavisaye atīte jeṭṭhaputtam pakkosāpetvā rajjam paṭicchāpetvā mahājanassa rodantassa paridevantassa kāme pahāya himavantam pavisitvā paṇṇasālam māpetvā isipabbajjam pabbajitvā na cirasseva abhiññā ca samāpattiyo ca nibbattetvā āyupariyosāne brahmalokūpago ahoṣi.

Satthā imaṃ dhammadesanam āharitvā saccāni pakāsetvā jātakam samodhānesi, saccapariyosāne bahū sotāpannādayo ahesuṃ. Tadā rājā ahameva ahoṣinti.

Darīmukhajātakavaṇṇanā tatiyā.

[379] 4. Nerujātakavaṇṇanā

**Kākolā kākasaṅghā cāti** idam satthā jetavane viharanto aññataram bhikkhuṃ ārabba katesi. So kira satthu santike kammaṭṭhānam gahetvā ekaṃ paccantagāmaṃ agamāsi. Manussā tassa iriyāpathe pasīditvā tam bhojetvā paṭiññam gahetvā araññe paṇṇasālam katvā tattha vasāpesuṃ, ativiya cassa sakkāram karimṃsu. Atheke sassatavādā āgamaṃsu. Te tesam vacanam sutvā therassa vādam vissajjetvā sassatavādam gahetvā tesaññeva sakkāram karimṃsu. Tato ucchedavādā āgamaṃsu te sassatavādam vissajjetvā ucchedavādameva gaṇhimṃsu. Athaññe acelakā āgamaṃsu. Te ucchedavādam vissajjetvā acelakavādam gaṇhimṃsu. So tesam guṇāguṇam ajānantānam manussānam santike dukkhena vasitvā vutthavasso pavāretvā satthu santikam gantvā katapaṭisanthāro “kham vassamvutthosī”’ti vutte “paccantam nissāya, bhante”’ti vatvā “sukham vutthosī”’ti puṭṭho “bhante, guṇāguṇam ajānantānam santike dukkham vutthosmī”’ti āha. Satthā “bhikkhu porānakapaṇḍitā tiracchānayanoniyam nibbattāpi guṇāguṇam ajānantehi saddhim ekadivasampi na vasimṃsu, tvam attano guṇāguṇam ajānanaṭṭhāne kasmā vasī”’ti vatvā tena yācito atītam āhari.

Atīte bārānasiyam brahmadatte rajjam kārente bodhisatto suvaṇṇahaṃsayoniyam nibbatti, kaniṭṭhabhātāpissa atthi. Te cittakūṭapabbate vasantā himavantapadesa sayamjātasālim khādanti. Te ekadivasam tattha caritvā cittakūṭam āgacchantā antarāmagge ekaṃ neruṃ nāma kañcanapabbatam disvā tassa matthake nisīdimṃsu. Tam pana pabbatam nissāya vasantā sakuṇasaṅghā catuppadā ca gocarabhūmiyam nānavaṇṇā honti, pabbatam pavitṭhakālato paṭṭhāya te sabbe tassobhāsenā suvaṇṇavaṇṇā honti. Tam disvā bodhisattassa kaniṭṭho tam kāraṇam ajānitvā “kiṃ nu kho ettha kāraṇa”’nti bhātārā saddhim sallapanto dve gāthā abhāsi –

20. “Kākolā kākasaṅghā ca, mayañca patatam varā;  
Sabbeva sadisā homa, imaṃ āgamma pabbatam.
21. “Idha sīhā ca byagghā ca, siṅgālā ca migādhamā;  
Sabbeva sadisā honti, ayam ko nāma pabbato”’ti.

Tattha **kākolāti** vanakākā. **Kākasaṅghāti** pakatikākasaṅghā ca. **Patatam varāti** pakkhīnam seṭṭhā. **Sadisā homāti** sadisavaṇṇā homa.

Tassa vacanam sutvā bodhisatto tatiyam gāthamāha –

22. “Imam nerūti jānanti, manussā pabbatuttamam;  
Idha vaṇṇena sampannā, vasanti sabbapāṇino”’ti.

Tattha **idha vaṇṇenāti** imasmim nerupabbate obhāsenā vaṇṇasampannā hutvā.

Taṃ sutvā kaniṭṭho sesagāthā abhāsi –

23. “Amānanā yattha siyā, antānaṃ vā vimānanā;  
Hīnasammānanā vāpi, na tattha visatiṃvase.
24. “Yatthālaso ca dakkho ca, sūro bhīru ca pūjīyā;  
Na tattha santo vasanti, avisesakare nare.
25. “Nāyaṃ neru vibhajati, hīnaukkaṭṭhamajjhime;  
Avisesakaro neru, handa neruṃ jahāmase”’ti.

Tattha paṭhamagāthāya ayamatto – yattha **santānaṃ** paṇḍitānaṃ sīlasampannānaṃ mānanassa abhāvena **amānanā** avamaññanā ca avamānavasena **vimānanā vā** hīnanānaṃ vā dussīlānaṃ sammānanā siyā, tattha nivāse na vaseyya. **Pūjīyāti** ete ettha ekasadisāya pūjāya pūjanīyā honti, samakaṃ sakkāraṃ labhanti. **Hīnaukkaṭṭhamajjhime**ti jātigottakulappadesasīlacāraññādīhi hīne ca majjhime ca ukkaṭṭhe ca ayaṃ na vibhajati. **Handāti** vavassaggatthe nipāto. **Jahāmaseti** pariccajāma. Evañca pana vatvā ubhopi te haṃsā uppatitvā cittakūṭameva gatā.

Satthā imaṃ dhammadesanaṃ āharitvā saccāni pakāsetvā jātakam samodhānesi, saccapariyosāne so bhikkhu sotāpattiphale patiṭṭhahi. Tadā kaniṭṭhahaṃso ānando ahosi, jeṭṭhakahaṃso pana ahameva ahosinti.

Nerujātakavaṇṇanā catutthā.

[380] 5. Āsaṅkajātakavaṇṇanā

**Āsāvati nāma latāti** idam satthā jetavane viharanto purāṇadutiyaikāpalobhanaṃ ārabha kathesi. Vatthu **indriyajātaka** (jā. 1.8.60 ādayo) āvi bhavissati. Idha pana satthā taṃ bhikkhuṃ “saccaṃ kira tvaṃ ukkaṇṭhitosi”’ti pucchitvā “saccaṃ, bhante”’ti vutte “kena ukkaṇṭhāpitosi”’ti vatvā “purāṇadutiyaikāya, bhante”’ti vutte “bhikkhu esā itthī tuyhaṃ anattakārikā, pubbepi tvaṃ etaṃ nissāya caturaṅginisenaṃ jahitvā himavantapadese mahantaṃ dukkhaṃ anubhavanto tīṇi saṃvaccharāni vasi”’ti vatvā aṭṭhaṃ āhari.

Atīte bārāṇasiyaṃ brahmadatte rajjaṃ kārente bodhisatto kāsigāme brāhmaṇakule nibbattitvā vayappatto takkasīlāyaṃ uggahitasippo isipabbajjaṃ pabbajitvā vanamūlaphalāhāro abhiññā ca samāpattiyo ca nibbattetvā himavantapadese vasi. Tasmim kāle eko puññasampanno satto tāvatimsabhavanato cavitvā tasmim ṭhāne padumasare ekasmim padumagabbhe dārikā hutvā nibbatti, sesapadumesu purāṇabhāvaṃ patvā patantesupi taṃ mahākucchikaṃ hutvā tiṭṭhateva. Tāpaso nahāyituṃ padumasaraṃ gato taṃ disvā “aññesu padumesu patantesupi idam mahākucchikaṃ hutvā tiṭṭhati, kiṃ nu kho kāraṇa”’nti cintetvā udakasātaṃ nivāsetvā otaranto gantvā taṃ padumaṃ vivaritvā taṃ dārikaṃ disvā dhītusaññaṃ uppādetvā paṇṇasālaṃ ānetvā paṭijaggi. Sā aparabhāge soḷasavassikā hutvā abhirūpā ahosi uttamarūpadharā atikkantā mānusakavaṇṇaṃ, apattā devavaṇṇaṃ. Tadā sakko bodhisattassa upaṭṭhānaṃ āgacchati, so taṃ dārikaṃ disvā “kuto esā”’ti pucchitvā laddhaniyāmaṃ sutvā “imissā kiṃ laddhuṃ vaṭṭatī”’ti pucchi. “Nivāsaṭṭhānaṃ vatthālaṅkārabhojanavidhānaṃ, mārisā”’ti. So “sādhu, bhante”’ti tassā vasanaṭṭhānassa āsanne phalikapāsādaṃ māpetvā dibbasayanadibbavatthālaṅkāradibbannapānāni māpesi.

So pāsādo tassā abhiruhanakāle otarivā bhūmiyaṃ patiṭṭhāti, abhiruḷhakāle laṅghitvā ākāse tiṭṭhati. Sā bodhisattassa vattapaṭivattaṃ kurumānā pāsāde vasati. Tameko vanacarako disvā “ayaṃ, vo bhante, kiṃ hotī”’ti pucchitvā “dhītā me”’ti sutvā bārāṇasiṃ gantvā “deva, mayā himavantapadese evarūpā nāma ekassa tāpasassa dhītā diṭṭhā”’ti rañño ārocesi. Taṃ sutvā so savanasaṃsaggena bajjhitvā vanacarakaṃ maggadesakaṃ katvā caturaṅginīyā senāya taṃ ṭhānaṃ gantvā khandhāvāraṃ nivāsāpetvā

vanacarakaṃ ādāya amaccagaṇaparivuto assamaṇapadaṃ pavisitvā mahāsattaṃ vanditvā ekamantaṃ nisinno “bhante, itthiyo nāma brahmacariyassa malaṃ, tumhākaṃ dhītaraṃ ahaṃ paṭijaggissāmi”ti āha. Bodhisatto pana “kiṃ nu kho etasmiṃ padume”ti āsaṅkaṃ katvā udakaṃ otaritvā ānītabhāvena tassā kumārikāya āsaṅkāti nāmaṃ akāsi. So taṃ rājānaṃ “imaṃ gahetvā gacchā”ti ujukaṃ avatvā “mahārāja, imāya kumārikāya nāmaṃ jānanto gaṇhitvā gacchā”ti āha. “Tumhehi kathite ñassāmi, bhante”ti. “Ahaṃ te na kathemi, tvaṃ attano paññābalena nāmaṃ jānantova gahetvā yāhi”ti. So “sādhū”ti sampaṭicchitvā tato paṭṭhāya amaccehi saddhiṃ “kinnāmā nu kho esā”ti nāmaṃ upadhāreti. So yāni dujjānāni nāmāni, tāni kittetvā “asukā nāma bhavissati”ti bodhisattena saddhiṃ katheti. Bodhisatto “na evaṃnāmā”ti paṭikkhipati.

Raṇṇo ca nāmaṃ upadhārentassa saṃvaccharo atīto. Tadā hatthiassamanusse sīhādayo vāḷā gaṇhanti, dīghajātikaparipantho hoti, makkhikaparipantho hoti, sītena kilamitvā bahū manussā maranti. Atha rājā kujjhivā “kiṃ me etāya”ti bodhisattassa kathetvā pāyāsi. Āsaṅkā kumārikā taṃ divasaṃ phalikavātapānaṃ vivaritvā attānaṃ dassentī aṭṭhāsi. Rājā taṃ disvā “mayaṃ tava nāmaṃ jānituṃ na sakkoma, tvaṃ himavanteyeva vasa, mayaṃ gamissāmā”ti āha. “Kahaṃ, mahārāja, gacchanto mādisaṃ itthiṃ labhissasi, mama vacanaṃ suṇāhi, tāvatimsadevaloke cittalatāvane āsāvati nāma latā atthi, tassā phalassa abbhantare dibbapānaṃ nibbattaṃ, taṃ ekavāraṃ pivitvā cattāro māse mattā hutvā dibbasayane sayanti, sā pana vassasahassena phalati, surāsoṇḍā devaputtā ‘ito phalaṃ labhissāmā’ti dibbapānapipāsaṃ adhvāsetvā vassasahassaṃ nibaddhaṃ gantvā taṃ lataṃ ‘arogā nu kho’ti olokenī, tvaṃ pana ekasaṃvacchareneva ukkaṇṭhito, āsāphalavatī nāma sukhā, mā ukkaṇṭhi”ti vatvā tisso gāthā abhāsi –

26. “Āsāvati nāma latā, jātā cittalatāvane;  
Tassā vassasahassena, ekaṃ nibbattate phalaṃ.
27. “Taṃ devā payirupāsanti, tāva dūraphalaṃ satim;  
Āsīseva tvaṃ rāja, āsā phalavatī sukhā.
28. “Āsīsateva so pakkhī, āsīsateva so dijo;  
Tassa cāsā samijjhati, tāva dūragatā satī;  
Āsīseva tvaṃ rāja, āsā phalavatī sukhā”ti.

Tattha āsāvati evaṃnāmikā. Sā hi yasmā tassā phale āsā uppajjati, tasmā etaṃ nāmaṃ labhati. **Cittalatāvane**ti evaṃnāmake uyyāne. Tasmim kira uyyāne tiṇarukkhalatādīnaṃ pabhā tattha pavitṭhapavitṭhānaṃ devatānaṃ sarīraṇṇaṃ cittaṃ karoti, tenassa “cittalatāvana”nti nāmaṃ jātaṃ. **Payirupāsanti**ti punappunaṃ upenti. **Āsīsevati** āsīsāhiyeva patthehiyeva, mā āsacchedaṃ karohīti.

Rājā tassā kathāya bajjhivā puna amacce sannipāṭepetvā dasanāmaṃ kāretvā nāmaṃ gavesanto aparampi saṃvaccharaṃ vasi. Tassā dasanāmakampi nāmaṃ nāhosi, “asukā nāmā”ti vutte bodhisatto paṭikkhipateva. Puna rājā “kiṃ me imāya”ti turaṅgaṃ āruya pāyāsi. Sāpi puna vātapāne ṭhatvā attānaṃ dassesi. Rājā “tiṭṭha tvaṃ, mayaṃ gamissāmā”ti āha. “Kasmā yāsi, mahārāja”ti? “Tava nāmaṃ jānituṃ na sakkomi”ti. “Mahārāja, kasmā nāmaṃ na jānissasi, āsā nāma asamijjhanakā nāma natthi, eko kira bako pabbatamuddhani ṭhito attanā patthitaṃ labhi, tvaṃ kasmā na labhissasi, adhvāsehi, mahārāja”ti. Eko kira bako ekasmiṃ padumasare gocaraṃ gahetvā uppatitvā pabbatamatthake nilīyi. So taṃ divasaṃ tattheva vasitvā punadivase cintesi “ahaṃ imasmiṃ pabbatamatthake sukhaṃ nisinno, sace ito anotaritvā ettheva nisinno gocaraṃ gahetvā pānīyaṃ pivitvā imaṃ divasaṃ vaseyyaṃ, bhadrakaṃ vata assā”ti. Atha taṃ divasameva sakko devarājā asuranimmathanaṃ katvā tāvatimsabhavane devissariyaṃ laddhā cintesi ‘mama tāva manoratho matthakaṃ patto, atthi nu kho añño koci aparipuṇṇamanoratho’ti upadhārento taṃ disvā ‘imassa manorathaṃ matthakaṃ pāpessāmi’ti bakassa nisinnaṭṭhānato avidūre ekā nadī atthi, taṃ nadiṃ oghapuṇṇaṃ katvā pabbatamatthakena pesesi. Sopi bako tattheva nisinno macche khādītva pānīyaṃ

pivivā taṃ divasaṃ tattheva vasi, udakampi bhassitvā gataṃ. “Evaṃ, mahārāja, bakopi tāva attano āsāphalaṃ labhi, kiṃ tvaṃ na labhissasī”ti vatvā “**āsīsatevā**”tiādimāha.

Tattha **āsīsatevā**ti āsīsatiyeva patthetiyeva. **Pakkhī**ti pakkhehi yuttatāya pakkhī. Dvikkhattuṃ jātatāya **dijo**. **Tāva dūragatā satī**ti pabbatamatthakato macchānañca udakassa ca dūrabhāvaṃ passa, evaṃ dūragatā samānā sakkassa ānubhāvena bakassa āsā pūriyevāti.

Atha rājā tassā kathaṃ sutvā rūpe bajjhivā kathāya allīno gantuṃ asakkonto amacce sannipātetvā satanāmaṃ kāresi, satanāmavasena nāmaṃ gavesatopissa aññaṃ saṃvaccharaṃ atītaṃ. So tiṇṇaṃ saṃvaccharānaṃ accayena bodhisattaṃ upasaṅkamitvā satanāmavasena “asukā nāma bhavissatī”ti pucchi. “Na jānāsi, mahārāja”ti. So “gamissāma dāni maya”nti bodhisattaṃ vanditvā pāyāsi. Āsaṅkā kumārikā ca puna phalikavātapānaṃ nissāya ʃhitāva. Rājā taṃ disvā “tvaṃ accha, mayaṃ gamissāmā”ti āha. “Kasmā, mahārāja”ti. “Tvaṃ maṃ vacaneneva santappesi, na ca kāmaratiyā, tava madhuravacanena bajjhivā vasantassa mama tīṇi saṃvaccharāni atikkantāni, idāni gamissāmī”ti imā gāthā āha –

29. “Sampesi kho maṃ vācāya, na ca sampesi kammunā;  
Mālā sereyyakasseva, vaṇṇavantā agandhikā.
30. “Aphalaṃ madhuraṃ vācaṃ, yo mittesu pakubbatī;  
Adadaṃ avissajaṃ bhogaṃ, sandhi tenassa jīrati.
31. “Yañhi kayirā tañhi vade, yaṃ na kayirā na taṃ vade;  
Akarontaṃ bhāsamānaṃ, parijānanti paṇḍitā.
32. “Balañca vata me khīṇaṃ, pātheyyañca na vijjati;  
Saṅke pāṇūparodhāya, handa dāni vajāmaha”nti.

Tattha **sampesī**ti santappesi pīnesi. **Sereyyakassā**ti suvaṇṇakuraṇḍakassa. Desanāsīsamevetāṃ, yaṃkiñci pana suvaṇṇakuraṇḍakajayasumanādikaṃ aññaṃ pupphaṃ vaṇṇasampannaṃ agandhakaṃ, sabbāṃ taṃ sandhāyevamāha. **Vaṇṇavantā agandhikā**ti yathā sereyyakādīnaṃ mālā vaṇṇavantatāya dassanena tappeti, agandhatāya gandhena na tappeti, evaṃ tvampi dassanena piyavacanena ca santappesi, na kammunāti dīpeti. **Adadanti** bhadde, yo “imaṃ nāma vo bhogaṃ dassāmī”ti madhuravacanena vatvā taṃ bhogaṃ adadanto avissajjento kevalaṃ madhuravacanameva karoti, tena saddhiṃ assa mittassa sandhi jīrati, mittasanthavo na ghaṭṭiyati. **Pātheyyañcā**ti bhadde, mayhaṃ tava madhuravacanena bajjhivā tīṇi saṃvaccharāni vasantasseva hatthiassarathapattisaṅkhātāṃ balañca khīṇaṃ, manussānaṃ bhattavetasāṅkhātāṃ pātheyyañca natthi. **Saṅke pāṇūparodhāyā**ti svāhaṃ idheva attano jīvitavināsaṃ āsaṅkāmi, handa dānaṃ gacchāmīti.

Āsaṅkā kumārikā rañño vacanaṃ sutvā “mahārāja, tvaṃ mayhaṃ nāmaṃ jānāsi, tayā vuttameva mama nāmaṃ, idaṃ me pitu kathetvā maṃ gaṇhitvā yāhī”ti rañña saddhiṃ sallapantī āha –

33. “Etadeva hi me nāmaṃ, yaṃnāmasmi rathesabha;  
Āgamehi mahārāja, pitarāṃ āmantayāmaha”nti.

Tassattho – yaṃnāmā ahaṃ asmi, taṃ etaṃ āsaṅkātveva mama nāmanti.

Taṃ sutvā rājā bodhisattassa santikaṃ gantvā “bhante, tumhākaṃ dhītā āsaṅkā nāmā”ti āha. “Nāmaṃ ñātakālato paṭṭhāya taṃ gahetvā gaccha, mahārāja”ti. So mahāsattaṃ vanditvā phalikavimānavāraṃ āgantvā āha – “bhadde, pitarāpi te mayhaṃ dinnā, ehi dāni gamissāmā”ti. “Āgamehi, mahārāja, pitarāṃ āmantayāmaha”nti pāsādā otaritvā mahāsattaṃ vanditvā roditvā



khamāpetvā rañño santikaṃ āgatā. Rājā taṃ gahetvā bārānasim gantvā puttadhītāhi vaḍḍhanto piyasamvāsaṃ vasi. Bodhisatto aparihīnajjhāno brahmaloke uppajji.

Satthā imaṃ dhammadesanaṃ āharitvā saccāni pakāsetvā jātakam samodhānesi, saccapariyosāne ukkaṅṅhitabhikkhu sotāpattiphale patitṭhahi. Tadā āsankā kumārikā purāṇadutiyyikā ahoṣi, rājā ukkaṅṅhitabhikkhu, tāpaso pana ahameva ahoṣinti.

Āsaṅkajātakavaṇṇanā pañcamā.

[381] 6. Migālopajātakavaṇṇanā

**Na me rucṅīti** idaṃ satthā jetavane viharanto ekaṃ dubbacabhikkhuṃ ārabba kathesi. Satthā taṃ bhikkhuṃ pakkosāpetvā “saccaṃ kira tvaṃ bhikkhu dubbaco”ti pucchitvā “āma, bhante”ti vutte “na kho bhikkhu idāneva, pubbepi tvaṃ dubbacoyeva, dubbacabhāvañca pana nissāya paṇḍitānaṃ vacanaṃ akaronto verambhavātamukhe byasanaṃ gatosī”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto gijjhayoniyaṃ nibbattitvā apanandagijjho nāma ahoṣi. So gijjhagaṇaparivuto gijjhakūṭapabbate vasi. Putto panassa migālopo nāma thāmabalasampanno ahoṣi, so aññesaṃ gijjhānaṃ sīmaṃ atikkamitvā atiuccaṃ uppatti. Gijjhā “putto te atidūraṃ uppattati”ti gijjharañño ācikkhimsu. So taṃ pakkosetvā “tvaṃ kira, tāta, atiuccaṃ gacchasi, atiuccaṃ gacchanto jīvitaṅkayaṃ pāpuṇissasi”ti vatvā tisso gāthā abhāsi –

34. “Na me rucṅī migālopa, yassa te tādisī gatī;  
Atuccaṃ tāta patasi, abhūmiṃ tāta sevasi.
35. “Catukkaṇṇaṃva kedāraṃ, yadā te pathavī siyā;  
Tato tāta nivattassu, māssu etto paraṃ gami.
36. “Santi aññepi sakuṇā, pattayānā vihaṅgamā;  
Akkhittā vātavegena, naṭṭhā te sassatīsamā”ti.

Tattha **migālopāti** puttaṃ nāmena ālapati. **Atuccaṃ tāta patasīti** tāta, tvaṃ aññesaṃ gijjhānaṃ sīmaṃ atikkamitvā atiuccaṃ gacchasi. **Catukkaṇṇaṃva kedāraṃ** imināssa sīmaṃ ācikkhati. Idaṃ vuttaṃ hoti – tāta, yadā te ayaṃ mahāpathavī catukkaṇṇaṃ kedāraṃ viya siyā, evaṃ khuddikā viya hutvā paññāyetha, atha tvaṃ ettakā thānā nivatteyyāsi, etto paraṃ mā gamīti. **Santi aññepīti** na kevalaṃ tvameva, aññepi gijjhā evaṃ karimsūti dīpeti. **Akkhittāti** tepi gijjhā amhākaṃ sīmaṃ atikkamitvā gatā vātavegena ākaḍḍhitā nassimsu. **Sassatīsamāti** sassatīhi pathavīpabbatādīhi samaṃ attānaṃ maññamānā attano vassasahassaparimāṇaṃ āyumaṃ apūretvāpi antarā naṭṭhāti attho.

Migālopo anovādakattā pitu vacanaṃ akatvā laṅghanto pitarā akkhātaṃ sīmaṃ disvā taṃ atikkamma kālavāte patvā tepi chinditvā uppattito verambhavātamukhaṃ pakkhandi, atha naṃ verambhavāta paharimsu. So tehi pahaṭamattova khaṇḍākhāṇḍaṃ hutvā ākāseyeva antaradhāyi.

37. “Akatvā apanandassa, pitu vuddhassa sāsanaṃ;  
Kālavāte atikkamma, verambhānaṃ vasaṃ agā.
38. “Tassa puttā ca dārā ca, ye caññe anujīvino;  
Sabbe byasanaṃpādumaṃ, anovādakare dije.
39. “Evampi idha vuddhānaṃ, yo vākyaṃ nāvabujjhati;  
Atisīmacaro ditto, gijjhovātītasāsano;  
Sabbe byasanaṃ papponti, akatvā vuddhasāsana”nti. –

Imā tisso abhisambuddhagāthā.

Tattha **anujivinoti** taṃ nissāya jīvanakā. **Anovādakare dijeti** tasmim migālope gijjhe ovādaṃ agaṇhante sabbe pi te tena saddhiṃ atisīmaṃ gantvā vināsaṃ pāpuṇiṃsu. **Evampīti**, bhikkhave, yathā so gijjho, evaṃ yo aññopi gahaṭṭho vā pabbajito vā hitānukampakānaṃ vuddhānaṃ vacanaṃ na gaṇhāti, sopi ayam sīmaṃ atikkamitvā caranto ditto gabbito gijjhova byasanaṃ pāpuṇātīti.

Satthā imaṃ dhammadesanaṃ āharitvā saccāni pakāsetvā jātaṃ samodhānesi – “taḍā migālopo dubbacabhikkhu aho si, apanando pana ahameva aho si”nti.

Migālopajātakavaṇṇanā chaṭṭhā.

[382] 7. Sirikāḷakaṇṇijātakavaṇṇanā

**Kā nu kālena vaṇṇenā**ti idaṃ satthā jetavane viharanto anāthapiṇḍikaṃ ārabba kathesi. So hi sotāpattiphale patiṭṭhitakāḷato paṭṭhāya akhaṇḍāni pañca sīlāni rakkhi, bhariyāpissa puttadhītaropi dāsāpi bhatim gahetvā kammaṃ karontā kammakarāpi sabbe rakkhiṃsuyeva. Athekadivasaṃ bhikkhū dhammasabhāyaṃ kathaṃ samuṭṭhāpesuṃ “āvuso, anāthapiṇḍiko suciyeva suciparivāro hutvā caratī”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbe porāṇakapaṇḍitāpi suciyeva suciparivārā ahesu”nti vatvā tehi yācito atītaṃ āhari.

Atīte bārānasiyaṃ brahmadatte rajjaṃ kārente bodhisatto seṭṭhi hutvā dānaṃ adāsi, sīlaṃ rakkhi, uposathakammaṃ kari, bhariyāpissa pañca sīlāni rakkhi, puttadhītaropi dāsakammakaraporisāpi pañca sīlāni rakkhiṃsu. So suciparivāraseṭṭhitveva paññāyittha. Athekadivasaṃ so cintesi “sace mayā suciparivārasīlo koci āgamissati, tassa mama nisīdanapallaṅkaṃ vā nipajjanasayanaṃ vā dātuṃ na yuttaṃ, anucchiṭṭhaṃ aparibhuttaṃ dātuṃ vaṭṭatī”ti attano vasanaṭṭhāneyeva ekapasse aparibhuttapallaṅkaṃ senāsanaṃ paññāpesi. Tasmim samaye cātumahārājikadevalokato virūpakkhamahārājassa dhītā kāḷakaṇṇī ca nāma dhataṛaṭṭhamahārājassa dhītā sirī ca nāmāti imā dve bahuṃ gandhamālaṃ ādāya “anotatte kīlissamā”ti anotattatitthaṃ āgacchiṃsu. Tasmim pana dahe bahūni titthāni, tesu buddhānaṃ titthe buddhāyeva nhāyanti, paccekabuddhānaṃ titthe paccekabuddhāva nhāyanti, bhikkhūnaṃ titthe bhikkhūva nhāyanti, tāpasānaṃ titthe tāpasāva nhāyanti, cātumahārājikādīsu chasu kāmasaggesu devaputtānaṃ titthe devaputtāva nhāyanti, devadhītānaṃ titthe devadhītāva nhāyanti.

Tatrimā dve āgantvā “ahaṃ paṭhamaṃ nhāyissāmi, ahaṃ paṭhama”nti titthāya kalahaṃ karimṃsu. Kāḷakaṇṇī “ahaṃ lokaṃ pālemi vicāremi, tasmā paṭhamaṃ nāyituṃ yuttāmhī”ti vadati. Sirī “ahaṃ mahājanassa issariyadāyikāya paṭipadāya ṭhitā, tasmā paṭhamaṃ nhāyituṃ yuttāmhī”ti vadati. Tā “amhesu paṭhamaṃ nhāyituṃ yuttarūpaṃ vā ayuttarūpaṃ vā cattāro mahārājāno jānissantī”ti tesam santikaṃ gantvā “amhesu kā paṭhamaṃ anotattadahe nhāyituṃ yuttarūpā”ti pucchimṃsu. Dhataṛaṭṭhavirūpakkhā “na sakkā amhehi vinicchinitu”nti virūḷhakavessavaṇṇaṃ bhāramakaṃsu. Te “amhepi na sakkhissāma, sakkassa pādāmūle pesessamā”ti tā sakkassa santikaṃ pesesuṃ. Sakko tāsam vacanaṃ sutvā cintesi “imā dve pi mama purisānaññeva dhītaro, na sakkā mayā imaṃ aḍḍaṃ vinicchinitu”nti. Atha tā sakko āha “bārānasiyaṃ suciparivāro nāma seṭṭhi atthi, tassa ghare anucchiṭṭhasayanaṃ paññattaṃ, yā tattha nisīdituṃ vā sayituṃ vā labhati, sā paṭhamaṃ nhāyituṃ yuttarūpā”ti. Taṃ sutvā kāḷakaṇṇī tasmim khaṇeyeva nīlavatthaṃ nivāsetvā nīlavilepanaṃ vilimpitvā nīlamanipīḷandhanaṃ pīḷandhitvā yantapāsāṇo viya devalokato otaritvā majjhimayāmasamanantare seṭṭhino pāsādassa upaṭṭhānadvāre sayanassa avidūre ṭhāne nīlarasmim vissajjetvā ākāse atṭhāsi. Seṭṭhi oloketvā taṃ addasa, sahadassanenevassa sā appiyā aho si amanāpā. So tāya saddhiṃ sallapanto paṭhamaṃ gāthamāha –

40. “Kā nu kālena vaṇṇena, na cāpi piyadassanā;

Kā vā tvam kassa vā dhītā, katham jānemu taṃ maya’nti.

Tattha **kālenā**ti nīlena. **Vaṇṇenā**ti sarīravatthābharaṇavaṇṇena. **Na cāpi piyadassanā**ti dhātuso, bhikkhave, sattā saṃsandantīti vuttam, ayañca devadhītā anācārā dussilā, tasmā sā sahadassanenevassa appiyā jātā, tenevamāha. **Kā vā tvanti** “kā ca tvam, ayameva vā pāṭho.

Taṃ sutvā kāḷakaṇṇī dutiyam gāthamāha –

41. “Mahārājassahaṃ dhītā, virūpakkhassa caṇḍiyā;  
Ahaṃ kāḷī alakkhikā, kāḷakaṇṇīti maṃ vidū;  
Okāsaṃ yācito dehi, vasemu tava santike’nti.

Tattha **caṇḍiyā**ti kodhanā. Kodhabhāvena hi mayham caṇḍīti nāmaṃ karimsu. **Alakkhikā**ti nippaññā. **Maṃ vidū**ti evaṃ maṃ cātumahārājikadevaloke jānanti. **Vasemū**ti mayam ajja ekarattam tava santike vaseyyāma, etasmim me anucchiṭṭhāsanasayane okāsaṃ dehīti.

Tato bodhisatto tatiyam gāthamāha –

42. “Kiṃsīle kiṃsamācāre, purise nivisase tuvaṃ;  
Puṭṭhā me kāḷī akkhāhi, katham jānemu taṃ maya’nti.

Tattha **nivisaseti** tava cittaena nivisasi patiṭṭhahasīti.

Tato sā attano guṇam kathentī catuttham gāthamāha –

43. “Makkhī paḷāsī sārāmbhī, issukī maccharī saṭho;  
So mayham puriso kanto, laddham yassa vinassati’nti.

Tassattho – yo puriso attano kataguṇam na jānāti, guṇamakkhī hoti, attano kismiñci kāraṇe kathite “kiṃ aham etaṃ na jānāmī”ti yugaggāham gaṇhāti, aññehi kiñci kataṃ disvā sārāmbhavasena karaṇuttarikam karoti, pare lābham labhante na tussati, “mayham issariyam paresam mā hotu, mayhameva hotu”ti sakasampattiṃ gopetvā parassa tiṇaggena telabindumpi na deti, kerāṭikalakkhaṇena samannāgato hutvā attano santakam parassa adatvā tehi tehi upāyehi parasantakameva khādati, yassa laddham dhaññaṃ vā dhanam vā vinassati na tiṭṭhati, surādhutto akkhadhutto itthidhutto vā hutvā laddham laddham vināsetiyeva, ayam etehi guṇehi samannāgato puriso mayham kanto piyo manāpo, evarūpe aham cittaena patiṭṭhahāmīti.

Sāyeva pañcamachaṭṭhasattamagāthā abhāsi –

44. “Kodhano upanāhī ca, piṣuṇo ca vibhedako;  
Kaṇḍakavāco pharuso, so me kantataro tato.
45. “Ajja suveti puriso, sadattham nāvabujjhati;  
Ovajjamāno kuppati, seyyam so atimaññati.
46. “Davappaluddho puriso, sabbamittehi dhamṣati;  
So mayham puriso kanto, tasmim homi anāmayā’nti.

Tāpi imināva nayena vitthāretabbā. Saṅkhepattho panettha – **kodhanoti** appamattakenāpi kujjhanako. **Upanāhī**ti parassa aparādham hadaye ṭhapetvā sucirenapi tassa anattakārako. **Piṣuṇoti** piṣuṇavāco. **Vibhedakoti** appamattakenapi mittabhindanako. **Kaṇḍakavācoti** sadosavāco. **Pharusoti**

thaddhavāco. **Kantataroti** so puriso mayhaṃ purimāpi kantataro piyataro. **Ajja suveti** “idaṃ kammaṃ ajja kātabbaṃ, idaṃ sve, idaṃ tatiyadivasādīsū”ti evaṃ so sadatthaṃ attano kiccaṃ nāvabujjhati na jānāti. **Ovajjamānoti** ovadiyamāno. **Seyyaṃ so atimaññatīti** jātigottakulappadesasīlācāraguṇehi uttaritaraṃ uttamapuggalaṃ “tvaṃ mayhaṃ kiṃ pahosī”ti atikkamitvā maññati. **Davappaluddhoti** rūpādīsū kāmāguṇesu nirantaradavena paluddho abhibhūto vasaṃ gato. **Dhamsatīti** “tayā mayhaṃ kiṃ kata”ntiādīni vatvā sabbeveva mittehi dhamsati parihāyati. **Anāmayāti** ayaṃ etehi guṇehi samannāgate puggale niddukkā nissokā homi, taṃ labhitvā aññattha anālayā hutvā vasāmī”ti.

Atha naṃ garahanto mahāsatto aṭṭhamāṃ gāthamāha –

47. “Apehi etto tvaṃ kāḷi, netāṃ amhesu vijjati;  
Aññaṃ janapadaṃ gaccha, nigame rājadhāniyo”ti.

Tattha **apehīti** apagaccha. **Netāṃ amhesūti** etaṃ makkhādikaṃ tava piyabhāvakaraṇaṃ amhesupi na vijjati natthi. **Nigame rājadhāniyoti** aññe nigamepi añña rājadhāniyopi gaccha, yattha mayaṃ taṃ na passāma, tattha gacchāti dīpeti.

Taṃ sutvā kāḷakaṇṇī additā hutvā anantaragāthamāha –

48. “Ahampi kho taṃ jānāmi, netāṃ tumhesu vijjati;  
Santi loke alakkhikā, saṅgharanti bahuṃ dhaṇaṃ;  
Ahaṃ devo ca me bhātā, ubho naṃ vidhamāmase”ti.

Tattha **netāṃ tumhesūti** yaṃ mama piyabhāvakaraṇaṃ makkhādikaṃ yena ahaṃ attanāpi samannāgatā, taṃ tumhesu natthīti ahampi etaṃ jānāmi. **Santi loke alakkhikāti** aññe pana loke nissīlā nippañña santi. **Saṅgharantīti** te nissīlā nippaññāpi samānā etehi makkhādīhi bahuṃ dhaṇaṃ saṅgharanti piṇḍaṃ karonti. **Ubho nanti** taṃ pana etehi saṅgharivā ṭhapitaṃ dhaṇaṃ ahañca mayhameva bhātā devo ca nāma devaputtoti ubho ekato hutvā vidhamāmase nāsema, amhākaṃ pana devaloke bahū dibbaparibhogā atthi dibbāni sayanāni, tvaṃ dadeyyāsi vā no vā, ko me tayā atthoti vatvā pakkāmi.

Tassā pakkantakāle sirī devadhītā suvaṇṇavaṇṇehi vatthavilepanehi suvaṇṇālaṅkārena āgantvā upaṭṭhānavāre pītarasmim̐ vissajjetvā samehi pādehi samaṃ pathaviyaṃ patiṭṭhāya sagāravā aṭṭhāsi. Taṃ disvā mahāsatto paṭhamāṃ gāthamāha –

49. “Kā nu dibbena vaṇṇena, pathabyā supatiṭṭhitā;  
Kā vā tvaṃ kassa vā dhītā, kathaṃ jānemu taṃ maya”nti.

Tattha **dibbenāti** visiṭṭhena uttamena.

Taṃ sutvā sirī dutiyaṃ gāthamāha –

50. “Mahārājassahaṃ dhītā, dhataratṭhassa sirīmato;  
Ahaṃ sirī ca lakkhī ca, bhūripaññāti maṃ vidū;  
Okāsaṃ yācito dehi, vasemu tava santike”ti.

Tattha **sirī ca lakkhī cāti** sirīti ca lakkhīti ca ahamevaṃnāmā, na añña. **Bhūripaññāti maṃ vidūti** maṃ cātumahārājikadevaloke pathavīsamāya vipulāya paññāya samannāgatāti jānanti. **Vasemu tava santiketī** tava anucchiṭṭhāsane ceva anucchiṭṭhasayane ca ekarattim̐ vaseyyāma, okāsaṃ me dehīti.

Tato param bodhisatto āha –

51. “Kimsīle kimsamācāre, purise nivisase tuvaṃ;  
Puṭṭhā me lakkhi akkhāhi, katham jānemu taṃ mayaṃ.
52. “Yo cāpi sīte atha vāpi uṇhe, vātātape ḍaṃsasarīsape ca;  
Khudham pipāsaṃ abhibhuyya sabbaṃ, rattindivaṃ yo satataṃ niyutto.
53. “Kālāgatañca na hāpeti atthaṃ, so me manāpo nivise ca tamhi;  
Akkodhano mittavā cāgavā ca, sīlūpanno asaṭhojubhūto.
54. “Saṅgāhako sakhilo saṅhavāco, mahattapattopi nivātavutti;  
Tasmimhaṃ pose vipulā bhavāmi, ūmi samuddassa yathāpi vaṇṇaṃ.
55. “Yo cāpi mitte atha vā amitte, seṭṭhe sarikkhe atha vāpi hīne;  
Atthaṃ carantaṃ atha vā anattaṃ, āvī raho saṅgahameva vatte.
56. “Vācaṃ na vajjā pharusam kadāci, matassa jīvassa ca tassa homi;  
Etesam yo aññataram labhitvā, kantā sirī majjati appapañño;  
Taṃ dittarūpaṃ visamaṃ carantaṃ, karīsaṭhānaṃva vivajjayāmi.
57. “Attanā kurute lakkhiṃ, alakhiṃ kurutattanā;  
Na hi lakkhiṃ alakhiṃ vā, añño aññassa kāraḷo”ti.

Seṭṭhissa pucchā hoti, siriyaṃ vissajjanā.

Tattha **ḍaṃsasarīsape cāti** ḍaṃsā vuccanti piṅgalamakkhikā, sabbāpi vā makkhikājātikā idha “ḍaṃsā”ti adhippetā. **Sarīsapāti** dīghajātikā. Ḍaṃsā ca sarīsapā ca ḍaṃsasarīsapā, tasmim ḍaṃsasarīsape sati. Idaṃ vuttaṃ hoti – yo mahāseṭṭhi sīte vā uṇhe vā vātātape vā ḍaṃsasarīsape vā sati etehi sītādīhi pīliyamānopi etāni ceva sītādīni khudhañca pipāsañcāti sabbampetaṃ parissayaṃ abhibhuyya abhibhavitvā tiṇaṃ viya agaṇetvā rattindivaṃ kasivañijjādīsu ceva dānasīlādīsu ca satataṃ attano kammesu niyutto attānaṃ yojetvā vattati.

**Kālāgatañcāti** kasikālādīsu kasiādīni dhanapariccāgasīlarakkhaṇadhammassavanādikālesu ca dhanapariccajanādippabhedam diṭṭhadhammasamparāye sukhāvahaṃ atthaṃ na hāpeti, yuttappayuttakāle karotiyeva, so mayhaṃ manāpo tasmiñca purise ahaṃ nivisāmīti. **Akkodhanoti** adhivāsanakhanthiyā samannāgato. **Mittavāti** kalyāṇamittena samannāgato. **Cāgavāti** dhanapariccāgayutto.

**Saṅgāhakoti** mittasaṅgahaāmisasaṅgahadhammasaṅgahānaṃ kāraḷo. **Sakhiloti** muduvāco. **Saṅhavācoti** madhuravacano. **Mahattapattopi nivātavuttīti** mahantaṃ ṭhānaṃ vipulaṃ issariyaṃ pattopi yasena anuddhato nīcavutti paṇḍitānaṃ ovādakaro hoti. **Tasmimhaṃ pose**ti tasmim ahaṃ purise. **Vipulā bhavāmīti** akhuddakā homi. So hi mahatīyā siriyaṃ padaṭṭhānaṃ. **Ūmi samuddassa yathāpi vaṇṇanti** yathā nāma samuddassa vaṇṇaṃ oloketānaṃ uparūpari āgacchamānā ūmi vipulā viya khāyati, evamahaṃ tasmim puggale vipulā homīti dīpeti.

**Āvī raho**ti sammukhā ca parammukhā ca. **Saṅgahameva vatteti** etasmim mittādibhede puggale catubbidhaṃ saṅgahameva vatteti pavatteti.

**Na vajjāti** yo kadāci kismiñci kāle pharusavacanaṃ na vadeyya, madhuravacanova hoti. **Matassa jīvassa cāti** tassāhaṃ puggalassa matassapi jīvantassapi bhattikā homi, idhalokepi paralokepi

tādisameva bhajāmīti dasseti. **Etesaṃ yoti** etesaṃ sītābhībhavanādīnaṃ heṭṭhā vuttaguṇānaṃ yo puggalo ekampi guṇaṃ labhitvā pamajjati pamussati, puna nānuyuñjatīti attho. **Kantā siri, kantasiriṃ, kantaṃ sirinti** tayopi pāṭhā, tesam vasena ayaṃ atthayojanā – yo puggalo siriṃ labhitvā “kantā me siri yathāṭhāne ṭhitā”ti etesaṃ aññataram guṇaṃ pamajjati, yo vā puggalo kantasiriṃ piyasiriṃ icchanto etesaṃ guṇānaṃ aññataram labhitvā pamajjati, yo vā puggalo siriṃ labhitvā kantaṃ manāpaṃ siriṃ etesaṃ guṇānaṃ aññataram pamajjati. **Appapaññoti** nippañño. **Taṃ dittarūpaṃ visamaṃ carantanti** taṃ ahaṃ dittasabhāvaṃ gabbitasabhāvaṃ kāyaduccaritādibhedam visamaṃ carantaṃ sucijātiko manusso gūthakūpaṃ viya dūrato vivajjayāmīti.

**Añño aññassa kārakoti** evaṃ sante lakkhiṃ vā alakkhiṃ vā añño puriso aññassa kārako nāma natthi, yo koci attanā attano lakkhiṃ vā alakkhiṃ vā karotīti.

Evaṃ mahāsatto deviyā vacanaṃ abhinanditvā “idaṃ anucchiṭṭhaṃ āsanañca sayanañca tuyhaṃyeva anucchavikaṃ, pallanke ca sayane ca nisīda ceva nipajja cā”ti āha. Sā tattha vasitvā paccūsakāle nikkhamitvā cātumahārājikadevalokaṃ gantvā anotattadahe paṭhamaṃ nahāyi. Tampi sayanaṃ siridevatāya paribhuttabhāvā sirisayanaṃ nāma jātaṃ. Sirisayanassa ayaṃ vaṃso, iminā kāraṇena yāvajjatanā “sirisayana”nti vuccati.

Satthā imaṃ dhammadesanaṃ āharitvā jātaṃ samodhānesi – “tadā siridevī uppalavaṇṇā ahoṣi, suciparivāraseṭṭhi pana ahameva ahoṣi”nti.

Sirikāḷakaṇṇijātakavaṇṇanā sattamā.

[383] 8. Kukkuṭajātakavaṇṇanā

**Sucittapattachadanā**ti idaṃ satthā jetavane viharanto ekaṃ ukkaṇṭhitabhikkhuṃ ārabha kathesi. Tañhi bhikkhuṃ satthā “kasmā ukkaṇṭhitosī”ti pucchitvā “ekaṃ alaṅkatapaṭiyattaṃ itthiṃ disvā kilesavasena, bhante”ti vutte “bhikkhu itthiyo nāma vañcetaṃ upalāpetvā attano vasaṃ gatakāle vināsaṃ pāpentī, lolabīḷārī viya hontī”ti vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto araññe kukkuṭayoniyam nibbattitvā anekasatakukkuṭaparivāro araññe vasati. Tassa avidūre ekā biḷārikāpi vasati. Sā ṭhapetvā bodhisattaṃ avasese kukkuṭe upāyena vañcetaṃ khādi. Bodhisatto tassā gahaṇaṃ na gacchati. Sā cintesi “ayaṃ kukkuṭo ativiya saṭho amhākañca saṭhabhāvaṃ upāyakusalabhāvañca na jānāti, imaṃ mayā ‘ahaṃ bhariyā te bhavissāmi”ti upalāpetvā attano vasaṃ āgatakāle khāditaṃ vaṭṭatī”ti. Sā tena nisinnarukkhasa mūlaṃ gantvā vaṇṇasambhāsanapubbaṅgamāya vācāya taṃ yācamānā paṭhamaṃ gāthamāha –

58. “Sucittapattachadana, tambacūḷa vihaṅgama;  
Oroha dumasākhāya, mudhā bhariyā bhavāmi te”ti.

Tattha **sucittapattachadanā**ti sucittehi pattehi katacchadana. **Mudhā**ti vinā mūlena na kiñci gahetvā ahaṃ bhariyā te bhavāmi.

Taṃ sutvā bodhisatto “imāya mama sabbe ñātakā khādītā, idāni maṃ upalāpetvā khādītukāmā ahoṣi, uyyojessāmi na”nti cintetvā dutiyaṃ gāthamāha –

59. “Catuppādī tvaṃ kalyāṇi, dvipadāhaṃ manorame;  
Migī pakkhī asaṇṇuttā, aññaṃ pariyesa sāmika”nti.

Tattha **migī**ti biḷāriṃ sandhāyāha. **Asaṇṇuttā**ti jayampatikā bhavitaṃ ayuttā asambandhā, natthi tesam īdiso sambandhoti dīpeti.

Taṃ sutvā tato sā “ayaṃ ativiya saṭho, yena kenaci upāyena vañcetvā maṃ khādissāmī”ti cintevā tatiyaṃ gāthamāha –

60. “Komārikā te hessāmi, mañjukā piyabhāṇinī;  
Vinda maṃ ariyena vedena, sāvaya maṃ yadicchasi”ti.

Tattha **komārikā**ti ahaṃ ettakaṃ kālaṃ aññaṃ purisaṃ na jānāmi, tava komārikā bhariyā bhavissāmīti vadati. **Mañjukā piyabhāṇinī**ti tava madhurakathā piyabhāṇinīyeva bhavissāmi. **Vinda manti** paṭilabha maṃ. **Ariyena vedenā**ti sundarena paṭilābhena. Ahampi hi ito pubbe purisasamphassaṃ na jānāmi, tvampi itthisamphassaṃ na jānāsi, iti pakatiyā brahmacārī brahmacāriṇiṃ maṃ niddosena lābhena labha. Yadi maṃ icchasi, atha me vacanaṃ na saddahasi, dvādasayojanāya bārāṇasiyā bheriṃ carāpetvā “ayaṃ me dāsi”ti sāvaya, maṃ attano dāsaṃ katvā gaṇhāhīti vadati.

Tato bodhisatto “imaṃ tajjetvā palāpetuṃ vaṭṭati”ti cintevā catutthaṃ gāthamāha –

61. “Kuṇapādini lohitape, cori kukkuṭapothini;  
Na tvaṃ ariyena vedena, mamaṃ bhattāramicchasi”ti.

Tattha **na tvaṃ ariyenā**ti tvaṃ ariyena brahmacariyavāsālābhena maṃ bhattāraṃ na icchasi, vañcetvā pana maṃ khādītukāmāsi, nassa pāpeti taṃ palāpesi. Sā pana palāyitvāva gatā, na puna oloketuṃ visahi.

62. “Evampi caturā nārī, disvāna sadhanaṃ naraṃ;  
Nenti saṅhāhi vācāhi, biḷārī viya kukkuṭaṃ.
63. “Yo ca uppatitaṃ atthaṃ, na khippamanubujjhati;  
Amittavasamanveti, pacchā ca anutappati.
64. “Yo ca uppatitaṃ atthaṃ, khippameva nibodhati;  
Muccate sattusambādhā, kukkuṭova biḷāriyā”ti. – imā abhisambuddhagāthā;

Tattha **caturā**ti cāturiyena samannāgatā. **Nārī**ti itthiyo. **Nenti**ti attano vasaṃ upanenti. **Biḷārī viyā**ti yathā sā biḷārī taṃ kukkuṭaṃ netuṃ vāyamaṃ, evaṃ aññāpi nāriyo nentiyeva. **Upatitaṃ atthanti** uppannaṃ kiñciveva atthaṃ. **Na anubujjhatī**ti yathāsabhāvena na jānāti, pacchā ca anutappati. **Kukkuṭovā**ti yathā so ñānasampanno kukkuṭo biḷārito mutto, evaṃ sattusambādhato muccatīti attho.

Satthā imaṃ dhammadesanaṃ āharitvā saccāni pakāsetvā jātakam samodhānesi, saccapariyosāne ukkaṇṭhitabhikkhu sotāpattiphale patitṭhahi. Tadā kukkuṭarājā ahameva ahosinti.

Kukkuṭajātakavaṇṇanā aṭṭhamā.

[384] 9. Dhammadhajātakavaṇṇanā

**Dhammaṃ caratha nātayoti** idam satthā jetavane viharanto ekaṃ kuhakabhikkhuṃ ārabha kathesi. Tadā hi satthā “na, bhikkhave, ayaṃ idāneva kuhako, pubbepi kuhakoyevā”ti vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto sakuṇayoniyaṃ nibbattitvā vayappatto sakuṇasaṅghaparivuto samuddamajjhe dīpake vasi. Athesacce kāsiraṭṭhavāsino vāṇijā disākākaṃ gahetvā nāvāya samuddaṃ pakkhandimsu, samuddamajjhe nāvā bhijji. So disākāko taṃ dīpakaṃ gantvā cintesi “ayaṃ mahāsakuṇasaṅgho, mayā kuhakakammaṃ katvā etesaṃ aṇḍakāni ceva chāpake ca varam varam khādītūṃ vaṭṭati”ti. So otarivā sakuṇasaṅghassa majjhe mukhaṃ vivarivā ekena pādena

pathaviyaṃ aṭṭhāsi. “Ko nāma tvaṃ, sāmī”ti sakuṇehi puṭṭho “ahaṃ dhammiko nāmā”ti āha. “Kasmā pana ekena pādena ṭhitosī”ti? “Mayā dutiye pāde nikkhitte pathavī dhāretuṃ na sakkotī”ti. “Atha kasmā mukhaṃ vivaritvā tiṭṭhasī”ti? “Ahaṃ aññaṃ āhāraṃ na khādāmi, vātameva khādāmi”ti. Evañca pana vatvā te sakuṇe āmantetvā “ovādaṃ vo dassāmi, taṃ suṇāthā”ti tesam ovādavasena paṭhamam gāthamāha –

65. “Dhammaṃ caratha ñātayo, dhammaṃ caratha bhaddaṃ vo;  
Dhammacārī sukhaṃ seti, asmiṃ loke paramhi cā”ti.

**Tattha dhammaṃ carathāti** kāyasucaritādibhedam dhammaṃ karotha. **Ñātayoti** te ālapati. **Dhammaṃ caratha bhaddaṃ voti** ekavāraṃ caritvā mā osakkatha, punappunam caratha, evam bhaddaṃ vo bhavissati. **Sukhaṃ seti**ti desanāsīsametaṃ, dhammacārī pana sukhaṃ tiṭṭhati gacchati nisīdati seti, sabbiriyāpathesu sukhito hotīti dīpeti.

Sakuṇā “ayaṃ kāko kohañña aṇḍakāni khādītuṃ evam vadatī”ti ajānitvā taṃ dussīlam vaṇṇentā dutiyaṃ gāthamāhasu –

66. “Bhaddako vatayaṃ pakkhī, dijo paramadhammiko;  
Ekapādena tiṭṭhanto, dhammamevānusāsati”ti.

Tattha **dhammamevāti** sabhāvameva. **Anusāsati**ti kathesi.

Sakuṇā tassa dussīlassa saddahitvā “tvaṃ kira sāmī aññaṃ gocaraṃ na gaṇhasi, vātameva bhakkhasi, tena hi amhākaṃ aṇḍakāni ca chāpake ca olokeyyāsī”ti vatvā gocarāya gacchanti. So pāpo tesam gatakāle aṇḍakāni ca chāpake ca kucchipūraṃ khādītvā tesam āgamanakāle upasantūpasanto hutvā mukhaṃ vivaritvā ekena pādena tiṭṭhati. Sakuṇā āgantvā puttake apassantā “ko nu kho khādātī”ti mahāsaddena viravanti, “ayaṃ kāko dhammiko”ti tasmīṃ āsaṅkāmatampī na karonti. Athekadivasam mahāsatto cintesi “idha pubbe koci paripantho natthi, imassa āgatakālato paṭṭhāya jāto, imaṃ pariggaṇhituṃ vaṭṭatī”ti. So sakuṇehi saddhiṃ gocarāya gacchanto viya hutvā nivattitvā paṭicchannaṭṭhāne aṭṭhāsi. Kākopi “gatā sakuṇā”ti nirāsaṅko hutvā uṭṭhāya gantvā aṇḍakāni ca chāpake ca khādītvā punāgantvā mukhaṃ vivaritvā ekena pādena aṭṭhāsi.

Sakuṇarājā sakuṇesu āgatesu sabbe sannipātāpetvā “ahaṃ vo ajja puttakānaṃ paripanthaṃ pariggaṇhanto imaṃ pāpakākaṃ khādantaṃ addasaṃ, etha naṃ gaṇhāmā”ti sakuṇasaṅghaṃ āmantetvā parivāretvā “sace palāyati, gaṇheyyātha na”nti vatvā sesagāthā abhāsi –

67. “Nāssa sīlam vijānātha, anaññāya pasamsatha;  
Bhutvā aṇḍaṇca potaṇca, dhammo dhammoti bhāsati.
68. “Aññaṃ bhaṇati vācāya, aññaṃ kāyena kubbatī;  
Vācāya no ca kāyena, na taṃ dhammaṃ adhiṭṭhito.
69. “Vācāya sakhilo manoviduggo, channo kūpasayova kaṇhasappo;  
Dhammadhajo gāmanigamāsu sādhu, dujjāno purisena bālisena.
70. “Imaṃ tuṇḍehi pakkhehi, pādā cimaṃ viheṭṭhatha;  
Chavañhimaṃ vināsetha, nāyaṃ saṃvāsanāraho”ti.

Tattha **nāssa sīlanti** na assa sīlam. **Anaññāyāti** ajānitvā. **Bhutvāti** khādītvā. **Vācāya no ca kāyenāti** ayañhi vacaneneva dhammaṃ carati, kāyena pana na karoti. **Na taṃ dhammaṃ adhiṭṭhitoti** tasmā jānitabbo yathāyaṃ dhammaṃ bhaṇati, na taṃ adhiṭṭhito, tasmīṃ dhamme na adhiṭṭhito. **Vācāya**



**sakhiloti** vacanena mudu. **Manoviduggoti** manasā viduggo duppaveso visamo. **Channoti** yasmim bile sayati, tena channo. **Kūpasayoti** bilāsayo. **Dhammadhajoti** sucaritadhammaṃ dhajam katvā vicaraṇena dhammaddhajo. **Gāmanigamāsu sādhu**ti gāmesu ca nigamesu ca sādhu bhaddako sambhāvito. **Dujjānoti** ayam evarūpo dussīlo paṭicchannakammanto bālisena aññāṇena purisena na sakkā jānitum. **Pādā cimanti** attano attano pādena ca imaṃ. **Viheṭṭhātī** paharatha hanatha. **Chavanti** lāmakaṃ. **Nāyanti** ayam amhehi saddhim ekasmim ṭhāne samvāsam na arahatīti.

Evañca pana vatvā sakuṇajetṭhako sayameva laṅghitvā tassa sīsam tuṇḍena pahari, avasesā sakuṇā tuṇḍanakhapādapakkhehi pahariṃsu. So tattheva jīvitakkhayaṃ pāpuṇi.

Satthā imaṃ dhammadesanaṃ āharitvā jātaṃ samodhānesi – “tadā kuhakakāko idāni kuhakabhikkhu ahoṣi, sakuṇarājā pana ahameva ahoṣi”nti.

Dhammadhajajātakavaṇṇanā navamā.

[385] 10. Nandiyamigarājajātakavaṇṇanā

**Sace brāhmaṇa gacchesīti** idaṃ satthā jetavane viharanto ekaṃ mātuposakabhikkhum ārabha kathesi. Tañhi satthā “saccaṃ kira tvaṃ bhikkhu gihī posesī”ti pucchitvā “saccaṃ, bhante”ti vutte “kiṃ te hontī”ti vutte “mātāpitaro me, bhante”ti vutte “sādhu sādhu bhikkhu porāṇakapaṇḍitānaṃ vaṃsam pālesi, porāṇakapaṇḍitā hi tiracchānayanoniyam nibbattitvāpi mātāpitūnaṃ jīvitam adamsū”ti vatvā atītam āhari.

Atīte kosalaratṭhe sākete kosalarāje rajjam kārente bodhisatto migayoniyam nibbattitvā vayappatto nandiyamigo nāma hutvā sīlācārasampanno mātāpitaro posesi. Tadā kosalarājā migavittakova ahoṣi. So pana manussānaṃ kasikammādīni kātuṃ adatvā mahāparivāro devasikaṃ migavaṃ gacchati. Manussā sannipatitvā “ayyā, ayam rājā amhākaṃ kammachedaṃ karoti, gharāvāsoṇi nassati, yaṃnūna mayaṃ ajjunavanaṃ uyyānaṃ parikkhipitvā dvāraṃ yojetvā porakkhaṇim khaṇitvā tiṇāni āropetvā daṇḍamuggarādihatthā araññaṃ pavisitvā gumble paharantā mige nīharitvā parivāretvā gorūpāni viya vajaṃ uyyānaṃ pavesetvā dvāraṃ pidahitvā rañño ārocetvā attano kammaṃ kareyyamā”ti mantayimṃsu. “Attheso upāyo”ti sabbe ekacchandā hutvā uyyānaṃ sajjitvā araññaṃ pavisitvā yojanamattaṭṭhānaṃ parikkhipimṃsu.

Tasmim khaṇe nandiyo ekasmim khuddakagumbe mātāpitaro gahetvā bhūmiyam nipanno hoti. Manussā nānāphalakāvudhahatthā bāhunā bāhum piḷetvā taṃ gumbaṃ parikkhipimṃsu. Athekacce mige oloketā taṃ gumbaṃ pavisiṃsu. Nandiyo te disvā “ajja mayā jīvitam pariccajitvā mātāpitūnaṃ jīvitam dātuṃ vaṭṭati”ti cintetvā utṭhāya mātāpitaro vanditvā “ammatāta, ime manussā imaṃ gumbaṃ pavisitvā amhe tayopi passissanti, tumhe ekena upāyena jīveyyātha, jīvitam vo seyyo, ahaṃ tumhākaṃ jīvitadānaṃ datvā manussehi gumbapariyante ṭhatvā gumble pahaṭamattēyeva nikkhamissāmi, atha te ‘imasmim khuddakagumbe ekoyeva migo bhavissati’ti maññaṃānā gumbaṃ na pavissanti, tumhe appamattā hothā”ti mātāpitaro khamāpetvā gamanasajjo aṭṭhāsi. So manussehi gumbapariyante ṭhatvā unnādetvā gumble pahaṭamattēyeva tato nikkhami. Te “ekovettha migo bhavissati”ti gumbaṃ na pavisiṃsu. Atha nandiyo gantvā migānaṃ antaraṃ pāvisi. Manussā parivāretvā sabbe mige uyyānaṃ pavesetvā dvāraṃ thaketvā rañño ārocetvā sakasakaṭṭhānāni agamaṃsu.

Tato paṭṭhāya rājā sayameva gantvā ekaṃ migam vijjhivā taṃ gahetvā ehīti ekaṃ pesetvā āharāpesi. Migā vāraṃ ṭhapayimṃsu, pattavāro migo ekamante tiṭṭhati, taṃ vijjhivā gaṇhanti. Nandiyo pokkharāṇiyam pānīyam pivati, tiṇāni khādati, vāro panassa na tāva pāpuṇāti. Atha bahūnaṃ divasānaṃ accayena tassa mātāpitaro taṃ daṭṭhukāmā hutvā “amhākaṃ putto nandiyamigarājā nāgabalo thāmasampanno, sace jīvati, avassaṃ vatim laṅghitvā amhākaṃ dassanattāya āgamissati, sāsanaṃ pesessamā”ti cintetvā maggasamīpe ṭhatvā ekaṃ brāhmaṇaṃ disvā “ayya, kahaṃ gacchasi”ti mānusikāya vācāya pucchitvā “sāketa”nti vutte puttassa sāsanaṃ pahiṇantā paṭhamam gāthamāhaṃsu –

71. “Sace brāhmaṇa gacchesi, sākete ajjunaṃ vanaṃ;  
Vajjāsi nandiyam nāma, puttaṃ asmākamorasam;  
Mātā pitā ca te vuddhā, te taṃ icchanti passitu’nti.

Tassattho – sace, tvaṃ brāhmaṇa, sāketam gacchasi, sākete ajjunavanaṃ nāma uyyānaṃ atthi, tattha amhākaṃ putto nandiyo nāma migo atthi, taṃ vadeyyāsi “mātāpitāro te vuddhā yāva na maranti, tāva taṃ passitum icchanti’nti.

So “sādhū”ti sampañcchitvā sāketam gantvā punadvise uyyānaṃ pavisitvā “nandiyamigo nāma kataro”ti pucchi. Migo āgantvā tassa samīpe thatvā “aha”nti āha. Brāhmaṇo tamattham ārocesi. Nandiyo taṃ sutvā “gaccheyyāmaṃ, brāhmaṇa, vatim laṅghitvā no na gaccheyyam, mayā pana rañño santakam nivāpapānabhojanam bhuttam, taṃ me iṅatthāne thatam, imesañca migānam majjhe ciravutthosmi, tassa me rañño ceva etesañca sotthibhāvaṃ akatvā attano balaṃ adassetvā gamanam nāma na yuttam, attano vāre pana sampatte aham etesam sotthibhāvaṃ katvā sukhito āgacchissāmī”ti tamattham pakāsento dve gāthā abhāsi –

72. “Bhuttā mayā nivāpāni, rājino pānabhojanam;  
Taṃ rājapiṇḍam avabhottum, nāham brāhmaṇa mussahe.
73. “Odahissāmaṃ passam, khurappānissa rājino;  
Tadāham sukhito mutto, api passeyya mātara’nti.

Tattha **nivāpāni**ti tesu tesu thānesu nivutāni nivāpāni. **Pānabhojananti** pānīyañca avasesatiñañca. **Taṃ rājapiṇḍanti** taṃ rañño santakam saṅkaḍḍhitvā samodhānakaṭṭhena piṇḍam. **Avabhottunti** dubbhuttam bhuñjitum. Rañño hi kiccaṃ anipphādento taṃ avabhuttam bhuñjati nāma, svāham evam avabhottum na ussahāmīti vadati. **Brāhmaṇa mussaheti** cettha **brāhmaṇāti** ālapanam, ma-kāro padasandhivasena vutto.

**Odahissāmaṃ passam, khurappānissa rājino**ti aham, brāhmaṇa, attano vāre sampatte khurappam sannayhitvā āgatassa rañño migayūthato nikkhamitvā ekamante thatvā “mam vijjha, mahārāja”ti vatvā attano mahāphāsukapassam odahissāmi oḍḍessāmi. **Sukhito muttoti** tadā aham maraṇabhayaṃ mutto sukhito niddukkho raññā anuññāto api nāma mātaram passeyyanti.

Taṃ sutvā brāhmaṇo pakkāmi. Aparabhāge tassa vāradivase rājā mahantena parivārena uyyānaṃ āgacchi. Mahāsatto ekamante atthāsi. Rājā “migaṃ vijjhissāmī”ti khurappam sannayhi. Mahāsatto yathā aññe maraṇabhayatajjitā palāyanti, evam apalāyitvā nibbhayo hutvā mettam purecārikaṃ katvā mahāphāsukapassam odahitvā niccalova atthāsi. Rājā tassa mettānubhāvena saram vissajjetum nāsakkhi. Mahāsatto “kiṃ, mahārāja, saram na muccesi, muñcāhī”ti āha. “Na sakkomi, migarāja”ti. “Tena hi guṇavantānam guṇam jāna, mahārāja”ti. Tadā rājā bodhisatte pasīditvā dhanum chaḍḍetvā “imam acittakam kalīngarakaṇḍampi tāva tava guṇam jānāti, aham sacittako manussabhūtopi tava guṇam na jānāmi, migarāja, mayham khama, abhayaṃ te dammī”ti āha. “Mahārāja, mayham tāva abhayaṃ desi, ayam pana uyyāne migagaṇo kiṃ karissati”ti? “Etassapi abhayaṃ dammī”ti. Evam mahāsatto **nigrodhajātaka** (jā. 1.1.12) vuttanayeneva sabbesam araññe migānam ākāsagatasakuṇānam jalacaramacchānañca abhayaṃ dāpetvā rājānam pañcasu sīlesu patitthāpetvā “mahārāja, raññā nāma agatigamanam pahāya dasa rājadhamme akopentena dhammena samena rajjam kāretum vaṭṭati”ti.

“Dānam sīlam pariccāgam, ajjavam maddavam tapam;  
Akkodham avihimsañca, khantiñca avirodhanam.

“Iccete kusale dhamme, thite passāmi attani;  
Tato me jāyate pīti, somanassañcanappaka”nti. (jā. 2.21.176-177) –

Evam vutte rājadhamme gāthābandheneva desetvā katipāhaṃ rañño santike vasitvā nagare sabbasattānaṃ abhayadānapakāsanatthaṃ suvaṇṇabheriṃ carāpetvā “appamatto hohi, mahārājā”ti vatvā mātāpitūnaṃ dassanatthāya gato.

74. “Migarājā pure āsiṃ, kosalassa nicketane;  
Nandiyo nāma nāmena, abhirūpo catuppado.
75. “Taṃ maṃ vadhitumāgacchi, dāyasmim̃ ajjune vane;  
Dhanuṃ ārajjam̃ katvāna, usuṃ sannayha kosalo.
76. “Tassāhaṃ odahim̃ passam̃, khurappānissa rājino;  
Tadāhaṃ sukhito mutto, mātaram̃ daṭṭhumāgato”ti. –

Imā tisso abhisambuddhagāthā honti.

Tattha **kosalassa nicketane**ti kosalassa rañño nicketane vasanaṭṭhāne, tassa santike araññasminti attho. **Dāyasminti** migānaṃ vasanaṭṭhāya dinnauyyāne. **Ārajjam̃ katvānāti** jiyāya saddhim̃ ekato katvā, āropetvāti attho. **Sannayhāti** sannayhitvā yojetvā. **Odahinti** oḍḍesiṃ. **Mātaram̃ daṭṭhumāgoti** desanāsīsametaṃ, rañño dhammaṃ desetvā sabbasattānaṃ abhayatthāya suvaṇṇabheriṃ carāpetvā mātāpitāro daṭṭhum̃ āgatosmīti attho.

Satthā imaṃ dhammadesanaṃ āharitvā saccāni pakāsetvā jātakam̃ samodhānesi, saccapariyosāne mātuposakabhikkhu sotāpattiphale patiṭṭhahi. Tadā mātāpitāro mahārājakulāni ahesuṃ, brāhmaṇo sārīputto, rājā ānando, nandiyamigarājā pana ahameva ahosinti.

Nandiyamigarājajātakavaṇṇanā dasamā.

Avāriyavaggo paṭhamo.

## 2. Kharaputtavaggo

[386] 1. Kharaputtajātakavaṇṇanā

**Saccaṃ kirevamāhamsūti** idam̃ satthā jetavane viharanto purānadutiyikāpalobhanaṃ ārabba kathesi. Tañhi bhikkhum̃ satthā “saccaṃ kira tvam̃ bhikkhu ukkaṇṭhitosī”ti pucchitvā “āma, bhante”ti vutte “kena ukkaṇṭhāpitosī”ti vatvā “purānadutiyikāyā”ti vutte “bhikkhu ayam̃ te itthī anattakārikā, pubbepi tvam̃ imaṃ nissāya aggim̃ pavisitvā maranto paṇḍite nissāya jīvitam̃ labhī”ti vatvā atītam̃ āhari.

Atīte bārānasiyam̃ senake nāma raññe rajjam̃ kārente bodhisatto sakkattam̃ kāresi. Tadā senakassa rañño ekena nāgarājena saddhim̃ mittabhāvo hoti. So kira nāgarājā nāgabhanā nikkhamitvā thale gocaram̃ gaṇhanto carati. Atha naṃ gāmadārakā disvā “sappo aya”nti leḍḍudaṇḍādīhi pahariṃsu. Atha rājā uyyānaṃ kilītuṃ gacchanto disvā “kim̃ ete dārakā karontī”ti pucchitvā “ekam̃ sappam̃ paharantī”ti sutvā “paharituṃ mā detha, palāpetha ne”ti palāpesi. Nāgarājā jīvitam̃ labhitvā nāgabhanam̃ gantvā bahūni ratanāni ādāya aḍḍharattasamaye rañño sayanagharam̃ pavisitvā tāni ratanāni datvā “mahārāja, mayā tumhe nissāya jīvitam̃ laddha”nti raññā saddhim̃ mittabhāvam̃ katvā punappunam̃ gantvā rājānaṃ passati. So attano nāgamānavikāsu ekam̃ kāmesu atītam̃ nāgamānavikam̃ rakkhaṇatthāya rañño santike ṭhapetvā “yadā etaṃ na passasi, tadā imaṃ mantam̃ parivatteyyāsī”ti tassa ekam̃ mantam̃ adāsī.

So ekadivasam̃ uyyānaṃ gantvā nāgamānavikāya saddhim̃ pokkharāṇiyam̃ udakakīlam̃ kilī. Nāgamānavikā ekam̃ udakasappam̃ disvā attabhāvam̃ vijahitvā tena saddhim̃ asaddhammaṃ paṭisevi. Rājā tam̃ apassanto “kham̃ nu kho gatā”ti mantam̃ parivattetvā anācāram̃ karontim̃ disvā veḷupesikāya

pahari. Sā kujjhitvā tato nāgabhavanam gantvā “kasmā āgatāsī”ti puṭṭhā “tumahākaṃ sahāyo maṃ attano vacanam aḡaṇhantiṃ piṭṭhiyaṃ paharī”ti pahāram dassesi. Nāgarājā tathato ajānitvāva cattāro nāgamāṇavake āmantetvā “gacchatha, senakassa sayanagharam pavisitvā nāsavātena taṃ bhusaṃ viya viddhamsethā”ti pesesi. Te gantvā rañño sirisayane nipannakāle gabbhaṃ pavisiṃsu. Tesam pavisanavelāyameva rājā devim āha – “jānāsī nu kho bhadde, nāgamāṇavikāya gataṭṭhāna”nti? “Na jānāmi, devā”ti. “Ajja sā amhākaṃ pokkharaniyaṃ kīlanakāle attabhāvaṃ vijahitvā ekena udakasappena saddhim anācāram akāsi, atha naṃ ahaṃ ‘evaṃ mā karī’ti sikkhāpanatthāya veḷupesikāya paharim, sā ‘nāgabhavanam gantvā sahāyassa me aññaṃ kiñci kathetvā mettim bhindeyyā’ti me bhayaṃ uppajjati”ti. Taṃ sutvā nāgamāṇavakā tatova nivattitvā nāgabhavanam gantvā nāgarājassa tamattham ārocesuṃ. So samvegappatto hutvā taṅkhaṇaññaeva rañño sayanagharam āgantvā tamattham ācikkhitvā khamāpetvā “idaṃ me daṇḍakamma”nti sabbarutajānanam nāma mantam datvā “ayaṃ, mahārāja, anaggho manto, sace imaṃ mantam aññaṃ dadeyyāsi, datvāva aggim pavisitvā mareyyāsī”ti āha. Rājā “sādhū”ti sampaṭicchhi. So tato paṭṭhāya kipillikānampi saddam jānāti.

Tassekadivasam mahātale nisīditvā madhuphāṇitehi khādanīyam khātantassa ekaṃ madhubindu ca phāṇitabindu ca pūvakaṇḍaṇca bhūmiyaṃ pati. Ekā kipillikā taṃ disvā “rañño mahātale madhucāṭi bhinnā, phāṇitasakaṭam pūvasakaṭam nikkujjitaṃ, madhuphāṇitaṇca pūvaṇca khādathā”ti viravanti vicarati. Atha rājā tassā ravaṃ sutvā hasi. Rañño samīpe ṭhitā devī “kiṃ nu kho disvā rājā hasī”ti cintesi. Tasmim khādanīyam khāditvā nhatvā pallaṅke nisinne ekaṃ makkhikaṃ sāmiko “ehi bhadde, kilesaratiyā ramissāmā”ti āha. Atha naṃ sā “adhivāsehi tāva sāmī, idāni rañño gandhe āharissanti, tassa vilimpantassa pādāmūle gandhacūṇam patissati, ahaṃ tattha vaṭṭetvā sugandhā bhavissāmi, tato rañño piṭṭhiyaṃ nipajjitvā ramissāmā”ti āha. Rājā tampi saddam sutvā hasi. Devīpi “kiṃ nu kho disvā hasī”ti puna cintesi. Puna rañño sāyamāsam bhuñjantassa ekaṃ bhattasittham bhūmiyaṃ pati. Kipillikā “rājakule bhattasakaṭam bhaggam, bhattam bhuñjathā”ti viravi. Taṃ sutvā rājā punapi hasi. Devī suvaṇṇakaṭacchuṃ gahetvā rājānam parivisanti “maṃ nu kho disvā rājā hasati”ti vitakkesi.

Sā raññā saddhim sayanam āruya nipajjanakāle “kiṃkāraṇā deva, hasī”ti pucchi. So “kiṃ te mama hasitakāraṇenā”ti vatvā punappunam nibaddho kathesi. Atha naṃ sā “tumahākaṃ jānanamantam mayham dethā”ti vatvā “na sakkā dātu”nti paṭikkhittāpi punappunam nibandhi. Rājā “sacāham imaṃ mantam tuyham dassāmi, marissāmī”ti āha. “Marantopi mayham dehi, devā”ti. Rājā mātugāmasaviko hutvā “sādhū”ti sampaṭicchitvā “imissā mantam datvā aggim pavissāmī”ti rathena uyyānam pāyāsi.

Tasmim khaṇe sakko lokaṃ olokento imaṃ kāraṇam disvā “ayaṃ bālarājā mātugāmam nissāya ‘aggim pavissāmī’ti gacchati, jīvītamassa dassāmī”ti sujam asurakaññaṃ ādāya bārāṇasim āgantvā taṃ ajikaṃ katvā attanā ajo hutvā “mahājano mā passatū”ti adhiṭṭhāya rañño rathassa purato ahoṣi. Taṃ rājā ceva rathe yuttasindhavā ca passanti, aññaṃ koci na passati. Ajo kathāsamuṭṭhāpanattham rathapurato ajikāya saddhim methunam dhammam paṭisevanto viya ahoṣi. Tameko rathe yuttasindhavo disvā “samma ajarāja, mayaṃ pubbe ‘ajā kira bālā ahirikā’ti assumha, na ca taṃ passimha, tvaṃ pana raho paṭicchannaṭṭhāne kattabbaṃ anācāram amhākaṃ ettakānam passantānaññaeva karosi, na lajjasi, taṃ no pubbe sutam iminā diṭṭhena sametī”ti vatvā paṭhamam gāthamāha –

77. “Saccam kirevamāhamsu, vastam bāloti paṇḍitā;  
Passa bālo rahokammaṃ, āvikubbaṃ na bujjhatī”ti.

Tattha **vastanti** ajaṃ. **Paṇḍitā**ti nāṇasampannā taṃ bāloti vadanti, saccam kira vadanti. **Passā**ti ālapanam, passathāhi attho. **Na bujjhatī**ti evam kātum ayuttanti na jānāti.

Taṃ sutvā ajo dve gāthā abhāsi –

78. “Tvam khopi samma bālosi, kharaputta vijānahi;  
Rajjuyā hi parikkhitto, vaṅkoṭṭho ohitomukho.

79. “Aparampi samma te bālyaṃ, yo mutto na palāyasi;  
So ca bālataro samma, yaṃ tvaṃ vahati senaka’’nti.

Tattha **tvam khopi sammā**ti samma sindhava mayāpi kho tvaṃ bālataro. **Kharaputtā**ti so kira gadrabhassa jātako, tena taṃ evamāha. **Vijānahī**ti ahameva bāloti evaṃ jānāhi. **Parikkhittoti** yugena saddhiṃ gīvāya parikkhitto. **Vaṅkoṭṭhoti** vaṅkaoṭṭho. **Ohitomukhoti** mukhabandhanena pihitamukho. **Yo mutto na palāyasī**ti yo tvaṃ rathato mutto samāno muttakāle palāyivā araṅṅaṃ na pavisasi, taṃ te apalāyanaṃ aparampi bālyaṃ, **so ca bālataroti** yaṃ tvaṃ senakaṃ vahasi, so senako tayāpi bālataro.

Rājā tesam ubhinnampi kathaṃ jānāti, tasmā taṃ suṇanto saṅikaṃ rathaṃ pesesi. Sindhavopi tassa kathaṃ sutvā puna catutthaṃ gāthamāha –

80. “Yaṃ nu samma ahaṃ bālo, ajarāja vijānāhi;  
Atha kena senako bālo, taṃ me akkhāhi pucchito’’ti.

Tattha **yanti** karaṇatthe paccattavacanaṃ. **Nūti** anussavatthe nipāto. Idaṃ vuttaṃ hoti – samma ajarāja, yena tāva tiracchānagatattena kāraṇena ahaṃ bālo, taṃ tvaṃ kāraṇaṃ jānāhi, sakkā etaṃ tayā ṅātum, ahaṅhi tiracchānagatattāva bālo, tasmā maṃ kharaputtātiādīni vadanto suṭṭhu vadasi, ayaṃ pana senako rājā kena kāraṇena bālo, taṃ me kāraṇaṃ pucchito akkhāhīti.

Taṃ sutvā ajo ācikkhanto pañcamaṃ gāthamāha –

81. “Uttamatthaṃ labhitvāna, bhariyāya yo padassati;  
Tena jahissatattānaṃ, sā cevassa na hessati’’ti.

Tattha **uttamatthanti** sabbarutajānanamantaṃ. **Tenāti** tassā mantappadānasaṅkhātena kāraṇena taṃ datvā aggiṃ pavisanto attānaṅca jahissati, sā cassa bhariyā na bhavissati, tasmā esa tayāpi bālataro, yo laddhaṃ yasaṃ rakkhitum na sakkotīti.

Rājā tassa vacanaṃ sutvā “ajarāja, amhākaṃ sotthiṃ karontopi tvaṅṅeva karissasi, kathehi tāva no kattabbayuttaka’’nti āha. Atha naṃ ajarājā “mahārāja, imesaṃ sattānaṃ attanā aṅṅo piyatara nāma natthi, ekaṃ piyabhaṅḍaṃ nissāya attānaṃ nāsetum laddhayasaṃ pahātum na vaṭṭati’’ti vatvā chaṭṭhaṃ gāthamāha –

82. “Na ve piyammeti janinda tādiso, attam niraṃkatvā piyāni sevati;  
Attāva seyyo paramā ca seyyo, labbhā piyā ocitatthena pacchā’’ti.

Tattha **piyammeti** piyaṃ me, ayameva vā pāṭho. Idaṃ vuttaṃ hoti – janinda, tādiso tumhādiso yasamahatte ṭhito puggalo ekaṃ piyabhaṅḍaṃ nissāya “idaṃ piyaṃ me’’ti attam niraṃkatvā attānaṃ chaḍḍetvā tāni piyāni na sevateva. Kiṃkāraṇā? **Attāva seyyo paramā ca seyoti**, yasmā sataguṇena sahasaguṇena attāva seyyo varo uttamo, paramā ca seyyo, paramā uttamāpi aṅṅasmā piyabhaṅḍāti attho. Ettha hi ca-kāro pi-kāratthe nipātoti datṭhabbo. **Labbhā piyā ocitatthena pacchāti** ocitatthena vaḍḍhitathena yasasampannena purisena pacchā piyā nāma sakkā laddhum, na tassā kāraṇā attā nāsetabboti.

Evaṃ mahāsatto raṅṅo ovādaṃ adāsi. Rājā tussitvā “ajarāja, kuto āgatosī’’ti pucchi. Sakko ahaṃ, mahārāja, tava anukampāya taṃ maraṇā mocetum āgatomhīti. Devarāja, ahaṃ etissā “mantaṃ dassāmi’’ti avacaṃ, idāni “kiṃ karomi’’ti? “Mahārāja, tumhākaṃ ubhinnampi vināsena kiccaṃ natthi, ‘sippassa upacāro’’ti vatvā etaṃ katipaye pahāre paharāpehi, iminā upāyena na gaṅhissatī’’ti. Rājā “sādhū’’ti sampatiṅchi. Mahāsatto raṅṅo ovādaṃ datvā sakaṭṭhānameva gato. Rājā uyyānaṃ gantvā devim pakkosāpetvā āha “gaṅhissasi bhadde, manta’’nti? “Āma, devā’’ti. “Tena hi upacāraṃ

karomī”ti. “Ko upacāro”ti? “Piṭṭhiyaṃ pahārasate pavattamāne saddaṃ kātuṃ na vaṭṭatī”ti. Sā mantalobhena “sādhū”ti sampatiṅghi. Rājā coraghātake pakkosāpetvā kasā gāhāpetvā ubhosu passesu paharāpesi. Sā dve tayo pahāre adhvāsetvā tato paraṃ “na me mantena attho”ti ravi. Atha naṃ rājā “tvaṃ maṃ māretvā mantam gaṇhitukāmāsī”ti piṭṭhiyaṃ niccammaṃ kāretvā vissajjāpesi. Sā tato paṭṭhāya puna kathetuṃ nāsakkhi.

Satthā imaṃ dhammadesanaṃ āharitvā saccāni pakāsetvā jātakaṃ samodhānesi, saccapariyosāne ukkaṇṭhitabhikkhu sotāpattiphale patiṭṭhahi. Tadā rājā ukkaṇṭhitabhikkhu ahoṣi, devī purāṇadutiyaikā, asso sārīputto, sakko pana ahameva ahoṣinti.

Kharaputtajātakavaṇṇanā paṭṭhamā.

[387] 2. Sūcijātakavaṇṇanā

**Akakkasaṃ aphaṛusaṃ** idaṃ satthā jetavane viharanto paññāpāramiṃ ārabba kathesi. Vatthu **mahāumaṅgajātake** (jā. 2.22.590 ādayo) āvi bhavissati. Tadā pana satthā bhikkhū āmantetvā “na, bhikkhave, idāneva, pubbepi tathāgato paññavā upāyakusaloyevā”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto kāsiraṭṭhe kammārakule nibbattitvā vayappatto pariyodātasippo ahoṣi. Mātāpitaro panassa daliddā, tesam gāmato avidūre añño sahasakuṭiko kammāragāmo. Tattha kammārasahassajetṭhako kammāro rājavallabho aḍḍho mahaddhano, tassekā dhītā ahoṣi uttamarūpadharā devaccharāpaṭibhāgā janapadakalyāṇilakkhaṇehi samannāgatā. Sāmantagāmesu manussā vāsīpharasuphālapācanādīkārapanattāya taṃ gāmaṃ gantvā yebhuyyena taṃ kumārikaṃ passanti, te attano attano gāmaṃ gantvā nisinnaṭṭhānādīsu tassā rūpaṃ vaṇṇenti. Bodhisatto taṃ sutvā savanasamsaggena bajjhivā “pādaparicārikaṃ naṃ karissāmī”ti uttamajātikaṃ ayaṃ gahetvā ekaṃ sukhumaṃ ghaṇaṃ sūciṃ katvā pāse vijjhivā udake uppilāpetvā aparampi tathārūpameva tassā kosakaṃ katvā pāse vijjhi. Iminā niyāmena tassā satta kosake akāsi, “kathaṃ akāsi”ti na vattabbaṃ. Bodhisattānañhi ṇāṇamahantatāya karaṇaṃ samijjhatiyeva. So taṃ sūciṃ nālikāya pakkhipitvā ovaṭṭikāya katvā taṃ gāmaṃ gantvā kammārajettṭhakassa vasanavīthiṃ pucchitvā tattha gantvā dvāre ṭhatvā “ko mama hatthato evarūpaṃ nāma sūciṃ mūlena kiṇituṃ icchatī”ti sūciṃ vaṇṇento jettṭhakakammārassa gharadvārasamīpe ṭhatvā paṭṭhamam gāthamāha –

83. “Akakkasaṃ aphaṛusaṃ, kharadhotam supāsiyaṃ;  
Sukhumaṃ tikhiṇaggañca, ko sūciṃ ketumicchati”ti.

Tassattho – mama paṭalassa vā tilakassa vā odhino vā abhāvena **akakkasaṃ**, sumattatāya **apharusam**, kharena pāsāṇena dhotattā **kharadhotam**, sundarena suviddhena pāsena samannāgatattā **supāsiyaṃ**, saṇhatāya **sukhumaṃ**, aggassa tikhiṇatāya **tikhiṇaggaṃ** sūciṃ mama hatthato mūlaṃ datvā ko kiṇituṃ icchatīti.

Evañca pana vatvā punapi taṃ vaṇṇento dutiyaṃ gāthamāha –

84. “Sumajjañca supāsañca, anupubbaṃ suvaṭṭitaṃ;  
Ghanaghātimaṃ paṭithaddham, ko sūciṃ ketumicchati”ti.

Tattha **sumajjañcāti** kuruvindakacuṇṇena suṭṭhu majjitaṃ. **Supāsañcāti** saṇhena pāsavedhakena vidhattā sundarapāsaṃ. **Ghanaghātimaṃ** yā ghātiyamānā adhikaraṇiṃ anupavisati, ayaṃ “ghanaghātimaṃ”ti vuccati, tādisinti attho. **Paṭithaddhanti** thaddham amudukaṃ.

Tasmiṃ khaṇe sā kumārikā bhuttaṭpātarāsaṃ pitaraṃ darathapaṭippassambhanatthaṃ cūlasayane nipannaṃ tālavaṇṇena bījāyamānā bodhisattassa madhurasaddaṃ sutvā allamaṃsapinḍena hadaye pahaṭā viya ghaṭasahassena nibbāpitadarathā viya hutvā “ko nu kho esa atimadhurena saddena kammārānaṃ

vasanagāme sūciṃ vikkiṇāti, kena nu kho kammena āgato, jānissāmi na’’nti tālavaṇṇaṃ ṭhapetvā gehā nikkhamma bahiḷindake ṭhatvā tena saddhiṃ kathesi. Bodhisattānaṃhi patthitaṃ nāma samijjhati, so hi tassāyevattāya taṃ gāmaṃ āgato. Sā ca tena saddhiṃ kathenti “māṇava, sakalaraṭṭhavāsino sūciādīnaṃ atthāya imaṃ gāmaṃ āgacchanti, tvaṃ bālatāya kammāragāme sūciṃ vikkiṇituṃ icchasi, sacepi divasaṃ sūciyā vaṇṇaṃ bhāsissasi, na te koci hatthato sūciṃ gaṇhissati, sace tvaṃ mūlaṃ laddhuṃ icchasi, aññaṃ gāmaṃ yāhi’’ti vatvā dve gāthā abhāsi –

84. “Itodāni patāyanti, sūciyo baḷisāni ca;  
Koyaṃ kammāragāmasmiṃ, sūciṃ vikketumicchati.
85. “Ito satthāni gacchanti, kammantā vividhā puthū;  
Koyaṃ kammāragāmasmiṃ, sūciṃ vikketumicchati’’ti.

Tattha **itodānī**ti imasmimṃ raṭṭhe idāni sūciyo ca baḷisāni ca aññāni ca upakaraṇāni imamhā kammāragāmā patāyanti nikkhamanti, taṃ taṃ disaṃ pattharantā niggaṇṇanti. **Koyanti** evaṃ sante ko ayaṃ imasmimṃ kammāragāme sūciṃ vikkiṇituṃ icchati. **Satthānī**ti bārāṇasiṃ gacchantāni nānappakārāni satthāni itova gacchanti. **Vividhā puthū**ti nānappakārā bahū kammantāpi sakalaraṭṭhavāsīnaṃ ito gahitaupakaraṇeḥeva pavattanti.

Bodhisatto tassā vacanaṃ sutvā “bhadde, tvaṃ ajānantī aññāṇena evaṃ vadesī’’ti vatvā dve gāthā abhāsi –

86. “Sūciṃ kammāragāmasmiṃ, vikketabbā pajānatā;  
Ācariyāva jānanti, kammaṃ sukatadukkaṭaṃ.
87. “Imaṅce te pitā bhadde, sūciṃ jaññā mayā kataṃ;  
Tayā ca maṃ nimanteyya, yañcatthaññaṃ ghare dhana’’nti.

Tattha **sūcinti** vibhattivipallāso kato. Imaṃ vuttaṃ hoti – sūci nāma pajānatā paṇḍitena purisena kammāragāmasmiṃyeva vikketabbā. Kimkāraṇā? **Ācariyāva jānanti, kammaṃ sukatadukkaṭanti**, tassa tassa sippassa ācariyāva tasmiṃ tasmiṃ sippe sukatadukkaṭakammaṃ jānanti, svāhaṃ kammārakammaṃ ajānantānaṃ gahapatikānaṃ gāmaṃ gantvā mama sūciyā sukatadukkaṭabhāvaṃ kathaṃ jānāpessāmi, imasmimṃ pana gāme mama balaṃ jānāpessāmīti. Evaṃ bodhisatto imāya gāthāya attano balaṃ vaṇṇesi.

**Tayā ca maṃ nimanteyyā**ti bhadde sace tava pitā imaṃ mayā kataṃ sūciṃ “īdisā vā esā, evaṃ vā katā’’ti jāneyya, “imaṃ me dhītaṃ tava pādapariṇāyikaṃ dammi, gaṇhāhi na’’nti evaṃ tayā ca maṃ nimanteyya. **Yañcatthaññaṃ ghare dhananti** yañca aññaṃ saviññāṇakaṃ vā aviññāṇakaṃ vā ghare dhanam atthi, tena maṃ nimanteyya. “Yañcassañña’’ntipi pāṭho, yañca assa ghare aññaṃ dhanam atthīti attho.

Kammārajetṭhako sabbaṃ tesam kathaṃ sutvā “ammā’’ti dhītaṃ pakkosivā “kena saddhiṃ sallapasī’’ti pucchi. Tāta, eko puriso sūciṃ vikkiṇāti, tena saddhiṃ sallapemīti. “Tena hi pakkosāhi na’’nti. Sā gantvā pakkosi. Bodhisatto gehaṃ pavisitvā kammārajetṭhakaṃ vanditvā ekamantaṃ aṭṭhāsi. Atha naṃ so “kataragāmaḥāsikosi’’ti pucchi. “Ahaṃ asukagāmaḥāsikomhi asukakammārassa putto’’ti. “Kasmā idhāgatosi’’ti. “Sūcivikkayatthāyā’’ti. “Āhara, sūciṃ te passāmā’’ti. Bodhisatto attano guṇaṃ sabbesaṃ majjhe pakāsetukāmo “nanu ekakānaṃ olokitaṃ sabbesaṃ majjhe oloketuṃ varatara’’nti āha. So “sādhu, tāta’’ti sabbe kammāre sannipātāpetvā tehi parivuto “āhara, tāta, mayaṃ passāma te sūci’’nti āha. “Ācariya, ekaṃ adhikaraṇiṇca udakapūraṇca kaṃsathālaṃ āharāpethā’’ti. So āharāpesi. Bodhisatto ovaṭṭikato sūcinālikaṃ nīharitvā adāsi. Kammārajetṭhako tato sūciṃ nīharitvā “tāta, ayaṃ sūci’’ti pucchi. “Nāyaṃ sūci, kosako eso’’ti. So upadhārento neva antaṃ, na koṭiṃ addasa. Bodhisatto

āharāpetvā nakhena kosakaṃ apanetvā “ayaṃ sūci, ayaṃ kosako”ti mahājanassa dassetvā sūciṃ ācariyassa hatthe, kosakaṃ pādamūle ṭhapesi. Puna tena “ayaṃ maññe sūci”ti vutto “ayampi sūcikosakoyevā”ti vatvā nakhena paharanto paṭipāṭiyā cha sūcikosake kammārajettḥakassa pādamūle ṭhapetvā “ayaṃ sūci”ti tassa hatthe ṭhapesi. Kammārasahassāni aṅguliyo phoṭesuṃ, celukkhepā pavattiṃsu.

Atha naṃ kammārajettḥako “tāta, imāya sūciyā kiṃ bala”nti pucchi. “Ācariya balavatā purisena adhikaraṇiṃ ukkhipāpetvā adhikaraṇiyā heṭṭhā udakapātiṃ ṭhapāpetvā adhikaraṇiyā majjhe imaṃ sūciṃ paharathā”ti. So tathā kāretvā adhikaraṇiyā majjhe sūciṃ aggena pahari. Sā adhikaraṇiṃ vinivijjhivā udakapiṭṭhe kesaggamattampi uddhaṃ vā adho vā ahutvā tiriyaṃ paṭiṭṭhāsi. Sabbe kammāra “amhehi ettakaṃ kālaṃ ‘kammāra nāma edisā honti’ti sutivasenapi na sutapubba”nti aṅguliyo phoṭetvā celukkhepasahassaṃ pavattayiṃsu. Kammārajettḥako dhītaraṃ pakkosivā tasmiññeva parisamajjhe “ayaṃ kumārikā tuyhameva anucchavikā”ti udakaṃ pātetvā adāsi. So aparabhāge kammārajettḥakassa accayena tasmiṃ gāme kammārajettḥako ahosi.

Satthā imaṃ dhammadesanaṃ āharitvā jātakam samodhānesi – “tadā kammārajettḥakassa dhītā rāhulamātā ahosi, paṇḍitakammāraputto pana ahameva ahosi”nti.

Sūcijātakavaṇṇanā dutiyā.

[388] 3. Tuṇḍilajātakavaṇṇanā

**Navachannaketi** idaṃ satthā jetavane viharanto ekaṃ maraṇabhīrukaṃ bhikkhuṃ ārabha kathesi. So kira sāvatthivāsī kulaputto buddhasāsane pabbajivā maraṇabhīruko ahosi, appamattakampi sākḥācalanaṃ daṇḍakapātanaṃ sakuṇacatuppadasaddaṃ vā aññaṃ vā tathārūpaṃ sutvā maraṇabhayatajjito hutvā kucchiyaṃ viddhasaso viya kampanto vicari. Bhikkhū dhammasabhāyaṃ kathaṃ samuṭṭhāpesuṃ “āvuso, asuko kira bhikkhu maraṇabhīruko appamattakampi saddaṃ sutvā vikampamāno palāyati, imesañca sattānaṃ maraṇameva dhuvaṃ, jīvitaṃ addhuvāṃ, nanu tadeva yoniso manasī kātabba”nti. Satthā āgantvā “kāya nuttha, bhikkhave, etarahi kathāya sannisinnā”ti pucchivā “imāya nāmā”ti vutte taṃ bhikkhuṃ pakkosāpetvā “saccaṃ kira tvaṃ bhikkhu maraṇabhīruko”ti vatvā “āma, bhante”ti tena paṭiññāto “na, bhikkhave, idāneva, pubbepesa maraṇabhīrukoyevā”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto sūkariyā kucchimhi paṭisandhiṃ gaṇhi. Sūkarī pariṇatagabbhā dve putte vijāyi. Sā ekadivasam te gahetvā ekasmiṃ āvāte nipajji. Athekā bārānasidvāragāmaṃvāsini mahallikā kappāsakhettato pacchipuṇṇam kappāsam ādāya yaṭṭhiyā bhūmiṃ ākoṭenti āgacchi. Sūkarī taṃ saddaṃ sutvā maraṇabhayena puttake chaḍḍetvā palāyi. Mahallikā sūkarapotake disvā puttasaññaṃ paṭilabhivā pacchiyaṃ pakkhipivā gharaṃ netvā jettḥakassa mahātuṇḍilo, kaniṭṭhassa cūlatuṇḍiloti nāmaṃ karitvā te puttake viya posesi. Te aparabhāge vaḍḍhitvā thūlasarīrā ahesuṃ. Mahallikā “ime no mūlena dehi”ti vuccamānāpi “puttā me”ti vatvā kassaci na deti. Athekasmiṃ chaṇakāle dhuttā suraṃ pivantā maṃse khīṇe “kuto nu kho maṃsam labhissāmā”ti vīmaṃsantā mahallikāya gehe sūkarānaṃ atthibhāvaṃ ṇatvā mūlaṃ gahetvā tattha gantvā “amma, mūlaṃ gahetvā ekaṃ no sūkaraṃ dehi”ti āhaṃsu. Sā “alaṃ, tāta, puttā me ete, puttā me nāma maṃsam khādanatthāya kiṇantānaṃ dadantā nāma natthī”ti paṭikkhipi. Dhuttā “amma, manussānaṃ sūkarā nāma puttā na honti, dehi no”ti punappunaṃ yācantāpi alabhivā mahallikam suraṃ pāyetvā mattakāle “amma, sūkarehi kiṃ karissasi, mūlaṃ gahetvā paribbayaṃ karohī”ti tassā hatthe kahāpaṇe ṭhapayiṃsu.

Sā kahāpaṇe gahetvā “tātā, mahātuṇḍilaṃ dātuṃ na sakkomi. Cūlatuṇḍilaṃ pana gaṇhathā”ti āha. “Kahaṃ so”ti? “Ayaṃ etasmiṃ gaccheti, saddamassa dehi”ti. “Āhāraṃ na passāmī”ti. Dhuttā mūlena ekaṃ bhattapātiṃ āharāpesuṃ. Mahallikā taṃ gahetvā dvāre ṭhapitaṃ sūkaradoṇiṃ pūretvā doṇisamīpe aṭṭhāsi. Tiṃsamattāpi dhuttā pāsahatthā tattheva aṭṭhaṃsu. Mahallikā “tāta, cūlatuṇḍila,



ehī’ ti tassa saddamakāsi. Taṃ sutvā mahātuṇḍilo “ettakaṃ kālaṃ mama mātārā cūlatuṇḍilassa saddo na dinnapubbo, maṃyeva paṭhamam saddāyati, avassaṃ ajja amhākaṃ bhayaṃ uppannaṃ bhavissati’ ti aññāsi. So kaniṭṭhaṃ āmantesi “tāta, mama mātā taṃ pakkosati, gaccha tāva jānāhī’ ti. So gacchā nikkhamitvā bhaddoṇisamīpe tesam ṭhitabhāvaṃ disvā “ajja me maraṇam uppanna’ nti maraṇabhayatajjito nivattitvā kampamāno bhātu santikaṃ āgantvā thambhituṃ nāsakkhi, kampamāno paribbhami. Mahātuṇḍilo taṃ disvā “tāta, tvaṃ ajja pana pavedhasi paribbhamasi, pavisaṇaṭṭhānaṃ olokesi, kiṃ nāmetam karosī’ ti pucchi. So attanā diṭṭhakāraṇam kathento paṭhamam gāthamāha –

88. “Navachannakedāni diyyati, puṇṇāyaṃ doṇi suvāminī ṭhitā;  
Bahuke jane pāsapāṇike, no ca kho me paṭibhāti bhuñjitu’ nti.

Tattha **navachannakedāni diyyatī** bhātika, pubbe amhākaṃ kuṇḍakayāgu vā jhāmabhattam vā diyyati, ajja pana navachannakaṃ navākāraṃ dānaṃ diyyati. **Puṇṇāyaṃ doṇī**ti ayaṃ amhākaṃ bhaddoṇi suddhabhattassa puṇṇā. **Suvāminī ṭhitā**ti ayyāpi no tassā santike ṭhitā. **Bahuke janeti** na kevalaṇca ayyāva, aññopi bahuko jano pāsapāṇiko ṭhito. **No ca kho me paṭibhātī**ti ayaṃ evaṃ etesaṃ ṭhitabhāvopi idaṃ bhattam bhuñjitumpi mayham na paṭibhāti, na rucattīti attho.

Taṃ sutvā mahāsatto “tāta cūlatuṇḍila, mama kira mātā ettheva sūkare posentī nāma yadattam poseti, svāssā attho ajja matthakaṃ patto, tvaṃ mā cintayī’ ti vatvā madhurena sarena buddhalīlāya dhammam desento dve gāthā abhāsi –

89. “Tasasi bhamasi leṇamicchasi, attāṇosi kuhiṃ gamissasi;  
Apposukko bhuñja tuṇḍila, maṃsatthāya hi positāmhase.
90. “Ogaha rahadam akaddamaṃ, sabbam sedamalam pavāhaya;  
Gaṇhāhi navam vilepanam, yassa gandho na kadāci chijjati’ ti.

Tattha **tasasi bhamasī**ti maraṇabhayena uttasasi, teneva kilamanto bhamasi. **Leṇamicchasi**ti patiṭṭham olokesi. **Attāṇosī**ti tāta, pubbe amhākaṃ mātā paṭisaraṇam ahosi, sā ajja pana nirapekkhā amhe chaḍḍesi, idāni kuhiṃ gamissasi. **Ogahāti** ogāha, ayameva vā pātho. **Pavāhayāti** pavāhehi, hārehīti attho. **Na chijjati**ti na nassati. Idaṃ vuttam hoti – tāta, sace maraṇato tasasi, akaddamaṃ pokkharāṇiṃ otaritvā tava sarīre sabbam sedaṇca malaṇca pavāhetvā surabhigandhavilepanam vilimpāti.

Tassa dasa pāramiyo āvajjetvā mettāpāramiṃ purecārikaṃ katvā paṭhamam padaṃ udāharantasessa saddo sakalam dvādasayojanikaṃ bārāṇasiṃ ajjhottharivā gato. Sutasutakkhaṇeyeva rājauparājādayo ādiṃ katvā bārāṇasivāsino āgamaṃsu. Anāgatāpi gehe ṭhitāva suṇiṃsu. Rājapurisā gacche chinditvā bhūmiṃ samaṃ katvā vālukaṃ okiriṃsu. Dhuttānaṃ surāmado chijji. Pāse chaḍḍetvā dhammam suṇamānā aṭṭhaṃsu. Mahallikāyapi surāmado chijji. Mahāsatto mahājanamajje cūlatuṇḍilassa dhammadesanaṃ ārabhi. Taṃ sutvā cūlatuṇḍilo “mayham bhātā evaṃ vadeti, amhākaṇca vaṃse pokkharāṇiṃ otaritvā nahānaṃ, sarīrato sedamalapavāhanaṃ, purāṇavilepanam hāretvā navavilepanagahaṇaṇca kismiṇci kāle natthi, kiṃ nu kho sandhāya bhātā maṃ eva mātā’ ti pucchanto catuttham gāthamāha –

91. “Katamo rahado akaddamo, kiṃsu sedamalanti vuccati;  
Katamaṇca navam vilepanam, yassa gandho na kadāci chijjati’ ti.

Taṃ sutvā mahāsatto “tena hi kaniṭṭha ohitasoto suṇāhī’ ti buddhalīlāya dhammam desento imā gāthā abhāsi –

92. “Dhammo rahado akaddamo, pāpam sedamalanti vuccati;  
Sīlaṇca navam vilepanam, tassa gandho na kadāci chijjati.

93. “Nandanti sarīraghātino, na ca nandanti sarīradhārino;  
Puñṇāya ca puñṇamāsiyā, ramamānāva jahanti jīvita”nti.

Tattha **dhammoti** pañcasīlaatṭhasīladasasīlāni tīṇi sucaritāni sattatiṃsabodhipakkhiyadhammā amatamahānibbānanti sabbopesa dhammo nāma. **Akaddamoti** rāgadosamohamānadiṭṭhikilesakaddamānaṃ abhāvena akaddamo. Iminā sesadhammato vinivattetvā nibbānameva dasseti. “Yāvatā, bhikkhave, dhammā saṅkhatā vā asaṅkhatā vā, virāgo tesam dhammānaṃ aggamakkhāyati, yadidaṃ madanimmadano pipāsavinayo ālayasamugghāto vaṭṭupacchedo taṇhakkhayo virāgo nirodho nibbāna”nti (a. ni. 4.34; itivu. 90) hi vuttaṃ, tadeva dassento, tāta cūlatuṇḍila, ahaṃ nibbānataḷākaṃ “rahado”ti kathemi. Jātijarābyādhimaraṇādīni hi tattha natthi, sace maraṇato muñcitukāmo, nibbānagāminiṃ paṭipadaṃ gaṇhāti. Upanissayapaccayavasena kira bodhisatto evaṃ kathesi.

**Pāpaṃ sedamalanti** tāta cūlatuṇḍila, pāpaṃ sedamalasadisattā “sedamala”nti porāṇakapaṇḍitehi kathitaṃ. Taṃ panetaṃ ekavidhena pāpaṃ yadidaṃ manopadoso, duvidhena pāpaṃ pāpakaṇḍika sīlaṃ, pāpikā ca diṭṭhi, tividhena pāpaṃ tīṇi duccharitāni, catubbidhena pāpaṃ cattāri agatigamanāni, pañcavidhena pāpaṃ pañca cetokhilā, chabbidhena pāpaṃ cha agāravā, sattavidhena pāpaṃ satta asaddhammā, aṭṭhavidhena pāpaṃ aṭṭha micchattā, navavidhena pāpaṃ nava āghātavattḥūni, dasavidhena pāpaṃ dasa akusalakammāpathā, bahuvividhena pāpaṃ rāgo doso mohoti ekakadukatikādivasena vibhattā akusalā dhammā, iti sabbampetaṃ pāpaṃ “sarīranissitasedamalasadisā”nti paṇḍitehi kathitaṃ.

**Sīlanti** pañcasīlaṃ dasasīlaṃ catupārisuddhisīlaṃ. “Idaṃ, tāta, sīlaṃ catujjātigandhavilepanasadisā”nti vadati. **Tassāti** tassa silassa gandho tīsu vayesu kadāci na chijjati, sakalalokaṃ pattharivā gacchati.

“Na pupphagandho paṭivātameti, na candanaṃ taggaramallikā vā;  
Sataṇḍa gandho paṭivātameti, sabbā disā sappuriso pavāyati.

“Candanaṃ tagaraṃ vāpi, uppalaṃ atha vassikī;  
Etesaṃ gandhajātānaṃ, sīlagandho anuttaro.

“Appamatto ayaṃ gandho, yvāyaṃ tagaracandanaṃ;  
Yo ca sīlavataṃ gandho, vāti devesu uttamo”ti. (dha. pa. 54-56);

**Nandanti sarīraghātino** tāta cūlatuṇḍila, ime aññāṇamanussā “madhuramaṃsaṃ khādissāma, puttadāraṃpi khādāpessāma”ti pāṇātipātaṃ karontā nandanti tussanti, pāṇātipāto āsevito bhāvito bahulīkato nirayasaṃvattaniko hoti, tiracchānayo...pe... pettivisayasaṃvattaniko hoti, yo sabbalahuko pāṇātipātassa vipāko, so manussabhūtassa appāyukasāṃvattaniko hotīti imaṃ pāṇātipāte ādīnavaṃ na jānanti. Ajānanta –

“Madhuvā maññati bālo, yāva pāpaṃ na paccati;  
Yadā ca paccati pāpaṃ, bālo dukkhaṃ nigacchati”ti. (dha. pa. 69) –

Madhurasaññino hutvā –

“Caranti bālā dummedhā, amitteneva attanā;  
Karontā pāpakaṃ kammaṃ, yaṃ hoti kaṭukapphala”nti. (dha. pa. 66) –

Ettakampi na jānanti.

“Na taṃ kammaṃ kataṃ sādhu, yaṃ katvā anutappati;  
Yassa assumukho rodaṃ, vipākaṃ paṭisevatī”ti. (dha. pa. 67);

**Na ca nandanti sarīradhārinoti** tāta cūlatuṇḍila, ye panete sarīradhārinō sattā, te attano maraṇe āgacchante ṭhapetvā sīhamigarājahatthājānīyaassājānīyakhīṇāsave avasesā bodhisattaṃ ādiṃ katvā abhāyantā nāma natthi.

“Sabbe tasanti daṇḍassa, sabbe bhāyanti maccuno;  
Attānaṃ upamaṃ katvā, na haneyya na ghātaye”ti. (dha. pa. 129);

**Puṇṇāyāti** guṇapūṇṇāya. **Puṇṇamāsiyāti** puṇṇacandayuttāya, māsaṃ vā pūretvā ṭhitāya. Tadā kira puṇṇamāsī uposathadivāso hoti. **Ramamānāva jahanti jīvitanti** tāta cūlatuṇḍila, mā soci mā paridevi, maraṇassa nāma te bhāyanti, yesaṃ abbhantare sīlādiguṇā natthi. Mayaṃ pana sīlācārasampannā puññavanto, tasmā amhādisā sattā ramamānāva jahanti jīvitanti.

Evam mahāsatto madhurena sarena buddhalīlāya dhammaṃ desesi. Mahājanakāyā aṅguliyo phoṭesuṃ, celukkhepā ca pavattiṃsu, sādhu-kārasaddapuṇṇaṃ antalikkhaṃ ahoṣi. Bārāṇasirājā bodhisattaṃ rajjena pūjetvā mahallikāya yasaṃ datvā ubhopi te gandhodakena nhāpetvā gandhādīhi vilimpāpetvā gīvāsu maṇiratanāni piḷandhāpetvā gharaṃ netvā puttaṭṭhāne ṭhapetvā mahantena parivārena paṭijaggi. Bodhisatto rañño pañca sīlāni adāsi. Sabbe bārāṇasivāsino ca kāsiraṭṭhavāsino ca pañca sīlāni rakkhīṃsu. Mahāsatto nesaṃ pakkhadivasesu dhammaṃ desesi, vinicchaye nisīditvā aḍḍe tīresi. Tasmīṃ dharamāne kūṭaḍḍakārakā nāma nāhesuṃ. Aparabhāge rājā kalamakāsi. Mahāsatto tassa sarīraparihāraṃ kāretvā vinicchaye potthake likhāpetvā “imaṃ potthakaṃ oloketvā aḍḍaṃ tīreyyāthā”ti vatvā mahājanassa dhammaṃ desetvā appamādena ovādaṃ datvā sabbesaṃ rodantānaṃ paridevantānaññeva saddhiṃ cūlatuṇḍilena araññaṃ pāvīsi. Tadā bodhisattassa ovādo satṭhi vassasahassāni pavatti.

Satthā imaṃ dhammaḍesaṇaṃ āharitvā saccāni pakāsetvā jātakam samodhānesi, saccapariyosāne so maraṇabhīruko bhikkhu sotāpattiphale patiṭṭhahi.

Tadā rājā ānando ahoṣi, cūlatuṇḍilo maraṇabhīruko bhikkhu, parisā buddhāparisā, mahātuṇḍilo pana ahameva ahoṣinti.

Tuṇḍilajātakavaṇṇanā tatiyā.

[389] 4. Suvanṇakakkaṭakajātakavaṇṇanā

**Siṅgimigoti** idaṃ satthā veḷuvane viharanto ānandattherassa attano atthāya jīvitapariccāgaṃ ārabha katesi. Vatthu yāva dhanuggahapayojanā **khaṇḍahālajātaka** (jā. 2.22.982 ādayo) dhanapālāvissajjanaṃ **cūlahamsamahāhamsajātaka** (jā. 1.15.133 ādayo) kathitaṃ. Tadā hi bhikkhū dhammasabhāyaṃ kathaṃ samuṭṭhāpesuṃ “āvuso, dhammaḥaṇḍāgārikaānandatthero sekkhapaṭisambhidāppatto hutvā dhanapālake āgacchante sammāsambuddhassa jīvitaṃ pariccajī”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepi ānando mayhaṃ jīvitaṃ pariccajīyevā”ti vatvā atītaṃ āhari.

Atīte rājagahassa pubbapasse sālindiyo nāma brāhmaṇagāmo hoti. Tadā bodhisatto tasmīṃ gāme kassakabrāhmaṇakule nibbattitvā vayappatto kuṭumbaṃ saṅṭhapetvā tassa gāmassa pubbuttarāya disāya ekasmiṃ gāmakhette karīsasahassamattaṃ kaṣiṃ kāresi. So ekadivasaṃ manussehi saddhiṃ khettaṃ gantvā kammakāre “kasathā”ti āṇāpetvā mukhadhovanatthāya khettaḷoṭiyaṃ mahantaṃ sobbhaṃ upasaṅkami. Tasmīṃ kho pana sobbhe eko suvaṇṇavaṇṇo kakkaṭako paṭivasati abhirūpo pāsādiko. Bodhisatto dantakaṭṭhaṃ khādītva taṃ sobbhaṃ otari. Tassa mukhadhovanakāle kakkaṭako santikaṃ āgamāsi. Atha naṃ so ukkhipitvā attano uttarisāṭakantare nipajjāpetvā gahetvā khettaṃ kattabbakiccaṃ

katvā gacchanto tattheva naṃ sobbhe pakkhipitvā gehaṃ agamāsi. Tato paṭṭhāya khettaṃ āgacchanto paṭhamaṃ taṃ sobbhaṃ gantvā kakkāṭakaṃ ukkhipitvā uttarisāṭakantare nipajjāpetvā pacchā kammantaṃ vicāresi. Iti tesam aññaṃaññaṃ viśāso daḷho ahoṣi.

Bodhisatto nibaddhaṃ khettaṃ āgacchati, akkhīsu ca panassa pañca pasādā tīṇi maṇḍalāni visuddhāni hutvā paññāyanti. Athassa khettaṃ ekasmiṃ tāle kākakulāvake kākī akkhīni disvā khāditukāmā hutvā kākāṃ āha – “sāmi, dohaḷo me uppanno”ti. “Kiṃ dohaḷo nāmā”ti? “Etassa brāhmaṇassa akkhīni khāditukāmāhī”ti. “Duddohaḷo te uppanno, ko etāni āharitūṃ sakkhissatī”ti. “Tvāṃ na sakkosī”ti ahampetaṃ jānāmi, yo panesa tālassa avidūre vammiko, ettha kaṇhasappo vasatī. “Taṃ upaṭṭhaha, so etaṃ ḍaṃsitvā māressatī, athassa akkhīni uppāṭetvā tvāṃ āharissasī”ti. So “sādhū”ti sampaṭicchitvā tato paṭṭhāya kaṇhasappaṃ upaṭṭhahi. Bodhisattenaṃ vāpitasassānaṃ gabbhaggahaṇakāle kakkāṭako mahā ahoṣi. Athekadivasam sappa kākamāha “samma, tvāṃ nibaddhaṃ maṃ upaṭṭhahasi, kiṃ te karomī”ti. “Sāmi, tumhākaṃ dāsīyā etassa khettsāmikassa akkhīsu dohaḷo uppajjī, svāhaṃ tumhākaṃ ānubhāvena tassa akkhīni labhissāmīti tumhe upaṭṭhahāmī”ti. Sappa “hotu, nayidaṃ garukaṃ, labhissasī”ti taṃ assāsetvā puna divase brāhmaṇassa āgamanamagge kedāramariyādaṃ nissāya tiṇehi paṭicchanno hutvā tassāgamaṃ olokento nipajjī.

Bodhisatto āgacchanto paṭhamaṃ sobbhaṃ otaritvā mukhaṃ dhovitvā sinehaṃ paccupaṭṭhāpetvā suvaṇṇakakkāṭakaṃ āliṅgetvā uttarisāṭakantare nipajjāpetvā khettaṃ pāvīsi. Sappa taṃ āgacchantaṃ disvā vā vegena pakkhanditvā piṇḍikamaṃse ḍaṃsitvā tattheva pāṭetvā vammikaṃ sandhāya palāyi. Bodhisattassa patanañca kakkāṭakassa sāṭakantarato laṅghanañca kākassa āgantvā bodhisattassa ure nilīyanañca apacchāpurimaṃ ahoṣi. Kāko nilīyitvā akkhīni tuṇḍena pahari. Kakkāṭako “imaṃ kākāṃ nissāya mama sahāyassa bhayaṃ uppannaṃ, etasmiṃ gahite sappa āgacchissatī”ti saṇḍāsena gaṇhanto viya kākāṃ gīvāyaṃ aḷena daḷhaṃ gahetvā kilametvā thokaṃ sithilamakāsi. Kāko “kissa maṃ samma, chaḍḍetvā palāyasi, esa maṃ kakkāṭako bhīyyo vihettheti, yāva na marāmi, tāva ehi”ti sappam pakkosanto paṭhamaṃ gāthamāha –

94. “Siṅgīmigo āyatacakkhunetto, aṭṭhittaco vārisayo alomo;  
Tenābhībhūto kapaṇaṃ rudāmi, hare sakhā kissa nu maṃ jahāsī”ti.

Tattha **siṅgīmigoti** siṅgīsuvannaṇaṇatāya vā aḷasaṅkhātānaṃ vā siṅgānaṃ atthitāya kakkāṭako vutto. **Āyatacakkhunetto**ti dīghehi cakkhusaṅkhātehi nettehi samannāgato. **Aṭṭhimeva** taco assāti **aṭṭhittaco**. **Hare sakhā**ti ālapanametaṃ, ambho sahāyāti attho.

Sappa taṃ sutvā mahantaṃ phaṇaṃ katvā kākāṃ assāsento agamāsi. Satthā imamatthaṃ dīpento abhisambuddho hutvā dutiyaṃ gāthamāha –

95. “So passasanto mahatā phaṇena, bhujāṅgamo kakkāṭamajjhapatto;  
Sakhā sakhāraṃ paritāyamāno, bhujāṅgamaṃ kakkāṭako gahesī”ti.

Tattha **kakkāṭamajjhapatto**ti kakkāṭakaṃ sampatto. **Sakhā sakhāra**nti sahāyo sahāyaṃ. “Sakaṃ sakhāra”ntipi pāṭho, attano sahāyanti attho. **Paritāyamāno**ti rakkhamāno. **Gahesī**ti dutiyena aḷena gīvāyaṃ daḷhaṃ gahesi.

Atha naṃ kilametvā thokaṃ sithilamakāsi. Atha sappa “kakkāṭakā nāma neva kākamaṃsaṃ khādanti, na sappamaṃsaṃ, atha kena nu kho kāraṇena ayaṃ amhe gaṇhī”ti cintetvā taṃ pucchanto tatiyaṃ gāthamāha –

96. “Na vāyasaṃ no pana kaṇhasappaṃ, ghāsattiko kakkāṭako adeyya;  
Pucchāmi taṃ āyatacakkhunetta, atha kissa hetumha ubho gahītā”ti.

Tattha **ghāsatthikoti** āhāratthiko hutvā. **Adeyyāti**ādiyeyya, na-kārena yojetvā na gaṇhīti attho.

Taṃ sutvā kakkāṭako gahaṇakāraṇaṃ kathento dve gāthā abhāsi –

97. “Ayaṃ puriso mama atthakāmo, yo maṃ gahetvāna dakāya neti;  
Tasmiṃ mate dukkhamanappakaṃ me, ahañca eso ca ubho na homa.
98. “Mamañca disvāna pavaddhakāyaṃ, sabbo jano hiṃsitumeva micche;  
Sāduñca thūlañca muduñca maṃsaṃ, kākāpi maṃ disva viheṭṭhayeyyu”nti.

Tattha **ayanti** bodhisattaṃ niddisati. **Atthakāmoti** hitakāmo. **Dakāya netīti** yo maṃ sampiyāyamāno uttarisāṭakena gahetvāna udakāya neti, attano vasanakasobbhaṃ pāpeti. **Tasmiṃ mateti** sace so imasmiṃ ṭhāne marissati, etasmiṃ mate mama kāyikaṃ cetasikaṃ mahantaṃ dukkhaṃ bhavissatīti dīpeti. **Ubho na homāti** dvepi janā na bhavissāma. **Mamañca disvānāti** gāthāya ayamatto – idañca aparaṃ kāraṇaṃ, imasmiṃ mate anāthaṃ nippaccayaṃ maṃ pavaḍḍhitakāyaṃ disvā sabbo jano “imassa kakkāṭakassa sāduñca thūlañca muduñca maṃsa”nti maṃ māretuṃ iccheyya, na kevalañca jano manusso, tiracchānabhūtā kākāpi maṃ disvā viheṭṭhayeyyuṃ viheseyyuṃ māreyyuṃ.

Taṃ sutvā sappo cintesi “ekenupāyena imaṃ vañcetvā kākāñca attānañca mocessāmī”ti. Atha naṃ vañcetukāmo chaṭṭhaṃ gāthamāha –

99. “Sacetassa hetumha ubho gahītā, uṭṭhātu pose visamāvamāmi;  
Mamañca kākāñca pamuñca khippaṃ, pure visaṃ gāḷhamupeti macca”nti.

Tattha **sacetassa hetūti** sace etassa kāraṇā. **Uṭṭhātūti** nibbiso hotu. **Visamāvamāmīti** ahamassa visaṃ ākaḍḍhāmi, nibbisaṃ naṃ karomi. **Pure visaṃ gāḷhamupeti maccanti** imañhi maccaṃ mayā anāvamiyamānaṃ visaṃ gāḷhaṃ balavaṃ hutvā upagaccheyya, taṃ yāva na upagacchati, tāvadeva amhe dvepi jane khippaṃ muñcāti.

Taṃ sutvā kakkāṭako cintesi “ayaṃ ekenupāyena maṃ dvepi jane vissajjāpetvā palāyitukāmo, mayhaṃ upāyakosallaṃ na jānāti, ahaṃ dāni yathā sappo sañcaritūṃ sakkoti, evaṃ aḷaṃ sithilaṃ karissāmi, kākāṃ pana neva vissajjessāmī”ti evaṃ cintetvā sattamaṃ gāthamāha –

100. “Sappaṃ pamokkhāmi na tāva kākāṃ, paṭibandhako hohiti tāva kāko;  
Purisañca disvāna sukhiṃ arogaṃ, kākāṃ pamokkhāmi yatheva sappa”nti.

Tattha **paṭibandhakoti** pāṭibhogo. **Yatheva sappanti** yathā bhavantaṃ sappaṃ muñcāmi, tathā kākāṃ pamokkhāmi, kevalaṃ tvamaṃ imassa brāhmaṇassa sarīrato sīghaṃ visaṃ āvamāhīti.

Evañca pana vatvā tassa sukhasañcāraṇatthaṃ aḷaṃ sithilamakāsi. Sappo visaṃ āvamitvā mahāsattassa sarīraṃ nibbisaṃ akāsi. So niddukkho uṭṭhāya pakativanṇeneva aṭṭhāsi. Kakkāṭako “sace ime dvepi janā arogā bhavissanti, mayhaṃ sahāyassa vaḍḍhi nāma na bhavissati, vināsessāmi ne”ti cintetvā kattarikāya uppalamakuḷaṃ viya aḷehi ubhinnampi sīsaṃ kappetvā jīvitakkhayaṃ pāpesi. Kākāpi tamhā ṭhānā palāyi. Bodhisatto sappassa sarīraṃ daṇḍake veṭhetvā gumbapiṭṭhe khipi. Suvaṇṇakakkāṭakaṃ sobbhe vissajjetvā nhatvā sālindiyagāmaṃ gato. Tato paṭṭhāya kakkāṭakena saddhiṃ adhikataro vissāso ahoṣi.

Satthā imaṃ dhammadesanaṃ āharitvā saccāni pakāsetvā jātaṃ samodhānento osānagāthamāha –

101. “Kāko tadā devadatto ahoṣi, māro pana kaṇhasappo ahoṣi;

Ānandabhaddo kakkāṭako ahoṣi, ahaṃ tadā brāhmaṇo homi satthā’’ti.

Saccapariyosāne bahū sotāpannādayo ahesuṃ. Kākī pana gāthāya na vuttā, sā ciñcamāṇavikā ahoṣīti.

Suvaṇṇakakkāṭakajātakavaṇṇanā catutthā.

[390] 5. Mayhakajātakavaṇṇanā

**Sakuṇo mayhako nāmāti** idaṃ satthā jetavane viharanto āgantukaseṭṭhiṃ ārabba kathesi.

Sāvattiyañhi āgantukaseṭṭhi nāma aḍḍho ahoṣi mahaddhano. So neva attanā bhoge bhuñji, na paresaṃ adāsi, nānaggarase paṇīte bhojane upanīte taṃ na bhuñjati, bilaṅgadiyaṃ kaṇājakam eva bhuñjati, dhūpitavāsitesu kāsikavatthesu upanītesu tāni hāretvā thūlathūlasāṭake nivāseti, ājānīyayutte maṇikanakavicitte rathe upanīte tampi harāpetvā kattararathakena gacchati, suvaṇṇacchatte dhāriyamāne taṃ apanetvā paṇṇacchattena dhāriyamānena. So yāvajīvaṃ dānādīsu puññesu ekampi akatvā kālaṃ katvā roruvaniraye nibbatti. Tassa aputtakam sāpateyyam rājabalaṃ sattahi rattidivasehi rājakulaṃ pavesesi. Tasmīṃ pavesite rājā bhuttapātarāso jetavanam gantvā satthāraṃ vanditvā nisinnō ‘‘kiṃ, mahārāja, buddhupaṭṭhānam na karosī’’ti vutte ‘‘bhante, sāvattiyam āgantukaseṭṭhino nāma kālakatassa assāmikadhane amhākam ghare āhariyamāneyeva satta rattidivasā gatā, so pana etaṃ dhanam labhitvāpi neva attanā paribhuñji, na paresaṃ adāsi, rakkhasapariggahitapokkharāṇī viyassa dhanam ahoṣi, so ekadivasampi paṇītabhojanādīnam rasam ananubhavitvāva maraṇamukham pavitṭho, evam maccharī apuññasatto kiṃ katvā ettakam dhanam labhi, kena cassa bhogesu cittaṃ na ramī’’ti satthāraṃ pucchi. Satthā ‘‘mahārāja, dhanalābho ca, dhanam laddhā aparibhuñjanakāraṇaṇca teneva kata’’nti vatvā tena yācito atītam āhari.

Atīte bārānasiyam brahmadatte rajjam kārente bārānasisetṭhi assaddho ahoṣi maccharī, na kassaci kiñci deti, na kañci saṅgaṇhāti. So ekadivasam rājupaṭṭhānam gacchanto tagarasikhim nāma paccekabuddham piṇḍāya carantaṃ disvā vanditvā ‘‘laddhā, bhante, bhikkhā’’ti pucchitvā ‘‘nanu carāma mahāseṭṭhī’’ti vutte purisaṃ āṇāpesi ‘‘gaccha, imaṃ amhākam gharam ānetvā mama pallaṅke nisīdāpetvā amhākam paṭiyattabhattassa pattam pūretvā dāpehi’’ti. So paccekabuddham gharam netvā nisīdāpetvā seṭṭhibhariyāya ācikkhi. Sā nānaggarasabhattassa pattam pūretvā tassa adāsi. So bhattam gahetvā seṭṭhinivesanā nikkhamitvā antaravīthiyam paṭipajji. Seṭṭhi rājakulato paccāgacchanto taṃ disvā vanditvā ‘‘laddham, bhante, bhata’’nti pucchi. ‘‘Laddham mahāseṭṭhī’’ti. So pattam oloketvā cittaṃ pasādetum nāsakkhi, ‘‘imaṃ me bhattam dāsā vā kammakarā vā bhuñjitvā dukkarampi kammaṃ kareyyum, aho vata me jānī’’ti aparacetanam paripuṇṇam katum nāsakkhi. Dānañhi nāma tisso cetanā paripuṇṇam katum sakkontasseva mahapphalaṃ hoti.

‘‘Pubbeva dānā sumanā bhavāma, dadampi ve attamanā bhavāma;  
Datvāpi ve nānutappāma pacchā, tasmā hi amhaṃ daharā namiyyare. (jā. 1.10.95);

‘‘Pubbeva dānā sumano, dadam cittaṃ pasādaye;  
Datvā attamano hoti, esā yaññassa sampadā’’. (a. ni. 6.37; pe. va. 305);

Iti, mahārāja, āgantukaseṭṭhi tagarasikhipaccekabuddhassa dinnapaccayena bahum dhanam labhi, datvā aparacetanam paṇītam katum asamatthatāya bhoge bhuñjitum nāsakkhīti. ‘‘Puttam pana kasmā na labhi, bhante’’ti? Satthā ‘‘puttassa alabhanakāraṇampi teneva katam, mahārājā’’ti vatvā tena yācito atītam āhari.

Atīte bārānasiyam brahmadatte rajjam kārente bodhisatto asītikotiṭṭhivhave seṭṭhikule nibbattitvā vayappatto mātāpitūnam accayena kaniṭṭham saṅgaṇhitvā kuṭumbaṃ vicārento gharadvāre dānasālam kāretvā mahādānam pavattento agāram ajjhāvasi. Athassa eko putto jāyi. So tassa padasā gamanakāle kāmesu ādīnavam nekkhamme cānisaṃsam disvā saddhim puttadārena sabbam gharavibhavam

kaniṭṭhassa niyyātetvā “appamatto dānaṃ pavattehī”ti ovādaṃ datvā isipabbajjaṃ pabbajitvā abhiññā ca samāpattiyo ca nibbattetvā himavantapadese vihāsi. Kaniṭṭhopissa ekaṃ puttaṃ paṭilabhi. So taṃ vaḍḍhantaṃ disvā cintesi “mama bhātu putte jīvante kuṭumbaṃ bhinditvā dvidhā bhavissati, bhātu puttaṃ māressāmi”ti. Atha naṃ ekadivasaṃ nadiyaṃ opilāpetvā māresi. Tameṇaṃ nhatvā āgataṃ bhātu jāyā “kuhiṃ mama putto”ti pucchi. “Nadiyaṃ udakaṃ kīḷi, atha naṃ uduke vicinanto nāddasa”nti. Sā roditvā kanditvā tuṅhī ahoṣi.

Bodhisatto taṃ pavattiṃ ñatvā “idaṃ kiccaṃ pākaṭaṃ karissāmi”ti ākāsenāgantvā bārāṇasiyaṃ otarivā sunivattho supāruto tassa gharadvāre ṭhatvā dānasālaṃ adisvā “dānasālāpi iminā asappurisaṇa nāsītā”ti cintesi. Kaniṭṭho tassa āgatabhāvaṃ ñatvā āgantvā mahāsattaṃ vanditvā pāsādaṃ āropetvā subhojanaṃ bhojesi. So bhattakiccāvasāne sukhakathāya nisinnō “dārako na paññāyati, kahaṃ nu kho”ti pucchi. “Mato, bhante”ti. “Kena kāraṇena”ti? “Udakakīḷanaṭṭhāne asukakāraṇenāti na jānāmi”ti. “Kiṃ tvamaṃ asappurisaṇa na jānissasi, tayā katakiccaṃ mayhaṃ pākaṭaṃ, nanu tvamaṃ iminā nāma kāraṇena taṃ māresi, kiṃ nu tvamaṃ rājādīnaṃ vasena nassamānaṃ dhaṇaṃ rakkhituṃ sakkuṇeyyāsi, mayhakasakuṇassa ca tuyhaṅca kiṃ nānākaraṇa”nti? Athassa mahāsatto buddhalīlāya dhammaṃ desento imā gāthā abhāsi –

102. “Sakuṇo mayhako nāma, girisānudarīcaro;  
Pakkaṃ pipphalimāruya, ‘mayhaṃ mayha’nti kandati.
103. “Tassevaṃ vilapantassa, dijasaṅghā samāgatā;  
Bhutvāna pipphaliṃ yanti, vilapatveva so dijo.
104. “Evameva idhekacco, saṅgharivā bahuṃ dhaṇaṃ;  
Nevattano na ñātīnaṃ, yathodhiṃ paṭipajjati.
105. “Na so acchādanaṃ bhattaṃ, na mālaṃ na vilepanaṃ;  
Anubhoti sakim kiñci, na saṅgaṅhāti ñātake.
106. “Tassevaṃ vilapantassa, mayhaṃ mayhanti rakkhato;  
Rājāno atha vā corā, dāyādā yeva appiyā;  
Dhanamādāya gacchanti, vilapatveva so naro.
107. “Dhīro bhoge adhigamma, saṅgaṅhāti ca ñātake;  
Tena so kittiṃ pappoti, pecca sagge pamodati”ti.

Tattha **mayhakoti** “mayhaṃ mayha”nti viravanavasena evaṃladdhanāmo. Girisānudarīsu caratīti **girisānudarīcaro. Pakkaṃ pipphalinti** himavantapadese ekaṃ phalabharitaṃ pipphalirukkhaṃ. **Kandati** dijagaṇe taṃ rukkhaṃ parivāretvā pakkāni khādante vāretuṃ “mayhaṃ mayha”nti paridevanto vicarati. **Tassevaṃ vilapantassāti** tassa vilapantasseva. **Bhutvāna vipphaliṃ yanti** taṃ pipphalirukkhaṃ paribhuñjitvā aññaṃ phalasampannaṃ rukkhaṃ gacchanti. **Vilapatvevāti** so pana dijo vilapatiyeva. **Yathodhinti** yathākoṭṭhāsaṃ, mātāpitābhātubhaginīputtadhītādīnaṃ upabhogaparibhogavasena yo yo koṭṭhāso dātabbo, taṃ taṃ na detīti attho.

**Sakinti** ekavārampi nānubhoti. “Saka”ntipi pāṭho, attano santakampīti attho. **Na saṅgaṅhātīti** bhattacchādanabījanaṅgalādīdānavasena na saṅgaṅhāti. **Vilapatveva so naroti** etesu rājādīsū dhaṇaṃ gahetvā gacchantesu kevalaṃ so puriso vilapatiyeva. **Dhīroti** paṇḍito. **Saṅgaṅhātīti** attano santikaṃ āgate dubbalañātake bhattacchādanabījanaṅgalādīdānena saṅgaṅhāti. **Tenāti** so puriso tena ñātisaṅgahena catuparisamajjhe kittiṅca attano vaṇṇabhaṇanaṅca pāpuṇāti, pecca sagge devanagare pamodati.

Evam mahāsatto tassa dhammaṃ desetvā dānaṃ pākatikaṃ kāretvā himavantameva gantvā aparihīnajjhāno brahmalokūpago ahosi.

Satthā imaṃ dhammadesanaṃ āharitvā “iti kho, mahārāja, āgantukasetthi bhātu puttassa māritattā ettakaṃ kālaṃ neva puttaṃ, na dhītaraṃ alabhī”ti vatvā jātakaṃ samodhānesi – “tadā kaniṭṭho āgantukasetthi ahosi, jeṭṭhako pana ahameva ahosi”nti.

Mayhakajātakavaṇṇanā pañcamā.

[391] 6. Vijjādharaajātakavaṇṇanā

**Dubbaṇṇarūpanti** idaṃ satthā jetavane viharanto lokatthacariyaṃ ārabha katesi. Vatthu **mahākaṇhajātake** (jā. 1.12.61 ādayo) āvi bhavissati. Tadā pana satthā “na, bhikkhave, idāneva, pubbepi tathāgato lokatthacariyaṃ cariyevā”ti vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto sakko ahosi. Tadā eko vijjādharo vijjaṃ parivattetvā aḍḍharattasamaye āgantvā bārāṇasirañño aggamahesiyā saddhiṃ aticarati, tassā paricārikāyo sañjāniṃsu. Sā sayameva rājānaṃ upasaṅkamtivā “deva, eko puriso aḍḍharattasamaye sirigabbhaṃ pavisitvā maṃ dūseti”ti āha. “Sakkhissasi pana kiñci saññānaṃ kātu”nti? “Sakkomi, devā”ti sā jātihiṅgulikapātiṃ āharāpetvā tassa purisassa rattiṃ āgantvā abhiramitvā gacchantassa piṭṭhiyaṃ pañcaṅgulikaṃ datvā pātova rañño ārocesi. Rājā manusse āṇāpesi “gacchatha, sabbadisāsu oloketvā piṭṭhiyaṃ katajātihiṅgulapañcaṅgulikapurisam gaṇhathā”ti. Vijjādharo rattiṃ anācāraṃ katvā divā susāne sūriyaṃ namassanto ekapādena tiṭṭhati. Rājapurisā taṃ disvā parivārayiṃsu. So “pākaṃ me kammaṃ jāta”nti vijjaṃ parivattetvā ākāse uppatitvā gato.

Rājā taṃ disvā āgatapurise “addasathā”ti pucchi. “Āma, addasāmā”ti. “Ko nāmeso”ti? “Pabbajito, devā”ti. “So hi rattiṃ anācāraṃ katvā divā pabbajitavesena vasati”. Rājā “ime divā samaṇavesena caritvā rattiṃ anācāraṃ karontī”ti pabbajitānaṃ kujjhitvā micchāgahaṇaṃ gahetvā “mayhaṃ vijitā ime sabbe pabbajitā palāyantu, diṭṭhadiṭṭhāṇe rājānaṃ karissantū”ti bherim carāpesi. Tiyojanasatikā kāsiraṭṭhā palāyitvā sabbe pabbajitā aññarājadhāniyo agamiṃsu. Sakalakāsiraṭṭhe manussānaṃ ovādadāyako ekopi dhammikasamaṇabrāhmaṇo nāhosi. Anovādakā manussā pharusā ahesuṃ, dānasīlavimukhā matamatā yebhuyyena apāye nibbattiṃsu, sagge nibbattanakā nāma nāhesuṃ.

Sakko nave devaputte apassanto “kiṃ nu kho kāraṇa”nti āvajjetvā vijjādharaṃ nissāya bārāṇasiraññā kuddhena micchāgahaṇaṃ gahetvā pabbajitānaṃ raṭṭhā pabbajitabhāvaṃ ṇatvā “ṭhapetvā maṃ añño imassa rañño micchāgahaṇaṃ bhindituṃ samattho nāma natthi, rañño ca raṭṭhavāsīnaṃ avassayo bhavissāmī”ti cintetvā nandamūlapabbhāre paccekabuddhānaṃ santikaṃ gantvā vanditvā “bhante, mayhaṃ ekaṃ mahallakaṃ paccekabuddhaṃ detha, kāsiraṭṭhaṃ pasādessāmī”ti āha. So saṅghattherameva labhi, athassa pattacīvaraṃ gahetvā taṃ purato katvā sayam pacchato hutvā sirasmim añjaliṃ ṭhapetvā paccekabuddhaṃ namassanto uttamarūpadharo māṇavako hutvā sakalanagarassa matthakena tikkhattuṃ vicaritvā rājadvāraṃ āgantvā ākāse aṭṭhāsi. Amaccā rañño ārocesuṃ “deva, abhirūpo māṇavako ekaṃ samaṇaṃ ānetvā rājadvāre ākāse ṭhito”ti. Rājā āsanā utṭhāya sīhapañjare ṭhatvā “māṇavaka, kasmā tvaṃ abhirūpo samāno etassa virūpassa samaṇassa pattacīvaraṃ gahetvā namassamāno ṭhito”ti tena saddhiṃ sallapanto paṭhamaṃ gāthamāha –

**108.** “Dubbaṇṇarūpaṃ tuvamariyavaṇṇī, purakkhatvā pañjaliko namassasi;  
Seyyo nu teso udavā sarikkho, nāmaṃ parassattano cāpi brūhī”ti.

Tattha **ariyavaṇṇī**ti sundararūpo. **Seyyo nu tesoti** eso virūpo pabbajito kiṃ nu tayā uttaritaro, udāhu sarikkho. **Nāmaṃ parassattano cāpī**ti etassa parassa ca attano ca nāmaṃ brūhīti pucchati.



Atha naṃ sakko “mahārāja, samaṇā nāma garuṭṭhāniyā, tena me nāmaṃ lapituṃ na labbhati, mayhaṃ pana te nāmaṃ kathessāmi”ti vatvā dutiyaṃ gāthamāha –

109. “Na nāmagottaṃ gaṇhanti rāja, sammaggatānujjugatāna devā;  
Ahañca te nāmadheyyaṃ vadāmi, sakkohamasmī tidasānamindo”ti.

Tattha **sammaggatānujjugatāna devāti** mahārāja, sabbasaṅkhāre yathā sabhāvasarasavasena sammasitvā aggaphalaṃ arahattaṃ pattattā sammaggatānaṃ, ujunā ca aṭṭhaṅgikena maggena nibbānaṃ gatattā ujugatānaṃ mahākhīṇāsavānaṃ upapattidevehi uttaritarānaṃ visuddhidevānaṃ upapattidevā nāmagottaṃ na gaṇhanti. **Ahañca te nāmadheyyanti** apica ahaṃ attano nāmadheyyaṃ tuyhaṃ kathemi.

Taṃ sutvā rājā tatiyagāthāya bhikkhunamassane ānisaṃsaṃ pucchi –

110. “Yo disvā bhikkhuṃ caraṇūpapannaṃ, purakkhatvā pañjaliko namassati;  
Pucchāmi taṃ devarājetamatthaṃ, ito cuto kiṃ labhate sukhaṃ so”ti.

Sakko catutthagāthāya kathesi –

111. “Yo disvā bhikkhuṃ caraṇūpapannaṃ, purakkhatvā pañjaliko namassati;  
Diṭṭheva dhamme labhate paṃsaṃsaṃ, saggañca so yāti sarīrabhedā”ti.

Tattha **bhikkhanti** bhinnakilesaṃ parisuddhapuggalaṃ. **Caraṇūpapannanti** sīlacaraṇena upetaṃ. **Diṭṭheva dhammeti** na kevalaṃ ito cutoyeva, imasmim̐ pana attabhāve so paṃsaṃsaṃ labhati, paṃsaṃsāsukhaṃ vindatīti.

Rājā sakkassa kathaṃ sutvā attano micchāgahaṇaṃ bhinditvā tuṭṭhamānaso pañcamāṃ gāthamāha –

112. “Lakkhī vata me udapādi ajja, yaṃ vāsavaṃ bhūtapatiddasāma;  
Bhikkhuñca disvāna tuvañca sakka, kāhāmi puññāni anappakāni”ti.

Tattha **lakkhīti** sirī, paññātipi vadanti. Idaṃ vuttaṃ hoti – ajja mama tava vacanaṃ suṇantasseva kusalākusalavipākajānanapaññā udapādīti. **Yanti** nipātamattaṃ. **Bhūtapatiddasāmāti** bhūtapatiṃ addasāma.

Taṃ sutvā sakko paṇḍitassa thutiṃ karonto chaṭṭhaṃ gāthamāha –

113. “Addhā have sevitabbā sapaññā, bahussutā ye bahuṭhānacintino;  
Bhikkhuñca disvāna mamañca rāja, karohi puññāni anappakāni”ti.

Tattha **bahuṭhānacintinoti** bahūni kāraṇāni cintanasamatthā.

Taṃ sutvā rājā osānagāthamāha –

114. “Akkodhano niccapasannacitto, sabbātithiyācayogo bhavitvā;  
Nihacca mānaṃ abhivādayissaṃ, sutvāna devinda subhāsītāni”ti.

Tattha **sabbātithiyācayogo bhavitvāti** sabbesaṃ atithīnaṃ āgatānaṃ āgantukānaṃ yaṃ yaṃ te yācanti, tassa tassa yutto anucchaviko bhavitvā, sabbaṃ tehi yācitayācitaṃ dadamānoti attho. **Sutvāna devinda subhāsītāni**ti tava subhāsītāni sutvā ahaṃ evarūpo bhavissāmīti vadati.

Evañca pana vatvā pāsādā oruyha paccekabuddhaṃ vanditvā ekamantaṃ aṭṭhāsi. Paccekabuddho ākāse pallānkena nisīditvā “mahārāja, vijjādhara na samaṇo, tvaṃ ito paṭṭhāya ‘atuccho loko, atthi dhammikasamaṇabrāhmaṇā’ ti nītvā dānaṃ dehi, sīlaṃ rakkha, uposathakammaṃ karohī” ti rājānaṃ ovadi. Sakkopi sakkānubhāvena ākāse ṭhatvā “ito paṭṭhāya appamattā hothā” ti nāgarānaṃ ovādaṃ datvā “palātā samaṇabrāhmaṇā āgacchantū” ti bheriṃ carāpesi. Atha te ubhopi sakaṭṭhānameva agamaṃsu. Rājā tassa ovāde ṭhatvā dānādīni puññāni akāsi.

Satthā imaṃ dhammadesanaṃ āharitvā jātaṃ samodhānesi – “tadā paccekabuddho parinibbuto, rājā ānando ahosi, sakko pana ahameva ahosi” nti.

Vijjādhara-jātakavaṇṇanā chaṭṭhā.

[392] 7. Singhapupphajātakavaṇṇanā

**Yametanti** idaṃ satthā jetavane viharanto aññataraṃ bhikkhuṃ ārabba kathesi. So kira jetavanā nikkhamitvā kosalaratṭhe aññataraṃ araññaṃ nissāya viharanto ekadivasam padumasaram otarivā supupphitapadumaṃ disvā adhovāte ṭhatvā upasiṅghi. Atha naṃ tasmim vane adhivatthā devatā “mārisa, tvaṃ gandhatheno nāma, idaṃ te ekaṃ theyyaṅga” nti saṃvejesi. So tāya saṃvejito puna jetavanaṃ āgantvā satthāraṃ vanditvā nisinno “kahaṃ bhikkhu nivutthosī” ti puṭṭho “asukavanasaṇḍe nāma, tattha ca maṃ devatā evaṃ nāma saṃvejesī” ti āha. Atha naṃ satthā “na kho bhikkhu pupphaṃ upasiṅghanto tvameva devatāya saṃvejito, porāṇakapaṇḍitāpi saṃvejitapubbā” ti vatvā tena yācito atītaṃ āhari.

Atīte bārānasiyaṃ brahmadatte rajjaṃ kārente bodhisatto ekasmiṃ kāsikagāme brāhmaṇakule nibbattitvā vayappatto takkasīlāyaṃ uggahitasippo aparabhāge isipabbajjaṃ pabbajitvā ekaṃ padumasaram nissāya upavasanto ekadivasam saram otarivā supupphitapadumaṃ upasiṅghamāno aṭṭhāsi. Atha naṃ ekā devadhītā rukkhakkhandhavivare ṭhatvā saṃvejayamānā paṭhamam gāthamāha –

**115.** “Yametaṃ vārijaṃ pupphaṃ, adinnaṃ upasiṅghasi;  
Ekaṅgamaṃ theyyānaṃ, gandhathenosi mārisā” ti.

Tattha **ekaṅgamaṃ** ekakoṭṭhāso esa.

Tato bodhisatto dutiyaṃ gāthamāha –

**116.** “Na harāmi na bhañjāmi, ārā siṅghāmi vārijaṃ;  
Atha kena nu vaṇṇena, gandhathenoti vuccatī” ti.

Tattha **ārā siṅghāmī**ti dūre ṭhito ghāyāmi. **Vaṇṇenā**ti kāraṇena.

Tasmim khaṇe eko puriso tasmim sare bhisāni ceva khaṇati, puṇḍarīkāni ca bhañjati. Bodhisatto taṃ disvā “maṃ ārā ṭhatvā upasiṅghantaṃ ‘coro’ ti vadasī, etaṃ purisaṃ kasmā na bhaṇasī” ti tāya saddhiṃ sallapanto tatiyaṃ gāthamāha –

**117.** “Yoyaṃ bhisāni khaṇati, puṇḍarīkāni bhañjati;  
Evaṃ ākiṇṇakammanto, kasmā eso na vuccatī” ti.

Tattha **ākiṇṇakammanto**ti kakkhaḷakammanto dāruṇakammanto.

Athassa avacanakāraṇam ācikkhantī devatā catutthapañcamagāthā abhāsi –

**118.** “Ākiṇṇaluddo puriso, dhāticelaṃva makkhito;

Tasmim me vacanaṃ natthi, tañcārahāmi vattave.

119. “Anaṅgaṇassa posassa, niccaṃ sucigavesino;  
Vālaggamattaṃ pāpassa, abbhāmatṭaṃva khāyatī”ti.

Tattha **dhāticelaṃvā**ti khelasīṅghānikamuttaḡūthamakkhitaṃ dhātidāsiyā nivatthacelaṃ viya ayaṃ pāpamakkhito yeva, tena kāraṇena tasmim mama vacanaṃ natthi. **Tañcārahāmi**ti samaṇā pana ovādakkhamaṃ honti piyasīlā, tasmā taṃ appamattakampi ayuttaṃ karontaṃ vattuṃ arahāmi samaṇāti. **Anaṅgaṇassā**ti niddosassa tumhādisassa. **Abbhāmatṭaṃva khāyatī**ti mahāmeghappamaṇaṃ hutvā upaṭṭhāti, idāni kasmā evarūpaṃ dosaṃ abbohārikaṃ karosīti.

Tāya pana saṃvejito bodhisatto saṃvegappatto chaṭṭhaṃ gāthamāha –

120. “Addhā maṃ yakkha jānāsi, atho maṃ anukampasi;  
Punapi yakkha vajjāsi, yadā passasi edisa”nti.

Tattha **yakkhāti** devataṃ ālapati. **Vajjāsīti** vadeyyāsi. **Yadā passasi edisanti** yadā mama evarūpaṃ dosaṃ passasi, tadā evaṃ mama vadeyyāsīti vadati.

Athassa sā devadhītā sattamaṃ gāthamāha –

121. “Neva taṃ upajīvāmi, napi te bhatakāmhase;  
Tvameva bhikkhu jāneyya, yena gaccheyya suggati”nti.

Tattha **bhatakāmhaseti** tava bhatihātā kammakarāpi na homa. Kimkāraṇā taṃ sabbakālaṃ rakkhamānā vicarissāmāti dīpeti. **Yena gaccheyyāti** bhikkhu yena kammena tvaṃ sugatiṃ gaccheyyāsi, tvameva taṃ jāneyyāsīti.

Evaṃ sā tassa ovādaṃ datvā attano vimānameva pavitṭhā. Bodhisattopi jhānaṃ nibbattetvā brahmalokaparāyaṇo ahoṣi.

Satthā imaṃ dhammadešanaṃ āharitvā saccāni pakāsetvā jātaṃ samodhānesi, saccapariyosāne so bhikkhu sotāpattiphale patiṭṭhahi.

Tadā devadhītā uppalavaṇṇā ahoṣi, tāpaso pana ahameva ahoṣinti.

Sīṅhapupphajātakavaṇṇanā sattamā.

[393] 8. Vighāsādajātakavaṇṇanā

**Susukhaṃ vata jīvantī**ti idaṃ satthā pubbārāme viharanto keḷisīlake bhikkhū ārabha katesi. Tesu hi mahāmogallānattherena pāsādaṃ kampetvā saṃvejitesu dhammasabhāyaṃ bhikkhū tesam aguṇaṃ kathentā nisīdimṣu. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepete keḷisīlakāyevā”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto sakko ahoṣi. Atha aññatarasmim kāsikagāme satta bhātaro kāmesu dosaṃ disvā nikkhamitvā isipabbajjaṃ pabbajitvā majjhāraññe vasantā yoge yogaṃ akatvā kāyadaḷhībahulā hutvā nānappakāraṃ kīlaṃ kīlantā carimṣu. Sakko devarājā “ime saṃvejessāmī”ti suko hutvā tesam vasanaṭṭhānaṃ āgantvā ekasmim rukkhe nilīyitvā te saṃvejento paṭhamaṃ gāthamāha –

122. “Susukhaṃ vata jīvanti, ye janā vighāsādino;  
Diṭṭheva dhamme pāsamsā, samparāye ca suggati”ti.

Tattha **vighāsādinoti** bhuttātirekaṃ bhuñjante sandhāyāha. **Diṭṭheva dhammeti** ye evarūpā, te diṭṭheva dhamme pāsamsā, samparāye ca tesam sugati hoti, sagge uppajjantīti adhippāyena vadati.

Atha tesu eko tassa vacanaṃ sutvā avasese āmantetvā dutiyaṃ gāthamāha –

123. “Sukassa bhāsamānassa, na nisāmetha paṇḍitā;  
Idaṃ suṇātha sodariyā, amhevāyaṃ pasamsati”ti.

Tattha **bhāsamānassāti** mānusikāya vācāya bhaṇantassa. **Na nisāmethāti** na suṇātha. **Idaṃ suṇāthāti** idamassa vacanaṃ suṇātha. **Sodariyāti** samāne udare vutthabhāvena te ālapanto āha.

Atha ne paṭikkhipanto suko tatiyaṃ gāthamāha –

124. “Nāhaṃ tumhe pasamsāmi, kuṇapādā suṇātha me;  
Ucchiṭṭhabhojino tumhe, na tumhe vighāsādino”ti.

Tattha **kuṇapādāti** kuṇapakhādakāti te ālapati.

Te tassa vacanaṃ sutvā sabbepi catutthaṃ gāthamāhaṃsu –

125. “Sattavassā pabbajitā, majjhāraññe sikhaṇḍino;  
Vighāseneva yāpentā, mayañce bhoto gārayhā;  
Ke nu bhoto pasamsiyā”ti.

Tattha **sikhaṇḍinoti** cūlāya samannāgatā. **Vighāsenevāti** ettakaṃ kālaṃ satta vassāni sīhabyagghavighāseneva yāpentā yadi bhoto gārayhā, atha ke nu te pasamsiyāti.

Te lajjāpento mahāsatto pañcamaṃ gāthamāha –

126. “Tumhe sīhānaṃ byagghānaṃ, vāḷānañcāvasiṭṭhakaṃ;  
Ucchiṭṭheneva yāpentā, maññivho vighāsādino”ti.

Tattha **vāḷānañcāvasiṭṭhakanti** sesavāḷamigānañca avasiṭṭhakaṃ ucchiṭṭhabhojanaṃ.

Taṃ sutvā tāpasā “sace mayaṃ na vighāsādā, atha ke carahi te vighāsādā”ti? Atha tesam so tamatthaṃ ācikkhanto chaṭṭhaṃ gāthamāha –

127. “Ye brāhmaṇassa samaṇassa, aññassa vā vanibbino;  
Datvāva sesaṃ bhuñjanti, te janā vighāsādino”ti.

Tattha **vanibbinoti** taṃ taṃ bhaṇaṃ yācanakassa. Evaṃ te lajjāpetvā mahāsatto sakaṭṭhānameva gato.

Satthā imaṃ dhammadešanaṃ āharitvā jātaṃ samodhānesi – “tadā satta bhātaro ime keḷisīlakā bhikkhū ahesuṃ, sakko pana ahameva ahosi”nti.

Vighāsādajātakavaṇṇanā aṭṭhamā.

[394] 9. Vaṭṭakajātakavaṇṇanā

**Paṇīta**nti idaṃ satthā jetavane viharanto ekaṃ lolabhikkhuṃ ārabha kathesi. Tañhi satthā “saccaṃ kira tvaṃ bhikkhu lolo”ti pucchitvā “āma, bhante”ti vutte “na kho bhikkhu idāneva lolo, pubbepi tvaṃ loloyeva, lolatāya pana bārāṇasiyaṃ hatthigavāssapurisakuṇapehi atitto ‘ito uttaritaraṃ labhissāmī’ti araṇṇaṃ pavīṭṭhosī”ti vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto vaṭṭakayoniyaṃ nibbattitvā araṇṇe lūkhatiṇabījāhāro vasi. Tadā bārāṇasiyaṃ eko lolakāko hatthikuṇapādīhi atitto “ito uttaritaraṃ labhissāmī”ti araṇṇaṃ pavisitvā phalāphalaṃ khādanto bodhisattaṃ disvā “ayaṃ vaṭṭako ativiya thūlasarīro, madhuraṃ gocaraṃ khādati maññe, etassa gocaraṃ pucchitvā taṃ khādītva ahampi thūlo bhavissāmī”ti cintetvā bodhisattassa uparibhāge sākāya nilīyitvā bodhisattaṃ pucchi “bho vaṭṭaka, kiṃ nāma paṇītāhāraṃ bhuñjasi, thūlasarīro ahoṣī”ti? Bodhisatto tena pucchito tena saddhim paṭisanthāraṃ karonto paṭhamam gāthamāha –

128. “Paṇītaṃ bhuñjase bhattaṃ, sappitelañca mātula;  
Atha kena nu vaṇṇena, kiso tvamasi vāyasā”ti.

Tattha **bhatta**nti manussānaṃ bhojananiyāmena paṭiyāditabhattaṃ. **Mātulā**ti taṃ piyasamudācārena ālapati. **Kisoti** appamaṃsalohito.

Tassa vacanaṃ sutvā kāko tisso gāthā abhāsi –

129. “Amittamajjhe vasato, tesu āmisamesato;  
Niccaṃ ubbigahadayassa, kuto kākassa daḷhiyaṃ.

130. “Niccaṃ ubbegino kākā, dhānkā pāpena kammunā;  
Laddho piṇḍo na piṇeti, kiso tenasmi vaṭṭaka.

131. “Lūkhāni tiṇabījāni, appasnehāni bhuñjasi;  
Atha kena nu vaṇṇena, thūlo tvamasi vaṭṭakā”ti.

Tattha **daḷhiya**nti evarūpassa mayhaṃ kākassa kuto daḷhībhāvo, kuto thūlanti attho. **Ubbeginoti** ubbegavanto. **Dhānkā**ti kākānameva nāmaṃ. **Pāpena kammunā laddhoti** kākena manussasantakavilumpanasaṅkhātena pāpena kammaena laddho piṇḍo. **Na piṇetī**ti na tappeti. **Tenasmī**ti tena kāraṇena kiso asmi. **Appasnehānī**ti mandojāni. Idaṃ kāko bodhisattaṃ “paṇītabhojanaṃ khādati”ti saññī hutvāpi vaṭṭakānaṃ gahitagocaraṃ pucchanto āha.

Taṃ sutvā bodhisatto attano thūlabhāvākāraṇaṃ kathento imā gāthā abhāsi –

132. “Appicchā appacintāya, adūragamanena ca;  
Laddhāladdhena yāpento, thūlo tenasmi vāyasa.

133. “Appicchassa hi posassa, appacintasukhassa ca;  
Susaṅgahitamānassa, vuttī susamudānaya”ti.

Tattha **appicchā**ti āhāresu appicchātāya nittaṇhatāya, kevalaṃ sarīrayāpanavaseneva āhārāharaṇatāyāti attho. **Appacintāyāti** “ajja kahaṃ āhāraṃ labhissāmi, sve kaha”nti evaṃ āhārācintāya abhāvena. **Adūragamanena cāti** “asukasmim nāma ṭhāne madhuraṃ labhissāmī”ti cintetvā avidūragamanena ca. **Laddhāladdhenāti** lūkhaṃ vā hotu paṇītaṃ vā, yaṃ laddhaṃ, teneva. **Thūlo tenasmī**ti tena catubbidhena kāraṇena thūlo asmi. **Vāyasāti** kākaṃ ālapati. **Appacintasukhassāti** āhārācintārahitaṇaṃ appacintānamariyānaṃ sukhaṃ assatthīti appacintasukho, tassa tādīsena sukkena samannāgatassa. **Susaṅgahitamānassāti** “ettakaṃ bhuñjitvā jīrapetuṃ sakkhissāmī”ti evaṃ suṭṭhu

saṅgahitāhāramānassa. **Vuttī susamudānayā**ti evarūpassa puggalassa jīvitavutti sukhena sakkā samudānetuṃ susamudānayā sunibbattiyā.

Satthā imaṃ dhammadesanaṃ āharitvā saccāni pakāsetvā jātakaṃ samodhānesi, saccapariyosāne lolabhikkhu sotāpattiphale patiṭṭhahi.

Tadā kāko lolabhikkhu ahosi, vaṭṭako pana ahameva ahosinti.

Vaṭṭakajātakavaṇṇanā navamā.

[395] 10. Pārāvatajātakavaṇṇanā

**Cirassaṃ vata passāmī**ti idaṃ satthā jetavane viharanto lolabhikkhuṃyeva ārabha kathesi. Paccuppannavatthu heṭṭhā vuttanayameva.

Atīte bārānasiyaṃ brahmadatte rajjaṃ kārente bodhisatto pārāvato hutvā bārānasisetṭhino mahānase nīlapacchiyaṃ vasati. Kākopī tena saddhiṃ vissāsaṃ katvā tattheva vasatīti sabbam vitthāretabbam. Bhattakārako kākapattāni luñcitvā piṭṭhena taṃ makkhetvā ekaṃ kapālakhaṇḍam vijjhivā kaṇṭhe piḷandhitvā pacchiyaṃ pakkhipi. Bodhisatto araṇṇato āgantvā taṃ disvā parihāsaṃ karonto paṭhamam gāthamāha –

**134.** “Cirassaṃ vata passāmi, sahāyaṃ maṇidhāriṇaṃ;  
Sukatā massukuttiyā, sobhate vata me sakhā”ti.

Tattha **massukuttiyā**ti imāya massukiriyāya.

Taṃ sutvā kāko dutiyaṃ gāthamāha –

**135.** “Parūḷhakacchanakhalomo, ahaṃ kammesu byāvaṇo;  
Cirassaṃ nhāpitaṃ laddhā, lomam taṃ ajja hārayi”nti.

Tattha **ahaṃ kammesu byāvaṇo**ti ahaṃ samma pārāvata, rājakammesu byāvaṇo okāsaṃ alabhanto parūḷhakacchanakhalomo ahosinti vadati. **Ajja hārayinti** ajja hāresim.

Tato bodhisatto tatiyaṃ gāthamāha –

**136.** “Yaṃ nu lomam ahāresi, dullabham laddha kappakaṃ;  
Atha kiñcarahi te samma, kaṇṭhe kiṇikiṇāyatī”ti.

Tassattho – yaṃ tāva dullabham kappakaṃ labhitvā lomam harāpesi, taṃ harāpaya, atha kiñcarahi te vayassa idaṃ kaṇṭhe kiṇikiṇāyatīti.

Tato kāko dve gāthā abhāsi –

**137.** “Manussasukhumālānaṃ, maṇi kaṇṭhesu lambati;  
Tesāham anusikkhāmi, mā tvaṃ maññi davā kataṃ.

**138.** “Sacepimaṃ pihayasi, massukuttiṃ sukāritaṃ;  
Kārayissāmi te samma, maṇiñcāpi dadāmi te”ti.

Tattha **maṇī**ti evarūpānaṃ manussānaṃ ekaṃ maṇiratanam kaṇṭhesu lambati. **Tesāhanti** tesam aham. **Mā tvaṃ maññī**ti tvaṃ pana “etaṃ mayā davā kata”nti mā maññi. **Sacepimaṃ pihayasī**ti sace

imaṃ mama kataṃ massukuttiṃ tvaṃ icchasi.

Taṃ sutvā bodhisatto chaṭṭhaṃ gāthamāha –

**139.** “Tvaññeva maṇinā channo, sukatāya ca massuyā;  
Āmanta kho taṃ gacchāmi, piyaṃ me tavadassana’nti.

Tattha **maṇinā**ti maṇino, ayameva vā pāṭho. Idaṃ vuttaṃ hoti – samma vāyasa, tvaññeva imassa maṇino anucchaviko imissā ca sukatāya massuyā, mama pana tava adassanameva piyaṃ, tasmā taṃ āmantayitvā gacchāmīti.

Evañca pana vatvā bodhisatto uppatitvā aññattha gato. Kāko tattheva jīvitakkhayaṃ patto.

Satthā imaṃ dhammadesanaṃ āharitvā saccāni pakāsetvā jātaṃ samodhānesi, saccapariyosāne lolabhikkhu anāgāmiṃ patitṭhahi. Tadā kāko lolabhikkhu ahoṣi, pārāvato pana ahameva ahoṣinti.

Pārāvatajātakavaṇṇanā dasamā.

Kharaputtavaggo dutiyo niṭṭhito.

Jātakuddānaṃ –

Avāriyaṃ setaketu, darīmukhañca neru ca;  
Āsaṅkamigālopañca, kāḷakaṇṇī ca kukkuṭaṃ.

Dhammadhajañca nandiyam, kharaputtaṃ sūci ceva;  
Tuṅḍilaṃ soṇṇakakkaṭaṃ, mayhakaṃ vijjādharañceva.

Siṅhapupphaṃ vighāsādaṃ, vaṭṭakañca pārāvataṃ;  
Saṅgāyimsu mahātherā, chakke vīsati jātake.

Chakkanipātavaṇṇanā niṭṭhitā.

## 7. Sattakanipāto

### 1. Kukkuvaggo

[396] 1. Kukkujātakavaṇṇanā

**Diyaḍḍhakukkū**ti idaṃ satthā jetavane viharanto rājovādaṃ ārabha kathesi. Paccuppannavatthu **tesakuṇajātake** (jā. 2.17.1 ādayo) āvi bhavissati.

Atīte bārānasiyaṃ brahmadatte rajjaṃ kārente bodhisatto tassa atthadhammānusāsako amacco ahoṣi. Rājā agatigamane patiṭṭhāya adhammena rajjaṃ kāresi, janapadaṃ piḷetvā dhanameva saṃhari. Bodhisatto rājānaṃ ovaditukāmo ekaṃ upamaṃ upadhārento vicarati, rañño uyyāne vāsāgāraṃ vipakataṃ hoti aniṭṭhitacchadanam, dārukaṇṇikaṃ āropetvā gopānasiyo pavesitamattā honti. Rājā kīlanatthāya uyyānaṃ gantvā tattha vicaritvā taṃ gehaṃ pavisitvā ullokento kaṇṇikamaṇḍalaṃ disvā attano uparipatanabhayena nikkhamitvā bahi ṭhito puna oloketvā “kiṃ nu kho nissāya kaṇṇikā ṭhitā, kiṃ nissāya gopānasiyo”ti cintetvā bodhisattaṃ pucchanto paṭhamaṃ gāthamāha –

1. “Diyaḍḍhakukkū udayena kaṇṇikā, vidatthiyo aṭṭha parikkhipanti naṃ;

Sā siṃsapā, sāramayā apheggukā, kuhiṃ ʘhitā upparito na dhaṃsati’’ti.

Tattha **diyadḍhakukkū**ti diyadḍharatanā. **Udayenā**ti uccattena. **Parikkhipanti** nanti taṃ panetaṃ aṭṭha vidatthiyo parikkhipanti, parikkhepato aṭṭhavidatthipamaṇāti vuttaṃ hoti. **Kuhiṃ ʘhitā**ti kattha patiṭṭhitā hutvā. **Na dhaṃsati**ti na patati.

Taṃ sutvā bodhisatto ‘‘laddhā dāni me rañño ovādatthāya upamā’’ti cintetvā imā gāthā āha –

2. ‘‘Yā tiṃsati sāramayā anujjukā, parikiriya gopānasiyo samaṃ ʘhitā;  
Tāhi susaṅgahitā balasā pīlitā, samaṃ ʘhitā upparito na dhaṃsati.
3. ‘‘Evampi mittehi daḷhehi paṇḍito, abhejjarūpehi sucīhi mantibhi;  
Susaṅgahito siriyā na dhaṃsati, gopānasībhāravahāva kaṇṇikā’’ti.

Tattha **yā tiṃsati sāramayā**ti yā eṭā sāraruḅkhamayā tiṃsati gopānasiyo. **Parikiriya**ti parivāretvā. **Samaṃ ʘhitā**ti samabhāgena ʘhitā. **Balasā pīlitā**ti tāhi tāhi gopānasīhi balena pīlitā suṭṭhu saṅgahitā ekābaddhā hutvā. **Paṇḍitoti** ñāṇasampanno rājā. **Sucīhī**ti sucisamācārehi kalyāṇamittehi. **Mantibhī**ti mantakusalehi. **Gopānasībhāravahāva kaṇṇikā**ti yathā gopānasīnaṃ bhāraṃ vahamānā kaṇṇikā na dhaṃsati na patati, evaṃ rājāpi vuttappakārehi mantīhi abhijjahadayehi susaṅgahito sirito na dhaṃsati na patati na parihāyati.

Rājā bodhisatte kathenteyeva attano kiriyāṃ sallakkhetvā kaṇṇikāya asati gopānasiyo na tiṭṭhanti, gopānasīhi asaṅgahitā kaṇṇikā na tiṭṭhati, gopānasīsu bhijjantīsu kaṇṇikā patati, evameva adhammiko rājā attano mittāmacce ca balakāye ca brāhmaṇagahapatike ca asaṅgahanto tesu bhijjantesu tehi asaṅgahito issariyā dhaṃsati, raññā nāma dhammikenā bhavitabbanti. Athassa tasmiṃ khaṇe paṇṇākārathāya mātuluṅgaṃ āharīsu. Rājā ‘‘sahāya, imaṃ mātuluṅgaṃ khādā’’ti bodhisattaṃ āha. Bodhisatto taṃ gahetvā ‘‘mahārāja, imaṃ khādituṃ aḷānantā tittakaṃ vā karonti ambilaṃ vā, jānantā pana paṇḍitā tittakaṃ hāretvā ambilaṃ anīharitvā mātuluṅgarasaṃ anāsetvāva khādantī’’ti rañño imāya upamāya dhanasaṅgharaṇūpāyaṃ dassento dve gāthā abhāsi –

4. ‘‘Kharattacaṃ bellaṃ yathāpi satthavā, anāmasantopi karoti tittakaṃ;  
Samāharaṃ sādumaṃ karoti patthiva, asādumaṃ kayirā tanubandhamuddharaṃ.
5. ‘‘Evampi gāmanigamesu paṇḍito, asāhasaṃ rājadhanāni saṅgharaṃ;  
Dhammānuvattī paṭipajjamāno, sa phāti kayirā aviheṭṭhayaṃ para’’nti.

Tattha **kharattacanti** thaddhatacaṃ. **Bellanti** mātuluṅgaṃ. ‘Bela’’ntipi pāṭho, ayamevattho. **Satthavā**ti satthakahattho. **Anāmasantoti** bahitacaṃ tanukampi atacchanto idaṃ phalaṃ tittakaṃ karoti. **Samāharanti** samāharanto bahitacaṃ tacchanto anto ca ambilaṃ anīharanto taṃ sādumaṃ karoti. **Patthivā**ti rājānaṃ ālapati. **Tanubandhamuddharanti** tanukaṃ pana tacaṃ uddharanto sabbaso tittakassa anapanītattā taṃ asādumeva kayirā. **Evanti** evaṃ paṇḍito rājāpi asāhasaṃ sāhasiyā taṅhāya vasaṃ agacchanto agatigamaṃ pahāya raṭṭhaṃ apīletvā upacikānaṃ vammikavaḍḍhananiyāmena madhukarānaṃ reṇuṃ gahetvā madhukaraṇaniyāmena ca dhanāṃ saṅgharanto –

‘‘Dānaṃ sīlaṃ pariccāgaṃ, ajjavaṃ maddavaṃ tapāṃ;  
Akkodhaṃ avihīsaṇca, khantiṇca avirodhana’’nti. –

Iti imesaṃ dasannaṃ rājadhammānaṃ anuvattanena dhammānuvattī hutvā paṭipajjamāno so attano ca paresaṇca phātiṃ vaḍḍhiṃ kareyya paraṃ aviheṭṭhento yevāti.

Rājā bodhisattena saddhiṃ mantento pokkharāṇīṭiraṃ gantvā supupphitaṃ bālasūriyavaṇṇaṃ



udakena anupalittam padumam disvā āha – “sahāya, imam padumam udake sañjātameva udakena alimpamānam ṭhita”nti. Atha nam bodhisatto “mahārāja, raññā nāma evarūpena bhavitabba”nti ovadanto imā gāthā āha –

6. “Odātamūlam sucivārisambhavam, jātam yathā pokkharāṇīsu ambujam;  
Padumam yathā agginikāsiphālimam, na kaddamo na rajo na vāri limpati.
7. “Evampi vohārasucim asāhasam, visuddhakammantamapetapāpakam;  
Na limpati kammakilesa tādiso, jātam yathā pokkharāṇīsu ambuja”nti.

Tattha **odātamūlanti** paṇḍaramūlam. **Ambujanti** padumasseva vevacanam. **Agginikāsiphālimanti** agginikāsina sūriyena phālitam vikasitanti attho. **Na kaddamo na rajo na vāri limpatīti** neva kaddamo na rajo na udakam limpati, na makkhetīti attho. “Lippati”cceva vā pāṭho, bhummatthe vā etāni paccattavacanāni, etesu kaddamādīsu na lippati, na allīyatīti attho. **Vohārasucinti** porāṇakehi dhammikarājūhi likhāpetvā ṭhapitavinicchayavohāre sucim, agatigamanam pahāya dhammena vinicchayakārakanti attho. **Asāhasanti** dhammikavinicchaye ṭhitattāyeva sāhasikakiriyāya virahitam. **Visuddhakammantanti** teneva asāhasikaṭṭhena visuddhakammantam saccavādiṃ nikkodham majjhataṃ tulābhūtam lokassa. **Apetapāpakanti** apagatapāpakammaṃ. **Na limpati kammakilesa tādisoti** tam rājānam pāṇātipāto adinnādānam kāmesumicchācāro musāvādoti ayam kammakilesa na allīyati. Kimkāraṇā? **Tādiso jātam yathā pokkharāṇīsu ambujam**. Tādiso hi rājā yathā pokkharāṇīsu jātam padumam anupalittam, evam anupalitto nāma hoti.

Rājā bodhisattassa ovādam sutvā tato paṭṭhāya dhammena rajjam kārento dānādīni puññāni katvā saggaparāyaṇo ahoṣi.

Satthā imam dhammadesanam āharitvā jātakam samodhānesi – “tadā rājā ānando ahoṣi, paṇḍitāmacco pana ahameva ahoṣi”nti.

Kukkujātakavaṇṇanā paṭhamā.

[397] 2. Manojajātakavaṇṇanā

**Yathā cāpo ninnamatīti** idam satthā veḷuvane viharanto vipakkhasevakam bhikkhum ārabha katesi. Vatthu pana heṭṭhā **mahiḷāmukhajātake** (jā. 1.1.26) vitthāritameva. Tadā pana satthā “na, bhikkhave, idāneva, pubbepesa vipakkhasevakoyevā”ti vatvā atītam āhari.

Atīte bārāṇasiyam brahmadatte rajjam kārente bodhisatto sīho hutvā sīhiyā saddhiṃ samvasanto dve potake labhi – puttañca dhītarañca. Puttassa manojoti nāmam ahoṣi, so vayappatto ekam sīhapotikam gaṇhi. Iti te pañca janā ahesum. Manojo vanamahimsādayo vadhitvā maṃsam āharitvā mātāpitaro ca bhaginiñca pajāpatiñca poseti. So ekadivasam gocarabhūmiyam giriyaṃ nāma siṅgālam palāyitum appahontam urena nipannam disvā “kim, sammā”ti pucchitvā “upaṭṭhātukāmomhi, sāmi”ti vutte “sādhu, upaṭṭhahassū”ti tam gahetvā attano vasanaguham ānesi. Bodhisatto tam disvā “tāta manoja, siṅgālā nāma dussilā pāpadhammā akicce niyojenti, mā etam attano santike karī”ti vāretum nāsakkhi.

Athekadivasam siṅgālo assamaṃsam khāditukāmo manojam āha – “sāmi, amhehi ṭhapetvā assamaṃsam aññaṃ akhāditapubbam nāma natthi, assam gaṇhissāmā”ti. “Kham pana, samma, assā hontī”ti? “Bārāṇasiyam nadīre”ti. So tassa vacanam gahetvā tena saddhiṃ assanam nadiyā nhānavelāyam gantvā ekam assam gahetvā piṭṭhiyam āropetvā vegena attano guhādvārameva āgato. Athassa pitā assamaṃsam khāditvā “tāta, assā nāma rājabhogā, rājāno ca nāma anekamāyā kusalehi dhanuggahehi vijjhāpentī, assamaṃsakhādanasīhā nāma dīghāyukā na hontī, ito paṭṭhāya mā assam gaṇhī”ti āha. So pitu vacanam akatvā gaṇhateva. “Sīho asse gaṇhātī”ti sutvā rājā antonagareyeva

assānaṃ pokkharāṇiṃ kārāpesi. Tatopi āgantvā gaṇhiyeva. Rājā assasālaṃ kāretvā antosālāyameva tiṇodakaṃ dāpesi. Sīho pākāramatthakena gantvā antosālātopi gaṇhiyeva.

Rājā ekaṃ akkhaṇavedhiṃ dhanuggahaṃ pakkosāpetvā “sakkhissasi tāta, sīhaṃ vijjhitu”nti āha. So “sakkomī”ti vatvā pākāraṃ nissāya sīhassa āgamanamagge aṭṭakaṃ kāretvā aṭṭhāsi. Sīho āgantvā bahisusāne siṅgālaṃ ṭhapetvā assagahaṇatthāya nagaraṃ pakkhandi. Dhanuggaho āgamanakāle “atitikhīṇo vego”ti sīhaṃ avijjhivā assaṃ gahetvā gamanakāle garubhāratāya olīnavegaṃ sīhaṃ tikhiṇena nārācena pacchābhāge vijjhi. Nārāco purimakāyena nikkhamitvā ākāsaṃ pakkhandi. Sīho “viddhosmī”ti viravi. Dhanuggaho taṃ vijjhivā asani viya jiyāṃ pothesi. Siṅgālo sīhassa ca jiyāya ca saddaṃ sutvā “sahāyo me dhanuggahena vijjhivā mārīto bhavissati, matakena hi saddhiṃ vissāso nāma natthi, idāni mama pakatiyā vasanavameva gamissāmi”ti attanāva saddhiṃ sallapanto dve gāthā abhāsi –

8. “Yathā cāpo ninnamati, jiyā cāpi nikūjati;  
Haññate nūna manojo, migarājā sakhā mama.
9. “Handa dāni vanantāni, pakkamāmi yathāsukhaṃ;  
Netādisā sakhā honti, labbhā me jīvato sakhā”ti.

Tattha **yathā**ti yenākārenea cāpo ninnamati. **Haññate nūnā**ti nūna haññati. **Netādisā**ti evarūpā matakā sahāyā nāma na honti. **Labbhā meti** jīvato mama sahāyo nāma sakkā laddhuṃ.

Sīhopi ekavegena gantvā assaṃ guhādvāre pātetvā sayampī maritvā pati. Athassa ñātakā nikkhamitvā taṃ lohitaṃ pakkhitāṃ pahāramukhehi paggharitalohitaṃ pāpajanasevitāya jīvitakkhayaṃ pattaṃ addasaṃsu, disvā cassa mātā pitā bhaginī pajāpatīti paṭipāṭiyā catasso gāthā bhāsīsu –

10. “Na pāpajanasamsevī, accantaṃ sukhamedhati;  
Manojaṃ passa semānaṃ, giriyaśānusāsānī.
11. “Na pāpasampavaṅkena, mātā puttena nandati;  
Manojaṃ passa semānaṃ, acchannaṃ samhi lohite.
12. “Evamāpajate poso, pāpiyo ca nigacchati;  
Yo ve hitānaṃ vacanaṃ, na karoti atthadassinaṃ.
13. “Evañca so hoti tato ca pāpiyo, yo uttamo adhamajanūpasevī;  
Passuttamaṃ adhamajanūpasevitaṃ, migādhipaṃ saravaraveganiddhuta”nti.

Tattha **accantaṃ sukhamedhatī**ti na ciraṃ sukhaṃ labhati. **Giriyaśānusāsānī**ti ayaṃ evarūpā giriyaśānusāsānīti garahanto āha. **Pāpasampavaṅkenā**ti pāpesu sampavaṅkena pāpasahāyena. **Acchannanti** nimuggaṃ. **Pāpiyo ca nigacchatī**ti pāpañca vindati. **Hitānanti** atthakāmānaṃ. **Atthadassinanti** anāgataatthaṃ passantānaṃ. **Pāpiyoti** pāpataro. **Adhamajanūpasevī**ti adhamajanaṃ pāpasevī. **Uttamanti** sarārabalena jeṭṭhakaṃ.

Pacchimā abhisambuddhagāthā –

14. “Nihīyati puriso nihīnasevī, na ca hāyetha kadāci tulyasevī;  
Seṭṭhamupagamaṃ udeti khippaṃ, tasmāttanā uttaritaraṃ bhajethā”ti.

Tattha **nihiyatī**ti bhikkhave, nihīnasevī nāma manojo sīho viya nihīyati parihāyati vināsaṃ pāpuṇāti. **Tulyasevī**ti sīlādīhi attanā sadisaṃ sevamāno na hāyati, vaḍḍhiyeva panassa hoti.

**Setṭhamupagamanti** sīlādīhi uttaritaramyeva upagacchanto. **Udeti khippanti** sīghameva sīlādīhi guṇehi udeti, vuddhiṃ upagacchatīti.

Satthā imaṃ dhammadesanaṃ āharitvā saccāni pakāsetvā jātakam samodhānesi, saccapariyosāne vipakkhasevako sotāpattiphale patiṭṭhahi.

Tadā siṅgālo devadatto ahosi, manojo vipakkhasevako, bhaginī uppalaṅṅā, bhariyā khemā bhikkhunī, mātā rāhulamātā, pitā siharājā pana ahameva ahosinti.

Manojajātakavaṇṇanā dutiyā.

[398] 3. Sutanujātakavaṇṇanā

**Rājā te bhattanti** idaṃ satthā jetavane viharanto mātuposakabhikkhuṃ ārabha kathesi. Vatthu **sāmajātake** (jā. 2.22.296 ādayo) āvi bhavissati.

Atīte bārāṇasiyaṃ brahmadatte rajjaṃ kārente bodhisatto duggatagahapatikule nibbatti, sutanūtissa nāmaṃ akaṃsu. So vayappatto bhatim katvā mātāpitāro posetvā pitari kālakate mātaram poseti. Tasmim pana kāle bārāṇasirājā migavittako ahosi. So ekadivasam mahantena parivārena yojanadviojanamattaṃ araṇṇam pavisitvā “yassa ṭhitatṭhānena migo palāyati, so imaṃ nāma jito”ti sabbesam ārocāpesi. Amaccā raṇṇo dhuvamaggaṭṭhāne koṭṭhakaṃ chādetvā adamsu. Manussehi migānaṃ vasanaṭṭhānāni parivāretvā unnādentehi utṭhāpitesu migesu eko eṇimigo raṇṇo ṭhitatṭhānaṃ paṭipajji. Rājā “taṃ vijjhissāmi”ti saram khipi. Uggahitamāyo migo saram mahāphāsukābhimukhaṃ āgacchantam ṇatvā parivattitvā sarena viddho viya hutvā pati. Rājā “migo me viddho”ti gahaṇatṭhāya dhāvi. Migo utṭhāya vātavegena palāyi, amaccādayo rājānaṃ avahasimsu. So migam anubandhitvā kilantakāle khaggena dvidhā chinditvā ekasmim daṇḍake laggitvā kājam vahanto viya āgacchanto “thokam vissamissāmi”ti maggasamīpe ṭhitam vaṭarukkham upagantvā nipajjitvā niddam okkami.

Tasmim pana vaṭarukkhe nibbato maghadevo nāma yakkho tattha pavitṭhe vessavaṇassa santikā khādituṃ labhi. So rājānaṃ utṭhāya gacchantam “tiṭṭha bhakkhosi me”ti hatthe gaṇhi. “Tvam konāmosī”ti? “Aham idha nibbattayakkho, imaṃ ṭhānaṃ pavitṭhake khādituṃ labhāmi”ti. Rājā satim upaṭṭhapetvā “kiṃ ajjeva maṃ khādissasi, udāhu nibaddham khādissasi”ti pucchi. “Labhanto nibaddham khādissāmi”ti. Rājā “imaṃ ajja migam khādītva maṃ vissajjehi, aham te sve paṭṭhāya ekāya bhattapātiyā saddhim ekam manussam pesessāmi”ti. “Tena hi appamatto hohi, apesitadivase taṇṇeva khādissāmi”ti. “Aham bārāṇasirājā, mayham avijjamānaṃ nāma natthi”ti. Yakkho paṭiṇṇam gahetvā taṃ vissajjesi. So nagaram pavisitvā tamattham ekassa atthacarakassa amaccassa kathetvā “idāni kiṃ kātabba”nti pucchi. “Divasaparicchedo kato, devā”ti? “Na kato”ti. “Ayuttam vo kataṃ, evam santepi mā cintayittha, bahū bandhanāgāre manussā”ti. “Tena hi tvam etaṃ kammaṃ kara, mayham jīvitaṃ dehī”ti.

Amacco “sādhū”ti sampaṭicchitvā devasikam bandhanāgārato manussam nīharitvā bhattapātim gahetvā kañci ajānāpetvāva yakkhassa pesesi. Yakkho bhattam bhuñjitvā manussam khādati. Aparabhāge bandhanāgārāni nimmanussāni jātāni. Rājā bhattahāraṃ alabhanto maraṇabhayena kampi. Atha naṃ amacco assāsetvā “deva, jīvītāsāto dhanāsāva balavatarā, hatthikkhandhe saḥsabhaṇḍikam ṭhapetvā ‘ko imaṃ dhanam gahetvā yakkhassa bhattam ādāya gamissati’ti bherim carāpema”ti vatvā tathā kāresi. Atha taṃ sutvā bodhisatto cintesi “aham bhatiyā māsakaḍḍhamāsakam saṅgharitvā kicchena mātaram posemi, imaṃ dhanam gahetvā mātu datvā yakkhassa santikam gamissāmi, sace yakkham dametuṃ sakkhissāmi, iccetaṃ kusalam, no ce sakkhissāmi, mātā me sukham jīvissati”ti. So tamattham mātu ārocetvā “alam tāta, na mama attho dhanenā”ti dve vāre paṭikkhipitvā tatiyavāre taṃ anāpucchitvāva “āharatha, ayya, saḥsam, aham bhattam harissāmi”ti saḥsam gahetvā mātu datvā “amma, mā cintayi, aham yakkham dametvā mahājanassa sotthim karissāmi, ajjeva tava assukilinnamukham hāsāpentova āgacchissāmi”ti mātaram vanditvā rājapurisehi saddhim raṇṇo

santikam gantvā vanditvā aṭṭhāsi.

Tato raññā “tāta, tvaṃ bhattaṃ harissasī”ti vutte “āma, devā”ti āha. “Kiṃ te laddhuṃ vaṭṭatī”ti? “Tumhākaṃ suvaṇṇapādūkā, devā”ti. “Kiṃkāraṇā”ti? “Deva, so yakkho attano rukkhamaññe bhūmiyaṃ ṭhitake khādituṃ labhati, ahaṃ etassa santakabhūmiyaṃ aṭṭhatvā pādūkāsu ṭhassāmī”ti. “Aññaṃ kiṃ laddhuṃ vaṭṭatī”ti? “Tumhākaṃ chattaṃ, devā”ti. “Idaṃ kimatthāyā”ti? “Deva, yakkho attano rukkhacchāyāya ṭhitake khādituṃ labhati, ahaṃ tassa rukkhacchāyāya aṭṭhatvā chattaṃcchāyāya ṭhassāmī”ti. “Aññaṃ kiṃ laddhuṃ vaṭṭatī”ti. “Tumhākaṃ khaggaṃ, devā”ti. “Iminā ko attho”ti? “Deva, amanussāpi āvudhahatthānaṃ bhāyantiyevā”ti. “Aññaṃ kiṃ laddhuṃ vaṭṭatī”ti? “Suvaṇṇapātīṃ pūretvā tumhākaṃ bhūñjanakabhattaṃ detha, devā”ti. “Kiṃkāraṇā, tātā”ti? “Deva, mādisassa nāma paṇḍitassa purisassa mattikapātīyā lūkkhabhojanaṃ harituṃ ananucchavika”nti. “Sādhu, tātā”ti rājā sabbam dāpetvā tassa veyyāvaccakare paṭipādesi.

Bodhisatto “mahārāja, mā bhāyittha, ajjāhaṃ yakkhaṃ dametvā tumhākaṃ sotthiṃ katvā āgamiṣāmī”ti rājānaṃ vanditvā upakaraṇāni gāhāpetvā tattha gantvā manusse rukkhassāvidūre ṭhapetvā suvaṇṇapādūkāṃ āruya khaggaṃ sannayhitvā setacchattaṃ matthake katvā kañcanaṇḍīyā bhattaṃ gahetvā yakkhassa santikam pāyāsi. Yakkho maggaṃ olokento taṃ disvā “ayaṃ puriso na aññesu divasesu āgamananiyāmena eti, kiṃ nu kho kāraṇā”nti cintesi. Bodhisattopi rukkhassamīpaṃ gantvā asitūḍena bhattapātīṃ antochāyāya karitvā chāyāya pariyaṇṭe ṭhito paṭhamam gāthamāha.

15. “Rājā te bhattaṃ pāhesi, sucim māmsūpasecanaṃ;  
Maghadevasmiṃ adhivatthe, ehi nikkamma bhūñjasū”ti.

Tattha **pāhesīti** paṇḍi. **Maghadevasmiṃ adhivattheti** maghadevoti vaṭarukkho vuccati, tasmim adhivattheti devataṃ ālapati.

Taṃ sutvā yakkho “imaṃ purisaṃ vañcetvā antochāyāya pavitṭhaṃ khādissāmī”ti cintetvā dutiyaṃ gāthamāha –

16. “Ehi māṇava orena, bhikkhamādāya sūpitaṃ;  
Tvañca māṇava bhikkhā ca, ubho bhakkhā bhavissathā”ti.

Tattha **bhikkhanti** mama nibaddhabhikkhaṃ. **Sūpitanti** sūpasampannaṃ.

Tato bodhisatto dve gāthā abhāsi –

17. “Appakena tvaṃ yakkha, thullamatthaṃ jahissasi;  
Bhikkhaṃ te nāharissanti, janā maraṇasaññino.
18. “Laddhāya yakkhā tava niccabhikkhaṃ, sucim paṇḍitaṃ rāsasā upetaṃ;  
Bhikkhañca te āhariyo naro idha, sudullabho hehiti bhakkhite mayī”ti.

Tattha **thullamatthanti** appakena kāraṇena mahantaṃ atthaṃ jahissasīti dasseti. **Nāharissantīti** ito paṭṭhāya maraṇasaññino hutvā na āharissanti, atha tvaṃ milātasākho viya rukkho nirāhāro dubbalo bhavissasīti. **Laddhāyanti** laddhaayaṃ laddhāgamaṇaṃ. Idaṃ vuttaṃ hoti – samma yakkha, yaṃ ahaṃ ajja āhariṃ, idaṃ tava niccabhikkhaṃ sucim paṇḍitaṃ uttamaṃ rasena upetaṃ laddhāgamaṇaṃ devasikaṃ te āgacchissati. **Āhariyoti** āharaṇako. Idaṃ vuttaṃ hoti – “sace tvaṃ imaṃ bhikkhaṃ gahetvā āgataṃ maṃ bhakkhasi, athevaṃ mayi bhakkhite bhikkhañca te āharaṇako añño naro idha sudullabho bhavissati. Kiṃkāraṇā? Mādiso hi bārāṇasiyaṃ añño paṇḍitamanusso nāma natthi, mayi pana khādite sutanupī nāma yakkhena khādito, aññassa kassa so lajjissatī”ti bhattāharaṇakaṃ na labhissasi, atha te ito paṭṭhāya bhojanaṃ dullabhaṃ bhavissati, amhākampi rājānaṃ gaṇhituṃ na

labhissasi. Kasmā? Rukkhato bahibhāvena. Sace panidaṃ bhattaṃ bhuñjitvā maṃ paṇissasi, ahaṃ te rañño kathetvā nibaddhaṃ bhattaṃ pesessāmi, attānampi ca te khādituṃ na dassāmi, ahampi tava santike tḥāne na tḥassāmi, pādukāsu tḥassāmi, rukkhacchāyāyampi te na tḥassāmi, attano chattaḥāyāyameva tḥassāmi, sace pana mayā saddhiṃ virujjhissasi, khaggena taṃ dvidhā bhindissāmi, ahañhi ajja etadatthameva sajjo hutvā āgatoti. Evaṃ kira naṃ mahāsatto tajjesi.

Yakkho “yuttarūpaṃ māṇavo vadatī”ti sallakkhetvā pasannacitto dve gāthā abhāsi –

19. “Mameva sutano attho, yathā bhāsasi māṇava;  
Mayā tvaṃ samanuññāto, sotthiṃ passāhi mātaraṃ.
20. “Khaggaṃ chattañca pātiñca, gacchamādāya māṇava;  
Sotthiṃ passatu te mātā, tvañca passāhi mātara”nti.

Tattha **sutanoti** bodhisattaṃ ālapati. **Yathā bhāsasīti** yathā tvaṃ bhāsasi, tathā yo esa tayā bhāsito attho, eso mamevattho, mayhameva vaḍḍhīti.

Yakkhassa kathaṃ sutvā bodhisatto “mama kammaṃ nipphannaṃ, damito me yakkho, bahuñca dhanaṃ laddhaṃ, rañño ca vacanaṃ kata”nti tuṭṭhacitto yakkhassa anumodanaṃ karonto osānagāthamāha –

21. “Evaṃ yakkha sukḥī hohi, saha sabbehi ñātibhi;  
Dhanañca me adhigataṃ, rañño ca vacanaṃ kata”nti. –

Vatvā ca pana yakkhaṃ āmantetvā “samma, tvaṃ pubbe akusalakammaṃ katvā kakkhaḷo pharuso paresaṃ lohitamaṃsabhakkho yakkho hutvā nibbatta, ito paṭṭhāya pāṇātipātādīni mā karī”ti sīle ca ānisaṃsaṃ, dussīlye ca ādīnavaṃ kathetvā yakkhaṃ pañcasu sīlesu patiṭṭhāpetvā “kiṃ te araññavāsena, ehi nagaradvāre taṃ nisīdāpetvā aggabhattalābhiṃ karomī”ti yakkhena saddhiṃ nikkhamitvā khaggādīni yakkhaṃ gāhāpetvā bārāṇasiṃ agamāsi. “Sutano māṇavo yakkhaṃ gahetvā etī”ti rañño ārocesuṃ. Rājā amaccaparivuto bodhisattassa paccuggamaṃ katvā yakkhaṃ nagaradvāre nisīdāpetvā aggabhattalābhiṃ katvā nagaraṃ pavisitvā bheriṃ carāpetvā nāgare sannipātāpetvā bodhisattassa guṇaṃ kathetvā senāpatiṭṭhānaṃ adāsi. Ayañca bodhisattassa ovāde tḥatvā dānādīni puññāni katvā saggaparāyaṇo ahoṣi.

Satthā imaṃ dhammadešanaṃ āharitvā saccāni pakāsetvā jātakaṃ samodhānesi, saccapariyosāne mātuposakabhikkhu sotāpattiphale patiṭṭhahi. Tadā yakkho aṅgulimālo ahoṣi, rājā ānando, māṇavo pana ahaṃeva ahoṣintī.

Sutanujātakavaṇṇanā tatiyā.

[399] 4. Mātuposakagijjhajātakaṃ

**Te kathaṃ nu karissantīti** idaṃ satthā jetavane viharanto ekaṃ mātuposakabhikkhuṃ ārabha katesi. Vatthu **sāmajātaka** (jā. 2.22.296 ādayo) āvi bhavissati.

Atīte bārāṇasiyaṃ brahmadatte rajjaṃ kārente bodhisatto gijjhayoniyaṃ nibbattitvā vayappatto vuddhe pariḥīnacakkhuke mātāpitaro gijjhaguhāyaṃ tḥapetvā gomaṃsādīni āharitvā posesi. Tasmim kāle bārāṇasiyaṃ susāne eko nesādo aniyametvā gijjhānaṃ pāse oḍḍesi. Athekadivasam bodhisatto gomaṃsādīṃ pariyesanto susānaṃ pavitṭho pādena pāse bajjhivā attano na cintesi, vuddhe pariḥīnacakkhuke mātāpitaro anussaritvā “kathaṃ nu kho me mātāpitaro yāpessanti, mama baddhabhāvampi ajānantā anāthā nippaccayā pabbataguhāyameva sussitvā marissanti maññe”ti vilapanto paṭhamaṃ gāthamāha –

22. “Te kathaṃ nu karissanti, vuddhā giridarīsaya;  
Ahaṃ baddhosmi pāsena, nilīyassa vasaṃ gato”ti.

Tattha **nilīyassā**ti evaṃnāmakassa nesādaputtassa.

Atha nesādaputto gijjharājassa paridevitasaddaṃ sutvā dutiyaṃ gāthamāha –

23. “Kiṃ gijjha paridevasi, kā nu te paridevanā;  
Na me suto vā diṭṭho vā, bhāsanto mānusiṃ dijo”ti.

Gijjho āha –

24. “Bharāmi mātāpitaro, vuddhe giridarīsaye;  
Te kathaṃ nu karissanti, ahaṃ vasaṃ gato tavā”ti.

Nesādo āha –

25. “Yaṃ nu gijjho yojanasataṃ, kuṇapāni avekkhati;  
Kasmā jālañca pāsāñca, āsajjāpi na bujjhasī”ti.

Gijjharājā āha –

26. “Yadā parābhavo hoti, poso jīvitasāṅkhaye;  
Atha jālañca pāsāñca, āsajjāpi na bujjhatī”ti.
27. “Bharassu mātāpitaro, vuddhe giridarīsaye;  
Mayā tvaṃ samanūññāto, sotthiṃ passāhi ñātake.
28. “Evaṃ luddaka nandassu, saha sabbehi ñātibhi;  
Bharissaṃ mātāpitaro, vuddhe giridarīsaye”ti. –

Nesādaputtena dutiyā, gijjhena tatiyāti imā gāthā paṭipāṭiyā vuttā.

Tattha **yaṃ nūti** yaṃ nu etaṃ loke kathīyati. **Gijjho yojanasataṃ, kuṇapāni avekkhatīti** yojanasataṃ atikkamma ṭhitānipi kuṇapāni passati, taṃ yadi tathaṃ, atha kasmā tvaṃ imaṃ jālañca pāsāñca āsajjāpi na bujjhasi, santikaṃ āgantvāpi na jānāsīti.

**Parābhavoti** vināso. **Bharassūti** idaṃ so bodhisattassa dhammakathaṃ sutvā “paṇḍito gijjharājā paridevanto na attano paridevati, mātāpitūnaṃ paridevati, nāyaṃ māretuṃ yutto”ti tussitvā āha, vatvā ca pana piyacittena muducittena pāsaṃ mocesi.

Athassa bodhisatto maraṇamukhā pamutto sukhito anumodanaṃ karonto osānagāthaṃ vatvā mukhapūraṃ maṃsaṃ ādāya mātāpitūnaṃ adāsi.

Satthā imaṃ dhammadesanaṃ āharitvā saccāni pakāsetvā jātaṃ samodhānesi, saccapariyosāne mātuposakabhikkhu sotāpattiphale patiṭṭhahi.

Tadā nesādaputto channo ahosi, mātāpitaro mahārājakulāni, gijjharājā pana ahameva ahosinti.

Mātuposakagijjhajātakavaṇṇanā catutthā.

[400] 5. Dabbhapupphajātakavaṇṇanā

**Anutīracārī bhaddanteti** idam satthā jetavane viharanto upanandaṃ sakyaputtaṃ ārabba kathesi. So hi sāsane pabbajitvā appicchatādiguṇe pahāya mahātaṇho ahoṣi. Vassūpanāyikāya dve tayo vihare pariggahetvā ekasmiṃ chattaṃ vā upāhanaṃ vā ekasmiṃ kattarayaṭṭhiṃ vā udakatumbaṃ vā ṭhapetvā ekasmiṃ sayamaṃ vasati. So ekasmiṃ janapadavihāre vassaṃ upagantvā “bhikkhūhi nāma appicchehi bhavitabba”nti ākāse candamaṃ uṭṭhāpento viya bhikkhūnaṃ paccayasantosadīpakaṃ ariyavaṃsapaṭipadaṃ kathesi. Taṃ sutvā bhikkhū manāpāni pattacīvarāni chaḍḍetvā mattikāpattāni ceva paṃsukūlacīvarāni ca gaṇhimsu. So tāni attano vasanaṭṭhāne ṭhapetvā vutthavasso pavāretvā yānakaṃ pūretvā jetavanaṃ gacchanto antarāmagge ekassa araṇṇavihārassa piṭṭhibhāge pāde vallyiā palibuddho “addhā ettha kiñci laddhabbaṃ bhavissati”ti taṃ vihāraṃ pāvisi. Tattha pana dve mahallakā bhikkhū vassaṃ upagacchimsu. Te dve ca thūlasātake ekañca sukhumakambalaṃ labhitvā bhājetuṃ asakkontā taṃ disvā “thero no bhājetvā dassati”ti tuṭṭhacittā “mayamaṃ, bhante, imaṃ vassāvāsikaṃ bhājetuṃ na sakkoma, imaṃ no nissāya vivādo hoti, idamaṃ amhākaṃ bhājetvā dethā”ti āhamsu. So “sādhu bhājessāmi”ti dve thūlasātake dvinnampi bhājetvā “ayamaṃ amhākaṃ vinayadharānaṃ pāpuṇāti”ti kambalaṃ gahetvā pakkāmi.

Tepi therā kambale sālayā teneva saddhiṃ jetavanaṃ gantvā vinayadharānaṃ bhikkhūnaṃ tamatthaṃ ārocetvā “labbhati nu kho, bhante, vinayadharānaṃ evamaṃ vilopaṃ khāditu”nti āhamsu. Bhikkhū upanandattherena ābhattaṃ pattacīvararāsiṃ disvā “mahāpuñṇosi tvamaṃ āvuso, bahumaṃ te pattacīvaraṃ laddha”nti vadiṃsu. So “kuto me āvuso, puñṇamaṃ, iminā me upāyena idamaṃ laddha”nti sabbaṃ kathesi. Bhikkhū dhammasabhāyaṃ kathaṃ samuṭṭhāpesuṃ “āvuso, upanando sakyaputto mahātaṇho mahālobho”ti. Satthā āgantvā “kāya nuttha, bhikkhave, etarahi kathāya sannissinnā”ti pucchitvā “imāya nāmā”ti vutte “na, bhikkhave, upanandena paṭipadāya anucchavikaṃ kataṃ, parassa paṭipadaṃ kathentena nāma bhikkhunā paṭhamamaṃ attano anucchavikaṃ katvā pacchā paro ovaditabbo”ti.

“Attānameva paṭhamamaṃ, patirūpe nivesaye;  
Athaññamanusāseyya, na kilsseyya paṇḍito”ti. (dha. pa. 158) –

Imāya dhammapade gāthāya dhammaṃ desetvā “na, bhikkhave, upanando idāneva, pubbepeṣa mahātaṇho mahālobhova, na ca pana idāneva, pubbepeṣa imesaṃ santakaṃ vilumpiyevā”ti vatvā atītaṃ āhari.

Atīte bārāṇasiyaṃ brahmadatte rajjamaṃ kārente bodhisatto nadītīre rukkhadevatā ahoṣi. Tadā eko siṅgālo māyāvimaṃ nāma bhariyamaṃ gahetvā nadītīre ekasmiṃ ṭhāne vasi. Atheadivasamaṃ siṅgālī siṅgālaṃ āha “dohaḷo me sāmi, uppanno, allarohitamacchamaṃ khādituṃ icchāmi”ti. Siṅgālo “appossukkā hohi, āharissāmi te”ti nadītīre caranto vallyiā pāde palibujjhivā anutīrameva agamāsi. Tasmimaṃ khaṇe gambhīracārī ca anutīracārī cāti dve uddā macche pariyesantā tīre aṭṭhamsu. Tesu gambhīracārī mahantaṃ rohitamacchamaṃ disvā vegena udake pavasitvā taṃ naṅguṭṭhe gaṇhi. Balavā maccho parikaḍḍhanto yāsi. So gambhīracārī uddo “mahāmaccho ubhinnaṃpi no pahossati, ehi me sahāyo hohi”ti itarena saddhiṃ sallapanto paṭhamamaṃ gāthamāha –

29. “Anutīracārī bhaddante, sahāyamanudhāva maṃ;  
Mahā me gahito maccho, so maṃ harati vegasā”ti.

Tattha **sahāyamanudhāva** manti sahāya anudhāva maṃ, sandhivasena ma-kāro vutto. Idamaṃ vuttaṃ hoti – yathāhaṃ iminā macchena na saṃhīrāmi, evamaṃ maṃ naṅguṭṭhakhaṇḍe gahetvā tvamaṃ anudhāvāti.

Tamaṃ sutvā itaro dutiyaṃ gāthamāha –

30. “Gambhīracārī bhaddante, daḷhaṃ gaṇhāhi thāmasā;

Ahaṃ taṃ uddharissāmi, supaṇṇo uragānivā’’ti.

Tattha **thāmasā**ti thāmena. **Uddharissāmī**ti nīharissāmi. **Supaṇṇo uragānivā**ti gaṇḍo sappam viya.

Atha dvepi te ekato hutvā rohitamacchaṃ nīharitvā thale ṭhapetvā māretvā ‘‘tvam bhājehi, tvam bhājehī’’ti kalaham katvā bhājetuṃ asakkontā ṭhapetvā nisīdīmsu. Tasmim kāle siṅgālo taṃ ṭhānaṃ anupatto. Te taṃ disvā ubhopi paccuggamaṇaṃ katvā ‘‘ayaṃ, samma, dabbhapupphamaccho amhehi ekato hutvā gahito, taṃ no bhājetuṃ asakkontānaṃ vivādo uppanno, samabhāgaṃ no bhājetvā dehī’’ti tatiyaṃ gāthamāhaṃsu –

31. ‘‘Vivādo no samuppanno, dabbhapuppha suṇohi me;  
Samehi medhagaṃ sammā, vivādo vūpasammata’’nti.

Tattha **dabbhapupphā**ti dabbhapupphasamānavaṇṇatāya taṃ ālapanti. **Medhaganti** kalaham.

Tesaṃ vacanaṃ sutvā siṅgālo attano balaṃ dīpento –

32. ‘‘Dhammaṭṭhohaṃ pure āsiṃ, bahū aḍḍā me tīritā;  
Samemi medhagaṃ sammā, vivādo vūpasammata’’nti. –

Idaṃ gāthaṃ vatvā bhājento –

33. ‘‘Anutīracāri naṅguṭṭhaṃ, sīsaṃ gambhīracārino;  
Accāyaṃ majjhimo khaṇḍo, dhammaṭṭhassa bhavissatī’’ti. –

Imaṃ gāthamāha –

Tattha paṭhamagāthāya ayamatto – ahaṃ pubbe rājūnaṃ vinicchayāmacco āsiṃ, tena mayā vinicchaye nisīditvā bahū aḍḍā tīritā, tesam tesam brāhmaṇagahapatikādīnaṃ bahū aḍḍā tīritā vinicchitā, svāhaṃ tumhādisānaṃ samajātikānaṃ catuppadānaṃ aḍḍaṃ tīretuṃ kiṃ na sakkhissāmi, ahaṃ vo samemi medhagaṃ, sammā maṃ nissāya tumhākaṃ vivādo vūpasammataṭṭi.

Evañca pana vatvā macchaṃ tayo koṭṭhāse katvā anutīracāri tvam naṅguṭṭhaṃ gaṇha, sīsaṃ gambhīracārino hotu. **Accāyaṃ majjhimo khaṇḍo**ti apica ayaṃ majjhimo koṭṭhāso. Atha vā **accā**ti aticca, ime dve koṭṭhāse atikkamitvā ṭhito ayaṃ majjhimo khaṇḍo dhammaṭṭhassa vinicchayasāmikassa mayhaṃ bhavissatīti.

Evaṃ taṃ macchaṃ vibhajitvā ‘‘tumhe kalaham akatvā naṅguṭṭhañca sīsañca khādathā’’ti vatvā majjhimakhaṇḍaṃ mukhena ḍamsitvā tesam passantānaṃyeva palāyi. Te sahaṃsaṃ parājītā viya dummukhā nisīditvā gāthamāhaṃsu –

34. ‘‘Cīrampi bhakkho abhavissa, sace na vivademase;  
Asīsakaṃ anaṅguṭṭhaṃ, siṅgālo harati rohita’’nti.

Tattha **cīrampī**ti dve tayo divase sandhāya vuttaṃ.

Siṅgālopi ‘‘ajja bhariyaṃ rohitamacchaṃ khādāpessāmī’’ti tuṭṭhacitto tassā santikaṃ agamāsi. Sā taṃ āgacchantam disvā abhinandamānā –

35. ‘‘Yathāpi rājā nandeyya, rajjaṃ laddhāna khattiyo;



Evāhamajja nandāmi, disvā puṇṇamukhaṃ pati’’nti. –

Imaṃ gāthaṃ vatvā adhigamūpāyaṃ pucchantī –

36. “Kathaṃ nu thalajo santo, uduke macchaṃ parāmasi;  
Puṭṭho me samma akkhāhi, kathaṃ adhigataṃ tayā’’ti. –

Imaṃ gāthamāha –

Tattha **kathaṃ nūti** “khāda, bhadda’’ti macchakhaṇḍe purato ṭhapite “kathaṃ nu tvaṃ thalajo samāno uduke macchaṃ gaṇhī’’ti pucchi.

Siṅgālo tassa adhigamūpāyaṃ ācikkhanto anantaragāthamāha –

37. “Vivādena kisā honti, vivādena dhanakkhayā;  
Jīnā uddā vivādena, bhūṇja māyāvi rohita’’nti.

Tattha **vivādena kisā hontīti** bhadda, ime sattā vivādaṃ karontā vivādaṃ nissāya kisā appamaṃsalohitā honti. **Vivādena dhanakkhayāti** hiraññasuvanṇādīnaṃ dhanānaṃ khayā vivādeneva honti. Dvīsūpi vivādantesu eko parājito parājitatā dhanakkhayaṃ pāpuṇāti, itaro jayabhāgadānena. **Jīnā uddāti** dve uddāpi vivādeneva imaṃ macchaṃ jīnā, tasmā tvaṃ mayā ābhatassa uppattiṃ mā puccha, kevalaṃ imaṃ bhūṇja māyāvi rohitanti.

Itarā abhisambuddhagāthā –

38. “Evameva manussesu, vivādo yattha jāyati;  
Dhammaṭṭhaṃ paṭidhāvati, so hi nesam vināyako;  
Dhanāpi tattha jīyanti, rājakoso pavaḍḍhatī’’ti.

Tattha **evamevāti** bhikkhave, yathā ete uddā jīnā, evameva manussesu yasmim ṭhāne vivādo jāyati, tattha te manussā dhammaṭṭhaṃ paṭidhāvanti, vinicchayasāmikaṃ upasaṅkamanti. Kimkāraṇā? **So hi nesam vināyako**, so tesam vivādāpannānaṃ vivādavūpasamakoti attho. **Dhanāpi tatthāti** tattha te vivādāpannā dhanatopi jīyanti, attano santakā parihāyanti, daṇḍena ceva jayabhāggahaṇena ca rājakoso pavaḍḍhatīti.

Satthā imaṃ dhammadesanaṃ āharitvā jātakam samodhānesi – “tadā siṅgālo upanando ahoṣi, uddā dve mahallakā, tassa kāraṇassa paccakkhārikā rukkhadevatā pana ahameva ahoṣi’’nti.

Dabbhapupphajātakavaṇṇanā pañcamā.

[401] 6. Paṇṇakajātakavaṇṇanā

**Paṇṇakaṃ tikhiṇadhāranti** idaṃ satthā jetavane viharanto purāṇadutiyaikāpalobhanaṃ ārabha katesi. Tañhi bhikkhuṃ satthā “saccaṃ kira tvaṃ bhikkhu ukkaṇṭhito’’ti pucchitvā “saccaṃ, bhante’’ti vutte “kena ukkaṇṭhāpito’’ti vatvā “purāṇadutiyaikāyā’’ti vutte “bhikkhu ayaṃ itthī tuyhaṃ anattakārikā, pubbepi tvaṃ imaṃ nissāya cetasikarogena maranto paṇḍite nissāya jīvitam alatthā’’ti vatvā atītam āhari.

Atīte bārānasiyaṃ maddavamahārāje rajjaṃ kārente bodhisatto brāhmaṇakule nibbatti, senakakumārotissa nāmaṃ akaṃsu. So vayappatto takkasīlāyaṃ sabbasippāni uggaṇhitvā bārānasiṃ paccāgantvā maddavarañño atthadhammānusāsako amacco ahoṣi, “senakapaṇḍito’’ti vutte sakalanagare cando viya sūriyo viya ca paññāyi. Tadā rañño purohitaputto rājupaṭṭhānaṃ āgato

sabbālaṅkārapaṭimaṇḍitaṃ uttamarūpadharaṃ rañño aggamaheṣiṃ disvā paṭibaddhacitto hutvā gehaṃ gantvā nirāhāro nipajjitvā sahāyakehi puṭṭho tamatthaṃ ārocesi. Rājāpi “purohitaputto na dissati, kahaṃ nu kho”ti pucchitvā tamatthaṃ sutvā taṃ pakkosāpetvā “ahaṃ te imaṃ satta divasāni dammi, sattāhaṃ ghare katvā aṭṭhame divase āneyyāsī”ti āha. So “sādhū”ti sampaṭicchitvā taṃ gehaṃ netvā tāya saddhiṃ abhirami. Te aññaṃaññaṃ paṭibaddhacittā hutvā kañci ajānāpetvā aggadvārena palāyitvā aññassa rañño vijitaṃ agamasuṃ, koci gataṭṭhānaṃ na jāni, nāvāya gatamaggo viya ahosi. Rājā nagare bheriṃ carāpetvā nānappakārena vicinantopi tassa gataṭṭhānaṃ na aññāsī. Athassa taṃ nissāya balavasoko uppajji, hadayaṃ uṇhaṃ hutvā lohitaṃ pagghari. Tato paṭṭhāya cassa kucchito lohitaṃ nikkhami, byādhi mahanto ahosi. Mahantāpi rājavejjā tikicchitūṃ nāsakkhiṃsu.

Bodhisatto “imassa rañño byādhi natthi, bhariyaṃ pana apassanto cetasikarogena phuṭṭho, upāyena taṃ tikicchissāmī”ti āyurañca pukkusañcāti dve rañño paṇḍitāmacce āmantetvā “rañño deviyā adassanena cetasiṃ rogaṃ ṭhapetvā añño rogo natthi, bahūpakāro ca kho pana amhākaṃ rājā, tasmā upāyena naṃ tikicchāma, rājaṅgaṇe samajjaṃ kāretvā asim gilitūṃ jānantena asim gilāpetvā rājānaṃ sīhapañjare katvā samajjaṃ olokāpessāma, rājā asim gilantaṃ disvā ‘atthi nu kho ito aññaṃ dukkaratara’nti pañhaṃ pucchissati. Taṃ samma āyura, tvam ‘asukam nāma dadāmīti vacanaṃ ito dukkaratara’nti byākareyyāsī, tato samma pukkusa, taṃ pucchissati, athassa tvam ‘mahārāja, dadāmīti vatvā adadato sā vācā aphalā hoti, tathārūpaṃ vācaṃ na keci upajjivanti na khādanti na pivanti, ye pana tassa vacanassānucchavikaṃ karonti, yathapaṭiññātamatthaṃ dentiyeva, idaṃ tato dukkaratara’nti evaṃ byākareyyāsī, ito paraṃ kattabbaṃ ahaṃ jānissāmī”ti vatvā samajjaṃ kāresi.

Atha te tayopi paṇḍitā rañño santikaṃ gantvā “mahārāja, rājaṅgaṇe samajjo vattati, taṃ olokentānaṃ dukkhampi na dukkhaṃ hoti, ehi gacchāma”ti rājānaṃ netvā sīhapañjaraṃ vivarivā samajjaṃ olokāpesuṃ. Bahū janā attano attano jānanakasippaṃ dassesuṃ. Eko pana puriso tettiṃsaṅgulaṃ tikhiṇadhāraṃ asiratanam gilati. Rājā taṃ disvā “ayaṃ puriso etaṃ asim gilati, ‘atthi nu kho ito aññaṃ dukkaratara’nti ime paṇḍite pucchissāmī”ti cintetvā āyuraṃ pucchanto paṭhamam gāthamāha –

39. “Paṇṇakaṃ tikhiṇadhāraṃ, asim sampannaṃ pāyinaṃ;  
Parisāyaṃ puriso gilati, kiṃ dukkarataraṃ tato;  
Yadaññaṃ dukkaraṃ ṭhānaṃ, taṃ me akkhāhi pucchito”ti.

Tattha **paṇṇakanti** paṇṇakaraṭṭhe uppannaṃ. **Sampannaṃ pāyinaṃ** sampannaṃ paralohitaṃ pāyinaṃ. **Parisāyanti** parisamajjhe dhanalobhena ayaṃ puriso gilati. **Yadaññanti** ito asigilanato yaṃ aññaṃ dukkarataraṃ kāraṇaṃ, taṃ mayā pucchito kathehīti.

Athassa so taṃ kathento dutiyaṃ gāthamāha –

40. “Gileyya puriso lobhā, asim sampannaṃ pāyinaṃ;  
Yo ca vajjā dadāmīti, taṃ dukkarataraṃ tato;  
Sabbaññaṃ sukaraṃ ṭhānaṃ, evaṃ jānāhi maddavā”ti.

Tattha **vajjāti** vadeyya. **Taṃ dukkarataranti** “dadāmī”ti vacanaṃ tato asigilanato dukkarataraṃ. **Sabbaññanti** “asukam nāma tava dassāmī”ti vacanaṃ ṭhapetvā aññaṃ sabbampi kāraṇaṃ sukaraṃ. **Maddavāti** rājānaṃ gottena ālapati.

Rañño āyurapaṇḍitassa vacanaṃ sutvā “asigilanato kira ‘idaṃ nāma dammī’ti vacanaṃ dukkaraṃ, ahañca ‘purohitaputtassa devim dammī’ti avacaṃ, atidukkaraṃ vata me kata’nti vīmaṃsantasseva hadayasoko thokaṃ tanuttaṃ gato. So tato “parassa imaṃ dammīti vacanato pana aññaṃ dukkarataraṃ atthi nu kho”ti cintetvā pukkusaṃ paṇḍitena saddhiṃ sallapanto tatiyaṃ gāthamāha –

41. “Byākāsi āyuro pañhaṃ, atthaṃ dhammassa kovido;  
Pukkusaṃ dāni pucchāmi, kiṃ dukkarataraṃ tato;  
Yadaññaṃ dukkaraṃ ṭhānaṃ, taṃ me akkhāhi pucchito”ti.

Tattha **pañhaṃ atthanti** pañhassa atthaṃ byākāsīti vuttaṃ hoti. **Dhammassa kovidoti** tadatthajotake ganthe kusalo. **Tatoti** tato vacanato kiṃ dukkarataranti.

Athassa byākaronto pukkusapaṇḍito catutthaṃ gāthamāha –

42. “Na vācamupajīvanti, aphalaṃ giramudīritaṃ;  
Yo ca datvā avākayirā, taṃ dukkarataraṃ tato;  
Sabbaññaṃ sukaraṃ ṭhānaṃ, evaṃ jānāhi maddavā”ti.

Tattha **datvāti** “asukāṃ nāma dammī”ti paṭiññaṃ datvā. **Avākayirāti** taṃ paṭiññātamattaṃ dadanto tasmīṃ lobhaṃ avākareyya chindeyya, taṃ bhaṇḍaṃ dadeyyāti vuttaṃ hoti. **Tatoti** tato asigilanato “asukāṃ nāma te dammī”ti vacanato ca tadeva dukkarataraṃ.

Raṅṅo taṃ vacanaṃ sutvā “ahaṃ ‘purohitaputtassa devīṃ dammī’ti paṭhamaṃ vatvā vācāya anucchavikaṃ katvā taṃ adāsiṃ, dukkaraṃ vata me kata”nti parivittakentassa soko tanukatāro jāto. Athassa etadahosi “senakapaṇḍitāto añño paṇḍitāto nāma natthi, imaṃ pañhaṃ etaṃ pucchissāmi”ti. Tato taṃ pucchanto pañcamaṃ gāthamāha –

43. “Byākāsi pukkuso pañhaṃ, atthaṃ dhammassa kovido;  
Senakaṃ dāni pucchāmi, kiṃ dukkarataraṃ tato;  
Yadaññaṃ dukkaraṃ ṭhānaṃ, taṃ me akkhāhi pucchito”ti.

Athassa byākaronto senako chaṭṭhaṃ gāthamāha –

44. “Dadeyya puriso dānaṃ, appaṃ vā yadi vā bahuṃ;  
Yo ca datvā nānutappe, taṃ dukkarataraṃ tato;  
Sabbaññaṃ sukaraṃ ṭhānaṃ, evaṃ jānāhi maddavā”ti.

Tattha **nānutappeti** attano atikantaṃ atīmanāpaṃ piyabhaṇḍaṃ parassa datvā “kimatthaṃ mayā idaṃ dinna”nti evaṃ taṃ piyabhaṇḍaṃ ārabba yo pacchā na tappati na socati, taṃ asigilanato ca “asukāṃ nāma te dammī”ti vacanato ca tassa dānato ca dukkarataraṃ.

Iti mahāsatto rājānaṃ saññāpentā kathesi. Dānañhi datvā aparacetanāva dussandhāriyā, tassā sandhāraṇadukkaratā vessantarajātakena dīpitā. Vuttañhetam –

“Adu cāpaṃ gahetvāna, khaggaṃ bandhiya vāmato;  
Añessāmi sake putte, puttānañhi vadho dukho.

“Aṭṭhānametaṃ dukkharūpaṃ, yaṃ kumārā vihaññare;  
Satañca dhammamaññāya, ko datvā anutappatī”ti. (jā. 2.22.2158-2159);

Rājāpi bodhisattassa vacanaṃ sutvā sallakkhesi “ahaṃ attano maneneva purohitaputtassa devīṃ datvā sakamaṇaṃ sandhāretuṃ na sakkomi, socāmi kilamāmi, na me idaṃ anucchavikaṃ, sace sā mayi sasinehā bhavēyya, imaṃ issariyaṃ chaḍḍetvā na palāyēyya, mayi pana sinehaṃ akatvā palātāya kiṃ tāya mayha”nti. Tassevaṃ cintentassa padumapatte udakabindu viya sabbasoko nivattitvā gato, tañkhaṇaṇṇēvassa kucchi parisañṭhāsi. So nirogo sukhito hutvā bodhisattassa thutiṃ karonto osānagāthamāha –

45. “Byākāsi āyuro pañhaṃ, atho pukkusaporiso;  
Sabbe pañhe atibhoti, yathā bhāsati senako”ti.

Tattha **yathā bhāsati**ti yathā paṇḍito bhāsati, tathevetam dānaṃ nāma datvā neva anutappitabbanti. Imaṃ panassa thutiṃ katvā tuṭṭho bahum dhanamadāsi.

Sattā imaṃ dhammadesanaṃ āharitvā saccāni pakāsetvā jātakaṃ samodhānesi, saccapariyosāne ukkaṅṭhitabhikkhu sotāpattiṃhale patiṭṭhahi. Tadā rājamahesī purāṇadutiyaikā ahosi, rājā ukkaṅṭhitabhikkhu, āyurapaṇḍito moggallāno, pukkusapaṇḍito sārīputto, senakapaṇḍito ahameva ahosinti.

Paṇṇakajātakavaṇṇanā chaṭṭhā.

[402] 7. Sattubhastajātakavaṇṇanā

**Vibbhantacittoti** idam sattā jetavane viharanto attano paññāpāramiṃ ārabha kathesi. Paccuppannavatthu **umaṅgajātake** (jā. 2.22.590 ādayo) āvi bhavissati.

Atīte bārāṇasiyaṃ janako nāma rājā rajjaṃ kāresi. Tadā bodhisatto brāhmaṇakule nibbatti, senakakumārotissa nāmaṃ karimsu. So vayappatto takkasilāyaṃ sabbasippāni uggaṇṭhitvā bārāṇasiṃ paccāgantvā rājānaṃ passi, rājā taṃ amaccaṭṭhāne ṭhapesi, mahantañcassa yasaṃ anuppadāsi. So rañño atthañca dhammañca anusāsi, madhurakatho dhammakathiko hutvā rājānaṃ pañcasu sīlesu patiṭṭhāpetvā dāne uposathakamme dasasu kusalakammāpathesūti imāya kalyāṇapaṭipadāya patiṭṭhāpesi, sakalaratṭhe buddhānaṃ uppannakālo viya ahosi. Pakkhadivasesu rājā ca uparājādayo ca sabbe sannipatitvā dhammasabhaṃ sajjenti. Mahāsatto sajjitadhammasabhāyaṃ ratanapallānkavaragato buddhalīlāya dhammaṃ deseti, buddhānaṃ dhammakathāsadisāvassa kathā hoti.

Atha aññatāro mahallakabrāhmaṇo dhanabhikkhaṃ caritvā kahāpaṇasahassaṃ labhitvā ekasmiṃ brāhmaṇakule nikkhipitvā puna “bhikkhaṃ carissāmī”ti gato. Tassa gatakāle taṃ kulaṃ kahāpaṇe vaḷañjesi. So āgantvā kahāpaṇe āharāpesi. Brāhmaṇo kahāpaṇe dātuṃ asakkonto attano dhītaraṃ tassa pādāparicārikaṃ katvā adāsi. Brāhmaṇo taṃ gahetvā bārāṇasito avidūre ekasmiṃ brāhmaṇagāme vasaṃ kappesi. Athassa bhariyā daharatāya kāmesu atittā aññena taruṇabrāhmaṇena saddhiṃ micchācāraṃ cari. **Soḷasa hi atappanīyavatthūni** nāma. Katamāni soḷasa? Sāgaro sabbasavantīhi na tappati, aggī upādānena na tappati, rājā ratṭhena na tappati, bālo pāpehi na tappati, itthī methunadhammena alaṅkārena vijāyānenāti imehi tīhi na tappati, brāhmaṇo mantehi na tappati, jhāyī vihārasamāpattiyā na tappati, sekkho apacayena na tappati, appiccho dhutaṅgaguṇena na tappati, āradhaviṇīyo vīriyārambhena na tappati, dhammakathiko sākacchāya na tappati, visārado parisāya na tappati, saddho saṅghupaṭṭhānena na tappati, dāyako pariccāgena na tappati, paṇḍito dhammassavanena na tappati, catasso parisā tathāgatadassanena na tappantīti.

Sāpi brāhmaṇī methunadhammena, atittā taṃ brāhmaṇaṃ nīharitvā vissattā pāpakammaṃ kātukāmā hutvā ekadivasaṃ dummanā nipajjitvā “kiṃ bhotī”ti vuttā “brāhmaṇa, ahaṃ tava gehe kammaṃ kātuṃ na sakkomi, dāsīdāsaṃ ānehī”ti āha. “Bhoti dhanam me natthi, kiṃ datvā ānemi”ti. “Bhikkhaṃ caritvā dhanam pariyesitvā ānehī”ti. “Tena hi bhoti pātheyyaṃ me sajjehī”ti. “Sā tassa baddhasattūnañca abaddhasattūnañca cammapasibbakaṃ pūretvā adāsi”. Brāhmaṇo gāmanigamarājadhānīsu caranto satta kahāpaṇasatāni labhitvā “alaṃ me ettakaṃ dhanam dāsīdāsamūlāya”ti nivattitvā attano gāmaṃ āgacchanto ekasmiṃ udakaphāsukaṭṭhāne pasibbakaṃ muñcitvā sattum khādītva pasibbakamukhaṃ abandhitvāva pānīyaṃ pivituṃ otiṇṇo. Athekasmiṃ rukkhāsusire eko kaṇhasappo sattugandhaṃ ghāyitvā pasibbakaṃ pavisitvā bhogaṃ ābhujitvā sattum khādanto nipajji. Brāhmaṇo āgantvā pasibbakassa abbhantaraṃ anoloketvā pasibbakaṃ bandhitvā aṃse katvā pāyāsi. Antarāmagge ekasmiṃ rukkhe nibbattadevatā khandhaviṭape ṭhatvā “brāhmaṇa, sace antarāmagge vasissasi, sayam marissasi, sace ajja gharam gamissasi, bhariyā te marissati”ti vatvā

antaradhāyi. So olokeno devataṃ adisvā bhīto maraṇabhayatajjito rodanto paridevanto bārāṇasinagaradvāraṃ sampāpuṇi.

Tadā ca pannarasuposatho hoti alaṅkatadhammāsane nisīditvā bodhisattassa dhammakathanadivaso. Mahājano nānāgandhapupphādihattho vaggavaggo hutvā dhammiṃ katham sotuṃ gacchati. Brāhmaṇo taṃ disvā ‘‘kahaṃ gacchathā’’ti pucchitvā ‘‘brāhmaṇa, ajja senakapaṇḍito madhurassarena buddhalīlāya dhammaṃ deseti, kiṃ tvampi na jānāsī’’ti vutte cintesi ‘‘paṇḍito kira dhammakathiko, ahañcamhi maraṇabhayatajjito, paṇḍitā kho pana mahantampi sokaṃ harituṃ sakkonti, mayāpi tattha gantvā dhammaṃ sotuṃ vaṭṭatī’’ti. So tehi saddhiṃ tattha gantvā mahāsattaṃ parivāretvā nisinnāya sarājikāya parisāya pariyante sattupasibbakena khandhagatena dhammāsanato avidūre maraṇabhayatajjito rodamāno aṭṭhāsī. Mahāsatto ākāsagaṅgaṃ otaranto viya amatavassaṃ vassento viya ca dhammaṃ desesi. Mahājano sañjātasomanasso sādhuḅkāraṃ datvā dhammaṃ assosi.

Paṇḍitā ca nāma disācakkhukā honti. Tasmīṃ khaṇe mahāsatto pasannapañcapasādāni akkhīni ummīletvā samantato parisāṃ olokeno taṃ brāhmaṇaṃ disvā cintesi ‘‘ettakā parisā somanassajātā sādhuḅkāraṃ datvā dhammaṃ suṇanti, ayaṃ paneko brāhmaṇo domanassappatto rodati, etassa abbhantare assujananasamatthena sokena bhavitabbaṃ, tamassa ambilena paharivā tambamalaṃ viya padumapalāsato udakabinduṃ viya vinivattetvā ettheva naṃ nissokaṃ tuṭṭhamānaṃ katvā dhammaṃ desessāmī’’ti. So taṃ āmantetvā ‘‘brāhmaṇa, senakapaṇḍito nāmāhaṃ, idāneva taṃ nissokaṃ karissāmi, vissattho katthehi’’ti tena saddhiṃ sallapanto paṭhamāṃ gāthamāha –

46. ‘‘Vibbhantacitto kupitindriyosi, nettehi te vāriḅaṇā savanti;  
Kiṃ te naṭṭhaṃ kiṃ pana patthayāno, idhāgamā brahme tadiḅgha brūhī’’ti.

Tattha **kupitindriyosīti** cakkhundriyameva sandhāya ‘‘kupitindriyosī’’ti āha. **Vāriḅaṇāti** assubindūni. **Idhāti** codanathe nipāto. Tañhi mahāsatto codento evamāha ‘‘brāhmaṇa, sattā nāma dvīhi kāraṇehi socanti paridevanti sattasaṅkhāresu kismiñcīdeva piyajātike naṭṭhe vā, kiñcīdeva piyajātikaṃ patthetvā alabhantā vā. Tattha kiṃ te naṭṭhaṃ, kiṃ vā pana patthayanto tvam idha āgato, idaṃ me khippaṃ brūhī’’ti.

Athassa attano sokakāraṇaṃ kathento brāhmaṇo dutiyaṃ gāthamāha –

47. ‘‘Miyyetha bhariyā vajato mamaḅja, agacchato maraṇamāha yakkho;  
Etena dukkhena pavedhitosmi, akkhāhi me senaka etamattha’’nti.

Tattha **vajatoti** gehaṃ gacchantassa. **Agacchatoti** agacchantassa. **Yakkhoti** antarāmagge ekā rukkhadevatā evamāhāti vadati. Sā kira devatā ‘‘pasibbake te brāhmaṇa, kaṇhasappo’’ti anācikkhantī bodhisattassa nānānubhāvappakāsanatthaṃ nācikkhi. **Etena dukkhenāti** gacchato bhariyāya maraṇadukkhena, agacchato attano maraṇadukkhena, tenasmi pavedhito ghaṭṭito kampito. **Etamatthanti** etaṃ kāraṇaṃ. Yena me kāraṇena gacchato bhariyāya maraṇaṃ, agacchato attano maraṇaṃ hoti, etaṃ me kāraṇaṃ ācikkhāhīti attho.

Mahāsatto brāhmaṇassa vacanaṃ sutvā samuddamatthake jālaṃ khipanto viya nāṇajālaṃ pattharivā ‘‘imesaṃ sattānaṃ bahūni maraṇakāraṇāni. Samudde nimuggāpi maranti, tattha vālamacchehi gahitāpi, gaṅgāya patitāpi, tattha susumārehi gahitāpi, rukkhato patitāpi, kaṇṭakena viddhāpi, nānappakārehi āvudhehi pahaṭṭāpi, visaṃ khādītvaṃ, ubbandhitvaṃ, papāte patitāpi, atisītādīhi vā nānappakārehi vā rogehi upaddutāpi marantiyeva, evaṃ bahūsu maraṇakāraṇesu katarena nu kho kāraṇena ajjesa brāhmaṇo antarāmagge vasanto sayāṃ marissati, gehamassa vajato bhariyā marissatī’’ti cintesi. Cinto eva brāhmaṇassa khandhe pasibbakaṃ disvā ‘‘imasmiṃ pasibbake ekena sappena pavitṭhena bhavitabbaṃ, pavisanto ca paneso imasmiṃ brāhmaṇe pātarāsasamaye sattuṃ khādītva pasibbakamukhaṃ abandhitvā pānīyaṃ pātuṃ gate sattugandhena sappo pavitṭho bhavissati.

Brāhmaṇopi pānīyaṃ pivitvā āgato sappassa pavitṭhabhāvaṃ ajānitvā pasibbakaṃ bandhitvā ādāya pakkanto bhavissati, sacāyaṃ antarāmagge vasanto sāyaṃ vasanaṭṭhāne “sattum khādissāmī”’ti pasibbakaṃ muñcitvā hatthaṃ pavesessati, atha naṃ sappo hatthe ḍaṃsitvā jīvitakkhayaṃ pāpessati, idamassa antarāmagge vasantassa maraṇakāraṇaṃ. Sace pana gehaṃ gaccheyya, pasibbako bhariyāya hatthagato bhavissati, sā ‘antobhaṇḍaṃ olokessāmī’’ti pasibbakaṃ muñcitvā hatthaṃ pavesessati, atha naṃ sappo ḍaṃsitvā jīvitakkhayaṃ pāpessati, idamassa ajja gehaṃ gatassa bhariyāya maraṇakāraṇa’nti upāyakosallañāneva aññāsi.

Athassa etadahosi “iminā kaṇhasappena sūrena nibbhayena bhavitabbaṃ. Ayañhi brāhmaṇassa mahāphāsukaṃ paharantopi pasibbake attano calanaṃ vā phandanaṃ vā na dasseti, evarūpāya parisāya majjhepi attano atthibhāvaṃ na dasseti, tasmā iminā kaṇhasappena sūrena nibbhayena bhavitabba’nti. Idampi so upāyakosallañāneva dibbacakkhunā passanto viya aññāsi. Evaṃ sarājikāya parisāya majjhe sappam pasibbakaṃ pavisantaṃ disvā ṭhitapuriso viya mahāsatto upāyakosallañāneva paricchinditvā brāhmaṇassa pañhaṃ kathento tatiyaṃ gāthamāha –

48. “Bahūni ṭhānāni vicintayitvā, yamettha vakkhāmi tadeva saccaṃ;  
Maññāmi te brāhmaṇa sattubhastam, ajānato kaṇhasappo pavitṭho”’ti.

Tattha **bahūni ṭhānānī**ti bahūni kāraṇāni. **Vicintayitvā**ti paṭivijjhivā cintāvasena pavattapaṭivedho hutvā. **Yamettha vakkhāmī**ti yaṃ te ahaṃ etesu kāraṇesu etaṃ kāraṇaṃ vakkhāmi. **Tadeva saccanti** tadeva tathaṃ dibbacakkhunā disvā kathitasadisam bhavissatīti dīpeti. **Maññāmī**ti sallakkhemi. **Sattubhastanti** sattupasibbakaṃ. **Ajānatoti** ajānantasseva eko kaṇhasappo pavitṭhoti maññāmīti.

Evañca pana vatvā “atthi te brāhmaṇa, etasmim pasibbake sattū”’ti pucchi. “Atthi, paṇḍitā”’ti. “Ajja pātarāsavelāya sattum khādī”’ti? “Āma, paṇḍitā”’ti. “Kattha nisīditvā”’ti? “Araññe rukkhamaṇḍalamim, paṇḍitā”’ti. “Sattum khādītva pānīyaṃ pātuṃ gacchanto pasibbakamukhaṃ bandhi, na bandhī”’ti? “Na bandhim, paṇḍitā”’ti. “Pānīyaṃ pivitvā āgato pasibbakaṃ oloketvā bandhī”’ti. “Anoloketvā bandhim, paṇḍitā”’ti. “Brāhmaṇa, tava pānīyaṃ pātuṃ gatakāle ajānantasseva te sattugandhena pasibbakaṃ sappo pavitṭhoti maññāmi, evamettha āgato tvaṃ, tasmā pasibbakaṃ otāretvā parisamajjhe ṭhapetvā pasibbakamukhaṃ mocetvā paṭikkamma ṭhito ekaṃ daṇḍakaṃ gahetvā pasibbakaṃ tāva pahara, tato patthaṭaphaṇaṃ susūtisaddam katvā nikkhamantaṃ kaṇhasappam disvā nikkankho bhavissatī”’ti catutthaṃ gāthamāha –

49. “Ādāya daṇḍam parisumbha bhastam, passelaṃūgaṃ uragaṃ dujivham;  
Chindajja kaṅkham vicikicchitāni, bhujāṅgamaṃ passa pamañca bhasta”’nti.

Tattha **parisumbhāti** pahara. **Passelaṃūganti** eḷam paggharantena mukhena eḷamūgaṃ pasibbakato nikkhamantaṃ dujivham uragaṃ passa. **Chandajja kaṅkham vicikicchitānī**ti “atthi nu kho me pasibbake sappo, udāhu natthī”’ti kaṅkhameva punappunaṃ uppajjamānāni vicikicchitāni ca ajja chinda, mayham saddaha, avitathañhi me veyyākaraṇaṃ, idāneva nikkhamantaṃ bhujāṅgamaṃ passa pamañca bhastanti.

Brāhmaṇo mahāsattassa katham sutvā saṃviggo bhayappatto tathā akāsi. Sappopi sattubhaste daṇḍena pahate pasibbakamukhā nikkhamitvā mahājanaṃ olokeno aṭṭhāsi. Tamatthaṃ pakāsento satthā pañcamam gāthamāha –

50. “Saṃviggārūpo parisāya majjhe, so brāhmaṇo sattubhastam pamañci;  
Atha nikkhami urago uggatejo, āsīviso sappo phaṇam karitvā”’ti.

Sappassa phaṇam katvā nikkhantakāle “mahāsattassa sabbaññubuddhasseva byākaraṇaṃ ahoṣī”’ti mahājano celukkhepasahassāni pavattesi, aṅguliphotaṇasahassāni paribbhamiṃsu, ghanameghavassaṃ

viya sattaratanavassam vassi, sādhuḥkārasahassāni pavattiṃsu, mahāpathavībhijjanasaddo viya ahosi. Idaṃ pana buddhalīlāya evarūpassa pañhassa kathanam nāma neva jātiyā balaṃ, na gottakulappadesānaṃ balaṃ, kassa panetaṃ balanti? Paññāya balaṃ. Paññavā hi puggalo vipassanaṃ vaḍḍhetvā ariyamaggadvāraṃ vivaritvā amatamahānibbānaṃ pavisati, sāvakapāramimpi paccekabodhimpī sammāsambodhimpī paṭivijjhati. Amatamahānibbānasampāpakesu hi dhammesu paññāva seṭṭhā, avasesā tassā parivārā honti. Tenetaṃ vuttaṃ –

“Paññā hi seṭṭhā kusalā vadanti, nakkhattarājāriva tārakānaṃ;  
Sīlaṃ sirī cāpi satañca dhammo, anvāyikā paññavato bhavanti”ti. (jā. 2.17.81);

Evam kathite ca pana mahāsattena pañhe eko ahituṇḍiko sappassa mukhabandhanaṃ katvā sappam gahetvā araññe vissajjesi. Brāhmaṇo rājānaṃ upasaṅkamitvā jayāpetvā añjaliṃ paggayha rañño thutiṃ karonto upaḍḍhagāthamāha –

51. “Suladdhalābhā janakassa rañño;  
Yo passatī senakaṃ sādhuḥpañña”nti.

Tassattho – yo sādhuḥpaññaṃ uttamapaññaṃ senakapaṇḍitaṃ akkhīni ummīletvā icchiticchitakkhaṇe piyacakkhūhi passituṃ labhati, tassa rañño janakassa ete icchiticchitakkhaṇe dassanalābhā suladdhalābhā vata, etena laddhesu sabbalābhesu eteva lābhā suladdhalābhā nāmāti.

Brāhmaṇopi rañño thutiṃ katvā puna pasibbakato satta kahāpaṇasatāni gahetvā mahāsattassa thutiṃ katvā tuṭṭhidāyaṃ dātukāmo diyaḍḍhagāthamāha –

“Vivaṭṭachaddo nusi sabbadassī, ñāṇaṃ nu te brāhmaṇa bhimsarūpaṃ.

52. “Imāni me sattasatāni atthi, gaṇhāhi sabbāni dadāmi tuyhaṃ;  
Tayā hi me jīvītamajja laddhaṃ, athopi bhariyāya makāsi sotthi”nti.

Tattha **vivaṭṭachaddo nusi sabbadassī** kiṃ nu kho tvam sabbesu dhammākāresu vivaṭṭachadano vivaṭṭaneyyadhammo sabbaññubuddhoti thutivasena pucchati. **Ñāṇaṃ nu te brāhmaṇa bhimsarūpanti** udāhu asabbaññussapi sato tava ñāṇaṃ ativiya bhimsarūpaṃ sabbaññutaññāṇaṃ viya balavanti. **Tayā hi meti** tayā hi dinnattā ajja mayā jīvītaṃ laddhaṃ. **Athopi bhariyāya makāsi sotthinti** athopi me bhariyāya tvameva sotthiṃ akāsi.

Iti so vatvā “sacepi satahassam bhavēyya, dadeyyamevāhaṃ, ettakameva me dhanam, imāni me satta satāni gaṇhā”ti punappunaṃ bodhisattaṃ yāci. Taṃ sutvā bodhisatto aṭṭhamam gāthamāha –

53. “Na paṇḍitā vetanamādiyanti, citrāhi gāthāhi subhāsītāhi;  
Itopi te brahme dadantu vittaṃ, ādāya tvam gaccha sakaṃ niketa”nti.

Tattha **vetananti** vettanaṃ, ayameva vā pāṭho. **Itopi te brahmeti** brāhmaṇa, ito mama pādāmūlatopi tuyhaṃ dhanam dadantu. **Vittaṃ ādāya tvam gacchāti** ito aññāni tīṇi satāni gahetvā sahasabhaṇḍikaṃ ādāya sakanivesanaṃ gaccha.

Evañca pana vatvā mahāsatto brāhmaṇassa sahasam pūrāpento kahāpaṇe dāpetvā “brāhmaṇa, kena tvam dhanabhikkhāya pesito”ti pucchi. “Bhariyāya me paṇḍitā”ti. “Bhariyā pana te mahallikā, daharā”ti. “Daharā, paṇḍitā”ti. “Tena hi sā aññena saddhiṃ anācāraṃ karontī ‘nibbhayā hutvā karissāmī’ti taṃ pesesi, sace ime kahāpaṇe gharaṃ nessasi, sā te dukkhena laddhakahāpaṇe attano jārassa dassati, tasmā tvam ujukameva geham agantvā bahigāme rukkhamūle vā yattha katthaci vā kahāpaṇe ṭhapetvā paviseyyāsī”ti vatvā taṃ uyyojesi. So gāmasamīpaṃ gantvā ekasmiṃ rukkhamūle

kahāpaṇe ṭhapetvā sāyaṃ gehaṃ agamāsi. Bhariyāpissa tasmim̐ khaṇe jārena saddhim̐ nisinnā ahoṣi. Brāhmaṇo dvāre ṭhatvā “bhotī”ti āha. Sā tassa saddaṃ sallakkhetvā dīpaṃ nibbāpetvā dvāraṃ vivaritvā brāhmaṇe anto pavitṭhe itaraṃ nīharitvā dvāramūle ṭhapetvā gehaṃ pavisitvā pasibbake kiñci adisvā “brāhmaṇa, kiṃ te bhikkhaṃ caritvā laddha”nti pucchi. “Sahassaṃ me laddha”nti. “Kahaṃ pana ta”nti. “Asukaṭṭhāne nāma ṭhapitaṃ, pātova āharissāmi, mā cintayī”ti. Sā gantvā jāraṣsa ācikkhi. So nikkhamitvā attanā ṭhapitaṃ viya gaṇhi.

Brāhmaṇo punadivase gantvā kahāpaṇe apassanto bodhisattassa santikaṃ gantvā “kiṃ, brāhmaṇā”ti vutte “kahāpaṇe na passāmi, paṇḍitā”ti āha. “Bhariyāya te ācikkhī”ti? “Āma, paṇḍitā”ti. Mahāsatto tāya jāraṣsa ācikkhitabhāvaṃ ñatvā “atthi pana te brāhmaṇa, bhariyāya kulūpakabrāhmaṇo”ti pucchi. “Atthi, paṇḍitā”ti. “Tuyhampi atthī”ti? “Āma, paṇḍitā”ti. Athassa mahāsatto sattannaṃ divasānaṃ paribbayaṃ dāpetvā “gaccha paṭhamadivase tava satta, bhariyāya te sattāti cuddasa brāhmaṇe nimantetvā bhojetha, punadivasaṭo paṭṭhāya ekekaṃ hāpetvā sattame divase tava ekaṃ, bhariyāya te ekanti dve brāhmaṇe nimantetvā bhariyāya te satta divase nimantitabrāhmaṇassa nibaddhaṃ āgamanabhāvaṃ ñatvā mayhaṃ ārocehī”ti āha. Brāhmaṇo tathā katvā “sallakkhito me paṇḍita, nibaddhaṃ bhuñjanakabrāhmaṇo”ti mahāsattassa ārocesi.

Bodhisatto tena saddhim̐ purise pesetvā taṃ brāhmaṇaṃ āharāpetvā “asukarukkhamūlato te imassa brāhmaṇassa santakaṃ kahāpaṇasahassaṃ gahita”nti pucchi. “Na gaṇhāmi, paṇḍitā”ti. “Tvaṃ mama senakapaṇḍitabhāvaṃ na jānāsi, āharāpessāmi te kahāpaṇe”ti. So bhīto “gahitā me”ti sampaticchi. “Kuhim̐ te ṭhapitā”ti? “Tattheva, paṇḍita, ṭhapitā”ti. Bodhisatto brāhmaṇaṃ pucchi “brāhmaṇa, kiṃ te sāyeva bhariyā hotu, udāhu aññaṃ gaṇhissasi”ti. “Sāyeva me hotu, paṇḍitā”ti. Bodhisatto manusse pesetvā brāhmaṇassa kahāpaṇe ca brāhmaṇiṇca āharāpetvā corabrāhmaṇassa hatthato kahāpaṇe brāhmaṇassa dāpetvā itarassa rājānaṃ kāretvā nagarā nīharāpetvā brāhmaṇiyāpi rājānaṃ kāretvā brāhmaṇassa mahantaṃ yasaṃ datvā attanoyeva santike vasāpesi.

Satthā imaṃ dhammadeṣanaṃ āharitvā saccāni pakāsetvā jātakaṃ samodhānesi, saccapariyosāne bahū sotāpattiṭṭhalādīni sacchikariṃsu. Tadā brāhmaṇo ānando ahoṣi, rukkhadevatā sārīputto, parisā buddhapaṇḍita, senakapaṇḍito pana ahameva ahoṣinti.

Sattubhastajātakavaṇṇanā sattamā.

[403] 8. Aṭṭhisenajātakavaṇṇanā

**Yeme ahaṃ na jānāmī**ti idaṃ satthā āḷaviṃ nissāya aggāḷave cetiye viharanto kuṭikārasikkhāpadaṃ ārabba kathesi. Paṇḍitaṃ vācyaṃ heṭṭhā **maṇikaṇṭhajātake** (jā. 1.3.7 ādayo) kathitameva. Satthā pana te bhikkhū āmantetvā “bhikkhave, porānakapaṇḍitā pubbe anuppanne buddhe bāhirakapabbajjāya pabbajitvā rājūhi pavāritāpi ‘yācanā nāma paresaṃ appiyā amanāpā’ti na yācimsū”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto ekasmiṃ nigame brāhmaṇakule nibbatti, aṭṭhisenakumārotissa nāmaṃ kariṃsu. So vayappatto takkasilāyaṃ sabbasippāni uggaṇhitvā aparabhāge kāmesu ādīnavaṃ disvā gharāvāsato nikkhamitvā isipabbajjaṃ pabbajitvā jhānābhīññāsamāpattiyo nibbattetvā himavantapadese ciraṃ vasitvā loṇambilasevanatthāya manussapathaṃ otaritvā anupubbena bārānasiṃ patvā rājuyyāne vasitvā punadivase bhikkhāya caranto rājānaṃ agamāsi. Rājā tassācāravihāre pasīditvā taṃ nimantāpetvā pāsādātale pallanke nisīdāpetvā subhojanaṃ bhojettvā bhojanāvasāne anumodanaṃ sutvā pasanno paṭiññaṃ gahetvā mahāsattaṃ rājuyyāne vasāpesi, divasassa ca dve tayo vāre upaṭṭhānaṃ agamāsi. So ekadivasaṃ dhammakathāya pasanno rajjaṃ ādim̐ katvā “yena vo attho, taṃ vadeyyāthā”ti pavāresi. Bodhisatto “idaṃ nāma me dehī”ti na vadati. Aññe yācakā “idaṃ dehi, idaṃ dehī”ti icchiticchitaṃ yācanti, rājā asajjamāno detiyeva. So ekadivasaṃ cintesi “aññe yācanakavanibbakā ‘idañcīdañca ambhākaṃ dehī’ti maṃ yācanti, ayyo pana aṭṭhiseno pavāritakālato paṭṭhāya na kiñci yācati, paññavā kho panesa upāyakusalo, pucchissāmi na”nti. So



ekadivasaṃ bhuttapātarāso gantvā vanditvā ekamantaṃ nisinno aññesaṃ yācanakāraṇaṃ tassa ca ayācanakāraṇaṃ pucchanto paṭhamāṃ gāthamāha –

54. “Yeme ahaṃ na jānāmi, aṭṭhisena vanibbake;  
Te maṃ saṅgama yācanti, kasmā maṃ tvaṃ na yācasī”ti.

Tattha **vanibbake**ti yācanake. **Saṅgammā**ti samāgantvā. Idaṃ vuttaṃ hoti – ayya, aṭṭhisena, yeme vanibbake ahaṃ nāmagottajātikulappadesena “ime nāmete”tipi na jānāmi, te maṃ samāgantvā icchicchitaṃ yācanti, tvaṃ pana kasmā maṃ kiñci na yācasīti.

Taṃ sutvā bodhisatto dutiyaṃ gāthamāha –

55. “Yācako appiyo hoti, yācaṃ adadamappiyo;  
Tasmāhaṃ taṃ na yācāmi, mā me videssanā ahū”ti.

Tattha **yācako appiyo hotī**ti yo hi, mahārāja, puggalo “idaṃ me dehī”ti yācako, so mātāpitūnampi mittāmaccādīnampi appiyo hoti amanāpo. Tassa appiyabhāvo maṇikaṇṭhajātakena dīpetabbo. **Yācanti** yācitabhaṇḍaṃ. **Adadanti** adadamāno. Idaṃ vuttaṃ hoti – yopi yācitaṃ na deti, so mātāpitaro ādiṃ katvā adadamāno puggalo yācakassa appiyo hotīti. **Tasmā**ti yasmā yācakopi dāyakassa, yācitaṃ bhaṇḍaṃ adadantopi yācakassa appiyo hoti, tasmā ahaṃ taṃ na yācāmi. **Mā me videssanā ahū**ti sace hi ahaṃ yāceyyameva, tava videsso bhavyeaya, sā me tava santikā uppannā videssanā, sace pana tvaṃ na dadeyyāsi, mama videsso bhavyeaya, sā ca mama tayi videssanā, evaṃ sabbathāpi mā me videssanā ahu, mā no ubhinnampi mettā bhijjīti etamatthaṃ sampassanto ahaṃ taṃ na kiñci yācāmīti.

Athassa vacanaṃ sutvā rājā tisso gāthā abhāsi –

56. “Yo ve yācanajīvāno, kāle yācaṃ na yācati;  
Parañca puññā dhamseti, attanāpi na jīvati.
57. “Yo ca yācanajīvāno, kāle yācañhi yācati;  
Parañca puññaṃ labbheti, attanāpi ca jīvati.
58. “Na vedessanti sappaññā, disvā yācakamāgate;  
Brahmacāri piyo mesī, vada tvaṃ bhaññamicchasi”ti.

Tattha **yācanajīvānoti** yācanajīvamāno, ayameva vā pāṭho. Idaṃ vuttaṃ hoti – ayya, aṭṭhisena yo yācanena jīvamāno dhammiko samaṇo vā brāhmaṇo vā yācitabbayuttapattakāle kiñciveva yācitabbaṃ na yācati, so parañca dāyakaṃ puññā dhamseti parihāpeti, attanāpi ca sukhaṃ na jīvati. **Puññaṃ labbhetī**ti kāle pana yācitabbaṃ yācanto parañca puññaṃ adhigameti, attanāpi ca sukhaṃ jīvati. **Na vedessantī**ti yaṃ tvaṃ vadesi “mā me videssanā ahū”ti, taṃ kasmā vadasi. Sappaññā hi dānañca dānaphalañca jānantā paṇḍitā yācake āgate disvā na dessanti na kujjhanti, aññadatthu pana pamuditāva hontīti dīpeti. **Yācakamāgateti** ma-kāro byañjanasandhivasena vutto, yācake āgateti attho. **Brahmacāri piyo mesī**ti ayya aṭṭhisena, parisuddhacāri mahāpuñña, tvaṃ mayhaṃ ativiya piyo, tasmā vamaṃ tvaṃ maṃ vadehi yācāhiyeva. **Bhaññamicchasi**ti yaṃkiñci vattabbaṃ icchasi, sabbaṃ vada, rajjampi te dassāmiyevāti.

Evaṃ bodhisatto raññā rajjenāpi pavārito neva kiñci yāci. Rañño pana evaṃ attano ajjhāsaye kathite mahāsattopi pabbajitapaṭipattiṃ dassetuṃ “mahārāja, yācanā hi nāmesā kāmabhogīnaṃ gihīnaṃ āciññā, na pabbajitānaṃ, pabbajitena pana pabbajitakālato paṭṭhāya gihīhi asamānāparisuddhājīvena bhavitabba”nti pabbajitapaṭipadaṃ dassento chaṭṭhaṃ gāthamāha –

59. “Na ve yācanti sappaññā, dhīro ca veditumarahati;  
Uddissa ariyā tiṭṭhanti, esā ariyāna yācanā”’ti.

Tattha **sappaññā**ti buddhā ca buddasāvaka ca bodhiyā paṭipannā isipabbajjam pabbajitā bodhisattā ca sabbepi sappaññā ca susilā ca, ete evarūpā sappaññā “amhākaṃ idañcidañca dethā”’ti na yācanti. **Dhīro ca veditumarahati**ti upaṭṭhāko pana dhīro paṇḍito gilānakāle ca agilānakāle ca yena yenattho, taṃ sabbam sayameva veditum jānitum arahati. **Uddissa ariyā tiṭṭhanti**ti ariyā pana vācam abhinditvā yenatthikā honti, taṃ uddissa kevalam bhikkhācāravattena tiṭṭhanti, neva kāyaṅgaṃ vā vācaṅgaṃ vā kopenti. Kāyavikāraṃ dassetvā nimittam karonto hi kāyaṅgaṃ kopeti nāma, vacībhedam karonto vācaṅgaṃ kopeti nāma, tadubhayaṃ akatvā buddhādayo ariyā tiṭṭhanti. **Esā ariyāna yācanā**ti esā kāyaṅgavācaṅgaṃ akopetvā bhikkhāya tiṭṭhamānā ariyānam yācanā nāma.

Rājā bodhisattassa vacanam sutvā “bhante, yadi sappañño upaṭṭhāko attanāva ñatvā kulūpakassa dātābham deti, ahampi tumhākaṃ idañcidañca dammi”’ti vadanto sattamam gāthamāha –

60. “Dadāmi te brāhmaṇa rohiṇīnam, gavam sahasam saha puṅgavena;  
Ariyo hi ariyassa katham na dajjā, sutvāna gāthā tava dhammayuttā”’ti.

Tattha **rohiṇī**anti rattavaṇṇanam. **Gavam sahasanti** khīradadhiādimaḍḍurarasaparibhogatthāya evarūpānam gunnam sahasam tuyham dammi, taṃ me paṭiggaṇha. **Ariyoti** ācāraariyo. **Ariyassāti** ācāraariyassa. **Katham na dajjāti** kena kāraṇena na dadeyya.

Evam vutte bodhisatto “ahaṃ mahārāja, akiñcano pabbajito, na me gāvīhi attho”’ti paṭikkhipi. Rājā tassovāde ṭhatvā dānādīni puññāni katvā saggaparāyaṇo ahoṣi. Sopi aparihīnājjhāno brahmaloke uppajji.

Satthā imaṃ dhammadesanam āharitvā saccāni pakāsetvā jātakam samodhānesi, saccapariyosāne bahū sotāpattiphalādīsu paṭiṭṭhitā. Tadā rājā ānando ahoṣi, aṭṭhiseno pana ahameva ahoṣinti.

Aṭṭhisenajātakavaṇṇanā aṭṭhamā.

[404] 9. Kapijātakavaṇṇanā

**Yattha verī nivasatī**ti idaṃ satthā jetavane viharanto devadattassa pathavipavesanam ārabha katesi. Tasmīhi pathaviṃ pavitṭhe dhammasabhāyaṃ katham samuṭṭhāpesum “āvuso, devadatto saha parisāya naṭṭho”’ti. Satthā āgantvā “kāya nuttha, bhikkhave, etarahi kathāya sannisinnā”’ti pucchitvā “imāya nāmā”’ti vutte “na, bhikkhave, idāneva devadatto saha parisāya naṭṭho, pubbepi nassiyevā”’ti vatvā atītam āhari.

Atīte bārānasiyam brahmadatte rajjam kārente bodhisatto kapiyoniyam nibbattitvā pañcasatakapiparivāro rājuyyāne vasi. Devadattopi kapiyoniyam nibbattitvā pañcasatakapiparivāro tattheva vasi. Athekadivasam purohite uyyānam gantvā nhatvā alaṅkaritvā nikkhamante eko lolakapi puretaram gantvā rājuyyānadvāre toraṇamatthake nisīditvā tassa matthake vaccapiṇḍam pātetvā puna uddham oloketassa mukhe pātesi. So nivattitvā “hotu, jānissāmi tumhākaṃ kattabba”’nti makkaṭe santajjetvā puna nhatvā pakkāmi. Tena veram gahetvā makkaṭānam santajjitabhāvam bodhisattassa ārocesum. So “verīnam nivasanaṭṭhāne nāma vasitum na vaṭṭati, sabbopi kapigaṇo palāyitvā aññattha gacchatū”’ti kapisahassasapi ārocāpesi. Dubbacakapi attano parivāramakkaṭe gahetvā “pacchā jānissāmi”’ti tattheva nisīdi. Bodhisatto attano parivāram gahetvā araṇṇam pāvīsi. Athekadivasam ekissā vīhikoṭṭikāya dāsīyā ātape pasāritavīhiṃ khādanto eko eḷako ummukkena pahāram labhitvā ādittasarīro palāyanto ekissā hatthisālam nissāya tiṇakuṭiyā kuṭṭe sarīram ghaṃsi. So aggi tiṇakuṭikam gaṇhi, tato uṭṭhāya hatthisālam gaṇhi, hatthisālaya hatthīnam piṭṭhi jhāyi, hatthivejjā hatthīnam paṭijagganti.

Purohitopi makkaṭānam gahaṇūpāyam upadhārento vicarati. Atha nam rājupaṭṭhānam āgantvā

nisinnaṃ rājā āha “ācariya, bahū no hatthī vaṇitā jātā, hatthivejjā paṭijaggituṃ na jānanti, jānāsi nu kho kiñci bhesajja”nti? “Jānāmi, mahārājā”ti. “Kiṃ nāmā”ti? “Makkaṭavasā, mahārājā”ti. “Kahaṃ labhissāmā”ti? “Nanu uyyāne bahū makkaṭā”ti? Rājā “uyyāne makkaṭe māretvā vasaṃ ānethā”ti āha. Dhanuggahā gantvā pañcasatepi makkaṭe vijjhivā māresuṃ. Eko pana jeṭṭhakamakkaṭo palāyanto sarapahāraṃ labhivāpi tattheva apatitvā bodhisattassa vasanaṭṭhānaṃ patvā pati. Vānarā “amhākaṃ vasanaṭṭhānaṃ patvā mato”ti tassa pahāraṃ laddhā matabhāvaṃ bodhisattassa ārocesuṃ. So gantvā kapigaṇamajjhe nisinna “paṇḍitānaṃ ovādaṃ akatvā veriṭṭhāne vasantā nāma evaṃ vinassanti”ti kapigaṇassa ovādavāsena imā gāthā abhāsi –

61. “Yattha verī nivasati, na vase tattha paṇḍito;  
Ekarattaṃ dvirattaṃ vā, dukkhaṃ vasati verisu.
62. “Diso ve lahucittassa, posassānuvidhīyato;  
Ekassa kapino hetu, yūthassa anayo kato.
63. “Bālova paṇḍitamānī, yūthassa parihārako;  
Sacittassa vasaṃ gantvā, sayethāyaṃ yathā kapi.
64. “Na sādhu balavā bālo, yūthassa parihārako;  
Ahito bhavati ñātīnaṃ, sakuṇānaṃva cetako.
65. “Dhīrova balavā sādhu, yūthassa parihārako;  
Hito bhavati ñātīnaṃ, tidasānaṃva vāsavo.
66. “Yo ca sīlañca paññañca, sutañcattani passati;  
Ubhinnaṃmatthaṃ carati, attano ca parassa ca.
67. “Tasmā tuleyya mattānaṃ, sīlapaññāsutāmiva;  
Gaṇaṃ vā parihare dhīro, eko vāpi paribbaje”ti.

Tattha **lahucittassā**ti lahucitto assa. Idaṃ vuttaṃ hoti – yo poso lahucittassa mittassa vā ñātino vā anuvidhīyati anuvattati, tassa posassa anuvidhīyato so lahucitto diso hoti, verikiccaṃ karoti. **Ekassa kapinoti** passatha ekassa lahucittassa andhabālassa kapino hetu ayaṃ sakalassa yūthassa anayo avuḍḍhi mahāvināso katoti. **Paṇḍitamānī**ti yo sayāṃ bālo hutvā “ahaṃ paṇḍito”ti attānaṃ maññaṃ māno paṇḍitānaṃ ovādaṃ akatvā sakassa cittassa vasaṃ gacchati, so sacittassa vasaṃ gantvā yathāyaṃ dubbacakapi matasayanaṃ sayito, evaṃ sayethāti attho.

**Na sādhu**ti bālo nāma balasampanno yūthassa parihārako na sādhu na laddhako. Kiṃkāraṇā? So hi **ahito bhavati ñātīnaṃ**, vināsameva vahati. **Sakuṇānaṃva cetakoti** yathā hi tittirasakuṇānaṃ dīpakatittiro divasampi vassanto aññe sakuṇe na māreti, ñātikeva māreti, tesaññeva ahito hoti, evanti attho. **Hito bhavati**ti kāyenaṃpi vācāyaṃpi manasāpi hitakārayeva. **Ubhinnaṃmatthaṃ carati**ti yo idha puggalo ete sīlādayo guṇe attani passati, so “mayhaṃ ācārasīlampi atthi, paññaṃpi sutapariyattipi atthi”ti tathato jānitvā gaṇaṃ pariharanto attano ca paresaṇca attānaṃ parivāretvā carantānanti ubhinnaṃmatthaṃ carati.

**Tuleyya mattānanti** tuleyya attānaṃ. **Tuleyyāti** tuletva. **Sīlapaññāsutāmivāti** etāni sīlādīni viya. Idaṃ vuttaṃ hoti – yasmā sīlādīni attani samanupassanto ubhinnaṃmatthaṃ carati, tasmā paṇḍito etāni sīlādīni viya attānaṃpi tesu tuletva “paṭiṭṭhito nu khomhi sīle paññaṃ sute”ti tīretvā paṭiṭṭhitabhāvaṃ paccakkaṃ katvā dhīro gaṇaṃ vā parihareyya, catūsu iriyāpathesu eko vā hutvā paribbajeyya vatteyya, parisupaṭṭhākenapi vivekacārināpi imehi tīhi dhammehi samannāgateneva bhavitābanti. Evaṃ mahāsatto kapirājā hutvāpi vinayapariyattikiccaṃ kathesi.

Satthā imaṃ dhammadesanaṃ āharitvā jātaṃ samodhānesi – “tadā dubbacakapi devadatto ahosi, parisāpissa devadattaparīsā, paṇḍitakapirājā pana ahameva ahosi”nti.

Kapijātakavaṇṇanā navamā.

[405] 10. Bakajātakavaṇṇanā

**Dvāsattatī**ti idaṃ satthā jetavane viharanto bakabrahmānaṃ ārabba kathesi. Tassa hi “idaṃ niccaṃ dhuvam sassaṃ acavanadhammaṃ, ito aññaṃ lokanissaraṇaṃ nibbānaṃ nāma natthī”ti evaṃ diṭṭhi uppajji. Heṭṭhūpapattiko kiresa brahmā pubbe jhānaṃ bhāvetvā vehapphalesu nibbatta, tattha pañcakappasataparimāṇaṃ āyuaṃ khepetvā subhakiṇhesu nibbattitvā catusaṭṭhikappaṃ khepetvā tato cuto aṭṭhakappāyukesu ābhassaresu nibbatti, tatrassa esā diṭṭhi uppajji. So hi neva uparibrahmalokato cutiṃ, na tattha upapattiṃ anussari, tadubhayampi apassanto evaṃ diṭṭhiṃ gaṇhi. Bhagavā tassa cetasaṃ cetoparivitakkamaññāya seyyathāpi nāma balavā puriso samiñjitaṃ vā bāhaṃ pasāreyya, pasāritaṃ vā bāhaṃ samiñjeyya, evameva jetavane antarahito tasmim brahmaloke pāturaḥosi. Atha brahmā bhagavantaṃ disvā “ehi kho, mārisa, svāgataṃ mārisa, cirassaṃ kho, mārisa, imaṃ pariyaṃmakāsi, yadidaṃ idhāgamanāya. Idañhi mārisa, niccaṃ idaṃ dhuvam idaṃ sassaṃ idaṃ kevalaṃ idaṃ acavanadhammaṃ, idañhi na ca jāyati na jīyati na mīyati na cavati na upapajjati, ito ca panaññaṃ uttari nissaraṇaṃ natthī”ti āha.

Evaṃ vutte bhagavā bakaṃ brahmānaṃ etadavoca “avijjāgato vata bho bako brahmā, avijjāgato vata bho bako brahmā, yatra hi nāma aniccaññaṃ samānaṃ niccanti vakkhati...pe... santañca panaññaṃ uttari nissaraṇaṃ, natthaññaṃ uttari nissaraṇanti vakkhati”ti (saṃ. ni. 1.175). Taṃ sutvā brahmā “tvam evaṃ kathesi, tvam evaṃ kathesi, iti maṃ esa anuyuñjanto anubandhati”ti cintetvā yathā nāma dubbalo coro katipaye pahāre labhitvā “kiṃ ahameva coro, asukopi coro asukopi coro”ti sabbepi sahāyake ācikkhati, tatheva bhagavato anuyogabhayena bhīto aññepi attano sahāyake ācikkhanto paṭhamam gāthamāha –

68. “Dvāsattati gotama puññakammā, vasavattino jātijaraṃ atītā;  
Ayamantimā vedagū brahmapatti, asmābhijappanti janā anekā”ti. (saṃ. ni. 1.175);

Tattha **dvāsattatī**ti na kevalaṃ bho gotama, ahameva, atha kho imasmim brahmaloke mayaṃ dvāsattati janā puññakammā aññesaṃ upari atthano vasaṃ vattanena **vasavattino** jātiñca jarañca atītā, ayaṃ no vedeḥi gatattā **vedagū**, ayaṃ bho gotama **antimā brahmapatti**, pacchimakoṭippatti seṭṭhabhāvappatti. **Asmābhijappanti janā anekā**ti amhe aññe bahū janā pañjalikā hutvā – “ayaṃ kho bhavaṃ brahmā mahābrahmā”tiādīni vadantā namassanti patthenti pihayanti, “aho vata mayampi evarūpā bhavyeṃyāmā”ti icchantīti attho.

Tassa vacanaṃ sutvā satthā dutiyaṃ gāthamāha –

69. “Appaṃ hi etaṃ na hi dīghamāyu, yaṃ tvam baka maññasi dīghamāyuaṃ;  
Sataṃ saḥassāni nirabbudānaṃ, āyuaṃ pajānāmi tavāha brahme”ti. (saṃ. ni. 1.175);

Tattha **sataṃ saḥassāni nirabbudānanti** nirabbudasaṅkhātānaṃ gaṇaṇānaṃ sataḥassāni. Vassānañhi dasadasakaṃ sataṃ, dasa satānaṃ saḥassaṃ, sataṃ saḥassānaṃ sataḥassam, sataṃ sataḥassānaṃ koṭi nāma, sataṃ koṭisatasahassānaṃ pakoṭi nāma, sataṃ pakoṭisatasahassānaṃ koṭipakoṭi nāma, sataṃ koṭipakoṭisatasahassānaṃ ekaṃ nahutaṃ nāma, sataṃ nahutasatasahassānaṃ ekaṃ ninnahutaṃ nāma. Cheko gaṇako ettakaṃ gaṇetuṃ sakkoti, tato paraṃ gaṇanā nāma buddhānameva visayo. Tattha sataṃ ninnahutasatasahassānaṃ ekaṃ abbudaṃ, vīsati abbudāni ekaṃ nirabbudaṃ, tesam nirabbudasatasahassānaṃ ekaṃ ahaṃ nāma, ettakaṃ bakassa brahmuno tasmim bhava avasiṭṭhaṃ āyu, taṃ sandhāya bhagavā evamāha.

Taṃ sutvā bako tatiyaṃ gāthamāha –

70. “Anantadassī bhagavāhamasmi, jātijjaraṃ sokamupātivatto;  
Kiṃ me purāṇaṃ vatasīlavattaṃ, ācikkha me taṃ yamaṃ vijañña”nti. (saṃ. ni. 1.175);

Tattha **bhagavā**ti bhagavā tumhe “āyuaṃ pajānāmi tavāha”nti vadantā “ahaṃ anantadassī jātijjaraṇca sokaṇca upātivattosmī”ti vadatha. **Vatasīlavattanti** vatasamādānaṇca sīlavattaṇca. Idaṃ vuttaṃ hoti – yadi tumhe sabbaññubuddhā, evaṃ sante kiṃ mayhaṃ purāṇaṃ vataṇca sīlavattaṇca, ācikkha me taṃ, yamaṃ tayā ācikkhitaṃ yāthāvasarasato vijāneyyanti.

Athassa bhagavā atītāni vatthūni āharitvā ācikkhanto catasso gāthā abhāsi –

71. “Yaṃ tvaṃ apāyesi bahū manusse, pipāsita ghammani samparete;  
Taṃ te purāṇaṃ vatasīlavattaṃ, suttappabuddhova anussarāmi.
72. “Yaṃ eṇikūlasmi janaṃ gahītaṃ, amocayī gayhaka nīyamānaṃ;  
Taṃ te purāṇaṃ vatasīlavattaṃ, suttappabuddhova anussarāmi.
73. “Gaṅgāya sotasmiṃ gahītanāvaṃ, luddena nāgena manussakappā;  
Amocayī tvaṃ balasā pasayha, taṃ te purāṇaṃ vatasīlavattaṃ;  
Suttappabuddhova anussarāmi.
74. “Kappo ca te baddhacaro ahoṣiṃ, sambuddhimantaṃ vatinaṃ amaññaṃ;  
Taṃ te purāṇaṃ vatasīlavattaṃ, suttappabuddhova anussarāmi”ti. (saṃ. ni. 1.175);

Tattha **apāyesi**ti pāyesi. **Ghammani samparete**ti ghammena samparete ativiya phutṭhe ghammakilante. **Suttappabuddhovā**ti paccūsakāle supanto supinaṃ passitvā taṃ supinakaṃ viya anussarāmi. So kira bakabrahmā ekasmiṃ kappe tāpaso hutvā marukantāre vasanto bahūnaṃ kantārapaṭipannaṃ pānīyaṃ āharitvā adāsi. Athekadivasaṃ eko sathhavāho pañcahi sakaṭasatehi marukantāraṃ paṭipajji. Manussā disā vavattapetuṃ asakkontā satta divasāni āhiṇḍitvā khīṇadārudakā nirāhārā uṇhābhībhitā “idāni no jīvitaṃ natthi”ti sakate parivattetvā goṇe mocetvā heṭṭhāsakaṭesu nipajjimsu. Tadā tāpaso āvajjento te disvā “mayi passante mā nassimsū”ti cintetvā attano iddhānubhāvena gaṅgāsotaṃ ubbattetvā sathhavāhābhimukhaṃ akāsi, avidūre ca ekaṃ vanasaṇḍaṃ māpesi. Manussā pānīyaṃ pivitvā nhatvā goṇe santappetvā vanasaṇḍato tiṇaṃ lāyitvā dārūni gahetvā disaṃ sallakkhetvā arogā kantāraṃ atikkamimsu, taṃ sandhāyetam vuttaṃ.

**Eṇikūlasminti** eṇiyā nāma nadiyā kūle. **Gayhaka nīyamānanti** karamaragāhaṃ gahetvā nīyamānaṃ. So kira tāpaso aparasmīṃ kāle ekaṃ paccantagāmaṃ nissāya nadītīre vanasaṇḍe vihāsi. Athekasmiṃ divase pabbatato corā otarivā taṃ gāmaṃ paharivā mahājanaṃ gahetvā pabbataṃ āropetvā antarāmagge cārakamanusse ṭhapetvā pabbatabilaṃ pavisitvā āhāraṃ pacāpentā nisīdimsu. Tāpaso gomahimsādīnañceva dārakadārikādīnañca mahantaṃ aṭṭassaraṃ sutvā “mayi passante mā nassimsū”ti iddhānubhāvena atabhāvaṃ jahitvā caturāṅginīyā senāya parivuto rājā hutvā yuddhabheriṃ ākoṭāpento taṃ ṭhānaṃ agamāsi. Cārakamanussā taṃ disvā corānaṃ ārocesuṃ. Corā “rañña saddhiṃ viggaho nāma na yutto”ti sabbaṃ gahitagahitaṃ bhaṇḍakaṃ chaḍḍetvā bhattaṃ abhuñjitvāva palāyimsu. Tāpaso te sabbe ānetvā sakagāmeveva patiṭṭhāpesi, taṃ sandhāyetam vuttaṃ.

**Gahītanāvanti** niggahitanāvaṃ. **Luddenāti** kakkhaḷena. **Manussakappāti** manusse vināsetukāmatāya. **Balasāti** balena. **Pasayhāti** abhibhavitvā. Aparasmīṃ kāle so tāpaso gaṅgātīre vihāsi. Tadā manussā dve tayo nāvāsaṅghāte bandhitvā saṅghātamattake pupphamaṇḍapaṃ kāretvā saṅghāte nisīditvā khādantā pivantā sambandhakulaṃ gacchanti. Te pītāvasesaṃ suraṃ bhuttakhādītāvasesāni bhattamacchamaṃsatambulādīni gaṅgāyameva pātentī. Gaṅgeyyo nāgarājā “ime ucchiṭṭhakaṃ mama

upari khipantī’ ti kujjhitvā ‘‘sabbe te jane gahetvā gaṅgāya osīdāpessāmī’’ ti mahantaṃ ekadoṅikanāvappamaṇaṃ attabhāvaṃ māpetvā udakaṃ bhinditvā phaṇaṃ dhārayamāno tesam abhimukho pāyāsi. Te nāgarājānaṃ disvā maraṇabhayaatajjitā ekappahāreṇeva mahāsaddaṃ karimṃsu. Tāpaso tesam paridevitasaddaṃ sutvā nāgarājassa ca kuddhabhāvaṃ ñatvā ‘‘mayi passante mā nassimṃsū’’ ti khippanisantīyā attano ānubhāvena khippaṃ supaṇṇavaṇṇaṃ attānaṃ māpetvā agamāsi. Nāgarājā taṃ disvā maraṇabhayaatajjito udake nimujji. Manussā sotthibhāvaṃ patvā agamaṃsu, taṃ sandhāyetaṃ vuttaṃ.

**Baddhacaroti** antevāsiko. **Sambuddhimantaṃ vatinaṃ amaññanti** buddhisampanno ceva vatasampanno ca tāpasoti taṃ maññamāno. Iminā kiṃ dasseti? Mahābrahme ahaṃ atīte tava kesavatāpasakāle kappo nāma antevāsiko veyyāvaccakaro hutvā tuyhaṃ nāradena nāma amaccena bārāṇasito himavantaṃ ānītassa rogaṃ vūpasamesiṃ. Atha naṃ nārado dutiyavāre āgantvā nirogaṃ disvā imaṃ gāthaṃ abhāsi –

‘‘Manussindaṃ jahitvāna, sabbakāmasamiddhinaṃ;  
Kathaṃ nu bhagavā kesi, kappassa ramati assame’’ ti. (jā. 1.4.181);

Tameṇaṃ tvaṃ etadavoca –

‘‘Sādūni ramaṇīyāni, santi vakkhā manoramā;  
Subhāsītāni kappassa, nārada ramayanti ma’’ nti. (jā. 1.4.182);

Itissa bhagavā imaṃ attanā antevāsikena hutvā rogassa vūpasamitabhāvaṃ dīpento evamāha. Tañca pana brahmunā manussaloke katakammaṃ sabbam mahābrahmānaṃ sallakkhāpentova kathesi.

So satthu vacanena attanā katakammaṃ saritvā tathāgatassa thutiṃ karonto osānagāthamāha –

75. ‘‘Addhā pajānāsi mametamāyumaṃ, aññampi jānāsi tathā hi buddho;  
Tathā hi tāyaṃ jalitānubhāvo, obhāsayaṃ tiṭṭhati brahmaloka’’ nti.

Tattha **tathā hi buddhoti** tathā hi tvaṃ buddho. Buddhānañhi aññātaṃ nāma natthi, sabbadhammānaṃ buddhattāyeva hi te buddhā nāmāti dasseti. **Tathā hi tāyanti** buddhattāyeva ca pana tava ayaṃ jalito sarīrappabhānubhāvo. **Obhāsayaṃ tiṭṭhati** imaṃ sakalampi brahmalokaṃ obhāsento tiṭṭhati.

Evaṃ satthā attano buddhaguṇaṃ jānāpento dhammaṃ desetvā saccāni pakāsesi, saccapariyosāne sampattānaṃ dasamattānaṃ brahmasahassānaṃ anupādāya āsavehi cittāni vimuccimṃsu. Iti bhagavā bahūnaṃ brahmānaṃ avassayo hutvā brahmalokā jetavanaṃ āgantvā tattha kathitaniyāmeṇeva taṃ dhammadesanaṃ bhikkhūnaṃ kathetvā jātaṃ samodhānesi – ‘‘tadā kesavatāpaso bakabrahmā ahoṣi, kappamaṇavo pana ahameva ahoṣi’’ nti.

Bakajātakavaṇṇanā dasamā.

Kukkuvaggo paṭhamo.

## 2. Gandhāravaggo

[406] 1. Gandhārajātakavaṇṇanā

**Hitvā gāmasahassānī**ti idaṃ satthā jetavane viharanto bhesajjasannidhikārasikkhāpadaṃ ārabba kathesi. Vatthu pana rājagahe samuṭṭhitaṃ. Āyasmatā hi pilindavacchena āramikakulaṃ mocetuṃ rājanivesanaṃ gantvā rañño pāsāde iddhibalena sovaṇṇamaye kate manussā pasīditvā therassa pañca



tiṇavaṭṭikaantare ṭhapesi. Athekadivasam aloṇake āhāre laddhe videho gandhārassa bhikkhābhājanam datvā tiṇavaṭṭikaantarato loṇam āharitvā “ācariya, loṇam gaṇhathā”ti āha. “Ajjā manussehi loṇam na dinnam, tvam kuto labhasī”ti? “Ācariya, purimadivase manussā bahum loṇamadamsu, athāham ‘aloṇakadivase bhavissatī’ti atirekam loṇam ṭhapesi”nti. Atha nam bodhisatto “moghapurisa, tiyojanasatikam videharatṭham pahāya pabbajitvā akiñcanabhāvam patvā idāni loṇasakkharāya taṇham janesī”ti tajjetvā ovadanto paṭhamam gāthamāha –

76. “Hitvā gāmasahassāni, paripuṇṇāni soḷasa;  
Koṭṭhāgārāni phītāni, sannidhiṃ dāni kubbasī”ti.

Tattha **koṭṭhāgārānī**ti suvaṇṇarajatamaṇimuttādiratanakoṭṭhāgārāni ceva dussakoṭṭhāgārāni ca dhañṇakoṭṭhāgārāni ca. **Phītānī**ti pūrāni. **Sannidhiṃ dāni kubbasī**ti idāni “sve bhavissati, tatiyadivase bhavissatī”ti loṇamattam sannidhiṃ karosīti.

Videho evam garahiyamāno garaham asahanto paṭipakkho hutvā “ācariya, tumhe attano dosam adisvā mayhameva dosam passatha, nanu tumhe ‘kiṃ me parena ovaditena, attānameva ovadissāmi”ti rajjam chaḍḍetvā pabbajitā, tumhe idāni maṃ kasmā ovadathā”ti codento dutiyam gāthamāha –

77. “Hitvā gandhāraṇisayam, pahūtadhanadhāriyam;  
Pasāsanato nikkhanto, idha dāni pasāsasī”ti.

Tattha **pasāsanatoti** ovādānusāsanīdānato. **Idha dānī**ti idāni idha arañṇe kasmā maṃ ovadathāti.

Tam sutvā bodhisatto tatiyam gāthamāha –

78. “Dhammam bhaṇāmi vedeha, adhammo me na rucati;  
Dhammam me bhaṇamānassa, na pāpamupalimpatī”ti.

Tattha **dhammanti** sabhāvam, buddhādīhi vaṇṇitam pasattham kāraṇameva. **Adhammo me na rucati**ti adhammo nāma asabhāvo mayham kadācipi na rucati. **Na pāpamupalimpatī**ti mama sabhāvameva kāraṇameva bhaṇantassa pāpam nāma hadaye na limpati na allīyati. Ovādādānam nāmetam buddhapaccekaḥbuddhasāvakaḥbodhisattānam pavenī. Tehi dinnovādam bālā na gaṇhanti, ovādādāyakassa pana pāpam nāma natthi.

“Nidhīnamva pavattāram, yaṃ passe vajjadassinam;  
Niggayhavādiṃ medhāviṃ, tādissam paṇḍitam bhaje;  
Tādissam bhajamānassa, seyyo hoti na pāpiyo.

“Ovadeyyānusāseyya, asabbhā ca nivāraye;  
Satañhi so piyo hoti, asatam hoti appiyo”ti. (dha. pa. 76-77);

Videhatāpaso bodhisattassa katham sutvā “ācariya, atthanissitam kathentenapi param ghaṭṭetvā rosetvā kathetum na vaṭṭati, tvam maṃ kuṇṭhasatthakena muṇḍento viya atipharusam kathesi”ti vatvā catuttham gāthamāha –

79. “Yena kenaci vaṇṇena, paro labhati ruppanam;  
Mahatthiyampi ce vācam, na tam bhāseyya paṇḍito”ti.

Tattha **yena kenacī**ti dhammayuttenāpi kāraṇena. **Labhati ruppananti** ghaṭṭanam dussanam kuppanam labhatiyeva. **Na tam bhāseyyāti** tasmā tam parapuggalam yāya so vācāya dussati, tam mahatthiyam mahantam atthanissitampi vācam na bhāseyyāti attho.



Athassa bodhisatto pañcamam gāthamāha –

80. “Kāmaṃ ruppatu vā mā vā, bhusaṃva vikirīyatu;  
Dhammaṃ me bhaṇamānassa, na pāpamupalimpati”’ti.

Tattha **kāmanti** ekaṃsena. Idam vuttam hoti – ayuttakārako puggalo “ayuttam te kata”’nti ovadiyamāno ekaṃsena kujjhatu vā mā vā kujjhatu, atha vā bhusamuṭṭhi viya vikirīyatu, mayham pana dhammam bhaṇantassa pāpam nāma natthīti.

Evañca pana vatvā “na vo aham, ānanda, tathā parakkamissāmi, yathā kumbhakāro āmake āmakamatte. Niggayha niggayhāham ānanda, vakkhāmi, yo sāro so ṭhassati”’ti (ma. ni. 3.196) imassa sugatovādassa anurūpāya paṭipattiyā ṭhatvā “yathā kumbhakāro bhājanesu punappunam ākoṭetvā ākoṭetvā āmakam aggahetvā supakkameva bhājanam gaṇhāti, evam punappunam ovaditvā niggaṇhitvā pakkabhājanasadiso puggalo gahetabbo”’ti dassetuṃ puna tam ovadanto –

81. “No ce assa sakā buddhi, vinayo vā susikkhito;  
Vane andhamahiṃsova, careyya bahuko jano.
82. “Yasmā ca panidhekacce, āceramhi susikkhitā;  
Tasmā vinītavinayā, caranti susamāhitā”’ti. – idam gāthādvayamāha;

Tassattho – samma vedeha, imesañhi sattānaṃ sace attano buddhi vā paṇḍite ovādadāyake nissāya ācārapaṇṇattivinayo vā susikkhito na bhaveyya, evam sante yathā tiṇalatādīgahane vane andhamahiṃso gocarāgocaram sāsaṅkanirāsankañca ṭhānam ajānanto carati, tathā tumhādiso bahuko jano careyya. Yasmā pana idha ekacce sakāya buddhiyā rahitā sattā ācariyasantike ācārapaṇṇattisusikkhitā, tasmā ācariyehi attano attano anurūpena vinayena vinītatā vinītavinayā susamāhitā ekaggacittā hutvā carantīti.

Iminā idam dasseti – iminā hi sattena gihinā hutvā attano kulānurūpā, pabbajitena pabbajitānurūpā sikkhā sikkhitabbā. Gihinopi hi attano kulānurūpesu kasigorakkhādīsu sikkhitāva sampannājīvā hutvā susamāhitā caranti, pabbajitāpi pabbajitānurūpesu pāsādikesu abhikkantapaṭikkantādīsu adhisīlaadhicittaadhipaññāsikkhāsu sikkhitāva vigatavikkhepā susamāhitā caranti. Lokasmiñhi –

“Bāhusaccañca sippañca, vinayo ca susikkhito;  
Subhāsītā ca yā vācā, etaṃ maṅgalamuttama”’nti. (khu. pā. 5.5; su. ni. 264);

Tam sutvā vedehatāpaso “ācariya, ito paṭṭhāya maṃ ovadatha anusāsatha, aham anadhivāsanaajātikatāya tumhehi saddhiṃ kathesiṃ, tam me khamathā”’ti vanditvā mahāsattam khamāpesi. Te samaggavāsaṃ vasitvā puna himavantameva agamaṃsu. Tatra bodhisatto vedehatāpasassa kasiṇaparikkammaṃ kathesi. So tam katvā abhiññā ca samāpattiyo ca nibbatesi. Iti te ubhopi aparihīnajjhānā brahmalokaparāyaṇā ahesuṃ.

Satthā imam dhammadesanaṃ āharitvā jātakam samodhānesi – “tadā vedeho ānando ahosi, gandhārārājā pana ahameva ahosī”’nti.

Gandhārājātakavaṇṇanā paṭhamā.

[407] 2. Mahākapijātakavaṇṇanā

**Attānaṃ saṅkamaṃ katvā**ti idam satthā jetavane viharanto nītatthacariyaṃ ārabha kathesi. Vatthu **bhaddasālajātaka** (jā. 1.12.13 ādayo) āvi bhavissati. Tadā pana dhammasabhāyaṃ katham samuṭṭhāpesuṃ “āvuso, sammāsambuddho nītakānaṃ attham caratī”’ti. Satthā āgantvā “kāya nuttha, bhikkhave, etarahi kathāya sannisinnā”’ti pucchitvā “imāya nāmā”’ti vutte “na, bhikkhave, idāneva,

pubbepi tathāgato ñātīnaṃ atthaṃ cariyevā”ti vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto kapiyoniyaṃ nibbattivā vayappatto ārohapariṇāhasampanno thāmabalūpeto pañcahatthibalaparimāṇo asītisahassakapigaṇaparivuto himavantapadese vasati. Tattha gaṅgātīraṃ nissāya sākḥāviṭapasampanno sandacchāyo bahalapatto pabbatakūṭaṃ viya samuggato ambarukkho ahoṣi “nigrodharukkho”tipi vadanti. Tassa madhurāni phalāni dibbagandharasāni mahantāni mahantakumbhappamāṇāni. Tassa ekissā sākḥāya phalāni thale patanti, ekissā sākḥāya gaṅgājale, dvinnaṃ sākḥānaṃ phalāni majjhe rukkhamūle patanti. Bodhisatto kapiṇaṃ ādāya tattha phalāni khādanto “ekasmiṃ kāle imassa rukkhassa udae patitaṃ phalaṃ nissāya amhākaṃ bhayaṃ uppajjissati”ti udakamatthake sākḥāya ekaphalampi anavasesetvā pupphakāle kaḷāyamattakālato paṭṭhāya khādāpeti ceva pātāpeti ca. Evaṃ santēpi asītivānarahassehi aditṭhaṃ kipillikapuṭapaṭicchannaṃ ekaṃ pakkaphalaṃ nadiyaṃ pativā uddhañca adho ca jālaṃ bandhāpetvā udakakīlaṃ kīlantaṃ bārāṇasirañño uddhaṃjāle laggī. Rañño divasaṃ kīlitvā sāyaṃ gamanasamaye kevaṭṭā jālaṃ ukkhipantā taṃ disvā “asukaphalaṃ nāmā”ti ajānantā rañño dassesuṃ.

Rājā “kimphalaṃ nāmeta”nti pucchi. “Na jānāma, devā”ti. “Ke jānissanti”ti? “Vanacarakā, devā”ti. So vanacarake pakkosāpetvā tesam santikā “ambapakka”nti sutvā churikāya chinditvā paṭhamaṃ vanacarake khādāpetvā pacchā attanāpi khādi, itthāgarassāpi amaccānampi dāpesi. Rañño ambapakkaraso sakalasarīraṃ pharivā aṭṭhāsi. So rasataṇhāya bajjhivā tassa rukkhassa thitaṭṭhānaṃ vanacarake pucchitvā tehi “himavantapadese nadīre”ti vutte bahū nāvāsaṅghāte bandhāpetvā vanacarakehi desitamaggena uddhaṃsotaṃ agamāsi. “Ettakāni divasāni”ti paricchedo na kathito, anupubbena pana taṃ thānaṃ patvā “eso deva, rukkho”ti vanacarakā rañño ācikkhimsu. Rājā nāvaṃ thapetvā mahājanaparivuto padasā tattha gantvā rukkhamūle sayanaṃ paññapāpetvā ambapakkāni khādītva nānaggarasabhojanaṃ bhujjivā nipajji, sabbadisāsu ārakkhaṃ thapetvā aggim karimsu.

Mahāsatto manussesu niddaṃ okkantesu aḍḍharattasamaye parisāya saddhim agamāsi. Asītisahassavānarā sākḥāya sākhaṃ carantā ambāni khādanti. Rājā pabujjhivā kapigaṇaṃ disvā manusse utthāpetvā dhanuggahe pakkosāpetvā “yathā ete phalakhādakā vānarā na palāyanti, tathā te parikkhipitvā vijjhatha, sve ambāni ceva vānaramaṃsañca khādissāmī”ti āha. Dhanuggahā “sādhū”ti sampaṭicchitvā rukkhaṃ parivāretvā sare sannayhitvā aṭṭhaṃsu. Te disvā vānarā maraṇabhayaabhīta palāyituṃ asakkontā mahāsattaṃ upasaṅkamitvā “deva, ‘palāyanamakkate vijjhissāmā’ti rukkhaṃ parivāretvā dhanuggahā thitā, kim karomā”ti pucchitvā kampamānā aṭṭhaṃsu. Bodhisatto “mā bhāyittha, ahaṃ vo jīvitam dassāmī”ti vānaraṇaṃ samassāsetvā ujukaṃ uggatasākhaṃ āruya gaṅgābhimukhaṃ gatasākhaṃ gantvā tassā pariyantato pakkhanditvā dhanusatamattaṃ thānaṃ atikkamma gaṅgātīre ekasmiṃ gumbamatthake pativā tato oruya “mamāgataṭṭhānaṃ ettakaṃ bhavissati”ti ākāsaṃ paricchinditvā ekaṃ vettalataṃ mūle chinditvā sodhetvā “ettakaṃ thānaṃ rukkhe bajjhissati, ettakaṃ ākāsaṭṭhaṃ bhavissati”ti imāni dve thānāni vavatthapetvā attano kaṭiyaṃ bandhanaṭṭhānaṃ na sallakkhesi.

So taṃ lataṃ ādāya ekaṃ koṭim gaṅgātīre patiṭṭhitarukkhe bandhitvā ekaṃ attano kaṭiyaṃ bandhitvā vātacchinnavalāhako viya vegena dhanusatamattaṃ thānaṃ laṅghitvā kaṭiyaṃ bandhanaṭṭhānaṃ asallakkhitattā rukkhaṃ pāpuṇituṃ asakkonto ubhoḥi hatthehi ambasākhaṃ daḷhaṃ gaṇhitvā vānaraṇassa saññamadāsi “sīghaṃ mama piṭṭhim maddamānā vettalatāya sotthigamaṇaṃ gacchathā”ti. Asītisahassavānarā mahāsattaṃ vanditvā khamāpetvā tathā agamaṃsu. Tadā devadattopi makkaṭo hutvā tesam abbhantare hoti. So “ayaṃ me paccāmittassa piṭṭhim passituṃ kālo”ti uccaṃ sākhaṃ āruya vegam janetvā tassa piṭṭhiyaṃ pati. Mahāsattassa hadayaṃ bhijji, balavavedanā uppajji. Sopi taṃ vedanāpattaṃ katvā pakkāmi. Mahāsatto ekakova ahoṣi. Rājā aniddāyanto vānarehi ca mahāsattena ca katakiriyaṃ sabbaṃ disvā “ayaṃ tiracchāno hutvā attano jīvitam aṅaṇetvā parisāya sotthibhāvameva akāsi”ti cintento nipajji.

So pabhātāya rattiyā mahāsattassa tussitvā “na yuttaṃ imaṃ kapirājānaṃ nāsetuṃ, upāyena naṃ

otāretvā paṭijaggissāmī”ti antogaṅgāya nāvāsaṅghāṭaṃ ṭhapetvā tattha aṭṭakaṃ bandhāpetvā saṅkamaṃ mahāsattaṃ otārāpetvā piṭṭhiyaṃ kāsāvavattaṃ pattharāpetvā gaṅgodakena nhāpetvā phāṇitodakaṃ pāyevā parisuddhasarīraṃ sahasapākateleṇa abbhāñjāpetvā sayanapiṭṭhe eḷakacammaṃ santharāpetvā saṅkamaṃ tattha nipajjāpetvā attanā nīce āsane nisīditvā paṭhamamaṃ gāthamāha –

83. “Attānaṃ saṅkamaṃ katvā, yo sotthiṃ samatārayi;  
Kiṃ tvaṃ tesamaṃ kime tuyhaṃ, honti ete mahākapi”ti.

Tassattho – ambho mahākapi, yo tvaṃ attānaṃ saṅkamaṃ katvā tulaṃ āropetvā jīvitaṃ pariccajivā ime vānare sotthiṃ samatārayi, khemena santāresi; kiṃ tvaṃ tesamaṃ hosi, kime tuyhaṃ vā kiṃsu ete hontīti?

Taṃ sutvā bodhisatto rājānaṃ ovaḍanto sesagāthā abhāsi –

84. “Rājāhaṃ issaro tesamaṃ, yūthassa parihārako;  
Tesamaṃ sokaparetānaṃ, bhītānaṃ te arindama.
85. “Ullaṅghayitvā attānaṃ, vissatṭhadhanuno satamaṃ;  
Tato aparapādesu, daḷhaṃ bandhaṃ latāguṇamaṃ.
86. “Chinnabbhamiva vātena, nuṇṇo rukkhaṃ upāgamiṃ;  
Sohaṃ appabhavaṃ tattha, sākhaṃ hatthehi aggahiṃ.
87. “Taṃ maṃ viyāyataṃ santaṃ, sākāya ca latāya ca;  
Samanukkamantā pādehi, sotthiṃ sākāhāmi gata.
88. “Taṃ maṃ na tapate bandho, mato me na tapessati;  
Sukhamāharitaṃ tesamaṃ, yesamaṃ rajjamakārayiṃ.
89. “Esā te upamā rāja, taṃ suṇohi arindama;  
Raññā raṭṭhassa yogassa, balassa nigamassa ca;  
Sabbesaṃ sukhametṭhabbaṃ, khattiyena pajānatā”ti.

Tattha **tesanti** tesamaṃ asītisahassānaṃ vānarānaṃ. **Bhītānaṃ teti** tava vijjhanatthāya ānāpetvā ṭhitassa bhītānaṃ. **Arindamāti** rājānaṃ ālapati. Rājā hi corādīnaṃ arīnaṃ damanato “arindamo”ti vuccati. **Vissatṭhadhanuno satanti** anāropitadhanusatappamaṇaṃ ṭhānaṃ attānaṃ ākāse ullaṅghayitvā vissajjetvā tato imamahā rukkhaṃ laṅghayitvā gataṭṭhānato. **Aparapādesūti** pacchāpādesu. Iḍaṃ kaṭibhāgaṃ sandhāya vuttaṃ. Bodhisatto hi kaṭibhāge taṃ latāguṇamaṃ daḷhaṃ bandhitvā pacchimāpādehi bhūmiyaṃ akkamitvā vissajjetvā vātavegena ākāsaṃ pakkhandi. **Nuṇṇo rukkhaṃ upāgaminti** vātacchinnaṃ abbhamaiva attano vegajanitena vātena nuṇṇo. Yathā vātacchinnaṃ vātena, evamaṃ attano vegena nuṇṇo hutvā imaṃ ambarukkhaṃ upāgamiṃ. **Appabhavanti** so ahaṃ tattha ākāsapādesu rukkhaṃ pāpūṇitumaṃ appahonto tassa rukkhasa sākhaṃ hatthehi aggahesinti attho.

**Viyāyatanti** rukkhasākāya ca vettalatāya ca vīṇāya bhamaratanti viya vitataṃ ākaḍḍhitasarīraṃ. **Samanukkamantāti** mayā anuññatā maṃ vanditvā pādehi anukkamantā nirantameva akkamantā sotthiṃ gata. **Taṃ maṃ na tapate bandhoti** taṃ maṃ nāpi so valliyā bandho tapati, nāpi idāni maraṇaṃ tapessati. Kiṃkāraṇā? **Sukhamāharitaṃ tesanti** yasmā yesamaṃ ahaṃ rajjamakārayiṃ, tesamaṃ mayā sukhamāharitaṃ. Ete hi “mahārāja, ayaṃ no uppannaṃ dukkhaṃ haritvā sukhaṃ āharissati”ti maṃ rājānaṃ akaṃsu. Ahampi “tumhākaṃ uppannaṃ dukkhaṃ harissāmi”cēva etesaṃ rājā jāto. Taṃ ajja mayā etesaṃ maraṇadukkhaṃ haritvā jīvitasukhaṃ āhaṭaṃ, tena maṃ nāpi bandho tapati, na maraṇavadho tapessati.

**Esā te upamāti** esā te mahārāja, mayā katakiriyāya upamā. **Taṃ suṇohīti** tasmā imāya upamāya saṃsandetvā attano diyyamānaṃ ovādaṃ suṇāhi. **Raññā raṭṭhassāti** mahārāja, raññā nāma ucchuyante ucchuṃ viya raṭṭhaṃ apīletvā catubbidhaṃ agatigamaṇaṃ pahāya catūhi saṅgahavatthūhi saṅgaṇhantena dasasu rājadhamesu patiṭṭhāya mayā viya attano jīvitam pariccajivā “kintime raṭṭhavāsino vigatabhayā gimhakāle vivaṭadvāre ñātīhi ca parivārahehi ca parivāritā ure putte naccantā sītena vātena bījyamānā yathārucci attano attano santakaṃ paribhuñjantā kāyikacetāsikasukhasamaṅgino bhaveyyu’nti sakalaraṭṭhassa ca rathasakaṭādiyuttavāhanassa **yoggassa** ca pattisaṅkhātassa **balassa** ca nigamajanapadasaṅkhātassa **nigamassa** ca sabbesaṃ sukhameva esitabbaṃ gavesitabbanti attho. **Khattiyena pajānatāti** khetānaṃ adhipatibhāvena “khattiyō”ti laddhanāmena pana etena avasesasatte atikkamma pajānatā ñāṇasampanna bhavitabbanti.

Evam mahāsatto rājānaṃ ovaḍanto anusāsantova kālamakāsi. Rājā amacce pakkosāpetvā “imassa kapiṛājassa rājūnaṃ viya sarīrakiccaṃ karoṭhā”ti vatvā itthāgārampi āṇāpesi “tumhe rattavatthanivatthā vikiṇṇakesā daṇḍadīpikahatthā kapiṛājānaṃ parivāretvā ālāhanaṃ gacchathā”ti. Amaccā dārūnaṃ sakaṭasatamattena citakaṃ karitvā rājūnaṃ karaṇaniyāmeneva mahāsattassa sarīrakiccaṃ katvā sīsakapālaṃ gahetvā rañño santikaṃ agamaṃsu. Rājā mahāsattassa ālāhane cetiyaṃ kāretvā dīpe jālapetvā gandhamālādīhi pūjetvā sīsakapālaṃ suvaṇṇakhacitaṃ kāretvā kuntagge ṭhapetvā purato katvā gandhamālādīhi pūjento bārāṇasiṃ gantvā antoraṇadvāre ṭhapetvā sakalanagaraṃ sajjāpetvā sattāhaṃ dhātupūjaṃ kāresi. Atha naṃ dhātuṃ gahetvā cetiyaṃ kāretvā yāvajīvaṃ gandhamālādīhi pūjetvā bodhisattassa ovāde patiṭṭhāya dānādīni puññāni karonto dhammena rajjaṃ kāretvā saggaparāyaṇo ahoṣi.

Satthā imaṃ dhammadesanaṃ āharitvā saccāni pakāsetvā jātaṃ samodhānesi – “taḍā rājā ānando ahoṣi, duṭṭhakapi devadatto, parisā buddhaparisā, kapiṛājā pana ahameva ahoṣi”nti.

Mahākapijātakavaṇṇanā dutiyā.

[408] 3. Kumbhakārajātakavaṇṇanā

**Ambāhamaddaṃ vanamantarasminti** idaṃ satthā jetavane viharanto kilesaniggahaṃ ārabha kathesi. Vatthu **pānīyajātake** (jā. 1.11.59 ādayo) āvi bhavissati. Taḍā pana sāvattiyaṃ pañcasatā sahāyakā pabbajitvā antokoṭisanthāre vasamānā aḍḍharattasamaye kāmavitakkaṃ vitakkayīṃsu. Satthā attano sāvake rattiyā tayo vāre, divasassa tayo vāreti rattindivaṃ cha vāre olokeno kīkī aṇḍaṃ viya, camarī vāladhiṃ viya, mātā piyaputtaṃ viya, ekacakkhuko puriso cakkhuṃ viya rakkhati, tasmim tasmimyeva khaṇe uppannakilesaṃ niggaṇhāti. So taṃ divasaṃ aḍḍharattasamaye jetavanaṃ pariggaṇhanto tesam bhikkhūnaṃ vitakkasamudācāraṃ ñatvā “imesaṃ bhikkhūnaṃ abbhantare ayaṃ kilesō vaḍḍhanto arahattassa hetuṃ bhindissati, idāneva nesam kilesaṃ niggaṇhitvā arahattaṃ dassāmi”ti gandhakuṭito nikkhamitvā ānandattheraṃ pakkosāpetvā “ānanda, antokoṭisanthāre vasanakabhikkhū sabbe sannipātehi”ti sannipātāpetvā paññattavarabuddhāsane nisīditvā “na, bhikkhave, antopavattakilesānaṃ vase vattituṃ vaṭṭati, kilesō hi vaḍḍhamāno paccāmitto viya mahāvīnāsaṃ pāpeti, bhikkhūnā nāma appamattakampi kilesaṃ niggaṇhituṃ vaṭṭati, porāṇakapaṇḍitā appamattakaṃ ārammaṇaṃ disvā abbhantare pavattakilesaṃ niggaṇhitvā paccekabodhiñānaṃ nibbatesu’nti vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto bārāṇasinagarassa dvāragāme kumbhakārakule nibbattitvā vayappatto kuṭumbaṃ saṅṭhapetvā ekaṃ puttaṅca dhītarāṅca labhitvā kumbhakārakammaṃ nissāya puttadāraṃ posesi. Taḍā kalīngaraṭṭhe dantapurānagare karaṇḍako nāma rājā mahantena parivārena uyyānaṃ gacchanto uyyānavāre phalabhārabharitaṃ madhuraphalaṃ ambarukkhaṃ disvā hatthikkhandhavaragatoyeva hatthaṃ pasāretvā ekaṃ ambapiṇḍaṃ gahetvā uyyānaṃ pavisitvā maṅgalasilāya nisīno dātabbayuttakānaṃ datvā ambaṃ paribhuñji. “Raññā gahitakālato paṭṭhāya sesehi nāma gahetabbamevā”ti amaccāpi brāhmaṇagahapatikādayopi ambāni pātetvā khādīṃsu. Pacchā āgatā rukkhāṃ āruyha muggarehi pothetvā obhaggavibhaggasākhaṃ katvā

āmakaphalampi asesetvā khādiṃsu.

Rājā divasaṃ uyyāne kīlītvā sāyanhasamaye alaṅkatahatthikkhandhavare nisīditvā gacchanto taṃ rukkhaṃ disvā hatthito otarītvā rukkhamūlaṃ gantvā rukkhaṃ oloketvā “ayaṃ pātova passantānaṃ atittikaro phalabhārabharito sobhamāno aṭṭhāsi, idāni gahitaphalo obhaggavibhaggo asobhamāno ṭhito”ti cintevā puna aññato olokeno aparaṃ nipphalaṃ ambarukkhaṃ disvā “esa rukkho attano nipphalabhāvena muṇḍamaṇipabbato viya sobhamāno ṭhito, ayaṃ pana saphalabhāvena imaṃ byasaṇaṃ patto, idaṃ agāramajjhampi phalitarukkhasadisāṃ, pabbajjā nipphalarukkhasadisā, sadhanasseva bhayaṃ atthi, niddhanassa bhayaṃ natthi, mayāpi nipphalarukkheṇa viya bhavitabba”nti phalarukkhaṃ ārammaṇaṃ katvā rukkhamūle ṭhitakova tīṇi lakkhaṇāni sallakkhetvā vipassaṇaṃ vaḍḍhetvā paccekabodhiññaṃ nibbattetvā “viddhaṃsitā dāni me mātukucchikuṭikā, chinnā tīsu bhavesu paṭisandhi, sodhitā saṃsāraukkārahūmi, sosito mayā assusamuddo, bhinno aṭṭhipākāro, natthi me puna paṭisandhi”ti āvajjento sabbālaṅkārapaṭimaṇḍitova aṭṭhāsi.

Atha naṃ amaccā āhaṃsu “atibahaṃ ṭhitattha, mahārājā”ti. “Na mayaṃ mahārājāno, paccekabuddhā nāma maya”nti. “Paccekabuddhā nāma tumhādisā na honti, devā”ti. “Atha kīdisā hontī”ti? “Oropitakesamassukāsāvavattapaṭicchannā kule vā gaṇe vā alaggā vātacchinnavalāhakarāhumuttacandamaṇḍalapaṭibhāgā himavante nandamūlakapabbhāre vasanti, evarūpā deva, paccekabuddhā”ti. Tasmīṃ khaṇe rājā hatthaṃ ukkhipitvā sīsaṃ parāmasi, tāvadevassa gihiliṅgaṃ antaradhāyi, samaṇaliṅgaṃ pāturaḥosi.

“Ticīvaraṅca patto ca, vāsi sūci ca bandhanaṃ;  
Parissāvanena aṭṭhete, yuttayogassa bhikkhuno”ti. –

Evam vuttā samaṇaparikkhārā kāyapaṭibaddhāva ahesuṃ. So ākāse ṭhatvā mahājanassa ovādaṃ datvā anilapathena uttarahimavante nandamūlakapabbhārameva agamāsi.

Gandhāraṭṭhepi takkasīlanagare naggaji nāma rājā uparipāsāde pallaṅkamajjhagato ekaṃ itthiṃ ekekahatthe ekekaṃ maṇivalayaṃ piḷandhitvā avidūre nisīditvā gandhaṃ pisamānaṃ disvā “etāni valayāni ekekabhāvena na ghaṭṭenti na viravanti”ti olokeno nisīdi. Atha sā dakkhiṇahatthato valayaṃ vāmahattheyeva piḷandhitvā dakkhiṇahatthena gandhaṃ saṅkaḍḍhitvā pīsituṃ ārabhi, vāmahatthe valayaṃ dutiyaṃ āgamma ghaṭṭiyamānaṃ saddamakāsi. Rājā tāni dve valayāni aññamaññaṃ ghaṭṭentāni viravantāni disvā cintesi “idaṃ valayaṃ ekekakāle na ghaṭṭesi, dutiyaṃ āgamma ghaṭṭeti, saddaṃ karoti, evameva ime sattāpi ekekā na ghaṭṭenti na vivadanti, dve tayo hutvā aññamaññaṃ ghaṭṭenti, kalahāṃ karonti. Ahaṃ pana kasmīragandhāresu dvīsu rajjesu raṭṭhavāsino vicāremi, mayāpi ekavalayasadisena hutvā paraṃ avicāretvā attānameva vicārentena vasitūṃ vaṭṭati”ti saṅghaṭṭanavalayaṃ ārammaṇaṃ katvā yathānisinnova tīṇi lakkhaṇāni sallakkhetvā vipassaṇaṃ vaḍḍhetvā paccekabodhiññaṃ nibbattesi. Sesāṃ purimasadisameva.

Videharaṭṭhe mithīlanagare nīmi nāma rājā bhuttaṭpātarāso amaccagaṇaparivuto vivaṭasāhapaṇjareṇa antaravīthiṃ pekkhamāno aṭṭhāsi. Atheko seno sūnāpaṇato maṃsapesiṃ gahetvā ākāsaṃ pakkhandī. Tameṇaṃ ito cito ca gijjhādayo sakuṇā samparivāretvā āhārahetu tuṇḍena vijjhantā pakkhehi paharantā pādehi maddantā agamaṃsu. So attano vadhaṃ asahamāno taṃ maṃsaṃ chaḍḍesi. Añño gaṇhi, sakuṇā imaṃ muñcitvā taṃ anubandhiṃsu. Tenapi vissatṭhaṃ añño aggahesi, tampi tatheva viheṭhesuṃ. Rājā te sakuṇe disvā cintesi “yo yo maṃsapesiṃ gaṇhi, tassa tasseva dukkhaṃ, yo yo taṃ vissajjesi, tassa tasseva sukhaṃ, imepi pañca kāmaguṇe yo yo gaṇhāti, tassa tasseva dukkhaṃ, itarassa sukhaṃ, ime hi bahūnaṃ sādharmaṇā, mayhaṃ kho pana soḷasa itthisahassāni, mayā vissatṭhamāsaṇḍena viya senena pañca kāmaguṇe pahāya sukhiteṇa bhavitūṃ vaṭṭati”ti. So yoniso manasi karonto yathāṭhitova tīṇi lakkhaṇāni sallakkhetvā vipassaṇaṃ vaḍḍhetvā paccekabodhiññaṃ nibbattesi. Sesāṃ purimasadisameva.

Uttarapañcālaratthe kapilanagare dummukho nāma rājā bhuttapātarāso sabbālañkārapaṭimaṇḍito amaccagaṇaparivuto vivaṭasṭhapañjare rājanāṇaṃ olokeno aṭṭhāsi. Tasmim̐ khaṇe gopālakā vajadvāraṃ vivariṃsu, usabhā vajato nikkhamitvā kilesavasena ekaṃ gāviṃ anubandhiṃsu. Tattheke tikhiṇasiṅgo mahāusabho aññaṃ usabhaṃ āgacchantaṃ disvā kilesamaccherābhībhūto tikhiṇena siṅgena antarasatthimhi pahari. Tassa pahāramukhena antāni nikkhamiṃsu, so tattheva jīvitakkhayaṃ pāpuṇi. Rājā taṃ disvā cintesi “ime sattā tiracchānagate ādiṃ katvā kilesavasena dukkhaṃ pāpuṇanti, ayaṃ usabho kilesaṃ nissāya jīvitakkhayaṃ patto, aññepi sattā kileseheva kampanti, mayā imesaṃ sattānaṃ kampanakilese pahātuṃ vaṭṭati”ti. So ṭhitakova tīṇi lakkhaṇāni sallakkhetvā vipassanaṃ vaḍḍhetvā paccekabodhiññaṃ nibbattesi. Sesam̐ purimasadisameva.

Athekadivasam̐ cattāro paccekabuddhā bhikkhācāvelaṃ sallakkhetvā nandaṃ ulakapabbhārā nikkhamma anotattadahe nāgalatādantakaṭṭhaṃ khādītva katasarīrapaṭijagganā manosilātale ṭhatvā nivāsetvā pattacīvaramādāya iddhiyā ākāse uppatitvā pañcavaṇṇavalāhake maddamānā gantvā bārāṇasinagaradvāragāmakassa avidūre otaritvā ekasmim̐ phāsukaṭṭhāne cīvaraṃ pārupitvā pattam̐ gahetvā dvāragāmaṃ pavisitvā piṇḍāya carantā bodhisattassa gehadvāraṃ sampāpuṇiṃsu. Bodhisatto te disvā tuṭṭhacitto hutvā gehaṃ pavesetvā paññattāsane nisīdāpetvā dakkhiṇodakaṃ datvā paṇītena khādanīyena bhojanīyena parivisitvā ekamantaṃ nisīditvā saṅghattheraṃ vanditvā “bhante, tumhākaṃ pabbajjā ativiya sobhati, vipassannāni vo indriyāni, parisuddho chavivaṇṇo, kiṃ nu kho ārammaṇaṃ disvā tumhe imaṃ bhikkhācariyapabbajjaṃ upagatā”ti pucchi. Yathā ca saṅghattheraṃ, evaṃ sesepi upasañkamitvā pucchi. Athassa te cattāropi janā “ahaṃ asukanagare asukaraṭṭhe asukarājā nāma hutvā”tiādinaṃ nayena attano attano abhinikkhamanavattḥūni kathetvā paṭipāṭiyā ekekaṃ gāthamāhaṃsu

90. “Ambāhamaddaṃ vanamantarasmim̐, nilobhāsaṃ phalitaṃ saṃvirūlhaṃ;  
Tamaddasaṃ phalahu vibhaggaṃ, taṃ disvā bhikkhācariyaṃ carāmi.
91. “Selaṃ sumatṭhaṃ naravīraniṭṭhitaṃ, nārī yugaṃ dhārayi appasaddaṃ;  
Dutiyañca āgamma ahosi saddo, taṃ disvā bhikkhācariyaṃ carāmi.
92. “Dijā dijaṃ kuṇapamāharantaṃ, ekaṃ samānaṃ bahukā samecca;  
Āhārahetū paripāṭayiṃsu, taṃ disvā bhikkhācariyaṃ carāmi.
93. “Usabhāhamaddaṃ yūthassa majjhe, calakkakuṃ vaṇṇabalūpapannaṃ;  
Tamaddasaṃ kāmahetu vitunnaṃ, taṃ disvā bhikkhācariyaṃ carāmi”ti.

Tattha **ambāhamaddanti** ambarukkhaṃ ahaṃ addasaṃ. **Vanamantarasminti** vanaantare, ambavanamajjheti attho. **Samvirūlhanti** suvaḍḍhitaṃ. **Tamaddasanti** taṃ uyyānato nikkhanto phalahu vibhaggaṃ puna addasaṃ. **Taṃ disvāti** taṃ phalahu vibhaggaṃ disvā paṭiladdhasaṃvego paccekabodhiññaṃ nibbattetvā imaṃ bhikkhācariyapabbajjaṃ upagatosmi, tasmā bhikkhācariyaṃ carāmi. Idaṃ so phalahu vibhaggaṃ ambarukkhaṃ dassanato paṭṭhāya sabbam̐ cittaṃcāraṃ katesi. Sesānaṃ vissajjanesupi eseva nayo. Ayaṃ panettha anuttānapadavaṇṇanā – **selanti** mañivalayaṃ. **Naravīraniṭṭhanti** vīranarehi niṭṭhitaṃ, paṇḍitapurisehi katanti attho. **Yuganti** ekekaṃ ekekaṃ katvā ekaṃ valayayugaṃ. **Dijā dijanti** gahitamamsapiṇḍaṃ dijaṃ avasesadijā. **Kuṇapamāharantanti** mamsapiṇḍaṃ ādāya āharantaṃ. **Sameccāti** samāgantvā sannipatitvā. **Paripāṭayiṃsūti** koṭṭentā anubandhiṃsu. **Usabhāhamaddanti** usabhaṃ ahaṃ addasaṃ. **Calakkakunti** calakkakudhaṃ.

Bodhisatto ekekaṃ gātham̐ sutvā “sādhu, bhante, tumhākameva taṃ ārammaṇaṃ anurūpa”nti ekekassa paccekabuddhassa thutiṃ akāsi. Tañca pana catūhi janehi desitaṃ dhammakathaṃ sutvā gharāvāse anapekkho hutvā pakkantesu paccekabuddhesu bhuttapātarāso sukhanisīno bhariyaṃ āmantetvā “bhaddo, ete cattāro paccekabuddhā rajjaṃ pahāya pabbajitvā akiñcanā apalibodhā pabbajjāsukhena vītināmenti, ahaṃ pana bhatiyā jīvikaṃ kappemi, kiṃ me gharāvāsena, tvaṃ puttake

saṅgaṇṭhantī gehe vasā’’ti vatvā dve gāthā abhāsi –

94. “Karaṇḍako kalingānaṃ, gandhārānaṃ naggaji;  
Nimirājā videhānaṃ, pañcālānaṃ dummukho;  
Ete raṭṭhāni hitvāna, pabbajimsu akiñcanā.
95. “Sabbepime devasamā samāgatā, aggī yathā pajjalito tathevime;  
Ahampi eko carissāmi bhaggavi, hitvāna kāmāni yathodhikāni’’ti.

Tāsaṃ attho – bhadde, esa saṅghatthero paccekabuddho dantapure nāma nagare karaṇḍako nāma kalingānaṃ janapadassa rājā, dutiyo takkasilanagare naggaji nāma gandhārānaṃ janapadassa rājā, tatiyo mithilanagare nimi nāma videhānaṃ janapadassa rājā, catuttho kapilanagare dummukho nāma uttarapañcālānaṃ janapadassa rājā, ete evarūpāni raṭṭhāni hitvā akiñcanā hutvā pabbajimsu. **Sabbepimeti** ime pana sabbepi visuddhidevehi purimapaccekabuddhehi samānā ekato samāgatā. **Aggī yathāti** yathā hi aggī pajjalito obhāsati. **Tathevimeti** imepi tatheva silādīhi pañcahi guṇehi obhāsanti. Yathā ete, tathā ahampi pabbajitvā eko carissāmīti attho. **Bhaggavīti** bhariyaṃ ālapati. **Hitvāna kāmānīti** rūpādayo vatthukāme hitvā. **Yathodhikānīti** attano odhivasena ṭhitāni. Idaṃ vuttaṃ hoti – rūpādiodhivasena yathāṭṭhite kāme pahāya ahampi pabbajitvā eko carissāmīti. “Yatodhikāni’’tipi pāṭho, tassattho – yato uparato odhi etesanti yatodhikāni, uparatakoṭṭhāsāni. Pabbajissāmīti cintitakālato paṭṭhāya hi kilesakāmānaṃ eko koṭṭhāso uparato nāma hoti niruddho, tassa vatthubhūto kāmakoṭṭhāsopi uparatova hotīti.

Sā tassa kathaṃ sutvā “mayhampi kho sāmī, paccekabuddhānaṃ dhammakathaṃ sutakālato paṭṭhāya agāre cittaṃ na saṅṭhātī’’ti vatvā imaṃ gāthamāha –

96. “Ayameva kālo na hi añño atthi, anusāsītā me na bhaveyya pacchā;  
Ahampi ekā carissāmi bhaggava, sakuṇīva muttā purisassa hatthā’’ti.

Tattha **anusāsītā me na bhaveyya pacchāti** anusāsako ovādako na bhaveyya dullabhattā ovādakānaṃ, tasmā ayameva pabbajitūṃ kālo, na hi añño atthīti dasseti. **Sakuṇīva muttāti** yathā sakuṇīkena gahetvā sakuṇapacchiyaṃ khittāsu sakuṇīsu tassa hatthato muttā ekā sakuṇī anilapathaṃ laṅghayitvā yathārucitaṭṭhānaṃ gantvā ekikāva careyya, tathā ahampi tava hatthato muttā ekikā carissāmīti sayampi pabbajitukāmā hutvā evamāha.

Bodhisatto tassā kathaṃ sutvā tuṅhī ahosi. Sā pana bodhisattaṃ vañcetvā puretaraṃ pabbajitukāmā “sāmī, pānīyatitthaṃ gamissāmi, dārake olokehi’’ti ghaṭṭaṃ ādāya gacchantī viya palāyitvā nagarasāmante tāpasānaṃ santike gantvā pabbaji. Bodhisatto tassā anāgamaṃ ṇatvā sayam dārake posesi. Aparabhāge tesu thokaṃ vaḍḍhitvā attano ayānayaajānanasamatthataṃ sampattesu tesam vīmaṃsanatthaṃ ekadivasaṃ bhattaṃ pacanto thokaṃ uttaṇḍulaṃ paci, ekadivasaṃ thokaṃ kilinnaṃ, ekadivasaṃ supakkaṃ, ekadivasaṃ atikilinnaṃ, ekadivasaṃ aloṇakaṃ, ekadivasaṃ atiloṇakaṃ. Dārakā “tāta, ajja bhattaṃ uttaṇḍulaṃ, ajja kilinnaṃ, ajja supakkaṃ, ajja atikilinnaṃ, ajja aloṇakaṃ, ajja atiloṇaka’’nti āhaṃsu. Taṃ sutvā bodhisatto “āma, tāta’’ti vatvā cintesi “ime dārakā idāni āmapakkaloṇikaatiloṇikāni jānanti, attano dhammatāya jīvitūṃ sakkhissanti, mayā pabbajitūṃ vaṭṭatī’’ti. Atha te dārake ṇītakānaṃ datvā paṭicchāpetvā “ammaṭātā, ime dārake sādhuṃ posethā’’ti vatvā so ṇītakānaṃ paridevantānaññeva nagarā nikkhamitvā isipabbajjaṃ pabbajitvā nagarassa sāmanteveva vasi.

Atha naṃ ekadivasaṃ bārāṇasiyaṃ bhikkhāya carantaṃ paribbājikā disvā vanditvā “ayya, dārakā te nāsītā maññe’’ti āha. Mahāsatto “nāhaṃ dārake nāsemi, tesam attano ayānayaajānanakāle pabbajitomi, tvaṃ tesam acintetvā pabbajjāya abhiraṃā’’ti vatvā osānagāthamāha –

97. “Āmaṃ pakkañca jānanti, atho loṇaṃ aloṇakaṃ;  
Tamaḥaṃ disvāna pabbajim, careva tvaṃ carāmaḥa”nti.

Tattha **tamahanti** taṃ ahaṃ dāraḥānaṃ kiriyaṃ disvā pabbajito. **Careva tvaṃ carāmahanti** tvampi bhikkhācariyameva cara, ahampi bhikkhācariyameva carissāmīti.

Iti so paribbājikaṃ ovaditvā uyyojesi. Sāpi ovādaṃ gahetvā mahāsattaṃ vanditvā yathāruccitaṃ thānaṃ gatā. Thapetvā kira taṃ divasaṃ na te puna aññamaññaṃ addasaṃsu. Bodhisatto ca jhānābhīññaṃ nibbattetvā brahmalokūpago ahoṣi.

Satthā imaṃ dhammadeśanaṃ āharitvā saccāni pakāsetvā jātaṃ samodhānesi, saccapariyosāne te pañcasatā bhikkhū arahatte paṭiṭṭhahimsu. Tadā dhītā uppalavaṇṇā ahoṣi, putto rāhulakumāro, paribbājikā rāhulamātā, paribbājako pana ahameva ahoṣinti.

Kumbhakārajātakavaṇṇanā tatiyā.

[409] 4. Daḥhadhammajātakavaṇṇanā

**Ahaṃ ce daḥhadhammassāti** idaṃ satthā kosambiṃ nissāya ghoṣitārāme viharanto udenassa rañño bhaddavatikaṃ hatthiniṃ ārabba kathesi. Tassā pana hatthiniyā laddhavidhānañca udenassa rājavamaṃso ca **mātaṅgajātake** (jā. 1.15.1 ādayo) āvi bhavissati. Ekadivasaṃ pana sā hatthinī nagarā nikkhamantī bhagavantaṃ pātova ariyagaṇaparivutaṃ anomāya buddhasiriyā nagaraṃ piṇḍāya pavisantaṃ disvā tathāgatassa pādamaḷe nipajjitvā “bhagavā sabbaññu sabbalokanīttaraṇa udeno vaṃsarājā maṃ taruṇakāle kammaṃ nittharituṃ samatthakāle ‘imaṃ nissāya mayā jīvitañca rajjañca devī ca laddhā’ti piyāyitvā mahantaṃ parihāraṃ adāsi, sabbālaṅkārehi alaṅkaritvā thitaṭṭhānaṃ gandhena paribhaṇḍaṃ kāretvā matthake suvaṇṇatāraḥakhaṇḍavitānaṃ bandhāpetvā samantā citrasāṇiṃ parikkhipāpetvā gandhatelena dīpaṃ jālāpetvā dhūmataṭṭakaṃ thapāpetvā karīsachāḍḍanaṭṭhāne suvaṇṇakaṭāhaṃ paṭiṭṭhapāpetvā maṃ cīttattharaṇaṇiṭṭhe thapesi, rājārahañca me nānaggarasabhojanaṃ dāpesi. Idāni pana me mahallakakāle kammaṃ nittharituṃ asamatthakāle sabbaṃ taṃ parihāraṃ acchindi, anāthā nippaccayā hutvā araññe ketakāni khādanti jīvāmi, aññaṃ mayhaṃ paṭisaraṇaṃ natthi, udenaṃ mama guṇaṃ sallakkhāpetvā porāṇakaparihāraṃ me paṭipākatikaṃ kāretha bhagavā”ti paridevamānā tathāgataṃ yāci.

Satthā “gaccha tvaṃ, ahaṃ te rañño kathetvā yasaṃ paṭipākatikaṃ kāressāmī”ti vatvā rañño nivesanadvāraṃ agamāsi. Rājā tathāgataṃ antonivesanaṃ pavesetvā buddhappamukhassa saṅghassa mahādānaṃ pavattesi. Satthā bhattakiccapariyosāne anumodanaṃ karonto “mahārāja, bhaddavatikā kaha”nti pucchi. “Na jānāmi, bhante”ti. “Mahārāja, upakāraḥānaṃ yasaṃ datvā mahallakakāle gahetuṃ nāma na vaṭṭati, kataññunā katavedinā bhavituṃ vaṭṭati. Bhaddavatikā idāni mahallikā jarājiṇṇā anāthā hutvā araññe ketakāni khādanti jīvati, taṃ jiṇṇakāle anāthaṃ kātuṃ tumhākaṃ ayutta”nti bhaddavatikāya guṇaṃ kathetvā “sabbaṃ porāṇakaparihāraṃ paṭipākatikaṃ karohī”ti vatvā pakkāmi. Rājā tathā akāsi. “Tathāgatena kira bhaddavatikāya guṇaṃ kathetvā porāṇakayaso paṭipākatiko kārīto”ti sakalanagaraṃ patthari, bhikkhusaṅghepi sā pavatti pākaṭā jātā. Atha bhikkhū dhammasabhāyaṃ kathaṃ samuṭṭhāpesuṃ “āvuso, satthārā kira bhaddavatikāya guṇaṃ kathetvā porāṇakayaso paṭipākatiko kārīto”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepi tathāgato etissā guṇaṃ kathetvā natthayasamaṃ paṭipākatikaṃ kāresiyevā”ti vatvā atītaṃ āhari.

Atīte bārāṇasiyaṃ daḥhadhammo nāma rājā rajjaṃ kāresi. Tadā bodhisatto amaccakule nibbattitvā vayappatto taṃ rājānaṃ upaṭṭhahi. So tassa santikā mahantaṃ yasaṃ labhitvā amaccaratanaṭṭhāne aṭṭhāsi. Tadā tassa rañño ekā oṭṭhibyādhi hatthinī thāmabalasampannā mahabbalā ahoṣi. Sā ekadivasaṃ yojanasataṃ gacchati, rañño dūteyyaharaṇakiccaṃ karoti, saṅgāme yuddhaṃ katvā sattu maddanaṃ karoti. Rājā “ayaṃ me bahūpakārā”ti tassā sabbālaṅkāraṃ datvā udenena bhaddavatikāya dinnasadiṣaṃ



sabbaṃ parihāraṃ dāpesi. Athassā jīṇṇadubbalakāle rājā sabbaṃ yasaṃ gaṇhi. Sā tato paṭṭhāya anāthā hutvā araṇṇe tiṇapaṇṇāni khādantī jīvati. Athekadivasam rājakule bhājanesu appahontesu rājā kumbhakāraṃ pakkosāpetvā “bhājanāni kira nappahontī”ti āha. “Gomayāharaṇayānake yojetuṃ goṇe na labhāmi, devā”ti. Rājā tassa kathaṃ sutvā “ambhākaṃ oṭṭhibyādhi kaha”nti pucchi. “Attano dhammatāya carati, devā”ti. Rājā “ito paṭṭhāya taṃ yojetvā gomayaṃ āharā”ti taṃ kumbhakārassa adāsi. Kumbhakāro “sādhu, devā”ti tathā akāsi.

Athekadivasam sā nagarā nikkhamamānā nagaram pavisantaṃ bodhisattaṃ disvā vanditvā tassa pādāmūle nipajjitvā paridevamānā “sāmi, rājā maṃ ‘taruṇakāle bahūpakārā’ti sallakkhetvā mahantaṃ yasaṃ datvā idāni mahallakakāle sabbaṃ acchinditvā mayi cittampi na karoti, ahaṃ pana anāthā araṇṇe tiṇapaṇṇāni khādantī jīvāmi, evaṃ dukkhappattaṃ maṃ idāni yānake yojetuṃ kumbhakārassa adāsi, ṭhapetvā tumhe aññaṃ mayhaṃ paṭisaraṇaṃ natthi, mayā rañño katūpakāraṃ tumhe jānātha, sādhu idāni me naṭṭhaṃ yasaṃ paṭipākatikaṃ karoṭhā”ti vatvā tisso gāthā abhāsi –

98. “Ahaṃ ce daḷhadhammassa, vahantī nābhirādhayim;  
Dharantī urasi sallam, yuddhe vikkantacārinī.
99. “Nūna rājā na jānāti, mama vikkamaporisaṃ;  
Saṅgāme sukataṅgāni, dūtavippahitāni ca.
100. “Sā nūnaṃ marissāmi, abandhu aparāyini;  
Tadā hi kumbhakārassa, dinnā chakaṇahārikā”ti.

Tattha **vahantī** dūteyyaharaṇaṃ saṅgāme balakoṭṭhakabhindanaṃ taṃ taṃ kiccaṃ vahantī nittharantī. **Dharantī urasi sallanti** urasmiṃ baddhaṃ kaṇḍaṃ vā asim vā sattim vā yuddhakāle sattūnaṃ upari abhiharantī. **Vikkantacārinī** vikkamaṃ parakkamaṃ katvā parabalavijayena yuddhe vikkantagāminī. Idaṃ vuttaṃ hoti – sace sāmi, ahaṃ imāni kiccāni karontī rañño daḷhadhammassa cittaṃ nārādhayim na paritosesim, ko dāni añño tassa cittaṃ ārādhayissatī.

**Mama vikkamaporisanti** mayā kataṃ purisaparakkamaṃ. **Sukatantānī** sukataṅgāni. Yathā hi kammāneva kammantāni, vanāneva vanantāni, evamidha sukataṅgāneva “sukatantāni”ti vuttāni. **Dūtavippahitāni** cāti gale paṇṇaṃ bandhitvā “asukarañño nāma dehi”ti pahitāya mayā ekadivaseneva yojanasataṃ gantvā katāni dūtapesanāni ca. **Nūna rājā na jānātī** nūna tumhākaṃ esa rājā etāni mayā katāni kiccāni na jānāti. **Aparāyini** appatiṭṭhā appaṭisaraṇā. **Tadā hī** tathā hi, ayameva vā pāṭho. **Dinnā** ahaṃ raññā chakaṇahārikā katvā kumbhakārassa dinnāti.

Bodhisatto tassā kathaṃ sutvā “tvaṃ mā soci, ahaṃ rañño kathetvā tava yasaṃ paṭipākatikaṃ karissāmi”ti taṃ samassāsetvā nagaram pavisitvā bhuttaṭṭarāso rañño santikaṃ gantvā kathaṃ samuṭṭhāpetvā “mahārāja, nanu tumhākaṃ asukā nāma oṭṭhibyādhi asukaṭṭhāne ca asukaṭṭhāne ca ure sallam bandhitvā saṅgāmaṃ nitthari, asukadivasam nāma gīvāya paṇṇaṃ bandhitvā pesitā yojanasataṃ agamāsi, tumhepissā mahantaṃ yasaṃ adattha, sā idāni kaha”nti pucchi. “Tamahaṃ kumbhakārassa gomayaharaṇathāya adāsi”nti. Atha naṃ bodhisatto “ayuttaṃ kho, mahārāja, tumhākaṃ taṃ kumbhakārassa yānake yojanathāya dātu”nti vatvā rañño ovādasena catasso gāthā abhāsi –

101. “Yāvatāsīsatiṃ poso, tāvadeva pavīṇati;  
Atthāpāye jahanti naṃ, oṭṭhibyādhimva khattiyo.
102. “Yo pubbe katakalyāṇo, katattho nāvabujjhati;  
Atthā tassa palujjanti, ye honti abhipatthitā.
103. “Yo pubbe katakalyāṇo, katattho manubujjhati;

Atthā tassa pavaḍḍhanti, ye honti abhipatthikā.

104. “Taṃ vo vadāmi bhaddante, yāvattettha samāgatā;  
Sabbe katañño hotha, ciraṃ saggamhi ṭhassathā”’ti.

Tattha paṭhamagāthāya tāva attho – idhekacco aññāṇajātiko poso **yāvatāsīsati**, yāva “idaṃ nāma me ayaṃ kātuṃ sakkhissati”’ti paccāsīsati, **tāvadeva** taṃ purisaṃ **pavīṇati** bhajati sevati, tassa pana **atthāpāye** vaḍḍhiyā apagamane pariḥīnakāle taṃ nānākiccesu patthitaṃ posaṃ ekacce bālā imaṃ oṭṭhibyādhiṃ ayaṃ khattiyo viya jahanti.

**Katakalyāṇoti** parena attano katakalyāṇakammo. **Katathoti** nipphāditakicco. **Nāvabujjhatī** pacchāpi taṃ parena kataṃ upakāraṃ tassa jarājīṇṇakāle asamatthakāle na sarati, attanā dinnampi yasaṃ puna gaṇhāti. **Palujjantī** bhijjanti nassanti. **Ye honti abhipatthitā** ye keci atthā icchitā nāma honti, sabbe nassantī dīpeti. Mittadubbhipuggalassa hi patthitapatthitaṃ aggimhi pakkhittabījaṃ viya nassati. **Katatto manubujjhatī** katatto anubujjhati, ma-kāro byañjanasandhivasena gahito. **Taṃ vo vadāmī** tena kāraṇena tumhe vadāmi. **Ṭhassathā** katañño hutvā cirakālaṃ saggamhi dibbasampattim anubhavatā patiṭṭhahissatha.

Evaṃ mahāsatto rājānaṃ ādiṃ katvā sannipatitānaṃ sabbesaṃ ovādaṃ adāsi. Taṃ sutvā rājā oṭṭhibyādhiyā yasaṃ paṭipākatikaṃ akāsi. Bodhisattassa ca ovāde ṭhatvā dānādīni puññāni katvā saggaparāyaṇo ahoṣi.

Satthā imaṃ dhammadesanaṃ āharitvā jātakam samodhānesi – “tadā oṭṭhibyādhi bhaddavatikā ahoṣi, rājā ānando, amacco pana ahameva ahoṣi”’nti.

Daḷhadhammajātakavaṇṇanā catutthā.

[410] 5. Somadattajātakavaṇṇanā

**Yo maṃ pure paccuḍḍetī** idaṃ satthā jetavane viharanto aññataraṃ mahallakaṃ ārabba katesi. So kirekaṃ sāmaṇeraṃ pabbājesi, sāmaṇero tassa upakārako hutvā tathārūpena rogena kālamakāsi. Mahallako tasmim kālakate rodanto paridevanto vicarati. Taṃ disvā bhikkhū dhammasabhāyaṃ kathaṃ samuṭṭhāpesuṃ “āvuso, asukamahallako sāmaṇerassa kālakiriyāya rodanto paridevanto vicarati, maraṇassatikammaṭṭhānarahito maññe”’ti. Satthā āgantvā “kāya nuttha, bhikkhave, etarahi kathāya sannisinnā”’ti pucchitvā “imāya nāmā”’ti vutte “na, bhikkhave, idāneva, pubbepesa imasmim mate rodiyevā”’ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto tāvatimsabhavane sakkattaṃ kāresi. Atheko kāsigāmvāsī brāhmaṇamahāsālo kāme pahāya himavantaṃ pavisitvā isipabbajjaṃ pabbajitvā uñchācariyāya vanamūlaphalāphalehi yāpento vāsaṃ kappesi. Ekadivasam phalāphalathāya gato ekaṃ hatthichāpaṃ disvā attano assamaṃ ānetvā puttattṭhāne ṭhapetvā somadattotissa nāmaṃ katvā tiṇapaṇṇāni khādāpento paṭijaggi. So vayappatto mahāsārīro hutvā ekadivasam bahuṃ bhojanaṃ gahetvā ajīrakena dubbalo ahoṣi. Tāpaso taṃ assamapade katvā phalāphalathāya gato, tasmim anāgateyeva hatthipotako kālamakāsi. Tāpaso phalāphalaṃ gahetvā āgacchanta “aññesu divasesu me putto paccuggamaṃ karoti, ajja na dissati, kahaṃ nu kho gato”’ti paridevanto paṭhamam gāthamāha –

105. “Yo maṃ pure paccuḍḍeti, araññe dūramāyato;  
So na dissati mātāṅgo, somadatto kuhiṃ gato”’ti.

Tattha **pureti** ito pure. **Paccuḍḍetī** paccuggacchati. **Araññe dūranti** imasmim nimmanusse araññe maṃ dūraṃ paccuḍḍeti. **Āyatoti** āyāmasampanno.

Evam paridevamāno āgantvā taṃ caṅkamanakoṭiyam patitam disvā gale gahetvā paridevamāno dutiyam gāthamāha –

106. “Ayaṃ vā so mato seti, allasiṅgaṃva vacchito;  
Bhūmyā nipatito seti, amarā vata kuṅjaro”ti.

Tattha **ayaṃ vā**ti vibhāvanatthe vā-saddo. Ayameva so, na aññoti taṃ vibhāvento evamāha. **Allasiṅgati** māluvalatāya aggapavālaṃ. **Vacchitoti** chinno, gimhakāle majjhanhikasamaye tattavālikāpuline nakhena chinditvā pātito māluvalatāya aṅkuro viyāti vuttaṃ hoti. **Bhūmyāti** bhūmiyam. **Amarā vatāti** mato vata, “amarī”tipi pāṭho.

Tasmiṃ khaṇe sakko lokaṃ olokento taṃ disvā “ayaṃ tāpaso puttadāraṃ pahāya pabbajito, idāni hatthipotake puttasaññaṃ katvā paridevati, saṃvejetvā naṃ satim paṭilabhāpessāmī”ti tassa assamapadaṃ āgantvā ākāse ṭhitova tatiyam gāthamāha –

107. “Anagāriyupetassa, vippamuttassa te sato;  
Samaṇassa na taṃ sādhu, yaṃ petamanusocasi”ti.

Athassa vacanaṃ sutvā tāpaso catutthaṃ gāthamāha –

108. “Saṃvāsena have sakka, manussassa migassa vā;  
Hadaye jāyate pemaṃ, taṃ na sakkā asocitu”nti.

Tattha **migassa vā**ti imasmiṃ ṭhāne sabbepi tiracchānā “migā”ti vuttā. **Tanti** piyāyitaṃ sattaṃ.

Atha naṃ ovadanto sakko dve gāthā abhāsi –

109. “Matam marissaṃ rodanti, ye rudanti lapanti ca;  
Tasmā tvaṃ isi mā rodi, roditaṃ moghamāhu santo.

110. “Kanditena have brahme, mato peto samuṭṭhahe;  
Sabbe saṅgamma rodāma, aññamaññassa ñātake”ti.

Tattha **ye rudanti lapanti cāti** brahme ye sattā rodanti paridevanti ca, sabbe te matam, yo ca marissati, taṃ rodanti, tesamyeva evam rodantānaṃ assasukkhanakālo natthi, tasmā tvaṃ isi mā rodi. Kiṃkāraṇā? **Roditaṃ moghamāhu santo**, paṇḍitā hi “roditaṃ nipphala”nti vadanti. **Mato petoti** yadi esa petoti saṅkhyam gato mato roditena samuṭṭhaheyya, evam sante sabbepi mayam samāgantvā aññamaññassa ñātake rodāma, kiṃ nikkammā acchāmāti.

Tāpaso sakkassa vacanaṃ sutvā satim paṭilabhivā vigatasoko assūni puñchitvā sakkassa thutivasena sesagāthā āha –

111. “Ādittaṃ vata maṃ santaṃ, ghatasittaṃva pāvakaṃ;  
Vāriṇā viya osiṅcaṃ, sabbam nibbāpaye daram.

112. “Abbahī vata me sallaṃ, yamāsi hadayassitaṃ;  
Yo me sokaparetassa, puttasoṃkaṃ apānudi.

113. “Sohaṃ abbūḷhasallosmi, vītasoko anāvilo;  
Na socāmi na rodāmi, tava sutvāna vāsavā”ti.

Tā heṭṭhā vuttatthāyeva. Evaṃ sakko tāpasassa ovādaṃ datvā sakatṭhānameva gato.

Satthā imaṃ dhammadeśanaṃ āharitvā jātaṃ samodhānesi – “tadā hatthipotako sāmaṇero ahosi, tāpaso mahallako, sakko pana ahameva ahosi”nti.

Somadattajātakavaṇṇanā pañcamā.

[411] 6. Susīmajātakavaṇṇanā

**Kāḷāni kesāni pure ahesunti** idaṃ satthā jetavane viharanto mahābhinnikkhamaṇaṃ ārabha kathesi. Tasmīṃhi samaye bhikkhū dhammasabhāyaṃ nisīditvā dasabalassa nikkhamaṇaṃ vaṇṇayimsu. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “anacchariyaṃ, bhikkhave, mayā dāni anekāni kappakoṭisatasahassāni pūritapāraminā mahābhinnikkhamaṇaṃ, pubbepāhaṃ tiyojanasatike kāsiraṭṭhe rajjaṃ chaḍḍetvā nikkhantoyevā”ti vatvā atūtaṃ āhari.

Atīte bārāṇasiyaṃ brahmadatte rajjaṃ kārente bodhisatto tassa purohitassa aggamaheṣiyā kucchimhi nibbatti, tassa jātadivaseyeva bārāṇasirañño pi putto jāyī. Tesam nāmaggaṇadivase mahāsattassa susīmakumāroti nāmaṃ akamsu, rājaputtassa brahmadattakumāroti. Bārāṇasirājā “puttena me saddhiṃ ekadivase jāto”ti bodhisattaṃ āṇāpetvā dhātiyo datvā tena saddhiṃ ekato vaḍḍhesi. Te ubhopi vayappattā abhirūpā devakumāravaṇṇino hutvā takkasilāyaṃ sabbasippāni uggaṇhitvā paccāgamimsu. Rājaputto uparājā hutvā bodhisattena saddhiṃ ekato khādanto pivanto nisīdanto sayanto pītu accayena rajjaṃ patvā mahāsattassa mahantaṃ yasaṃ datvā purohitaṭṭhāne taṃ ṭhapetvā ekadivasaṃ nagaraṃ sajjāpetvā sakko devarājā viya alaṅkato alaṅkataerāvaṇapaṭibhāgassa mattavaravāraṇassa khandhe nisīditvā bodhisattaṃ pacchāsane hatthipiṭṭhe nisīdāpetvā nagaraṃ padakkhiṇaṃ akāsi. Mātāpissa “puttaṃ olokessāmī”ti sīhapañjare ṭhatvā tassa nagaraṃ padakkhiṇaṃ katvā āgacchantassa pacchato nisinnaṃ purohitaṃ disvā paṭibaddhacittā hutvā sayanagabbhaṃ pavisitvā “imaṃ alabhantī etheva marissāmī”ti āhāraṃ pacchinditvā nipajji.

Rājā mātaraṃ aṇṇanto “kuhiṃ me mātā”ti pucchitvā “gilānā”ti sutvā tassā santikaṃ gantvā vanditvā “kiṃ amma, aphāsuka”nti pucchi. Sā lajjāya na kathesi. So gantvā rājapallaṅke nisīditvā attano aggamaheṣiṃ pakkosivā “gaccha ammāya aphāsukaṃ jānāhi”ti pesesi. Sā gantvā piṭṭhiṃ parimajjantī pucchi, itthiyo nāma itthīnaṃ rahassaṃ na niguhanti, sā tassā tamatthaṃ ārocesi. Itarāpi taṃ sutvā gantvā rañño ārocesi. Rājā “hotu, gaccha naṃ samassāsehi, purohitaṃ rājānaṃ katvā tassa taṃ aggamaheṣiṃ karissāmī”ti āha. Sā āgantvā taṃ samassāsesi. Rājāpi purohitaṃ pakkosāpetvā etamatthaṃ ārocetvā “samma, mātu me jīvitaṃ dehi, tvaṃ rājā bhavissasi, sā aggamaheṣī, ahaṃ uparājā”ti āha. So “na sakkā evaṃ kātu”nti paṭikkhipitvā tena punappunaṃ yāciyamāno sampaṭicchi. Rājā purohitaṃ rājānaṃ, mātaraṃ aggamaheṣiṃ kāretvā sayam uparājā ahosi.

Tesam samaggavāsaṃ vasantānaṃ aparabhāge bodhisatto agāramajjhe ukkaṇṭhito kāme pahāya pabbajjāya ninnacitto kilesaratiṃ anallīyanto ekakova tiṭṭhati, ekakova nisīdati, ekakova sayati, bandhanāgāre baddho viya pañjare pakkhittakukkuṭo viya ca ahosi. Athassa aggamaheṣī “ayaṃ rājā mayā saddhiṃ nābhiraṃmatī, ekakova tiṭṭhati nisīdati seyyaṃ kappeti, ayaṃ kho pana daharo taruṇo, ahaṃ mahallikā, sīse me palitāni paññāyanti, yaṃnūnāhaṃ ‘sīse te deva, ekaṃ palitaṃ paññāyati’ti musāvādaṃ katvā ekenupāyena rājānaṃ pattiyāpetvā mayā saddhiṃ abhiramāpeyya”nti cintetvā ekadivasaṃ rañño sīse ūkā vicinanti viya hutvā “deva, mahallakosi jāto, sīse te ekaṃ palitaṃ paññāyati”ti āha. “Tena hi bhaddhe, etaṃ palitaṃ luñjitvā mayhaṃ hatthe ṭhapehi”ti. Sā tassa sīsato ekaṃ kesam luñjitvā attano sīse palitaṃ gahetvā “idaṃ te, deva, palita”nti tassa hatthe ṭhapesi. Bodhisattassa taṃ disvā bhītatasiṭṭassa kañcanapaṭṭasadisā nalāṭā sedā muccimsu.

So attānaṃ oṇḍanto “susīma, tvaṃ daharo hutvā mahallako jāto, ettakaṃ kālaṃ gūthakalale nimuggo gāmasūkaro viya kāmakalale nimujjitvā taṃ kalalaṃ jahitum na sakkosi, nanu kāme pahāya

himavantam pavisitvā pabbajitvā brahmacariyavāsassa te kālo’’ti cintetvā paṭhamam gāthamāha –

114. “Kālāni kesāni pure ahesum, jātāni sīsamhi yathāpadese;  
Tānāja setāni susīma disvā, dhammam cara brahmacariyassa kālo’’ti.

Tattha **yathāpadese**ti tava sīse tasmim tasmim kesānam anurūpe padese ito pubbe kālāni bhamarapattavaṇṇāni kesāni jātāni ahesunti vadati. **Dhammam carā**ti dasakusalakammaphadhammam carāti attānameva āṇāpeti. **Brahmacariyassā**ti methunaviratiyā te kāloti attho.

Evam bodhisattena brahmacariyavāsassa guṇe vaṇṇite itarā “aham ‘imassa lagganam karissāmī’ ti vissajjanameva kari’’nti bhītatasiā “idānissa apabbajjanatthāya sarīravaṇṇam vaṇṇayissāmī’’ti cintetvā dve gāthā abhāsi –

115. “Mameva deva palitam na tuyham, mameva sīsam mama uttamaṅgam;  
‘Attham karissa’nti musā abhāṇim, ekāparādham khama rājasetṭha.
116. “Daharo tuvam dassaniyosi rāja, paṭhamuggato hoti yathā kaḷīro;  
Rajjañca kārehi mamañca passa, mā kālikam anudhāvī janindā’’ti.

Tattha **mameva sīsanti** mameva sīse sañjātam palitanti dīpeti. Itaram tasseva vevacanam. **Atthanti** attano vuḍḍhim karissāmīti musā kathesim. **Ekāparādhanti**. Imam mayham ekam aparādham. **Paṭhamuggatoti** paṭhamavayena uggato. **Hohīti** hosi, paṭhamavaye patiṭṭhosi attho. “Hosī’’tiyeva vā pāṭho. **Yathā kaḷīroti** yathā siniddhachavitaruṇakalīro mandavāterito ativiya sobhati, evarūposi tvanti dasseti. “Paṭhamuggato hoti’’tipi pāṭho, tassattho – yathā paṭhamuggato taruṇakalīro dassanīyo hoti, evam tvampi dassanīyoti. **Mamañca passāti** mamañca olokehi, mā mam anātham vidhavam karohīti attho. **Kālikanti** brahmacariyacaraṇam nāma dutiye vā tatiye vā attabhāve vipākādānato kālikam nāma, rajjam pana imasmimyeva attabhāve kāmaguṇasukhuppādanato akālikam, so tvam imam akālikam pahāya mā kālikam anudhāvīti vadati.

Bodhisatto tassā vacanam sutvā “bhadde, tvam bhavitabbamevetam katham kathesi, pariṇamante hi mama vaye imehi kālakesehi parivattetvā sānavākasadisēhi paṇḍarehi bhavitabbam. Ahañhi nīluppālādikusumadāmasadisakumārānam kañcanarūpapaṭibhāgānam uttamayobbanavilāsasampattānam khattiyakaññādīnam vaye pariṇamante jaram pattānam vevaṇṇiyañceva sarīrabhaṅgañca passāmi. Evam vipattipariyosānovesā bhadde, jīvaloko’’ti vatvā upari buddhalīlāya dhammam desento gāthādvayamāha –

117. “Passāmi voham daharim kumarim, sāmattṭhapassam sutanum sumajjham;  
Kāḷappavāḷāva pavellamānā, palobhayantīva naresu gacchati.
118. “Tamena passāniparena nārim, āsītikam nāvutikamva jaccā;  
Daṇḍam gahetvāna pavedhamānam, gopānasībhoggasamam caranti’’nti.

Tattha **voti nipātamattam**. **Sāmattṭhapassanti** sāmattṭhapassam. Ayameva vā pāṭho, sabbapassesu matṭhachavivaṇṇanti attho. **Sutanunti** sundarasarīram. **Sumajjhanti** susaṅghitamajjham. **Kāḷappavāḷāva pavellamānā**ti yathā nāma taruṇakāle susamuggatā kāḷavallī pavāḷā vā hutvā mandavāteritā ito cito ca pavellati, evam pavellamānā itthivilāsam dassayamānā kumārīkā **palobhayantīva naresu gacchati**. Samīpatthe bhummavacanam, purisānam santike te purise kilesavasena palobhayantī viya gacchati.

**Tamena passāniparena nārinti** tamenam nārim aparena samayena jaram pattam antarahitarūpasobhaggappattam passāmi. Bodhisatto hi paṭhamagāthāya rūpe assādam kathetvā idāni ādīnavam dassento evamāha. **Āsītikam nāvutikamva jaccā**ti asītisamvaccharam vā

navutisaṃvaccharam vā jātiyā. **Gopānasībhoggasamanti** gopānasīsamaṃ bhoggaṃ, gopānasīkārena bhaggasarīraṃ onamitvā natṭhakākaṇikaṃ pariyesantiṃ viya caramānanti attho. Kāmañca bodhisattena daharakāle disvā puna nāvutikakāle diṭṭhapubbā nāma natthi, ñāṇena diṭṭhabhāvaṃ sandhāya panetaṃ vuttaṃ.

Iti mahāsatto imāya gāthāya rūpassa ādīnavaṃ dassetvā idāni agāramajjhe attano anabhiratiṃ pakāsetto gāthādvayamāha –

119. “Sohaṃ tamevānuvicintayanto, eko sayāmi sayanassa majjhe;  
‘Ahampi evaṃ’ iti pekkhamāno, na gahe rame brahmacariyassa kālo.

120. “Rajjuvālambanī cesā, yā gehe vasato rati;  
Etampi chetvāna vajanti dhīrā, anapekkhino kāmasukhaṃ pahāyā”ti.

Tattha **sohanti** so ahaṃ. **Tamevānuvicintayantoti** tameva rūpānaṃ assādañca ādīnavañca cinto. **Evaṃ iti pekkhamānoti** “yathā esā pariṇatā, ahampi jaraṃ patto bhaggasarīro bhavissāmī”ti pekkhamāno. **Na gahe rameti** gehe na ramāmi. **Brahmacariyassa kāloti** bhadde, brahmacariyassa me kālo, tasmā pabbajissāmīti dīpeti.

**Rajjuvālambanī cesāti** ca-kāro nipātamatto, ālambanarajju viya esāti attho. Katarā? **Yā gehe vasato rati**, yā gehe vasantassa rūpādīsu ārammaṇesu kāmaratīti attho. Iminā kāmānaṃ appassādataṃ dasseti. Ayaṃ etthādhippāyo – yathā gilānassa manussassa attano balena parivattitūṃ asakkontassa “imaṃ ālambitvā parivatteyyāsī”ti ālambanarajjuṃ bandheyyuṃ, tassa taṃ ālambitvā parivattantassa appamattakaṃ kāyikacetāsikasukhaṃ bhaveyya, evaṃ kilesāturānaṃ sattānaṃ vivekasukhavasena parivattitūṃ asakkontānaṃ agāramajjhe ṭhapitāni kāmaratidāyakāni rūpādīni ārammaṇāni tesam kilesapariḷāhakāle methunadhammaṇiṣevanavasena tāni ārabba parivattamānānaṃ kāyikacetāsikasukhasaṅkhātā kāmaratī nāma taṃ muhuttaṃ uppajjamānā appamattikā hoti, evaṃ appassādā kāmāti. **Etampi chetvānāti** yasmā pana bahudukkhā kāmā bahupāyāsā, ādīnavo ettha bhiyyo, tasmā taṃ ādīnavaṃ sampassamānā paṇḍitā etampi rajjuṃ chetvā gūthakūpe nimuggapuriso taṃ pajahanto viya anapekkhino etaṃ appamattakaṃ bahudukkhaṃ kāmasukhaṃ **pahāya vajanti**, nikkhamitvā manoramaṃ pabbajjaṃ pabbajantīti.

Evaṃ mahāsatto kāmesu assādañca ādīnavañca dassento buddhalīlāya dhammaṃ desetvā sahāyaṃ pakkosāpetvā rajjaṃ paṭicchāpetvā ñātimittasuhajjānaṃ rodantānaṃ paridevantānameva sirivibhavaṃ chaḍḍetvā himavantaṃ pavisitvā isipabbajjaṃ pabbajitvā jhānābhīññaṃ nibbattetvā brahmalokaparāyaṇo ahoṣi.

Satthā imaṃ dhammaḍesaṇaṃ āharitvā saccāni pakāsetvā bahū jane amatapānaṃ pāyetvā jātaṃ samodhānesi – “tadā aggamaheṣī rāhulamātā ahoṣi, sahāyarājā ānando, susīmarājā pana ahameva ahoṣi”nti.

Susīmajātakavaṇṇanā chaṭṭhā.

[412] 7. Koṭasimbali-jātakavaṇṇanā

**Ahaṃ dasasatambyāmanti** idaṃ satthā jetavane viharanto kilesaniggahaṃ ārabba kathesi. Vatthu pana **pānīyajātake** (jā. 1.11.59 ādayo) āvi bhavissati. Idhāpi satthā antokoṭisanthāre kāmavitakkābhībhūte pañcasate bhikkhū disvā bhikkhusaṅghaṃ sannipātāpetvā “bhikkhave, āsaṅkitabbayuttakaṃ nāma āsaṅkituṃ vaṭṭati, kilesā nāma vadḍhantā vane nigrodhādayo viya rukkaṃ, purisaṃ bhañjanti, teneva pubbepi koṭasimbaliyaṃ nibbattadevatā ekaṃ sakuṇaṃ nigrodhabījāni khādītva attano rukkhassa sākhaṅtare vaccaṃ pāntaṃ disvā ‘ito me vimānassa vināso bhavissatī’ti bhayappattā ahoṣī”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto koṭasimbaliyaṃ rukkhadavatā hutvā nibbatti. Atheke supaṇṇarājā diyadḍhajojanasatikaṃ attabhāvaṃ māpetvā pakkhavātehi mahāsamudde udakaṃ dvidhā katvā ekaṃ byāmasahassāyāmaṃ nāgarājānaṃ naṅguṭṭhe gahetvā mukhenassa gahitagocaraṃ chaḍḍāpetvā koṭasimbaliṃ sandhāya vanamatthakena pāyāsī. Nāgarājā “olambento attānaṃ mocessāmī”ti nigrodharukkhe bhogaṃ pavesetvā nigrodhaṃ veṭhetvā gaṇhi. Supaṇṇarañño mahābalatāya nāgarājassa ca mahāsarīratāya nigrodharukkho samugghāṭaṃ agamāsī. Nāgarājā neva rukkhaṃ vissajjesi, supaṇṇarājā saddhiṃ nigrodharukkhe nāgarājānaṃ gahetvā koṭasimbaliṃ patvā nāgarājānaṃ khandhapitṭhe nipajjāpetvā udaramassa phāletvā nāgamedaṃ khāditvā sesakalevaram samudde vissajjesi. Tasmīṃ pana nigrodhe ekā sakuṇikā atthi, sā nigrodharukkhe vissatṭhe uppatitvā koṭasimbaliyā sākhanare nisīdi. Rukkhadavatā taṃ disvā “ayaṃ sakuṇikā mama rukkhaḥkhandhe vaccaṃ pātesati, tato nigrodhagaccho vā pilakkhagaccho vā uṭṭhahitvā sakalarukkhaṃ ottharitvā gacchissati, atha me vimānaṃ nassissatī”ti bhītatasiṭā pavedhi. Tassā pavedhantiyā koṭasimbaliṃ yāva mūlā pavedhi. Supaṇṇarājā taṃ pavedhamānaṃ disvā kāraṇaṃ pucchanto dve gāthā abhāsi –

121. “Ahaṃ dasasatambiyāmaṃ, uragamādāya āgato;  
Taṅca maṅca mahākāyaṃ, dhārayaṃ nappavedhasi.
122. “Athimaṃ khuddakaṃ pakkhiṃ, appamaṃsataraṃ mayā;  
Dhārayaṃ byathasi bhītā, kamatthaṃ koṭasimbali”ti.

Tattha **dasasatambiyā**ṃanti sahasabyāmamattāyāmaṃ. **Uragamādāya āgato**ti evaṃ mahantaṃ uragaṃ ādāya idha āgato. **Taṅca maṅcā**ti taṅca uragaṃ maṅca. **Dhārayanti** dhārayamānā. **Byathasī**ti kampasi. **Kamatthanti** kiṃ atthaṃ, kena kāraṇeṇāti pucchati, kaṃ vā atthaṃ sampassamānātipi attho. **Koṭasimbali**ti rukkhanāmena devaputtaṃ ālapati. So hi simbalirukkho khandhasākhamaṃhatatāya koṭasimbaliṃ labhati, tasmīṃ adhiyatthadevaputtassapi tadeva nāmaṃ.

Athassa kāraṇaṃ kathento devaputto catasso gāthā abhāsi –

123. “Maṃsabhakkho tuvaṃ rāja, phalabhakkho ayaṃ dijo;  
Ayaṃ nigrodhabījāni, pilakkhudumbarāni ca;  
Assatthāni ca bhakkhitvā, khandhe me ohadissati.
124. “Te rukkḥā saṃvirūhanti, mama passe nivātajā;  
Te maṃ pariyanandhissanti, arukkhaṃ maṃ karissare.
125. “Santi aññepi rukkḥā se, mūlino khandhino dumā;  
Iminā sakuṇajātena, bījamāharitā hatā.
126. “Ajjhārūhābhivaḍḍhanti, brahantampi vanappatiṃ;  
Tasmā rāja pavedhāmi, sampassaṃnāgataṃ bhaya”nti.

Tattha **ohadissatī**ti vaccaṃ pātesati. **Te rukkḥā**ti tehi bījehi jātā nigrodhādayo rukkḥā. **Saṃvirūhanti**ti saṃviruhissanti vaḍḍhissanti. **Mama passeti** mama sākhanarādīsu. **Nivātajā**ti mama sākḥāhi vātassa nivāritattā nivāte jātā. **Te maṃ pariyanandhissanti**ti ete evaṃ vaḍḍhitā maṃ pariyanandhissanti ayametthādhippāyo. **Karissareti** athevaṃ pariyanandhitvā maṃ arukkameva karissanti sabbaso bhañjissanti. **Rukkḥā seti** rukkḥā. **Mūlino khandhinoti** mūlasampannā ceva khandhasampannā ca. **Dumā**ti rukkhavevacanameva. **Bījamāharitā**ti bījaṃ āharitvā. **Hatā**ti aññepi imasmīṃ vane rukkḥā vināsītā santi. **Ajjhārūhābhivaḍḍhanti**ti nigrodhādayo rukkḥā ajjhārūhā hutvā mahantampi aññaṃ vanappatiṃ atikkamma vaḍḍhanti dasseti. Ettha pana vane pati, vanassa pati, vanappatīti tayopi pāṭhāyeva. **Rājā**ti supaṇṇaṃ ālapati.

Rukkhadevatāya vacanaṃ sutvā supaṇṇo osānagāthamāha –

127. “Saṅkeyya saṅkitabbāni, rakkheyyānāgataṃ bhayaṃ;  
Anāgatabhayaṃ dhīro, ubho loke avekkhatī”ti.

Tattha **anāgataṃ bhayanti** pāṇātipātādīhi viramanto diṭṭhadhammikampi samparāyikampi anāgataṃ bhayaṃ rakkhati nāma, pāpamitte veripuggale ca anupasaṅkamanto anāgatabhayaṃ rakkhati nāma. Evaṃ anāgataṃ bhayaṃ rakkheyya. **Anāgatabhayaṃ**ti anāgatabhayaakāraṇā taṃ bhayaṃ passanto dhīro idhalokaṇca paralokaṇca avekkhati oloketi nāma.

Evaṇca pana vatvā supaṇṇo attano ānubhāvena taṃ pakkhiṃ tamhā rukkḥā palāpesi.

Satthā imaṃ dhammadesanaṃ āharitvā “āsaṅkitabbayuttakaṃ āsaṅkituṃ vaṭṭatī”ti vatvā saccāni pakāsetvā jātaṃ samodhānesi, saccapariyosāne pañcasatā bhikkhū arahattaphale patiṭṭhahimsu.

Tadā supaṇṇarājā sārīputto ahosi, rukkhadevatā pana ahameva ahosinti.

Koṭasimbali jātakavaṇṇanā sattamā.

[413] 8. Dhūmakārijātakavaṇṇanā

**Rājā apucchi vidhuranti** idaṃ satthā jetavane viharanto kosalarañño āgantukasaṅgahaṃ ārabha katesi. So kira ekasmiṃ samaye paveṇiāgatānaṃ porāṇakayodhānaṃ saṅgahaṃ akatvā abhinavāgatānaṃ āgantukānaññeva sakkārasammānaṃ akāsi. Athassa paccante kupite yujjhanatthāya gatassa “āgantukā laddhasakkārā yujjhissanti”ti porāṇakayodhā na yujjhimsu, “porāṇakayodhā yujjhissanti”ti āgantukāpi na yujjhimsu. Corā rājānaṃ jiniṃsu. Rājā parājito āgantukasaṅgahadosena attano parājītabhāvaṃ ñatvā sāvattiṃ paccāgantvā “kiṃ nu kho ahameva evaṃ karonto parājito, udāhu aññepi rājāno parājītapubbāti dasabalaṃ pucchissāmī”ti bhuttapātarāso jetavanaṃ gantvā sakkāraṃ katvā satthāraṃ vanditvā tamatthaṃ pucchi. Satthā “na kho, mahārāja, tvameveko, porāṇakarājānopi āgantukasaṅgahaṃ katvā parājīta”ti vatvā tena yācito atītaṃ āhari.

Atīte kururaṭṭhe indapatthanagare yudhiṭṭhilagotto dhanañcayo nāma korabyarājā rajjaṃ kāresi. Tadā bodhisatto tassa purohitakule nibbattitvā vayappatto takkasīlāyaṃ sabbasippāni uggaṇhitvā indapatthaṃ paccāgantvā pitu accayena purohitatṭhānaṃ labhitvā rañño atthadhammānusāsako ahosi, vidhurapaṇḍitotissa nāmaṃ kariṃsu. Tadā dhanañcayarājā porāṇakayodhe agaṇetvā āgantukānaññeva saṅgahaṃ akāsi. Tassa paccante kupite yujjhanatthāya gatassa “āgantukā jānissanti”ti neva porāṇakā yujjhimsu, “porāṇakā yujjhissanti”ti na āgantukā yujjhimsu. Rājā parājito indapatthameva paccāgantvā “āgantukasaṅgahassa katabhāvena parājītomhī”ti cintesi. So ekadivasam “kiṃ nu kho ahameva āgantukasaṅgahaṃ katvā parājito, udāhu aññepi rājāno parājītapubbā atthīti vidhurapaṇḍitaṃ pucchissāmī”ti cintetvā taṃ rājupaṭṭhānaṃ āgantvā nisinnaṃ tamatthaṃ pucchi. Athassa taṃ pucchanākāraṃ āvikaronto satthā upaḍḍhaṃ gāthamāha –

128. Rājā apucchi vidhuraṃ, dhammakāmo yudhiṭṭhilo”ti.

Tattha **dhammakāmoti** sucaritadhammappiyo.

“Api brāhmaṇa jānāsi, ko eko bahu socatī”ti –

Sesaupaḍḍhagāthāya pana ayamatto – api nāma, brāhmaṇa, tvaṃ jānāsi “ko imasmiṃ loke

Eko bahu socatī, nānākāraṇena socatī”ti.

Taṃ sutvā bodhisatto “mahārāja, kiṃ soko nāma tumhākaṃ soko, pubbe dhūmakārī nāmeko



ajapālabrāhmaṇo mahantaṃ ajayūthaṃ gahetvā araññe vajaṃ katvā tattha ajā ṭhapetvā aggiṇca dhūmañca katvā ajayūthaṃ paṭijagganto khīrādīni paribhuñjanto vasi. So tattha āgate suvaṇṇavaṇṇe sarabhe disvā tesu sinehaṃ katvā ajā agaṇetvā ajānaṃ sakkāraṃ sarabhānaṃ katvā saradakāle sarabhesu palāyitvā himavantaṃ gatesu ajāsūpi naṭṭhāsu sarabhe apassanto sokena paṇḍurogī hutvā jīvitakkhayaṃ patto, ayaṃ āgantukasaṅgahaṃ katvā tumhehi satagaṇeṇa sahaṣagaṇeṇa socitvā kilamitvā vināsaṃ patto”ti idaṃ udāharaṇaṃ ānetvā dassento imā gāthā āha –

129. “Brāhmaṇo ajayūthena, pahūtejo vane vasaṃ;  
Dhūmaṃ akāsi vāseṭṭho, rattindivamatandito.
130. “Tassa taṃdhūmagandhena, sarabhā makasaḍḍitā;  
Vassāvāsaṃ upagacchuṃ, dhūmakārissa santike.
131. “Sarabhesu manaṃ katvā, ajā so nāvabujjhatha;  
Āgacchantī vajantī vā, tassa tā vinasuṃ ajā.
132. “Sarabhā sarade kāle, pahīnamakase vane;  
Pāvisuṃ giriduggāni, nadīnaṃ pabhavāni ca.
133. “Sarabhe ca gate disvā, ajā ca vibhavaṃ gatā;  
Kiso ca vivaṇṇo cāsi, paṇḍurogī ca brāhmaṇo.
134. “Evaṃ yo saṃ niraṃkatvā, āgantuṃ kurute piyaṃ;  
So eko bahu socati, dhūmakārīva brāhmaṇo”ti.

Tattha **pahūtejoti** pahūtaindhano. **Dhūmaṃ akāsīti** makkhikaparipanthaharaṇatthāya aggiṇca dhūmañca akāsi. **Vāseṭṭhoti** tassa gottaṃ. **Atanditoti** analaso hutvā. **Taṃdhūmagandhenāti** tena dhūmagandhena. **Sarabhāti** sarabhamigā. **Makasaḍḍitāti** makasehi upaddutā pīlitā. Sesamakkhikāpi makasaggahaṇeṇeva gahitā. **Vassāvāsanti** vassārattavāsaṃ vasiṃsu. **Manaṃ katvāti** sinehaṃ uppādetvā. **Nāvabujjhathāti** araññato caritvā vajaṃ āgacchantī ceva vajato araññaṃ gacchantī ca “ettakā āgatā, ettakā anāgatā”ti na jānāti. **Tassa tā vinasanti** tassa tā evaṃ apaccavekkhantassa sīhaparipanthādito arakkhiyamānā ajā sīhaparipanthādīhi vinasiṃsu, sabbāva vinaṭṭhā.

**Nadīnaṃ pabhavāni cāti** pabbateyyānaṃ nadīnaṃ pabhavaṭṭhānāni ca pavīṭṭhā. **Vibhavanti** abhāvaṃ. Ajā ca vināsaṃ pattā disvā jānitvā. **Kiso ca vivaṇṇoti** khīrādīdayikā ajā pahāya sarabhe saṅgaṇhitvā tepi apassanto ubhato parihīno sokābhībhūto kiso ceva dubbaṇṇo ca ahoṣi. **Evaṃ yo saṃ niraṃkatvāti** evaṃ mahārāja, yo sakaṃ porāṇaṃ ajjhattikaṃ janamaṃ nīharitvā pahāya kismiñci agaṇetvā āgantukaṃ piyaṃ karoti, so tumhādiso **eko bahu socati**, ayaṃ te mayā dassito dhūmakārī brāhmaṇo viya bahu socatīti.

Evaṃ mahāsatto rājānaṃ saññāpento kathesi. Sopi saññattaṃ gantvā tassa pasīditvā bahuṃ dhanamaṃ adāsi. Tato paṭṭhāya ca ajjhattikasaṅgahameva karonto dānādīni puññāni katvā saggaparāyaṇo ahoṣi.

Satthā imaṃ dhammadesanaṃ āharitvā jātakamaṃ samodhānesi – “tadā korabyarājā ānando ahoṣi, dhūmakārī pasenadikosalo, vidhurapaṇḍito pana ahameva ahoṣi”nti.

Dhūmakārījātakavaṇṇanā aṭṭhamā.

[414] 9. Jāgarajātakavaṇṇanā

**Kodha jāgarataṃ suttoti** idaṃ satthā jetavane viharanto aññataraṃ upāsakaṃ ārabha kathesi. So hi sotāpanno ariyasāvako sāvatthito sakaṭasatthena saddhimaṃ kantāramaggaṃ paṭipajji. Satthavāho tattha

ekasmiṃ udakaphāsukaṭṭhāne pañca sakaṭasatāni mocetvā khādanīyabhojanīyaṃ saṃvidahitvā vāsaṃ upagacchi. Te manussā tattha tattha nipajjitvā supiṃsu, upāsako pana sathavāhassa santike ekasmiṃ rukkhamūle caṅkamaṃ adhiṭṭhāsi. Atha naṃ satham vilumpitukāmā pañcasatā corā nānāvudhāni gahetvā satham parivāretvā aṭṭhaṃsu. Te taṃ upāsakaṃ caṅkamantaṃ disvā “imassa niddāyanakāle vilumpissāmā”ti tattha tattha aṭṭhaṃsu, sopi tiyāmarattiṃ caṅkamiyeva. Corā paccūsasamaye gahitagahitā pāsānamuggarādayo chaḍḍetvā “bho sathavāha, imaṃ appamādena jaggantaṃ purisaṃ nissāya jīvitaṃ labhitvā tava santakassa sāmiko jāto, etassa sakkāraṃ kareyyāsī”ti vatvā pakkamiṃsu. Manussā kālasseva vuṭṭhāya tehi chaḍḍitapāsānamuggarādayo disvā “imaṃ nissāya amhehi jīvitaṃ laddha”nti upāsakassa sakkāraṃ akaṃsu. Upāsakopi icchitaṭṭhānaṃ gantvā katakicco puna sāvattiṃ āgantvā jetavanaṃ gantvā tathāgataṃ pūjetvā vanditvā nisinno “kiṃ, upāsaka, na paññāyasī”ti vutte tamatthaṃ ārocesi. Sathā “na kho, upāsaka, tvaṃyeva aniddāyitvā jagganto visesaṃ labhi, porāṇakapaṇḍitāpi jaggantā visesaṃ guṇaṃ labhimsū”ti vatvā tena yācito atūtaṃ āhari.

Atīte bārāṇasiyaṃ brahmadatte rajjaṃ kārente bodhisatto brāhmaṇakule nibbattitvā vayappatto takkasilāyaṃ sabbasippāni uggaṇhitvā paccāgantvā agāramajjhe vasanto aparabhāge nikkhamitvā isipabbajjaṃ pabbajitvā na cirasseva jhānābhīṇṇaṃ nibbattetvā himavantapadese ṭhānacaṅkamiriyāpatho hutvā vasanto niddaṃ anupagantvā sabbarattiṃ caṅkamati. Athassa caṅkamanakoṭiyaṃ nibbattarukkadevatā tussitvā rukkhaviṭape ṭhatvā pañhaṃ pucchantī paṭhamaṃ gāthamāha –

135. “Kodha jāgarataṃ sutto, kodha suttesu jāgaro;  
Ko mametaṃ vijānāti, ko taṃ paṭibhaṇāti me”ti.

Tattha **kodhāti** ko idha. **Ko mametanti** ko mama etaṃ pañhaṃ vijānāti. **Ko taṃ paṭibhaṇāti meti** etaṃ mayā puṭṭhaṃ pañhaṃ mayhaṃ ko paṭibhaṇāti, ko byākaritum sakkhissatīti pucchati.

Bodhisatto tassā vacanaṃ sutvā –

136. “Ahaṃ jāgarataṃ sutto, ahaṃ suttesu jāgaro;  
Ahmetaṃ vijānāmi, ahaṃ paṭibhaṇāmi te”ti. –

Imaṃ gāthaṃ vatvā puna tāya –

137. “Kathaṃ jāgarataṃ sutto, kathaṃ suttesu jāgaro;  
Kathaṃ etaṃ vijānāsi, kathaṃ paṭibhaṇāsi me”ti. –

Imaṃ gāthaṃ puṭṭho tamatthaṃ byākaronto –

138. “Ye dhammaṃ nappajānanti, saṃyamoti damoti ca;  
Tesu suppaṃānesu, ahaṃ jaggāmi devate.

139. “Yesaṃ rāgo ca doso ca, avijjā ca virājitā;  
Tesu jāgaramānesu, ahaṃ suttosmi devate.

140. “Evaṃ jāgarataṃ sutto, evaṃ suttesu jāgaro;  
Evametaṃ vijānāmi, evaṃ paṭibhaṇāmi te”ti. – imā gāthā āha;

Tattha **kathaṃ jāgarataṃ suttoti** kathaṃ tvaṃ jāgarataṃ sattānaṃ antare sutto nāma hosi. Esa nayo sabbattha. **Ye dhammanti** ye sattā navavidhaṃ lokuttaradhammaṃ na pajānanti. **Saṃyamoti damoti cāti** “ayaṃ saṃyamo, ayaṃ damo”ti evaṃca ye maggena āgataṃ sīlañceva indriyasamvaraṇca na jānanti. Indriyasamvaro hi manacchaṭṭhānaṃ indriyānaṃ damanato “damo”ti vuccati. **Tesu suppaṃānesūti** tesu kilesaniddāvasena supantesu sattesu ahaṃ appamādasena jaggāmi.

“**Yesam rāgo cā**”ti gāthāya yesam mahākhīṇāsavānaṃ padasatena niddiṭṭhadiyaḍḍhasahassataṇhālobhasaṅkhāto rāgo ca navaāghātavattthusamuṭṭhāno doso ca dukkhādīsu aṭṭhasu vatthūsu aññābhūtā avijjā cāti ime kilesā virājitā pahīnā, tesu ariyesu sabbākārena jāgaramānesu te upādāya ahaṃ sutto nāma devateti attho. **Evam jāgaratanti** evaṃ devate ahaṃ iminā kāraṇena jāgarataṃ sutto nāmāti. Esa nayo sabbapadesu.

Evam mahāsattena pañhe kathite tuṭṭhā devatā tassa thutiṃ karontī osānagāthamāha –

**141.** “Sādhu jāgarataṃ sutto, sādhu suttesu jāgaro;  
Sādhu metaṃ vijānāsi, sādhu paṭibhaṇāsi me”ti.

Tattha **sādhū**ti bhaddakaṃ katvā tvaṃ imaṃ pañhaṃ kathesi, mayampi naṃ evameva kathamāti. Evam sā bodhisattassa thutiṃ katvā attano vimānameva pāvisi.

Satthā imaṃ dhammadesanaṃ āharitvā jātakam samodhānesi – “tadā devadhītā uppalavaṇṇā ahosi, tāpaso pana ahameva ahosi”nti.

Jāgarajātakavaṇṇanā navamā.

[415] 10. Kummāsapiṇḍijātakavaṇṇanā

**Na kiratthū**ti idaṃ satthā jetavane viharanto mallikaṃ devim ārabha kathesi. Sā hi sāvatthiyaṃ ekassa mālākārajeṭṭhakassa dhītā uttamarūpadharā mahāpuññā soḷasavassikakāle ekadivasam kumārikāhi saddhim pupphārāmaṃ gacchantī tayo kummāsapiṇḍe gahetvā pupphapacchiyam ṭhapetvā gacchati. Sā nagarato nikkhamanakāle bhagavantaṃ sarīrappabham vissajjtvā bhikkhusaṅghaparivutaṃ nagaram pavisaṃtaṃ disvā tayo kummāsapiṇḍe upanāmesī. Satthā catumahārājadattiyam pattam upanetvā paṭiggahesi. Sāpi tathāgatassa pāde sirasā vanditvā buddhārammaṇam pītiṃ gahetvā ekamantaṃ aṭṭhāsi. Satthā taṃ oloketvā sitam pātvākāsi. Āyasmā ānando “ko nu kho, bhante, hetu ko paccayo tathāgatassa sitakaraṇe”ti bhagavantaṃ pucchi. Athassa satthā “ānanda, ayaṃ kumārikā imesaṃ kummāsapiṇḍānaṃ phalena ajjeva kosalarāñño aggamaheṣī bhavissatī”ti sitakāraṇam kathesi.

Kumārikāpi pupphārāmaṃ gatā. Taṃ divasameva kosalarājā ajātasattunā saddhim yujjhanto yuddhaparājito palāyitvā assam abhiruyha āgacchanto tassā gītasaddam sutvā paṭibaddhacitto assam taṃ āramābhimukham pesesi. Puññasampannā kumārikā rājānaṃ disvā apalāyitvāva āgantvā assassa nāsarajjuyā ganhi, rājā assapiṭṭhiyaṃ nisinnova “sasāmikāsi, asāmikāsi”ti pucchitvā asāmikabhāvaṃ ñatvā assā oruyha vātātapakilanto tassā anke nipanno muhuttaṃ vissamitvā taṃ assapiṭṭhiyaṃ nisīdāpetvā balakāyaparivuto nagaram pavisitvā attano kulagharam pesetvā sāyanhasamaye yānam pahīnitvā mahantena sakkārasammānena kulagharato āharāpetvā ratanarāsīmhi ṭhapetvā abhisekam datvā aggamaheṣim akāsi. Tato paṭṭhāya ca sā rañño piyā ahosi manāpā, pubbuṭṭhāyikādīhi pañcahi kalyāṇadhammehi samannāgatā patidevatā, buddhānampi vallabhā ahosi. Tassā satthu tayo kummāsapiṇḍe datvā taṃ sampattiṃ adhigatabhāvo sakalanagaraṃ pattharivā gato.

Athekadivasam dhammasabhāyaṃ katham samuṭṭhāpesum “āvuso, mallikā devī buddhānaṃ tayo kummāsapiṇḍe datvā tesam phalena taṃ divasaññeva abhisekam pattā, aho buddhānaṃ mahāguṇatā”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “anacchariyaṃ, bhikkhave, mallikāya ekassa sabbaññubuddhassa tayo kummāsapiṇḍe datvā kosalarāñño aggamaheṣibhāvādhigamo. Kasmā? Buddhānaṃ guṇamahantatāya. Porāṇakapaṇḍitā pana paccakabuddhānaṃ aloṇakam asneham aphāṇitaṃ kummāsam datvā tassa phalena dutiye attabhāve tiyojanasatike kāsiraṭṭhe rajjasirim pāpuṇimsū”ti vatvā atītam āhari.

Atīte bārāṇasiyaṃ brahmadatte rajjam kārente bodhisatto ekasmiṃ daliddakule nibbattitvā vayappatto ekam seṭṭhim nissāya bhatiyā kammaṃ karonto jīvikaṃ kappesi. So ekadivasam

“pātarāsathāya me bhavissatī”ti antarāpaṇato cattāro kummāsapiṇḍe gahetvā kammantaṃ gacchanto cattāro paccekabuddhe bhikkhācārathāya bārāṇasinagarābhīmukhe āgacchante disvā “ime bhikkhaṃ sandhāya bārāṇasiṃ gacchanti, mayhampime cattāro kummāsapiṇḍā atthi, yaṃnūnāhaṃ ime imesaṃ dadeyya”nti cintetvā te upasaṃkamitvā vanditvā “bhante, ime me hatthe cattāro kummāsapiṇḍā, ahaṃ ime tumhākaṃ dadāmi, sādhu me, bhante, paṭiggaṇhatha, evamidaṃ puññaṃ mayhaṃ bhavissati dīgharattaṃ hitāya sukhāyā”ti vatvā tesam̐ adhvāsanaṃ viditvā vālikaṃ ussāpetvā cattāri āsanāni paññāpetvā tesam̐ upari sākḥābhaṅgaṃ attharivā paccekabuddhe paṭipāṭiyā nisīdāpetvā paṇṇapuṭena udakaṃ āharitvā dakkhiṇodakaṃ pātetvā catūsu pattesu cattāro kummāsapiṇḍe patiṭṭhāpetvā vanditvā “bhante, etesaṃ nissandena daliddagehe nibbatti nāma mā hotu, sabbaññūtaññāppaṭivedhassa paccayo hotū”ti āha. Paccekabuddhā paribhuñjimsu, paribhogāvasāne anumodanaṃ katvā uppatitvā nandamūlakapabbhārameva agamaṃsu.

Bodhisatto añjaliṃ paggayha paccekabuddhagataṃ pītiṃ gahetvā tesu cakkhupathaṃ atītesu attano kammantaṃ gantvā yāvātāyukaṃ dānaṃ anussarivā kālaṃ katvā tassa phalena bārāṇasirañño aggamaheṣiyā kucchimhi nibbatti, brahmadattakumārotissa nāmaṃ akaṃsu. So attano padaṣā gamanakālate paṭṭhāya “ahaṃ imasmimyeva nagare bhatako hutvā kammantaṃ gacchanto paccekabuddhānaṃ cattāro kummāsapiṇḍe datvā tassa dānassa phalena idha nibbato”ti pasannādāse mukhanimittaṃ viya sabbaṃ purimajātikiriyam̐ jātissaraññaṇena pākaṭaṃ katvā passi. So vayappatto takkasilāyaṃ gantvā sabbasippāni uggaṇhitvā paccāgantvā sikkhitasippaṃ pitu dassetvā tuṭṭhena pitarā oparajje patiṭṭhāpito, aparabhāge pitu accayena rajje patiṭṭhāsi. Athassa uttamarūpadharaṃ kosalarāñño dhītaraṃ ānetvā aggamaheṣiṃ akaṃsu, chattaṃāṅgaladivase panassa sakalanagaraṃ devanagaraṃ viya alaṅkarimsu.

So nagaraṃ padakkiṇaṃ katvā alaṅkatapāsādaṃ abhiruhitvā mahātalamaṃjje samussitasetacchattaṃ pallaṅkaṃ abhiruyha nisinno parivāretvā ṭhite ekato amacce, ekato brāhmaṇagahapatiādayo nānāvibhave sirivilāsasamujjale, ekato nānāvidhapaṇṇākārahathhe nāgaramanusse, ekato alaṅkatadevaccharasaṅghaṃ viya soḷasasahasasāṅkhaṃ nāṭakitthigaṇanti imaṃ atīmanoraṃaṃ sirivibhavaṃ olokento attano pubbakammaṃ anussarivā “idaṃ suvaṇṇapiṇḍikaṃ kañcanaṃālaṃ setacchattaṃ, imāni ca anekasahasāni hatthivāhanaassavāhanarathavāhanāni, maṇimuttādīpūrītā sāragabbhā, nānāvidhadhaññāpūrītā mahāpathavī, devaccharapaṭibhāgā nāriyo cāti sabbopesa mayhaṃ sirivibhavo na aññassa santako, catunnaṃ paccekabuddhānaṃ dinnassa catukummāsapiṇḍādānasseva santako, te nissāya mayā esa laddho”ti paccekabuddhānaṃ guṇaṃ anussarivā attano kammaṃ pākaṭaṃ akāsi. Tassa taṃ anussarantassa sakalasarīraṃ pītiyā pūri. So pītiyā temitahadayo mahājanassa maṃjje udānagītaṃ gāyanto dve gāthā abhāsi –

142. “Na kiratthi anomadassisu, pāricariyā buddhesu appikā;  
Sukkhāya aloṅikāya ca, passa phalaṃ kummāsapiṇḍiyā.
143. “Hatthigavāssā cime bahū, dhanadhaññaṃ pathavī ca kevalā;  
Nāriyo cimā accharūpamā, passa phalaṃ kummāsapiṇḍiyā”ti.

Tattha **anomadassisūti** anomassa alāmakassa paccekabodhiññaṇassa diṭṭhattā paccekabuddhā anomadassino nāma. **Pāricariyāti** abhivādanapaccuṭṭhānañjalikammādibhedā sāmīcikiriyāpi, sampatte disvā attano santakaṃ appaṃ vā bahuṃ vā lūkhaṃ vā paṇītaṃ vā deyyadhammaṃ cittaṃ pasādetvā guṇaṃ sallakkhetvā tisso cetanā visodhetvā phalaṃ saddahitvā pariccajanakiriyāpi. **Buddhesūti** paccekabuddhesu. **Appikāti** mandā parittā nāma natthi kira. **Sukkhāyāti** nisnehāya. **Aloṅikāyāti** phāṇitavirahitāya. Nipphāṇitattā hi sā “aloṅikā”ti vuttā. **Kummāsapiṇḍiyāti** cattāro kummāsapiṇḍe ekato katvā gahitaṃ kummāsaṃ sandhāya evamāha. Guṇavantaṇaṃ samaṇabrāhmaṇānaṃ guṇaṃ sallakkhetvā cittaṃ pasādetvā phaluppattiṃ pāṭikaṅkhamānaṃ tisso cetanā visodhetvā dinnapadakkiṇā appikā nāma natthi, nibbattanibbattaṭṭhāne mahāsampattimeva detīti vuttaṃ hoti. Hoti cettha –

“Natthi citte pasannamhi, appikā nāma dakkhiṇā;  
Tathāgate vā sambuddhe, atha vā tassa sāvake.

“Tiṭṭhante nibbute cāpi, same citte samaṃ phalaṃ;  
Cetopaṇidhihetu hi, sattā gacchanti suggati”nti. (vi. va. 804, 806);

Imassa panatthassa dīpanatthāya –

“Khīrodanaṃ ahamadāsiṃ, bhikkhuno piṇḍāya carantassa; (Vi. va. 413);  
Tassā me passa vimānaṃ, accharā kāmavaṇṇinīhamasmi. (vi. va. 334);

“Accharāsahassassāhaṃ, pavarā passa puññānaṃ vipākaṃ;  
Tena metādiso vaṇṇo, tena me idha mijjhati.

“Uppajjanti ca me bhogā, ye keci manaso piyā;  
Tenamhi evaṃ jalitānubhāvā, vaṇṇo ca me sabbadisā pabhāsati”ti. (vi. va. 334-336) –

Evamādīni vimānavatthūni āharitabbāni.

**Dhanadhaññanti** muttādidhanañca satta dhaññāni ca. **Pathavī ca kevalā**ti sakalā cesā mahāpathavīti sakalopathaviṃ hatthagataṃ maññamāno vadati. **Passa phalaṃ kummāsapiṇḍiyāti** attano dānaphalaṃ attanāva dassento evamāha. Dānaphalaṃ kira bodhisattā ca sabbaññubuddhāyeva ca jānanti. Teneva satthā itivuttake suttantaṃ kathento –

“Evañce, bhikkhave, sattā jāneyyumaṃ dānaṃ vibhāgassa vipākaṃ, yathāhaṃ jānāmi, na adatvā bhuñjeyyumaṃ, na ca nesaṃ maccheramalaṃ cittaṃ pariyādāya tiṭṭheyya. Yopi nesaṃ assa carimo ālopo carimaṃ kabaḷaṃ, tatopi na asaṃvibhajitvā bhuñjeyyumaṃ, sace nesaṃ paṭiggāhakā assu. Yasmā ca kho, bhikkhave, sattā na evaṃ jānanti dānaṃ vibhāgassa vipākaṃ, yathāhaṃ jānāmi, tasmā adatvā bhuñjanti, maccheramalañca nesaṃ cittaṃ pariyādāya tiṭṭhati”ti (itivu. 26).

Bodhisattopi attano chattamaṅgaladivase sañjātapītipāmojjo imāhi dvīhi gāthāhi udānagītaṃ gāyi. Tato paṭṭhāya “rañño piyagīta”nti bodhisattassa nāṭakitthiyo ca sesanāṭakagandhabbādayopi ca antepurājanopi antonagaravāsīnopi bahinagaravāsīnopi pānāgāresupi amaccamaṇḍalesupi “amhākaṃ rañño piyagīta”nti tadeva gītaṃ gāyanti. Evaṃ addhāne gate aggamaheṣī tassa gītassa atthaṃ jānitukāmā ahoṣi, mahāsattaṃ pana pucchitumaṃ na visahati. Athassā ekasmiṃ guṇe pasīditvā ekadivasaṃ rājā “bhadde, varaṃ te dassāmi, varaṃ gaṇhāhi”ti āha. “Sādhu, deva, gaṇhāmī”ti. “Hatthiassādīsu te kiṃ dammī”ti? “Deva, tumhe nissāya mayhaṃ na kiñci natthi, na me etehi attho, sace pana dātukāmāttha, tumhākaṃ gītassa atthaṃ kathetvā dethā”ti. “Bhadde, ko te iminā varena attho, aññaṃ gaṇhāhi”ti. “Deva, aññaena me attho natthi, etadeva gaṇhāmī”ti. “Sādhu bhadde, kathessāmi, tuyhaṃ pana ekikāya raho na kathessāmi, dvādasayojanikāya bārānasiyā bheriṃ carāpetvā rājadvāre ratanaṃ ḍapaṃ kāretvā ratanapallaṅkaṃ paññāpetvā amaccabrāhmaṇādīhi ca nāgarehi ceva soḷasahi itthisahashehi ca parivuto tesam majjhe ratanapallaṅke nisīditvā kathessāmī”ti. Sā “sādhu, devā”ti sampaṭicchi.

Rājā tathā kāretvā amaragaṇaparivuto sakko devarājā viya mahājanakāyaparivuto ratanapallaṅke nisīdi. Devīpi sabbālaṅkārapaṭimaṇḍitā kañcanabhaddapīṭhaṃ attharitvā ekamante akkhikoṭiyā oloketvā tathārūpe ṭhāne nisīditvā “deva, tumhākaṃ tussitvā gāyanaṃ ḍalaḍḍitvā tāva me atthaṃ gaganatale puñṇacandaṃ uṭṭhāpento viya pākaṃ katvā kathethā”ti vatvā tatiyaṃ gāthamāha –

144. “Abhikkhaṇaṃ rājakuñjara, gāthā bhāsasi kosalādhipa;  
Pucchāmi taṃ raṭṭhavaḍḍhana, bālhaṃ pītimano pabhāsasi”ti.

Tattha **kosalādhipāti** na so kosalaratthāhipo, kusale pana dhamme adhipatiṃ katvā viharati, tena naṃ ālapantī evamāha, kusalādhipa kusalajjhāsayaṭi attho. **Bālham pītimano pabhāsasīti** ativiya pītiyuttacitto hutvā bhāsasi, tasmā kathetha tāva me etāsaṃ gāthānaṃ atthanti.

Athassa gāthānamattham āvi karonto mahāsatto catasso gāthā abhāsi –

145. “Imasmiṃyeva nagare, kule aññatare ahuṃ;  
Parakammakaro āsiṃ, bhatako sīlasaṃvuto.
146. “Kammāya nikkhamantohaṃ, caturo samaṇeddasam;  
Ācārasīlasampanne, sītibhūte anāsave.
147. “Tesu cittaṃ pasādetvā, nisīdetvā paṇṇasanthate;  
Adaṃ buddhānaṃ kummāsaṃ, pasanno sehi paṇibhi.
148. “Tassa kammaṃ kusalassa, idaṃ me edisaṃ phalaṃ;  
Anubhomi idaṃ rajjaṃ, phītaṃ dharaṇimuttama”nti.

Tattha **kule aññatare**ti nāmena vā gottena vā apākaṭe ekasmiṃyeva kule. **Ahanti** nibbatiṃ. **Parakammakaro āsinti** tasmīṃ kule jātovāhaṃ daliddatāya parassa kammaṃ katvā jīvikam kappento parakammakaro āsiṃ. **Bhatakoti** paravetanabhato. **Sīlasaṃvutoti** pañcasīlasaṃvare tthito, bhatiyā jīvantopi dussīlyam pahāya sīlasampannova ahosinti dīpeti. **Kammāya nikkhamantohanti** taṃ divasaṃ kattabbakiccassa karaṇatthāya nikkhanto ahaṃ. **Caturo samaṇeddasanti** bhadde, ahaṃ nagarā nikkhamma mahāmaggaṃ āruya attano kammabhūmiṃ gacchanto bhikkhāya bārāṇasinagaraṃ pavisante samitapāpe cattāro pabbajite addasaṃ. **Ācārasīlasampanneti** ekavīsatiyā anesanāhi jīvikakappanaṃ anācāro nāma, tassa paṭipakkhena ācārena ceva maggaphalehi āgatena sīlena ca samannāgate. **Sītibhūte**ti rāgādipariḷāhavūpasamena ceva ekādasagginibbāpanena ca sītibhāvappatte. **Anāsaveti** kāmāsavādivirahite. **Nisīdetvāti** vālikāsanānaṃ upari santhate paṇṇasanthare nisīdāpetvā. Santharo hi idha santhatoti vutto. **Adanti** nesaṃ udakaṃ datvā sakkaccaṃ sakehi hatthehi kummāsaṃ adāsiṃ. **Kusalassāti** ārogyānavajjattthena kusalassa. **Phalanti** tassa nissandaphalaṃ. **Phītanti** sabbasampattiphullitaṃ.

Evañca mahāsattassa attano kammaphalaṃ vitthāretvā kathentassa sutvā devī pasannamanā “sace, mahārāja, evaṃ paccakkhato dānaphalaṃ jānātha, ito dāni paṭṭhāya ekaṃ bhattapiṇḍaṃ labhitvā dhammikasamaṇabrāhmaṇānaṃ datvāva paribhuñjeyyāthā”ti bodhisattassa thutiṃ karontī –

149. “Dadaṃ bhuñja mā ca pamādo, cakkaṃ vattaya kosalādhipa;  
Mā rāja adhammiko ahu, dhammaṃ pālaya kosalādhipā”ti. – imaṃ gāthamāha;

Tattha **dadaṃ bhuñjāti** aññesaṃ datvāva attanā bhuñja. **Mā ca pamādoti** dānādīsu puññesu mā pamajji. **Cakkaṃ vattaya kosalādhipāti** kusalajjhāsaya, mahārāja, patirūpadesavāsādikam catubbidham dhammacakkaṃ pavattehi. Pakatiratho hi dvīhi cakkehi gacchati, ayaṃ pana kāyo imehi catūhi cakkehi devalokaṃ gacchati, tena te “dhammacakka”nti saṅkhyam gatā, taṃ tvam cakkaṃ pavattehi. **Adhammikoti** yathā aññe chandāgatiṃ gacchantā lokaṃ ucchuyante piḷetvā viya dhanameva saṃkaḍḍhantā adhammikā honti, tathā tvam mā adhammiko ahu. **Dhammaṃ pālayāti** –

“Dānaṃ sīlaṃ pariccāgaṃ, ajjavaṃ maddavaṃ tapaṃ;  
Akkodham avihimsaṅca, khantiṅca avirodhana”nti. (jā. 2.21.176) –

Imaṃ pana dasavidham rājadhammeva pālaya rakkha, mā pariccaji.

Mahāsatto tassā vacanaṃ sampañcchanto –

**150.** “Sohaṃ tadeva punappunaṃ, vaṭumaṃ ācarissāmi sobhane;  
Ariyācaritaṃ sukosale, arahanto me manāpāva passitu”nti. – gāthamāha;

Tattha **vaṭumanti** maggaṃ. **Ariyācaritanti** ariyehi buddhādīhi āciṇṇaṃ. **Sukosaleti** sobhane kosalarañño dhīteti attho. **Arahantoti** kilesehi ārakattā, arānañca arīnañca hatattā, paccayānaṃ arahattā evaṃladdhanāmā paccakabuddhā. Idaṃ vuttaṃ hoti – bhadde, kosalarājadhīte so ahaṃ “dānaṃ me dinna”nti tittimā akatvā punappunaṃ tadeva ariyācaritaṃ dānamaggaṃ ācarissāmi. Mayhañhi aggadakkhiṇeyyattā arahanto manāpadassanā, cīvarādīni dātukāmatāya teyeva passitum icchāmīti.

Evañca pana vatvā rājā deviyā sampattim oloketvā “bhadde, mayā tāva purimabhava attano kusalakammaṃ vitthāretvā kathitaṃ, imāsaṃ pana nārīnaṃ majjhe rūpena vā līlāvilāsena vā tayā sadisī ekāpi natthi, sā tvaṃ kiṃ kammaṃ katvā imaṃ sampattim paṭilabhī”ti pucchanto puna gāthamāha –

**151.** “Devī viya accharūpamā, majjhe nārīgaṇassa sobhasi;  
Kiṃ kammamakāsi bhaddakaṃ, kenāsi vaṇṇavatī sukosale”ti.

Tassattho – bhadde **sukosale** kosalarañño sudhīte tvaṃ rūpasampattiyā **accharūpamā** tidasapure sakkassa devarañño aññatarā devadhīta viya imassa nārīgaṇassa majjhe sobhasi, pubbe kiṃ nāma **bhaddakaṃ** kalyāṇakammaṃ akāsi, kenāsi kāraṇena evaṃ vaṇṇavatī jātāti.

Athassa sā purimabhava kalyāṇakammaṃ kathentī sesagāthādvayamāha –

**152.** “Ambaṭṭhakulassa khattiya, dāsyaḥaṃ parapesiyā ahuṃ;  
Saññatā ca dhammajivinī, sīlavatī ca apāpadassanā.

**153.** “Uddhaṭabhattaṃ ahaṃ tadā, caramānassa adāsīm bhikkhuno;  
Vittā sumanā sayam ahaṃ, tassa kamma phalaṃ mamedisa”nti.

Sāpi kira jātissarāva ahosi, tasmā attano jātissaraññaṇena paricchinditvāva kathesi.

Tattha **ambaṭṭhakulassāti** kuṭumbiyakulassa. **Dāsyaḥanti** dāsī ahaṃ, “dāsāha”ntipi pāṭho. **Parapesiyāti** parehi tassa tassa kiccassa karaṇatthāya pesitabbā pesanakārikā. **Saññatāti** dāsīyo nāma dussīlā honti, ahaṃ pana tīhi dvārehi saññatā sīlasampannā. **Dhammajivinīti** paravañcanādīni akatvā dhammena samena pavattitajīvikā. **Sīlavatīti** ācārasampannā guṇavatī. **Apāpadassanāti** kalyāṇadassanā piyadhammā.

**Uddhaṭabhattanti** attano pattakoṭṭhāsavasena uddharitvā laddhabhāgabhattaṃ. **Bhikkhunoti** bhinnakilesassa paccakabuddhassa. **Vittā sumanāti** tuṭṭhā somanassajātā kammaphalaṃ saddahantī. **Tassa kammassāti** tassa ekabhikkhādānakammaṃ. Idaṃ vuttaṃ hoti – ahaṃ, mahārāja, pubbe sāvattiyam aññatarassa kuṭumbiyakulassa dāsī hutvā attano laddhabhāgabhattaṃ ādāya nikkhamantī ekaṃ paccakabuddhaṃ piṇḍāya carantaṃ disvā attano taṇhaṃ milāpetvā saññatādiguṇasampannā kammaphalaṃ saddahantī tassa taṃ bhattaṃ adāsīm, sāhaṃ yāvatāyukaṃ thatvā kālaṃ katvā tattha sāvattiyam kosalarañño aggamahesiyā kucchimhi nibbattitvā idāni tava pāde paricaramānā evarūpaṃ sampattim anubhavāmi, tassa mama kamma idamīdisaṃ phalanti. Tattha guṇasampannānaṃ dinnadānassa mahapphalabhāvadassanattaṃ –

“Aggato ve pasannāna”nti (itivu. 90) ca.

“Esa devamanussānaṃ, sabbakāmadado nidhī”ti (khu. pā. 8.10) ca. –

Ādigāthā vitthāretabbā.

Iti te ubhopi attano purimakammaṃ vitthārato kathetvā tato paṭṭhāya catūsu nagaradvāresu nagaramajjhe nivesanadvāreti cha dānasālāyo kāretvā sakalajambudīpaṃ unnaṅgalaṃ katvā mahādānaṃ pavattetvā sīlaṃ rakkhitvā uposathakammaṃ katvā jīvitapariyosāne saggaparāyaṇā ahesuṃ.

Satthā imaṃ dhammadesanaṃ āharitvā jātaṃ samodhānesi – “tadā devī rāhulamātā ahosi, rājā pana ahameva ahosi”nti.

Kummāsapiṇḍijātakavaṇṇanā dasamā.

[416] 11. Parantapajātakavaṇṇanā

**Āgamissati me pāpanti** idaṃ satthā veḷuvane viharanto devadattassa vadhāya parisakkaṃ ārabba kathesi. Tadā hi dhammasabhāyaṃ kathaṃ samuṭṭhāpesuṃ “āvuso, devadatto tathāgatassa māraṇatthameva parisakkati, dhanuggahe payojesi, silaṃ pavijjhi, nāḷagirīṃ vissajjāpesi, tathāgatassa vināsattameva upāyaṃ karotī”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepeṣa mama vadhāya parisakki, tāsamattampi pana kātuṃ asakkonto attanāva dukkhaṃ anubhosi”ti vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto tassa aggamahesiyā kucchimhi nibbattitvā vayappatto takkasīlāyaṃ sabbasippāni sikkhi, sabbarutajānanamantaṃ uggaṇhi. So ācariyassa anuyogaṃ datvā bārāṇasiṃ paccāgacchi, pitā taṃ oparajje ṭhapesi. Kiñcāpi oparajje ṭhabeti, mārāpetukāmo pana naṃ hutvā daṭṭhumpi na icchi. Athekā siṅgālī dve potake gahetvā rattiṃ manussesu paṭisallīnesu niddhamanena nagaraṃ pāvīsi. Bodhisattassa ca pāsāde sayanagabbhassa avidūre ekā sālā atthi, tattheko addhikamanusso upāhanā omuñcitvā pādāmūle bhūmiyaṃ ṭhabetvā ekasmiṃ phalake nipajji, na tāva niddāyati. Tadā siṅgāliyā potakā chātā viraviṃsu. Atha tesam mātā “tātā, mā saddaṃ karittha, etissā sālāya eko manusso upāhanā omuñcitvā bhūmiyaṃ ṭhabetvā phalake nipanno na tāva niddāyati, etassa niddāyanakāle etā upāhanā āharitvā tumhe khādāpeṣāmi”ti attano bhāsāya āha. Bodhisatto mantānubhāvena tassā bhāsaṃ jānitvā sayanagabbhā nikkhamma vātapānaṃ vivaritvā “ko etthā”ti āha. “Ahaṃ, deva, addhikamanusso”ti. “Upāhanā te kuhi”nti? “Bhūmiyaṃ, devā”ti. “Ukkhitvā olambetvā ṭhapehī”ti. Taṃ sutvā siṅgālī bodhisattassa kujjhi.

Puna ekadivasam sā tatheva nagaraṃ pāvīsi. Tadā ceko mattamanusso “pānīyaṃ pivissāmi”ti pokkharāṇiṃ otaranto patitvā nimuggo nirassāso mari. Nivatthā panassa dve sātākā nivāsanantare kahāpaṇasahassaṃ aṅguliyaṃ ca muddikā atthi. Tadāpi sā puttake “chātāmhā, amma”ti viravante “tātā, mā saddaṃ karittha, etissā pokkharāṇiyā manusso mato, tassa idaṅcīdaṅca atthi, so pana maritvā sopāneyeva nipanno, tumhe etaṃ manussaṃ khādāpeṣāmi”ti āha. Bodhisatto taṃ sutvā vātapānaṃ vivaritvā “sālāya ko atthi”ti vatvā ekenuṭṭhāya “ahaṃ, devā”ti vutte “gaccha etissā pokkharāṇiyā matamanussassa sātāke ca kahāpaṇasahassaṃ aṅgulimuddikaṅca gahetvā sarīramassa yathā na uṭṭhahati, evaṃ uduke osīdāpehī”ti āha. So tathā akāsi. Sā punapi kujjhitvā “purimadivase tāva me puttakānaṃ upāhanā khādītuṃ na adāsi, ajja matamanussaṃ khādītuṃ na deti, hotu, ito dāni tatiyadivase eko sapattarājā āgantvā nagaraṃ parikkhipissati. Atha naṃ pitā yuddhatthāya peṣessati, tatra te sīsaṃ chindissanti, atha te galalohitaṃ pivitvā veraṃ muñcissāmi. Tvaṃ mayā saddhiṃ veraṃ bandhasi, jānissāmi”ti viravitvā bodhisattaṃ tajjetvā puttake gahetvā nikkhamati.

Tatiyadivase eko sapattarājā āgantvā nagaraṃ parivāresi. Rājā bodhisattaṃ “gaccha, tāta, tena saddhiṃ yujjhā”ti āha. “Mayā, deva, ekaṃ diṭṭhaṃ atthi, gantuṃ na visahāmi, jīvitantarāyaṃ bhāyāmi”ti. “Mayhaṃ tayi mate vā amate vā kiṃ, gacchāheva tva”nti? So “sādhu, devā”ti mahāsatto parisam gahetvā sapattarañño ṭhitadvārena anikkhamitvā aññaṃ dvāraṃ vivaritvā nikkhami. Tasmim gacchante sakalanagaraṃ tucchaṃ viya ahosi. Sabbe teneva saddhiṃ nikkhamiṃsu. So ekasmiṃ sabhāgaṭṭhāne khandhāvāraṃ nivāsetvā acchi. Rājā cintesi “uparājā nagaraṃ tucchaṃ katvā balaṃ



gahetvā palāyi, sapattarājāpi nagaram parivāretvā t̥hito, idāni mayham jīvitam natthī”ti. So “jīvitam rakkhissāmī”ti deviñca purohitañca parantapam nāmekam pādamūlikañca dāsam gahetvā rattibhāge aññātakavesena palāyitvā araññam pāvīsi. Bodhisatto tassa palātabhāvam ñatvā nagaram pavisitvā yuddham katvā sapattam palāpetvā rajjam gañhi. Pitāpissa ekasmiṃ nadītīre pañnasālam kāretvā phalāphalena yāpento vasi. Rājā ca purohito ca phalāphalathāya gacchanti. Parantapadāso deviyā saddhiṃ pañnasālāyameva hoti. Tatrāpi rājānam paṭicca deviyā kucchismiṃ gabbho patiṭṭhāsi. Sā abhiñhasamsaggavasena parantapena saddhiṃ aticari. Sā ekadivasam parantapam āha “raññā ñāte neva tava, na mayham jīvitam atthi, tasmā mārehi na”nti. “Katham māremī”ti? Esa tam khaggañca nhānasāṭakañca gāhāpetvā nhāyitum gacchati, tatrassa nhānatthāne pamādam ñatvā khaggena sīsam chinditvā sarīram khaṇḍākhaṇḍikam katvā bhūmiyam nikhañāhīti. So “sādhū”ti sampaṭicchī.

Athekadivasam purohitoyeva phalāphalathāya gantvā avidūre rañño nhānatitthasāmante ekam rukkham āruyha phalāphalam gañhāti. Rājā “nhāyissāmī”ti parantapam khaggañca nhānasāṭakañca gāhāpetvā nadītīram agamāsi. Tattha nam nhānakāle pamādamāpannam “māressāmī”ti parantapo gīvāya gahetvā khaggaṃ ukkhipi. So maraṇabhayena viravi. Purohito tam saddam sutvā olokento parantapam rājānam mārentam disvā bhītatasito sākham vissajjetvā rukkhato oruyha ekam gumbam pavisitvā nilīyi. Parantapo tassa sākāvissajjanasaddam sutvā rājānam māretvā bhūmiyam khañitvā “imasmiṃ thāne sākāvissajjanasaddo ahosi, ko nu kho etthā”ti vicinanto kañci adisvā nhatvā gato. Tassa gatakāle purohito nisinnatthānā nikkhamitvā rañño sarīram khaṇḍākhaṇḍikam chinditvā āvāte nikhātabhāvam ñatvā nhatvā attano vadhabhayena andhavesam gahetvā pañnasālam agamāsi. Tam disvā parantapo “kiṃ te, brāhmaṇa, kata”nti āha. So ajānanto viya “deva, akkhīni me nāsetvā āgatomhi, ussannāsīvise araññe ekasmiṃ vammikapasse atthāsim, tatrekena āsīvisena nāsavāto vissattho me bhavissati”ti āha. Parantapo “na maṃ sañjānāti, ‘devā’ti vadati, samassāsessāmi na”nti cintetvā “brāhmaṇa, mā cintayī, aham tam paṭijaggissāmī”ti assāsetvā phalāphalam datvā santappesi. Tato paṭṭhāya parantapadāso phalāphalam āhari, devīpi puttam vijāyi. Sā putte vadḍhante ekadivasam paccūsasamaye sukhanisinnā saṇikam parantapadāsam etadavoca “tvam rājānam mārento kenaci diṭṭho”ti. “Na maṃ koci addasa, sākāvissajjanasaddam pana assosim, tassā sākāya manussena vā tiracchānena vā vissatthabhāvam na jānāmi, yadā kadāci pana me bhayam āgacchantam sākāvissatthatthānato āgamissati”ti tāya saddhiṃ sallapanto paṭhamam gāthamāha –

154. “Āgamissati me pāpam, āgamissati me bhayam;  
Tadā hi calitā sākā, manussena migena vā”ti.

Tattha **pāpanti** lāmakam aṇiṭṭham akantam. **Bhayanti** cittutrāsabhayampi me āgamissati, na sakkā nāgantum. Kiṃkāraṇā? **Tadā hi calitā sākā manussena migena vāti** na paññāyati, tasmā tato maṃ bhayam āgamissati.

Te “purohito niddāyatī”ti maññimsu. So pana aniddāyamānova tesam katham assosi. Athekadivasam purohito parantapadāse phalāphalathāya gate attano brāhmaṇim saritvā vilapanto dutiyam gāthamāha –

155. “Bhīruyā nūna me kāmo, avidūre vasantiyā;  
Karissati kisaṃ paṇḍum, sāva sākā parantapa”nti.

Tattha **bhīruyāti** itthī ca nāma appamattakenāpi bhāyati, tasmā “bhīrū”ti vuccati. **Avidūreti** nātidūre ito katipayayanamatthake vasantiyā bhīruyā mayham brāhmaṇiyā yo mama kāmo uppanno, so nūna maṃ kisañca paṇḍuñca karissatīti dasseti. “**Sāva sākā**”ti iminā pana opammaṃ dasseti, yathā sākā parantapam kisaṃ paṇḍum karoti, evanti attho.

Iti brāhmaṇo gāthameva vadati, attham pana na katheti, tasmā imāya gāthāya kiccaṃ deviyā apākaṭam. Atha nam “kiṃ kathesi brāhmaṇā”ti āha. Sopi “sallakkhitam me”ti vatvā puna ekadivasam

tatiyaṃ gāthamāha –

156. “Socayissati maṃ kantā, gāme vasamaninditā;  
Karissati kisaṃ paṇḍuṃ, sāva sākḥā parantapa”nti.

Tattha **socayissatī** sokuppādanena sukkhāpessati. **Kantā**ti iṭṭhabhariyā. **Gāme vasanti** bārāṇasiyaṃ vasantīti adhippāyo. **Aninditā**ti agarahitā uttamarūpadharā.

Punekadivasam catuttham gāthamāha –

157. “Tayā maṃ asitāpaṅgi, sitāni bhaṇitāni ca;  
Kisaṃ paṇḍuṃ karissanti, sāva sākḥā parantapa”nti.

Tattha **tayā maṃ asitāpaṅgī**ti tayā maṃ asitā apaṅgi. Idaṃ vuttaṃ hoti – bhadde, akkhikoṭito añjanasalākāya nīharitvā abhisāṅkhataasitāpaṅgi tayā pavattitāni mandahasitāni ca maṃ sā vissaṭṭhasākḥā viravamānā parantapaṃ viya kisaṃ paṇḍuṃ karissatīti. Pa-kārassa va-kāraṃ katvā “vaṅgī”tipi pāṭhoyeva.

Aparabhāge kumāro vayappatto ahosi soḷasavassuddesiko. Atha naṃ brāhmaṇo yaṭṭhikoṭiṃ gāhāpetvā nhānatittham gantvā akkhīni ummīletvā olokesi. Kumāro “nanu tvaṃ brāhmaṇa, andho”ti āha. So “nāham andho, iminā me upāyena jīvitam rakkhāmī”ti vatvā “tava pitaram jānāsī”ti āha. “Ayaṃ me pitā”ti vutte “nāyam tava pitā, pitā pana te bārāṇasirājā, ayaṃ tumbhākaṃ dāso, so mātari te vipaṭṭipajjivā imasmim ṭhāne tava pitaram māretvā nikhaṇī”ti aṭṭhīni nīharitvā dassesi. Kumārassa balavakodho uppajji. Atha naṃ “idāni kiṃ karomī”ti pucchi. “Yaṃ te ismiṃyeva titthe pitu tena kataṃ, taṃ karohī”ti sabbaṃ pavattiṃ ācikkhitvā kumāraṃ katipāham tharugaṇhanam sikkhāpesi. Athekadivasam kumāro khaggañca nhānasāṭakañca gahetvā “nhāyituṃ gacchāma, tātā”ti āha. Parantapo “sādhū”ti tena saddhiṃ gato. Athassa nhāyituṃ otiṇṇakāle dakkhiṇahatthena asim, vāmahatthena cūlam gahetvā “tvaṃ kira imasmimyeva titthe mama pitaram cūlāya gahetvā viravantam māresi, ahampi taṃ tatheva karissāmī”ti āha. So maraṇabhayabhīto paridevamāno dve gāthā abhāsi –

158. “Āgamā nūna so saddo, asaṃsi nūna so tava;  
Akkhātaṃ nūna taṃ tena, yo taṃ sākhamakampayī.

159. “Idaṃ kho taṃ samāgamma, mama bālassa cintitaṃ;  
Tadā hi calitā sākḥā, manussena migena vā”ti.

Tattha **āgamā**ti so sākhasaddo nūna taṃ āgato sampatto. **Asaṃsi nūna so tavā**ti so saddo tava ārocesi maññe. **Akkhātaṃ nūna taṃ tenā**ti yo satto tadā taṃ sākham akampayī, tena “evaṃ te pitā mārito”ti nūna taṃ kāraṇam akkhātaṃ. **Samāgammā**ti saṅgamma, samāgatanti attho. Yaṃ mama bālassa “tadā calitā sākḥā manussena migena vā, tato me bhayaṃ uppajjissatī”ti cintitaṃ parivittakitaṃ ahosi, idaṃ tayā saddhiṃ samāgatanti vuttaṃ hoti.

Tato kumāro osānagāthamāha –

160. “Tatheva tvaṃ avedesī, avañci pitaram mama;  
Hantvā sākḥāhi chādentō, āgamissati me bhaya”nti.

Tattha **tatheva tvaṃ avedesī**ti tatheva tvaṃ aññāsī. **Avañci pitaram mamā**ti tvaṃ mama pitaram “nhāyituṃ gacchāmā”ti vissāsetvā nhāyantam māretvā khaṇḍākhāṇḍikaṃ chinditvā nikhaṇitvā “sace koci jānissati, mayhampi evarūpaṃ bhayaṃ āgacchissatī”ti vañcesi, idaṃ kho pana maraṇabhayaṃ idāni tavāgatanti.

Iti taṃ vatvā tattheva jīvitakkhayaṃ pāpetvā nikhaṇitvā sākāhi paṭicchādetvā khaggaṃ dhovitvā nhatvā paṇṇasālaṃ gantvā tassa māritabhāvaṃ purohitassa kathetvā mātaraṃ paribhāsivā “idha kiṃ karissāmā”ti tayo janā bārāṇasimeva agamaṃsu. Bodhisatto kaniṭṭhassa oparajjaṃ datvā dānādīni puññāni katvā saggapadaṃ pūresi.

Satthā imaṃ dhammadešanaṃ āharitvā saccāni pakāsetvā jātakam samodhānesi – “tadā piturājā devadatto ahosi, purohito ānando, puttārājā pana ahameva ahosi”nti.

Parantapajātakavaṇṇanā ekādasamā.

Gandhāravaggo dutiyo.

Jātakuddānaṃ –

Kukku manoja sutano, gijjha dabbhapuppha paṇṇako;  
Sattubhasta aṭṭhiseno, kapi bakabrahmā dasa.

Gandhāro mahākapi ca, kumbhakāro daḷhadhammo;  
Somadatto susīmo ca, koṭasimbali dhūmakārī;  
Jāgaro kummāsapiṇḍo, parantapā ekādasa.

Sattakanipātavaṇṇanā niṭṭhitā.

## 8. Aṭṭhakanipāto

[417] 1. Kaccānijātakavaṇṇanā

**Odātavattā suci allakesāti** idaṃ satthā jetavane viharanto aññataraṃ mātuposakaṃ upāsakaṃ ārabha katesi. So kira sāvattiyam kuladārako ācārasampanno pitari kālakate mātudevato hutvā mukhadhovanadantakaṭṭhadānanhāpanapādadhovanādiveyyāvaccakammena ceva yāgubhattādīhi ca mātaraṃ paṭijaggi. Atha naṃ mātā “tāta, tava aññānipi gharāvāsakiccāni atthi, ekaṃ samajātikaṃ kulakumārikaṃ gaṇhāhi, sā maṃ possessati, tvampi attano kammaṃ karissasī”ti āha. “Amma, ahaṃ attano hitasukhaṃ apaccāsīsamāno tumhe upaṭṭhahāmi, ko añño evaṃ upaṭṭhahissatī”ti? “Kulavaḍḍhanakammaṃ nāma tāta, kātuṃ vaṭṭatī”ti. “Na mayhaṃ gharāvāsena attho, ahaṃ tumhe upaṭṭhahitvā tumhākaṃ dhūmakāle pabbajissāmī”ti. Athassa mātā punappunaṃ yācitvāpi maṃ alabhamānā tassa chandaṃ aggahetvā samajātikaṃ kulakumārikaṃ ānesi. So mātaraṃ appaṭikkhipitvā tāya saddhiṃ saṃvāsaṃ kappesi. Sāpi “mayhaṃ sāmiko mahantena ussāhena mātaraṃ upaṭṭhahati, ahampi naṃ upaṭṭhahissāmī, evamassa piyā bhavissāmī”ti cintetvā taṃ sakkaccaṃ upaṭṭhahāhi. So “ayaṃ me mātaraṃ sakkaccaṃ upaṭṭhahī”ti tato paṭṭhāya laddhaladdhāni madhurakhādanīyādīni tassāyeva deti. Sā aparabhāge cintesi “ayaṃ laddhaladdhāni madhurakhādanīyādīni mayhaññeva deti, addhā mātaraṃ nīharitukāmo bhavissati, nīharaṇūpāyamassā karissāmī”ti evaṃ ayoniso ummuṃjivitvā ekaṃ divasaṃ āha – “sāmi, tayaṃ bahi nikkhamante tava mātā maṃ akkosatī”ti. So tuṇhī ahosi.

Sā cintesi – “imaṃ mahallikaṃ ujjhāpetvā puttassa paṭikūlaṃ kāressāmī”ti. Tato paṭṭhāya yāguṃ dadamānā accuṇhaṃ vā atisītaṃ vā atiloṇaṃ vā aloṇaṃ vā deti. “Amma, accuṇhā”ti vā “atiloṇā”ti vā vutte pūretvā sītodakaṃ pakkhipati. Puna “atisītalā, aloṇāyevā”ti vutte “idāneva ‘accuṇhā, atiloṇā’ti vatvā puna ‘atisītalā, aloṇā’ti vadasi, kā taṃ tosetuṃ sakkhissatī”ti mahāsaddaṃ karoti. Nhānodakampi accuṇhaṃ katvā piṭṭhiyaṃ āsiṅcati. “Amma, piṭṭhi me dahatī”ti ca vutte puna pūretvā sītodakaṃ pakkhipati. “Atisītaṃ, amma”ti vutte “idāneva ‘accuṇha’nti vatvā puna ‘atisīta’nti vadati, kā etissā avamānaṃ sahituṃ sakkhissatī”ti paṭivissakānaṃ katesi. “Amma, mañcake me bahū maṅgulā”ti ca vuttā mañcakaṃ nīharitvā tassa upari attano mañcakaṃ pothetvā “pothito me”ti atiharitvā paññapeti.

Mahāupāsikā diguṇehi maṅgulehi khajjamānā sabbarattiṃ nisinnāva vītināmetvā “amma, sabbarattiṃ maṅgulehi khādītāmhī”ti vadati. Itarā “hiyyo te mañcako pothito, kā imissā kiccaṃ nittharituṃ sakkoti”ti paṭivatvā “idāni naṃ puttana ujjhāpessāmi”ti tattha tattha kheḷasiṅghāṇikādīni vipākiritvā “kā imaṃ sakalagehaṃ asuciṃ karoti”ti vutte “mātā te evarūpaṃ karoti, ‘mā kari’ti vuccamānā kalahaṃ karoti, ahaṃ evarūpāya kālakaṇṇiyā saddhiṃ ekagehe vasituṃ na sakkomi, etaṃ vā ghare vasāpehi, maṃ vā”ti āha.

So tassā vacanaṃ sutvā “bhadde, tvaṃ taruṇā yattha kathaci gantvā jīvituṃ sakkā, mātā pana me jarādubbalā, ahamevassā paṭisaraṇaṃ, tvaṃ nikkhamitvā attano kulagehaṃ gacchāhī”ti āha. Sā tassa vacanaṃ sutvā bhītā cintesi “na sakkā imaṃ mātu antare bhindituṃ, ekaṃsenassa mātā piyā, sace panāhaṃ kulagharaṃ gamissaṃ, vidhavavāsaṃ vasantī dukkhitā bhavissāmi, purimanayeneva sassuṃ ārādhetaṃ paṭijaggissāmi”ti. Sā tato paṭṭhāya purimasadisameva taṃ paṭijaggi. Athekadivasāṃ so uposako dhammassavanatthāya jetavanaṃ gantvā satthāraṃ vanditvā ekamantaṃ nisīdi. “Kiṃ, upāsaka, tvaṃ puññakammesu na pamajjasi, mātuupaṭṭhānakammaṃ pūresi”ti ca vutto “āma, bhante, sā pana mama mātā mayhaṃ aruciyāyeva ekaṃ kuladārikaṃ ānesi, sā idaṇcidaṇca anācārakammaṃ akāsī”ti sabbaṃ satthu ācikkhitvā “iti bhagavā sā itthī neva maṃ mātu antare bhindituṃ sakkhi, idāni naṃ sakkaccaṃ upaṭṭhahati”ti āha. Satthā tassa kathaṃ sutvā “idāni tāva tvaṃ upāsaka, tassā vacanaṃ na akāsī, pubbe panetissā vacanena tava mātaraṃ nikkadḍhitvā maṃ nissāya puna gehaṃ ānetvā paṭijaggi”ti vatvā tena yācito aṭṭhaṃ āhari.

Atīte bārānasiyaṃ brahmadatte rajjaṃ kārente aññatarassa kulassa putto pitari kālakate mātudevato hutvā vuttaniyāmeneva mātaraṃ paṭijaggiṭi sabbaṃ heṭṭhā kathitanayeneva vitthāretabbaṃ. “Ahaṃ evarūpāya kālakaṇṇiyā saddhiṃ vasituṃ na sakkomi, etaṃ vā ghare vasāpehi, maṃ vā”ti vutte tassā kathaṃ gahetvā “mātuyeva me doso”ti mātaraṃ āha “amma, tvaṃ niccaṃ imasmiṃ ghare kalahaṃ karosi, ito nikkhamitvā aññasmiṃ yathārucite ṭhāne vasāhī”ti. Sā “sādhū”ti rodamānā nikkhamitvā ekaṃ samiddhakulaṃ nissāya bhatim katvā dukkhena jīvikaṃ kappesi. Sassuyā gharā nikkhantakāle suṇisāya gabbho paṭiṭṭhahi. Sā “tāya kālakaṇṇiyā gehe vasamānāya gabbhampi na paṭilabhiṃ, idāni me gabbho laddho”ti patino ca paṭivissakānaṇca kathenti vicarati.

Aparabhāge puttaṃ vijāyitvā sāmikaṃ āha “tava mātari gehe vasamānāya puttaṃ na labhiṃ, idāni me laddho, imināpi kāraṇena tassā kālakaṇṇibhāvaṃ jānāhī”ti. Itarā “mama kira nikkadḍhitakāle puttaṃ labhī”ti sutvā cintesi “addhā imasmiṃ loke dhammo mato bhavissati, sace hi dhammo mato na bhaveyya, mātaraṃ pothetvā nikkadḍhantā puttaṃ na labheyyuṃ, sukhaṃ na jīveyyūṃ, dhammassa matakabhattaṃ dassāmi”ti. Sā ekadivasāṃ tilapiṭṭhaṇca taṇḍulaṇca pacanathāliṇca dabbīṇca ādāya āmakasusānaṃ gantvā tīhi manussasīsehi uddhanaṃ katvā aggim jāletvā udakaṃ oruyha sasīsaṃ nhatvā sāṭakaṃ nivāsetvā mukhaṃ vikkhāletvā uddhanaṭṭhānaṃ gantvā kese mocetvā taṇḍule dhovituṃ ārabhi. Tadā bodhisatto sakko devarājā ahosi. Bodhisattā ca nāma appamattā honti, so tasmim khaṇe lokaṃ olokento taṃ dukkhappattaṃ “dhammo mato”ti saññāya dhammassa matakabhattaṃ dātukāmaṃ disvā “ajja mayhaṃ balaṃ dassessāmi”ti brāhmaṇavesena mahāmaggaṃ paṭipanno viya hutvā taṃ disvā maggā okkamma tassā santike ṭhatvā “amma, susāne āhāraṃ pacantā nāma natthi, tvaṃ iminā idha pakkena tilodanena kiṃ karissasī”ti kathaṃ samuṭṭhāpento paṭhamāṃ gāthamāha –

1. “Odātavattā suci allakesā, kaccāni kiṃ kumbhimadhissayitvā;  
Piṭṭhā tilā dhovasi taṇḍulāni, tilodano hehiti kissahetū”ti.

Tattha **kaccānī**ti taṃ gottena ālapati. **Kumbhimadhissayitvā**ti pacanathālikaṃ manussasīuddhanaṃ āropetvā. **Hehī**ti ayaṃ tilodano kissa hetu bhavissati, kiṃ attanā bhuñjissasi, udāhu aññaṃ kāraṇamatthīti.

Athassa sā ācikkhanti dutiyaṃ gāthamāha –

2. “Na kho ayaṃ brāhmaṇa bhojanatthā, tilodano hehiti sādhipakko;  
Dhammo mato tassa pahuttamajja, ahaṃ karissāmi susānamajjhe”’ti.

Tattha **dhammoti** jeṭṭhāpacāyanadhammo ceva tividhasucaritadhammo ca. **Tassa pahuttamajjāti** tassāhaṃ dhammassa idaṃ matakabhattaṃ karissāmīti attho.

Tato sakko tatiyaṃ gāthamāha –

3. “Anuvicca kaccāni karoḥi kiccaṃ, dhammo mato ko nu taveva saṃsi;  
Sahassanetto atulānubhāvo, na miyyatī dhammavaro kadācī”’ti.

Tattha **anuviccāti** upaparikkhitvā jānitvā. **Ko nu taveva saṃsīti** ko nu tava evaṃ ācikkhi. **Sahassanetto**ti attānaṃ dhammavaraṃ uttamadhammaṃ katvā dassento evamāha.

Taṃ vacanaṃ sutvā itarā dve gāthā abhāsi –

4. “Daḥhappamāṇaṃ mama ettha brahme, dhammo mato natthi mamettha kaṅkhā;  
Ye yeva dāni pāpā bhavanti, te teva dāni sukhita bhavanti.
5. “Suṇisā hi mayhaṃ vañjhā ahoṣi, sā maṃ vadhitvāna vijāyi puttaṃ;  
Sā dāni sabbassa kulassa issarā, ahaṃ panamhi apaviddhā ekikā”’ti.

Tattha **daḥhappamāṇanti** daḥhaṃ thiraṃ nissaṃsayam brāhmaṇa ettha mama pamāṇanti vadati. **Ye yeti** tassa matabhāve kāraṇaṃ dassentī evamāha. **Vadhitvānāti** pothetvā nikkadḍhitvā. **Apaviddhāti** chaḍḍitā anāthā hutvā ekikā vasāmi.

Tato sakko chaṭṭhaṃ gāthamāha –

6. “Jīvāmi vohaṃ na matohamasmi, taveva atthāya idhāgatosmi;  
Yā taṃ vadhitvāna vijāyi puttaṃ, sahāva puttena karomi bhasma”’nti.

Tattha **voti** nipātamattaṃ.

Itarā taṃ sutvā “dhī ahaṃ kiṃ kathesiṃ, mama nattu amaraṇakāraṇaṃ karissāmī”’ti sattamaṃ gāthamāha –

7. “Evañca te ruccati devarāja, mameva atthāya idhāgatosi;  
Ahañca putto suṇisā ca nattā, sammodamānā gharamāvasemā”’ti.

Athassā sakko aṭṭhamaṃ gāthamāha –

8. “Evañca te ruccati kātiyāni, hatāpi santā na jahāsi dhammaṃ;  
Tuvañca putto suṇisā ca nattā, sammodamānā gharamāvasethā”’ti.

Tattha **hatāpi santāti** yadi tvaṃ pothitāpi nikkadḍhitāpi samānā tava dārakesu mettadhammaṃ na jahāsi, evaṃ sante yathā tvaṃ icchasi, tathā hotu, ahaṃ te imasmiṃ guṇe pasannoti.

Evañca pana vatvā alaṅkatapaṭiyatto sakko attano ānubhāvena ākāse ṭhatvā “kaccāni tvaṃ mā bhāyi, putto ca te suṇisā ca mamānubhāvena āgantvā antarāmagge taṃ khamāpetvā ādāya gamissanti, appamattā hohī”’ti vatvā attano ṭhānameva gato. Tepi sakkānubhāvena tassā guṇaṃ anussarivā “kahaṃ no mātā”’ti antogāme manusse pucchitvā “susānābhimukhaṃ gatā”’ti sutvā “amma, ammā”’ti

susānamaggaṃ paṭipajjitvā taṃ disvāva pādesu patitvā “amma, amhākaṃ dosaṃ khamāhī”ti taṃ khamāpesuṃ. Sāpi nattāraṃ gaṇhi. Iti te sammodamānā gehaṃ gantvā tato paṭṭhāya samaggavāsaṃ vasiṃsu.

9. “Sā kātiyānī suṇisāya saddhiṃ, sammodamānā gharamāvasittha;  
Putto ca nattā ca upaṭṭhahiṃsu, devānamindena adhiggaḥitā”ti. –

Ayaṃ abhisambuddhagāthā.

Tattha **sā kātiyānī**ti bhikkhave, sā kaccānagottā. **Devānamindena adhiggaḥitā**ti devindena sakkena anuggaḥitā hutvā tassānubhāvena samaggavāsaṃ vasiṃsūti.

Satthā imaṃ dhammadesanaṃ āharitvā saccānī pakāsetvā jātaṃ samodhānesi, saccapariyosāne so upāsako sotāpattiphale patiṭṭhahi. Tadā mātuposako etarahi mātuposako ahosi, bhariyāpissa tadā bhariyāyeva, sakko pana ahameva ahosinti.

Kaccānijātakavaṇṇanā paṭhamā.

[418] 2. Aṭṭhasaddajātakavaṇṇanā

**Idaṃ pure ninnamāhūti** idaṃ satthā jetavane viharanto kosalarāñño aḍḍharattasamaye suttaṃ bhimsanakaṃ avinibbhogasaddaṃ ārabba kathesi. Vatthu heṭṭhā **lohakumbhijātake** (jā. 1.4.53 ādayo) kathitasadisameva. Idha pana satthā “mayhaṃ, bhante, imesaṃ saddānaṃ sutattā kinti bhavissatī”ti vutte “mā bhāyi, mahārāja, na te etesaṃ sutapaccayā koci antarāyo bhavissati, na hi, mahārāja, evarūpaṃ bhayānakaṃ avinibbhogasaddaṃ tvameveko suṇi, pubbepi rājāno evarūpaṃ saddaṃ sutvā brāhmaṇānaṃ kathaṃ gahetvā sabbacatukkayaññaṃ yajitukāmā paṇḍitānaṃ vacanaṃ sutvā yaññaharaṇatthāya gahitasatte vissajjetvā nagare māghātabheriṃ carāpesu”nti vatvā tena yācito atītaṃ āhari.

Atīte bārānasiyaṃ brahmadatte rajjaṃ kārente bodhisatto asītikoṭivibhave brāhmaṇakule nibbattitvā vayappatto takkasilāyaṃ uggahitasippo mātāpitūnaṃ accayena ratanavilokanaṃ katvā sabbhaṃ vibhavajātaṃ dānamukhe vissajjetvā kāme pahāya himavantaṃ pavisitvā isipabbajjaṃ pabbajitvā jhānābhīññāyo nibbattetvā aparabhāge loṇambilasevanatthāya manussapathaṃ caranto bārānasiṃ patvā rājuyyāne vasi. Tadā bārānāsirājā sirisayane nisinnā aḍḍharattasamaye aṭṭha sadde assosi – paṭhamaṃ rājānivesanasāmantā uyyāne eko bako saddamakāsi, dutiyaṃ tasmaṃ sadde anupacchinneyeva hatthisālāya toraṇanivāsini kākī saddamakāsi, tatiyaṃ rājagehe kaṇṇikāyaṃ nivutthaghuṇapāṇako saddamakāsi, catutthaṃ rājagehe posāvaniyakokilo saddamakāsi, pañcamaṃ tattheva posāvaniyamigo saddamakāsi, chaṭṭhaṃ tattheva posāvaniyavānaro saddamakāsi, sattamaṃ tattheva posāvaniyakinnaro saddamakāsi, aṭṭhamaṃ tasmaṃ sadde anupacchinneyeva rājānivesanamattakena uyyānaṃ gacchanto paccekabuddho ekaṃ udānaṃ udānento saddamakāsi.

Bārānāsirājā ime aṭṭha sadde sutvā bhītatasito punadivase brāhmaṇe pucchi. Brāhmaṇā “antarāyo te, mahārāja, bhavissati, sabbacatukkayaññaṃ yajissāmā”ti vatvā raññā “yathāruccitaṃ karoṭhā”ti anuññatā haṭṭhapahaṭṭhā rājakulato nikkhamitvā yaññakammaṃ ārabhiṃsu. Atha nesaṃ jeṭṭhakassa yaññakārabrahmaṇassa antevāsī māṇavo paṇḍito byatto ācariyaṃ āha – “ācariya, evarūpaṃ kakkhaḷaṃ pharusāṃ asātaṃ bahūnaṃ sattānaṃ vināsakammaṃ mā karī”ti. “Tāta, tvaṃ kiṃ jānāsi, saccepi aññaṃ kiñci na bhavissati, macchamaṃsaṃ tāva bahūnaṃ khāditaṃ labhissāmā”ti. “Ācariya, kucchiṃ nissāya niraye nibbattanakammaṃ mā karoṭhā”ti. Taṃ sutvā sesabrāhmaṇā “ayaṃ amhākaṃ lābhantarāyaṃ karotī”ti tassa kujjhiṃsu. Māṇavo tesāṃ bhayena “tena hi tumheva macchamaṃsakhādanūpāyaṃ karoṭhā”ti vatvā nikkhamitvā bahinagare rājānaṃ nivāretuṃ samatthaṃ dhammikasamaṇabrāhmaṇaṃ upadhārento rājuyyānaṃ gantvā bodhisattaṃ disvā vanditvā “bhante, kiṃ tumhākaṃ sattesu anukampā natthi, rājā bahū satte māretvā yaññaṃ yajāpeti, kiṃ vo mahājanassa bandhanamokkhaṃ kātuṃ na

vaṭṭatī”ti āha. “Māṇava, ettha neva rājā amhe jānāti, na mayaṃ rājānaṃ jānāmā”ti. “Jānātha pana, bhante, rañña sutasaddānaṃ nipphatti”nti? “Āma, jānāmī”ti. “Jānantā rañño kasmā na kathethā”ti? “Māṇava kiṃ sakkā ‘ahaṃ jānāmī’ti nalāṭe siṅgaṃ bandhitvā carituṃ, sace idhāgantvā pucchissati, kathessāmī”ti.

Māṇavo vegena rājakulaṃ gantvā “kiṃ, tātā”ti vutte “mahārāja, tumhehi sutasaddānaṃ nipphattiṃ jānanako eko tāpaso tumhākaṃ uyyāne maṅgalasilāyaṃ nisinno ‘sace maṃ pucchissati, kathessāmī’ti vadati, gantvā taṃ pucchituṃ vaṭṭatī”ti āha. Rājā vegena tattha gantvā tāpasam vanditvā katapaṭisanthāro nisīditvā “saccaṃ kira, bhante, tumhe mayā sutasaddānaṃ nipphattiṃ jānāthā”ti pucchi. “Āma, mahārāja”ti. “Tena hi kathetha taṃ me”ti. “Mahārāja, tesam sutapaccayā tava koci antarāyo natthi, porāṇuyyāne pana te eko bako atthi, so gocaraṃ alabhanto jighacchāya pareto paṭhamaṃ saddamakāsi”ti tassa kiriyam attano ñāṇena paricchinditvā paṭhamaṃ gāthamāha –

10. “Idaṃ pure ninnamāhu, bahumacchaṃ mahodakaṃ;  
Āvāso bakarājassa, pettikaṃ bhavanaṃ mama;  
Tyajja bhekena yāpema, okaṃ na vijahāmase”ti.

Tattha **idanti** maṅgalapokkharaniṃ sandhāya vadati. Sā hi pubbe udakatumbena udake pavisante mahodakā bahumacchā, idāni pana udakassa pacchinnattā na mahodakā jātā. **Tyajja bhekenāti** te mayaṃ ajja macche alabhantā maṇḍūkamattena yāpema. **Okanti** evaṃ jighacchāya pīḷitāpi vasanaṭṭhānaṃ na vijahāma.

Iti, mahārāja, so bako jighacchāpīḷito saddamakāsi. Sacepi taṃ jighacchāto mocetukāmo, taṃ uyyānaṃ sodhāpetvā pokkharaniṃ udakassa pūrehīti. Rājā tathā kāretuṃ ekaṃ amaccaṃ āṇāpesi.

“Hatthisālatoṇe pana te, mahārāja, ekā kākī vasamānā attano puttāsokena dutiyam saddamakāsi, tatopi te bhayam natthi”ti vatvā dutiyam gāthamāha –

11. “Ko dutiyam asīlissa, bandharassakki bhecchati;  
Ko me putte kulāvakaṃ, mañca sotthiṃ karissatī”ti.

Vatvā ca pana “ko nāma te, mahārāja, hatthisālāya hatthimeṇḍo”ti pucchi. “Bandharo nāma, bhante”ti. “Ekakkhikāṇo so, mahārāja”ti? “Āma, bhante”ti. Mahārāja, hatthisālāya te dvāratoṇe ekā kākī kulāvakaṃ katvā aṇḍakāni nikkhipi. Tāni pariṇatāni kākapotakā nikkhantā, hatthimeṇḍo hatthiṃ āruya sālato nikkhamanto ca pavisanto ca aṅkusakena kākimpi puttakepissā paharati, kulāvakampi viddhamseti. Sā tena dukkhena pīḷitā tassa akkhibhedanaṃ āyācantī evamāha, sace te kākiyā mettacittam atthi, etaṃ bandharaṃ pakkosāpetvā kulāvakaviddhamsanato vārehīti. Rājā taṃ pakkosāpetvā paribhāsivā hāretvā aññassa taṃ hatthiṃ adāsi.

“Pāsādakaṇṇikāya pana te, mahārāja, eko ghuṇapāṇako vasati. So tattha pheggum khādītva tasmim khīṇe saram khādītum nāsakki, so bhakkham alahitvā nikkhamitumpi asakkonto paridevamāno tatiyam saddamakāsi, tatopi te bhayam natthi”ti vatvā tassa kiriyam attano ñāṇena paricchinditvā tatiyam gāthamāha –

12. “Sabbā parikkhatā pheggu, yāva tassā gatī ahu;  
Khīṇabhakkho mahārāja, sāre na ramatī ghuṇo”ti.

Tattha **yāva tassā gatī ahūti** yāva tassā phegguyā nipphatti ahosi, sā sabbā khādītā. **Na ramatīti** “mahārāja, so paṇako tato nikkhamitvā gamanaṭṭhānampi apassanto paridevati, nīharāpehi na”nti āha. Rājā ekaṃ purisaṃ āṇāpetvā upāyena naṃ nīharāpesi.

“Nivesane pana te, mahārāja, ekā posāvaniyā kokilā atthī”’ti? “Atthi, bhante”’ti. “Mahārāja, sā attanā nivutthapubbaṃ vanasaṇḍaṃ saritvā ukkaṇṭhitvā ‘kadā nu kho imamhā pañjarā mucchivā ramaṇīyaṃ vanasaṇḍaṃ gacchissāmi’ ti catutthaṃ saddamakāsi, tatopi te bhayaṃ natthī”’ti vatvā catutthaṃ gāthamāha –

13. “Sā nūnāhaṃ ito gantvā, rañño muttā nivesanā;  
Attānaṃ ramayissāmi, dumasākhaniketini”’ti.

Tattha **dumasākhaniketini**ti supupphitāsu rukkhāsākhāsu sakaniketā hutvā. Evañca pana vatvā “ukkaṇṭhitā, mahārāja, sā kokilā, vissajjehi na”’nti āha. Rājā tathā kāresi.

“Nivesane pana te, mahārāja, eko posāvaniyo migo atthī”’ti? “Atthi, bhante”’ti. “Mahārāja, so eko yūthapati attano migiṃ anussarivā kilesavasena ukkaṇṭhito pañcamaṃ saddamakāsi, tatopi te bhayaṃ natthī”’ti vatvā pañcamaṃ gāthamāha –

14. “So nūnāhaṃ ito gantvā, rañño mutto nivesanā;  
Aggodakāni pissāmi, yūthassa purato vaja”’nti.

Tattha **aggodakāni**ti aggaudakāni, aññehi migehi paṭhamataraṃ apītāni anucchiṭṭhodakāni yūthassa purato gacchanta kadā nu kho pivissāmi.

Mahāsatto tampi migamā vissajjāpetvā “nivesane pana te, mahārāja, posāvaniyo makkaṭo atthī”’ti pucchi. “Atthi, bhante”’ti vutte “sopi, mahārāja, himavantapadese yūthapati makkaṭhi saddhiṃ kāmaggiddho hutvā vicaranta bharatena nāma luddena idha ānīto, idāni ukkaṇṭhitvā tattheva gantukāmo chaṭṭhaṃ saddamakāsi, tatopi te bhayaṃ natthī”’ti vatvā chaṭṭhaṃ gāthamāha –

15. “Taṃ maṃ kāmehi sammattaṃ, rattaṃ kāmesu mucchitaṃ;  
Ānayaī bhārato luddo, bāhiko bhaddamatthu te”’ti.

Tattha **bāhikoti** bāhikaraṭṭhavāsī. **Bhaddamatthu teti** imamattaṃ so vānaro āha, tuyhaṃ pana bhaddamatthu, vissajjehi nanti.

Mahāsatto taṃ vānaraṃ vissajjāpetvā “nivesane pana te, mahārāja, posāvaniyo kinnaro atthī”’ti pucchivā “atthī”’ti vutte “so, mahārāja, attano kinnariyā kataguṇaṃ anussarivā kilesāturo saddamakāsi. So hi tāya saddhiṃ ekadivasaṃ tuṅgapabbatasikharaṃ āruhi. Te tattha vaṇṇagandharasasampannāni nānāpupphāni ocinantā piḷandhantā sūriyaṃ atthaṅgataṃ na sallakkhesuṃ, atthaṅgate sūriye otarantānaṃ andhakāro ahosi. Tatra naṃ kinnarī ‘sāmi, andhakāro vattati, apakkhalanto appamādena otarāhī’ ti vatvā hatthe gahetvā otāresi, so tāya taṃ vacanaṃ anussarivā saddamakāsi, tatopi te bhayaṃ natthī”’ti taṃ kāraṇaṃ attano ñāṇabalena paricchinditvā pākaṭaṃ karonto sattamaṃ gāthamāha –

16. “Andhakāratimisāyaṃ, tuṅge uparipabbate;  
Sā maṃ saṇhena mudunā, mā pādaṃ khali yasmanī”’ti.

Tattha **andhakāratimisāyanti** andhabhāvākārake tame. **Tuṅgeti** tikhīṇe. **Saṇhena mudunāti** maṭṭhena mudukena vacanena. **Mā pādaṃ khali yasmanīti** ya-kāro byañjanasandhivasena gahito. Idaṃ vuttaṃ hoti – sā maṃ kinnarī saṇhena mudakena vacanena “sāmi, appamatto hohi, mā pādaṃ khali asmani, yathā te upakkhalitvā pādo pāsāṇasmīṃ na khalati, tathā otarā”’ti vatvā hatthena gahetvā otāresīti.

Iti mahāsatto kinnarena katasaddakāraṇaṃ kathetvā taṃ vissajjāpetvā “mahārāja, aṭṭhamo



udānasaddo ahosi. Nandamūlakapabbhārasmiṃ kira eko paccekabuddho attano āyusaṅkhāraparikkhayaṃ ñatvā ‘manussapathaṃ gantvā bārāṇasiraṅṅo uyyāne parinibbāyissāmi, tassa me manussā sarīranikkhepaṃ kāretvā sādhuḱīlaṃ kīlītvā dhātupūjaṃ katvā saggapathaṃ pūressanti’ ti iddhānubhāvena āgacchanto tava pāsādassa matthakaṃ pattakāle khandhabhāraṃ otāretvā nibbānapurapavesanadīpanaṃ udānaṃ udānesi’ ti paccekabuddhena vuttaṃ gāthamāha –

17. “Asaṃsayam jātikhayantadassī, na gabbhaseyyam punarāvajissam;  
Ayamantimā pacchimā gabbhaseyyā, khīṇo me saṃsāro punabbhavāyā’ ti.

Tassattho – jātiyā khayantasaṅkhātassa nibbānassa diṭṭhattā **jātikhayantadassī** ahaṃ **asaṃsayam** puna gabbhaseyyam na āvajissam, ayam me antimā jāti, pacchimā gabbhaseyyā, khīṇo me punabbhavāya khandhapatiṇipāṭisaṅkhāto saṃsāroti.

“Idaṅca pana so udānaṃ vatvā imaṃ uyyānavanaṃ āgamma ekassa supupphitassa sālassa mūle parinibbuto, ehi, mahārāja, sarīrakiccamassa karissāmā” ti mahāsatto rājānaṃ gahetvā paccekabuddhassa parinibbutatṭhānaṃ gantvā sarīraṃ dassesi. Rājā tassa sarīraṃ disvā saddhiṃ balakāyena gandhamālādīhi pūjetvā bodhisattassa vacanaṃ nissāya yaṅṅaṃ hāretvā sabbasattānaṃ jīvitadānaṃ datvā nagare māghātabheriṃ carāpetvā sattāhaṃ sādhuḱīlaṃ kīlītvā sabbagandhacitake mahantena sakkārena paccekabuddhassa sarīraṃ jhāpetvā dhātuyo catumahāpathe thūpaṃ kāresi. Bodhisattopi raṅṅo dhammaṃ desetvā “appamatto hohi” ti ovaditvā himavantameva pavisitvā brahmavihāresu parikkamaṃ katvā aparihīnājjhāno brahmalokaparāyaṇo ahosi.

Satthā imaṃ dhammadesanaṃ āharitvā “mahārāja, tassa saddassa sutakāraṇā tava koci antarāyo natthi” ti yaṅṅaṃ harāpetvā “mahājanassa jīvitaṃ dehi” ti jīvitadānaṃ dāpetvā nagare dhammabheriṃ carāpetvā dhammaṃ desetvā jātaṃ samodhānesi “tadā rājā ānando ahosi, māṇavo sarīputto, tāpaso pana ahameva ahosi” nti.

Aṭṭhasaddajātakavaṇṇanā dutiyā.

[419] 3. Sulasājātakavaṇṇanā

**Idaṃ suvaṇṇakāyūranti** idaṃ satthā jetavane viharanto ekaṃ anāthapiṇḍikassa dāsīṃ ārabha katesi. Sā kira ekasmiṃ ussavadvase dāsigaṇena saddhiṃ uyyānaṃ gacchantī attano sāmīniṃ puṅṅalakkhaṇadeviṃ ābharaṇaṃ yāci. Sā tassā satahassamūlaṃ attano ābharaṇaṃ adāsī. Sā taṃ piḷandhitvā dāsigaṇena saddhiṃ uyyānaṃ pāvīsi. Atheko coro tassā ābharaṇe lobhaṃ uppādetvā “imaṃ māretvā ābharaṇaṃ harissāmī” ti tāya saddhiṃ sallapanto uyyānaṃ gantvā tassā macchamaṃsasurādīni adāsī. Sā “kilesavasena deti maṅṅe” ti gahetvā uyyānakīlaṃ kīlītvā vīmaṃsanatthāya sāyanhasamaye nipanne dāsigaṇe utṭhāya tassa santikaṃ agamāsī. So “bhaddo, imaṃ ṭhānaṃ appaṭicchanaṃ, thokaṃ purato gacchāmā” ti āha. Taṃ sutvā itarā “imasmīṃ ṭhāne sakkā rahassakammaṃ kātuṃ, ayam pana nissamaṃsayam maṃ māretvā piḷandhanabhaṇḍaṃ haritukāmo bhavissati, hotu, sikkhāpessāmi na” nti cintetvā “sāmi, surāmadena me sukkaṃ sarīraṃ, pāṇīyaṃ tāva maṃ pāyehi” ti ekaṃ kūpaṃ netvā “ito me pāṇīyaṃ osiṅcā” ti rajjuṅca ghaṭaṅca dassesi. Coro rajjuṃ kūpe otāresi, atha naṃ onamitvā udakaṃ osiṅcantam mahabbaladāsī ubhohi hatthehi āṇisadam paharitvā kūpe khipitvā “na tvam ettakena marissasi” ti ekaṃ mahantaṃ iṭṭhakaṃ matthake āsumbhi. So tattheva jīvitakkhayaṃ patto. Sāpi nagaraṃ pavisitvā sāmīniyā ābharaṇaṃ dadamānā “manamhi ajja imaṃ ābharaṇaṃ nissāya matā” ti sabbam taṃ pavattim ārocesi, sāpi anāthapiṇḍikassa ārocesi, anāthapiṇḍiko tathāgatassa ārocesi. Satthā “na kho, gahapati, idāneva sā dāsī ṭhānuppattikāya paṅṅāya samannāgatā, pubbepi samannāgatāva, na ca idāneva tāya so mārito, pubbepi naṃ māresiyevā” ti vatvā tena yācito atītaṃ āhari.

Atīte bārāṇasiyaṃ brahmadatte rajjaṃ kārente sulasā nāma nagarasobhinī pañcasatavaṇṇadāsiparivārā ahosi, sahasena rattim gacchati. Tasmīyeva nagare sattuko nāma coro ahosi nāgabalo, rattibhāge issaragharāni pavisitvā yathārucciṃ vilumpati. Nāgarā sannipatitvā raṅṅo

upakkosimsu. Rājā nagaraguttikaṃ āṇāpetvā tattha tattha gumbaṃ ṭhapāpetvā coraṃ gaṇhāpetvā “sīsamma chindathā”ti āha. Taṃ pacchābāhaṃ bandhitvā catukke catukke kasāhi tāletvā āghātanam nenti. “Coro kira gahito”ti sakalanagaraṃ saṅkhubhi. Tadā sulasā vātapāne ṭhatvā antaravithiṃ oloketi taṃ disvā paṭibaddhacittā hutvā “sace imaṃ coroti gahitapurisaṃ mocetuṃ sakkhissāmi, idaṃ kiliṭṭhakammaṃ akatvā imināva saddhiṃ samaggavāsaṃ kappessāmi”ti cintevā heṭṭhā **kaṇaverajātaka** (jā. 1.4.69 ādayo) vuttanayeneva nagaraguttikassa sahasaṃ pesetvā taṃ mocetvā tena saddhiṃ sammodamānā samaggavāsaṃ vasi. Coro tiṇṇaṃ catunnaṃ māsānaṃ accayena cintesi “ahaṃ imasmiṃyeva ṭhāne vasituṃ na sakkhissāmi, tucchahatthena palāyitumpi na sakkā, sulasāya piḷandhanabhaṇḍaṃ satahasaṃ agghati, sulasā māretvā idaṃ gaṇhissāmi”ti. Atha naṃ ekadivasaṃ āha – “bhadde, ahaṃ tadā rājapurisehi nīyamāno asukapabbatamatthake rukkhadevatāya balikammaṃ paṭissuṇiṃ, sā maṃ balikammaṃ alabhamānā bhāyāpeti, balikammamassā karomā”ti. “Sādhu, sāmi, sajjetvā pesehi”ti. “Bhadde, pesetuṃ na vaṭṭati, mayaṃ ubhoṃ sabbābharaṇapaṭimaṇḍitā mahantena parivārena gantvā dassāma”ti. “Sādhu, sāmi, tathā karomā”ti.

Atha naṃ tathā kāretvā pabbatapādaṃ gatakāle āha – “bhadde, mahājanaṃ disvā devatā balikammaṃ na sampācicchissati, mayaṃ ubhova abhiruhitvā demā”ti. So tāya “sādhū”ti sampācicchito taṃ balipātiṃ ukkhipāpetvā sayāṃ sannaddhapañcāvudho hutvā pabbatamatthakaṃ abhiruhitvā ekaṃ sataporisapapātaṃ nissāya jātarukkhamaṇḍile balibhājanaṃ ṭhapāpetvā “bhadde, nāhaṃ balikammattāya āgato, taṃ pana māretvā piḷandhanaṃ te gahetvā gamissāmi āgatomhi, tava piḷandhanaṃ omuñcitvā uttarasāṭakena bhaṇḍikaṃ karohi”ti āha. “Sāmi, maṃ kasmā māresī”ti? “Dhanakāraṇā”ti. “Sāmi, mayā katagunaṃ anussara, ahaṃ taṃ bandhitvā nīyamānaṃ seṭṭhiputtana parivattetvā bahuṃ dhanam datvā jīvitam labhāpesiṃ, devasikaṃ sahasaṃ labhamānāpi aññaṃ purisaṃ na olokemi, evañhi tava upakārikaṃ mā maṃ mārehi, bahuñca te dhanam dassāmi, tava dāsī ca bhavissāmi”ti yācantī paṭhamam gāthamāha –

18. “Idaṃ suvaṇṇakāyūraṃ, muttā veḷuriyā bahū;  
Sabbam harassu bhaddante, mañca dāsīti sāvayā”ti.

Tattha **kāyūranti** gīvāyaṃ piḷandhanapasādhanam kāyūraṃ. **Sāvayāti** mahājanamajjhe sāvetvā dāsīṃ katvā gaṇhāti.

Tato sattukena –

19. “Oropayassu kalyāṇi, mā bālham paridevasi;  
Na cāham abhijānāmi, ahantvā dhanamābhata”nti. –

Attano ajjhāsayanurūpaṃ dutiyagāthāya vuttāya sulasā ṭhānuppattikāraṇam paṭilabhivā “ayaṃ coro mayham jīvitam na dassati, upāyena naṃ paṭhamataram papāte pātetvā jīvitakkhayaṃ pāpessāmi”ti cintevā gāthādvayamāha –

20. “Yato sarāmi attānaṃ, yato pattāsmi viññutaṃ;  
Na cāham abhijānāmi, aññaṃ piyataram tayā.
21. “Ehi taṃ upagūhissaṃ, karissañca padakkhiṇaṃ;  
Na hi dāni puna atthi, mama tuyhañca saṅgamo”ti.

Sattuko tassādhippāyaṃ ajānanto “sādhu, bhadde, ehi upagūhassu ma”nti āha. Sulasā taṃ tikkhattuṃ padakkhiṇam katvā upagūhitvā “idāni taṃ, sāmi, catūsu passesu vandissāmi”ti vatvā pādapiṭṭhiyaṃ sīsam ṭhapetvā bāhupasse vanditvā pacchimapassaṃ gantvā vandamānā viya hutvā nāgabalā gaṇikā coram dvīsu pacchāpādesu gahetvā heṭṭhā sīsam katvā sataporise narake khiṃpi. So tattheva cuṇṇavicuṇṇam patvā mari. Taṃ kiriyaṃ disvā pabbatamatthake nibbattadevatā imā gāthā

abhāsi –

22. “Na hi sabbesu ṭhānesu, puriso hoti paṇḍito;  
Itthīpi paṇḍitā hoti, tattha tattha vicakkhaṇā.
23. “Na hi sabbesu ṭhānesu, puriso hoti paṇḍito;  
Itthīpi paṇḍitā hoti, lahuṃ atthaṃ vicintikā.
24. “Lahuṇca vata khippaṇca, nikaṭṭhe samacetayi;  
Migaṃ puṇṇāyateneva, sulasā sattukaṃ vadhi.
25. “Yodha uppatitaṃ atthaṃ, na khippamanubujjhati;  
So haññati mandamati, corova girigabbhare.
26. “Yo ca uppatitaṃ atthaṃ, khippameva nibodhati;  
Muccate sattusambādā, sulasā sattukānivā’”ti.

Tattha **paṇḍitā hotīti** itthīpi paṇḍitā tattha tattha vicakkhaṇā hoti, atha vā itthī paṇḍitā ceva tattha tattha vicakkhaṇā ca hoti. **Lahuṃ atthaṃ vicintikāti** lahuṃ khippaṃ atthaṃ vicintikā. **Lahuṇca vatāti** adandhaṇca vata. **Khippaṇcāti** acireneva. **Nikaṭṭhe samacetayīti** santike ṭhitāva tassa maraṇūpāyaṃ cintesi. **Puṇṇāyatenevāti** pūritadhanusmiṃ. Idam vuttaṃ hoti – yathā cheko migaluddako sakaṇḍapūṇḍadhanusmiṃ khippaṃ migaṃ vadhati, evaṃ sulasā sattukaṃ vadhīti. **Yodhāti** yo imasmim satta-loke. **Nibodhatīti** jānāti. **Sattukānivāti** sattukā iva, yathā sulasā muttā, evaṃ mucatīti atho.

Iti sulasā coraṃ vadhitvā pabbatā oruyha attano pariyanassa santikaṃ gantvā “ayyaputto kaha”nti puṭṭhā “mā taṃ pucchathā”ti vatvā rathaṃ abhiruhitvā nagarameva pāvīsi.

Satthā imaṃ dhammadesanaṃ āharitvā jātaṃ samodhānesi “tadā te ubhopi imeyeva ahesuṃ, devatā pana ahameva ahosi”nti.

Sulasājātakavaṇṇanā tatiyā.

[420] 4. Sumaṅgalajātakavaṇṇanā

**Bhusamhi kuddhoti** idam satthā jetavane viharanto rājovādasuttaṃ ārabba kathesi. Tadā pana satthā rañña yācito atītaṃ āhari.

Atīte bārānasiyaṃ brahmadatte rajjaṃ kārente bodhisatto tassa aggamahesiyā kucchimhi nibbatto vayappatto pitu accayena rajjaṃ kāresi, mahādānaṃ pavattesi. Tassa sumaṅgalo nāma uyyānapālo ahosi. Atheko paccekabuddho nandamūlakapabbhārā nikkhamitvā cārikaṃ caramāno bārānasim patvā uyyāne vasitvā punadivase nagaraṃ piṇḍāya pāvīsi. Tamenam rājā disvā pasannacitto vanditvā pāsādaṃ āropetvā rājāsane nisīdāpetvā nānaggarasehi khādaniyabhojanīyehi parivisitvā anumodanaṃ sutvā pasanno attano uyyāne vasanattāya paṭiññaṃ gāhāpetvā uyyānaṃ pavesetvā sayampi bhuttapātarāso tattha gantvā rattiṭṭhānadivāṭṭhānādīni samvidahitvā sumaṅgalaṃ nāma uyyānapālaṃ veyyāvaccakaraṃ katvā nagaraṃ pāvīsi. Paccekabuddho tato paṭṭhāya nibaddhaṃ rājagehe bhujjanto tattha ciraṃ vasi, sumaṅgalopi naṃ sakkaccaṃ upaṭṭhahi.

Athekadivasaṃ paccekabuddho sumaṅgalaṃ āmantetvā “ahaṃ katipāhaṃ asukagāmaṃ nissāya vasitvā āgacchissāmi, rañño ārocehi”ti vatvā pakkāmi. Sumaṅgalopi rañño ārocesi. Paccekabuddho katipāhaṃ tattha vasitvā sāyaṃ sūriye atthaṅgate taṃ uyyānaṃ paccāgami. Sumaṅgalo tassa āgatabhāvaṃ ajānanto attano gehaṃ agamāsi. Paccekabuddhopi pattacīvaraṃ paṭisāmetvā thokaṃ caṅkamtivā pāsāṇaphalake nisīdi. Taṃ divasaṃ pana uyyānapālassa gharaṃ pāhunakā āgamimsu. So

tesaṃ sūpabyañjanatthāya “uyyāne abhayaḷaddhaṃ miḡaṃ māressāmi”ti dhanuṃ ādāya uyyānaṃ gantvā miḡaṃ upadhārento paccekabuddhaṃ disvā “mahāmiḡo bhavissati”ti saññāya saraṃ sannayhitvā vijjhi. Paccekabuddho sīsaṃ vivarivā “sumaṅgalā”ti āha. So saṃvegappatto vanditvā “bhante, ahaṃ tumhākaṃ āgatabhāvaṃ ajānanto ‘miḡo’ti saññāya vijjhiṃ, khamatha me”ti vatvā “hotu dāni kiṃ karissasi, ehi saraṃ luñcitvā gaṇhāhi”ti vutte vanditvā saraṃ luñci, mahatī vedanā uppajji. Paccekabuddho tattheva parinibbāyi. Uyyānapālo “sace rājā jānissati, nāsessati”ti puttadāraṃ gahe tvā tatova palāyi. Tāvadeva “paccekabuddho parinibbuto”ti devatānubhāvena sakalanagaraṃ ekakolāhalaṃ jātaṃ.

Punadivase manussā uyyānaṃ gantvā paccekabuddhaṃ disvā “uyyānapālo paccekabuddhaṃ māretvā palāto”ti rañño kathayimṃsu. Rājā mahantena parivārena uyyānaṃ gantvā sattāhaṃ sarīrapūjaṃ katvā mahantena sakkārena jhāpetvā dhātuyo ādāya cetiyaṃ katvā taṃ pūjento dhammena rajjaṃ kāresi. Sumaṅgalopi ekasaṃvaccharaṃ vītināmetvā “rañño cittaṃ jānissāmi”ti āgantvā ekaṃ amaccaṃ passitvā “mayi rañño cittaṃ jānāhi”ti āha. Amaccopi rañño santikaṃ gantvā tassa guṇaṃ kathesi. Rājā asuṇanto viya ahoṣi. Puna kiñci avatvā rañño anattamanabhāvaṃ sumaṅgalassa kathesi. So dutiyasaṃvaccharepi āgantvā tatheva rājā tuṇhī ahoṣi. Tatiyasaṃvacchare āgantvā puttadāraṃ gahe tvāva āgami. Amacco rañño cittaṃ mudubhāvaṃ ñatvā taṃ rājadvāre ṭhapetvā tassāgatabhāvaṃ rañño kathesi. Rājā taṃ pakkosāpetvā paṭisanthāraṃ katvā “sumaṅgala, kasmā tayā mama puññakkhettaṃ paccekabuddho mārito”ti pucchi. So “nāhaṃ, deva, ‘paccekabuddhaṃ māremi’ti māresim, apica kho iminā nāma kāraṇena idaṃ nāma akāsi”nti taṃ pavattiṃ ācikkhi. Atha naṃ rājā “tena hi mā bhāyi”ti samassāsetvā puna uyyānapālaṃ eva akāsi.

Atha naṃ so amacco pucchi “deva, kasmā tumhe dve vāre sumaṅgalassa guṇaṃ sutvāpi kiñci na kathayittha, kasmā pana tatiyavāre sutvā taṃ pakkositvā anukampitthā”ti? Rājā “tāta, raññā nāma kuddhena sahasā kiñci kātuṃ na vaṭṭati, tenāhaṃ pubbe tuṇhī hutvā tatiyavāre sumaṅgale mama cittassa mudubhāvaṃ ñatvā taṃ pakkosāpesi”nti rājavattaṃ kathento imā gāthā āha –

27. “Bhusamhi kuddhoti avekkhiyāna, na tāva daṇḍaṃ paṇayeyya issaro;  
Aṭṭhānaso appatirūpamattano, parassa dukkhāni bhusaṃ udīraye.
28. “Yato ca jāneyya pasādamattano, atthaṃ niyuñjeyya parassa dukkaṭaṃ;  
Tadāyamatthoti sayāṃ avekkhiya, athassa daṇḍaṃ sadisaṃ nivesaye.
29. “Na cāpi jhāpeti paraṃ na attanaṃ, amucchito yo nayate nayānayaṃ;  
Yo daṇḍadhāro bhavatīdha issaro, sa vaṇṇagutto siriyā na dhaṃsati.
30. “Ye khattiyā se anisammakārino, paṇenti daṇḍaṃ sahasā pamucchitā;  
Avaṇṇasaṃyutā jahanti jīvitaṃ, ito vimuttāpi ca yanti duggatiṃ.
31. “Dhamme ca ye ariyappavedite ratā, anuttarā te vacasā manasā kammunā ca;  
Te santisoraccasamādhisaṇṭhitā, vajanti lokaṃ dubhayaṃ tathāvidhā.
32. “Rājāhamasmi narapamadānamissaro, sacepi kujjhāmi ṭhapemi attanaṃ;  
Nisedhayanto janataṃ tathāvidhaṃ, paṇemi daṇḍaṃ anukampa yoniso”ti.

Tattha **avekkhiyānāti** avekkhitvā jānitvā. Idaṃ vuttaṃ hoti – tāta, pathavissaro rājā nāma “ahaṃ bhusaṃ kuddho balavakodhābhībhuṭo”ti ñatvā aṭṭhavatthukādibhedaṃ daṇḍaṃ parassa na paṇayeyya na vatteyya. Kiṃkāraṇā? Kuddho hi aṭṭhavatthukaṃ soḷasavatthukaṃ katvā aṭṭhānena akāraṇena attano rājabhāvassa ananurūpaṃ “imaṃ ettakaṃ nāma āharatha, idaṃca tassa karoṭhā”ti parassa bhusaṃ dukkhāni balavadukkhāni udīraye.

**Yatoti** yadā. Idaṃ vuttaṃ hoti – yadā pana rājā parasmim̐ uppannaṃ attano pasādaṃ jāneyya, atha parassa dukkaṭaṃ atthaṃ niyuñjeyya upaparikkheyya, tadā evaṃ niyuñjanto “ayaṃ nāmettha attho, ayaṃ etassa doso”ti sayāṃ attapaccakkaṃ katvā athassa aparādhakārakassa aṭṭhavatthukahetu aṭṭheva, soḷasavatthukahetu soḷaseva kahāpaṇe gaṇhamāno daṇḍaṃ sadisaṃ katadosānurūpaṃ nivesaye ṭhapeyya pavattheyāti.

**Amucchitoti** chandādīhi agatikilesehi amucchito anabhibhūto hutvā yo nayānayaṃ nayate upaparikkhati, so neva paraṃ jhāpeti, na attānaṃ. Chandādivasena hi ahetuṃ daṇḍaṃ pavattento parampi tena daṇḍena jhāpeti dahati pīleti, attānampi tatonidānena pāpena. Ayaṃ pana na paraṃ jhāpeti, na attānaṃ. **Yo daṇḍadhāro bhavatīdha issaroti** yo idha pathavissaro rājā idha sattaloke dosānucchavikaṃ daṇḍaṃ pavattento daṇḍadhāro hoti. **Sa vaṇṇaguttoti** guṇavaṇṇena ceva yasavaṇṇena ca gutto rakkhito siriyaṃ na dhamṣati na parihāyati. **Avāṇṇasamyutā jahantīti** adhammikā lolarājāno avāṇṇena yuttā hutvā jīvitāṃ jahanti.

**Dhamme ca ye ariyappaveditēti** ye rājāno ācāraariyehi dhammikarājūhi pavedite dasavidhe rājadhamme ratā. **Anuttarā teti** te vacasā manasā kammunā ca tīhipi etehi anuttarā jeṭṭhakā. **Te santisoraccasamādhisaṇṭhitāti** te agatipahānena kilesasantiyañca susīlyasaṅkhāte soracce ca ekaggaṭāsamādhimhi ca saṇṭhitā patiṭṭhitā dhammikarājāno. **Vajanti lokaṃ dubhayanti** dhammena rajjaṃ kāretvā manussalokato devalokaṃ, devalokato manussalokanti ubhayalokameva vajanti, nirayādīsu na nibbattanti. **Narapamadānanti** narānañca nārīnañca. **Ṭhapemi attananti** kuddhopi kodhavasena agantvā attānaṃ porāṇakarājūhi ṭhapitanayasmim̐yeva dhamme ṭhapemi, vinicchayadhammaṃ na bhindāmīti.

Evaṃ chahi gāthāhi raññā attano guṇe kathite sabbāpi rājaparisā tuṭṭhā “ayaṃ silācāraguṇasampatti tumhākaññeva anurūpā”ti rañño guṇe kathesum̐. Sumaṅgalo pana parisāya kathitāvasāne utṭhāya rājānaṃ vanditvā añjaliṃ paggayha rañño thutiṃ karonto tisso gāthā abhāsi –

33. “Sirī ca lakkhī ca taveva khattiya, janādhipa mā vijahi kudācanaṃ;  
Akkodhano niccapasannacitto, anīgho tuvaṃ vassasatāni pālaya.
34. “Guṇehi etehi upeta khattiya, ṭhitamariyavattī suvaco akodhano;  
Sukhī anuppīla pasāsa mediniṃ, ito vimuttopi ca yāhi suggaṭiṃ.
35. “Evaṃ sunītena subhāsitenā, dhammena nāyena upāyaso nayaṃ;  
Nibbāpaye saṅkhubhitaṃ mahājanaṃ, mahāva meggho salilena medini”nti.

Tattha **sirī ca lakkhī cāti** parivārasampatti ca paññā ca. **Anīghoti** niddukkho hutvā. **Upeta khattiyāti** upeto khattiya, ayameva vā pāṭho. **Ṭhitamariyavattīti** ṭhitaariyavatti, ariyavatti nāma dasarājadharmmasaṅkhātaṃ porāṇarājavattaṃ, tattha patiṭṭhitattā ṭhitarājadharmo hutvāti attho. **Anuppīla pasāsa medininti** anuppīlaṃ pasāsa mediniñca, ayameva vā pāṭho. **Sunītenāti** sunayena suṭṭhu kāraṇena. **Dhammenāti** dasakusalakammaphadhammena. **Nāyenāti** purimaphadasseva vevacanaṃ. **Upāyasoti** upāyakosallena. **Nayanti** nayanto rajjaṃ anusāsanto dhammikarājā. **Nibbāpayeti** imāya paṭipattiyā kāyikacetāsikadukkhaṃ darathaṃ apanento kāyikacetāsikadukkhasaṅkhubhitampi mahājanaṃ mahāmeggho salilena mediniṃ viya nibbāpeyya, tvampi tatheva nibbāpehīti dassento evamāha.

Satthā kosalarañño ovādasena imaṃ dhammadesanaṃ āharitvā jātaṃ samodhānesi – “tadā paccakabuddho parinibbuto, sumaṅgalo ānando ahosi, rājā pana ahameva ahosi”nti.

Sumaṅgalajātakavaṇṇanā catutthā.

[421] 5. Gaṅgamāajātakavaṇṇanā

**Āṅgārajātā**ti idaṃ satthā jetavane viharanto uposathakammaṃ ārabha kathesi. Ekadivasañhi satthā uposathike upāsake āmantetvā “upāsakā sādthurūpaṃ vo kataṃ uposathaṃ upavasantehi, dānaṃ dāttabbaṃ, sīlaṃ rakkhitabbaṃ, kodho na kātabbo, mettā bhāvetabbā, uposathavāso vasitabbo, porāṇakapaṇḍitā hi ekaṃ upaḍḍhuposathakammaṃ nissāya mahāyasaṃ labhiṃsū”ti vatvā tehi yācito atītaṃ āhari.

Atīte bārāṇasiyaṃ brahmadatte rajjaṃ kārente tasmim̃ nagare suciparivāro nāma seṭṭhi ahosi asītikoṭidhanavibhavo dānādipuññābhirato. Tassa puttadārāpi pariṇānāpi antamaso tasmim̃ ghare vacchapālakāpi sabbe māsassa cha divase uposathaṃ upavasanti. Tadā bodhisatto ekasmim̃ daliddakule nibbattitvā bhatim̃ katvā kicchena jīvati. So “bhatim̃ karissāmi”ti tassa gehaṃ gantvā vanditvā ekamantaṃ ṭhito “kiṃ āgatosi”ti vutte “tumhākaṃ gehe bhatiyā kammakaraṇattha”nti āha. Seṭṭhi aññesaṃ bhatikānaṃ āgatadivaseyeva “imasmim̃ gehe kammaṃ karontā sīlaṃ rakkhanti, sīlaṃ rakkhituṃ sakkontā kammaṃ karothā”ti vadati, bodhisattassa pana sīlarakkhaṇaācikkhaṇe saññaṃ akatvā “sādhu, tāta, attano bhatim̃ jānitvā kammaṃ karohī”ti āha. So tato paṭṭhāya suvaco hutvā uraṃ datvā attano kilamathaṃ agaṇetvā tassa sabbakiccāni karoti, pātova kammantaṃ gantvā sāyaṃ āgacchati.

Athekadivasaṃ nagare chaṇaṃ ghosesuṃ. Mahāseṭṭhi dāsimaṃ āmantetvā “ajjuuposathadivaso, gehe kammakarānaṃ pātova bhattaṃ pacitvā dehi, kālasseva bhuñjitvā uposathikā bhavissanti”ti āha. Bodhisatto kālasseva uṭṭhāya kammantaṃ agamāsi, “ajjuuposathiko bhaveyyāsi”ti tassa koci nārocesi. Sesakammakarā pātova bhuñjitvā uposathikāva ahesuṃ. Seṭṭhipi saputtadāro sapariṇāno uposathaṃ adhiṭṭhahi, sabbepi uposathikā attano attano vasanaṭṭhānaṃ gantvā sīlaṃ āvajjentā nisīdīṃsu. Bodhisatto sakaladivasaṃ kammaṃ katvā sūriyatthaṅgamanavelāya āgato. Athassa bhattakārikā hatthadhovanaṃ datvā pātiyaṃ bhattaṃ vaḍḍhetvā upanāmesi. Bodhisatto “aññesu divasesu imāya velāya mahāsaddo hoti, ajja kahaṃ gatā”ti pucchi. “Sabbe uposathaṃ samādiyitvā attano attano vasanaṭṭhānāni gatā”ti. Taṃ sutvā bodhisatto cintesi “ettakānaṃ sīlavantānaṃ antare ahaṃ eko dussīlo hutvā na vasissāmi, idāni uposathaṅgesu adhiṭṭhitesu hoti nu kho uposathakammaṃ, no”ti. So gantvā seṭṭhim̃ pucchi. Atha naṃ seṭṭhi “tāta pātova anadhiṭṭhitattā sakalaṃ uposathakammaṃ na hoti, upaḍḍhuposathakammaṃ pana hoti”ti āha.

So “ettakampi hotū”ti seṭṭhissa santike samādinnaṃ sīlo hutvā uposathakammaṃ adhiṭṭhāya attano vasanokāsaṃ pavisitvā sīlaṃ āvajjento nipajji. Athassa sakaladivasaṃ nirāhāratāya pacchimayāmasamanantare satthakavātā samuṭṭhahīṃsu. Seṭṭhinā nānāvidhāni bhesajjāni āharitvā “bhuñjā”ti vuccamānopi “uposathaṃ na bhindissāmi, jīvitaṃ pariyantaṃ katvā samādiyī”nti āha. Balavavedanā uppajji, aruṇuggamanavelāya satim̃ paccupaṭṭhāpetuṃ nāsakkhi. Atha naṃ “idāni marissatī”ti nīharitvā “osārake nipajjāpesuṃ. Tasmim̃ khaṇe bārāṇasirājā rathavaragato mahantena parivārena nagaraṃ padakkhiṇaṃ karonto taṃ ṭhānaṃ sampāpuṇi. Bodhisatto tassa sirim̃ oloketvā tasmim̃ lobhaṃ uppādetvā rajjaṃ patthesi. So cavitvā upaḍḍhuposathakammaṃ nissandena tassa aggamaheṣiyā kucchimhi paṭisandhim̃ gaṇhi. Sā laddhagabbhāparihārā dasamāsaccayena puttaṃ vijāyi, “udayakumāro”tissa nāmaṃ akāṃsu. So vayappatto sabbasippesu nipphattim̃ pāpuṇi, jātissaraññaṇena attano pubbakammaṃ saritvā “appakassa kammaṃ phalaṃ mama ida”nti abhikkhaṇaṃ udānaṃ udānesi. So pitu accayena rajjaṃ patvāpi attano mahantaṃ sirivibhavaṃ oloketvā tadeva udānaṃ udānesi.

Athekadivasaṃ nagare chaṇaṃ sajjayīṃsu, mahājano kīlāpasuto ahosi. Tadā bārāṇasiyā uttaradvāravāsī eko bhatiko udakabhatim̃ katvā laddhaṃ aḍḍhamāsakaṃ pākāriṭṭhakāya antare ṭhapetvā bhatim̃ karonto dakkhiṇadvāraṃ patvā tattha udakabhatimeva katvā jīvamānāya ekāya kapaṇṭhiyā saddhim̃ saṃvāsaṃ kappesi. Sā taṃ āha – “sāmi, nagare chaṇo vattatī, sace te kiñci atthi, mayampi kīleyyāmā”ti? “Āma, atthī”ti. “Kittakaṃ, sāmi”ti? “Aḍḍhamāsako”ti. “Kahaṃ so”ti? “Uttaradvāre iṭṭhakabbhantare ṭhapitoti ito me dvādasayojanantare nidhānaṃ, tava pana hatthe kiñci atthi”ti? “Āma, atthī”ti. “Kittaka”nti? “Aḍḍhamāsakovā”ti. “Iti tava aḍḍhamāsako, mama aḍḍhamāsakoti māsakova

hoti, tato ekena koṭṭhāsena mālaṃ, ekena koṭṭhāsena gandhaṃ, ekena koṭṭhāsena suraṃ gahetvā kīḷissāma, gaccha tayā ṭhapitaṃ aḍḍhamāsakaṃ āharaṃ”ti. So “bhariyāya me santikā kathā laddhā”ti haṭṭhatuṭṭho “bhadde, mā cintayi, āharissāmi na”nti vatvā pakkāmi. Nāgabalo bhatiko cha yojanāni atikkamma majjhanhikasamaye vītaccikaṅgārasanthataṃ viya uṇhaṃ vālukaṃ maddanto dhanalobhena haṭṭhapahaṭṭho kasāvarattanivāsano kaṇṇe tālapaṇṇaṃ piḷandhitvā ekena āyogavattena gītaṃ gāyanto rājāṅgaṇena pāyāsi.

Udayarājā sīhapañjaraṃ vivarivā ṭhito taṃ tathā gacchantaṃ disvā “kiṃ nu kho esa evarūpaṃ vātātaṃ agaṇetvā haṭṭhatuṭṭho gāyanto gacchati, pucchissāmi na”nti cintetvā pakkosantthāya ekaṃ purisaṃ paṇiṇi. Tena gantvā “rājā taṃ pakkosati”ti vutte “rājā mayhaṃ kiṃ hoti, nāhaṃ rājānaṃ jānāmi”ti vatvā balakkārena nīto ekamantaṃ aṭṭhāsi. Atha naṃ rājā pucchanto dve gāthā abhāsi –

36. “Aṅgārajātā pathavī, kukkuḷānugatā mahī;  
Atha gāyasi vattāni, na taṃ tapati ātaṃpo.

37. “Uddhaṃ tapati ādicco, adho tapati vālukā;  
Atha gāyasi vattāni, na taṃ tapati ātaṃpo”ti.

Tattha **aṅgārajātā**ti bho purisa, ayaṃ pathavī vītaccikaṅgārā viya uṇhajātā. **Kukkuḷānugatā**ti ādittachārikasaṅkhātena kukkuḷena viya uṇhavālukāya anugatā. **Vattānī**ti āyogavattāni āropetvā gītaṃ gāyasīti.

So rañño kathaṃ sutvā tatiyaṃ gāthamāha –

38. “Na maṃ tapati ātaṃpo, ātapā tapayanti maṃ;  
Atthā hi vividhā rāja, te tapanti na ātaṃpo”ti.

Tattha **ātapā**ti vatthukāmakilesakāmā. Purisañhi te abhitapanti, tasmā “ātapā”ti vuttā. **Atthā hi vividhā**ti, mahārāja, mayhaṃ vatthukāmakilesakāme nissāya kattabbā nānākiccaṅgānāni vividhā atthā atthi, te maṃ tapanti, na ātapoti.

Atha naṃ rājā “ko nāma te attho”ti pucchi. So āha “ahaṃ, deva, dakkhiṇadvāre kapaṇṭhiyā saddhiṃ saṃvāsaṃ kappesiṃ, sā maṃ ‘chaṇaṃ kīḷissāma, atthi te kiñci hatthe’ti pucchi, atha naṃ ahaṃ ‘mama nidhānaṃ uttaradvāre pākārantare ṭhapita’nti avacaṃ, sā ‘gaccha taṃ āhara, ubhopi kīḷissāmā’ti maṃ paṇiṇi, sā me tassā kathā hadayaṃ na vijahati, taṃ maṃ anussarantaṃ kāmataṃ tapati, ayaṃ me, deva, attho”ti. Atha “evarūpaṃ vātātaṃ agaṇetvā kiṃ te tussanakāraṇaṃ, yena gāyanto gacchasī”ti? “Deva, taṃ nidhānaṃ āharitvā ‘tāya saddhiṃ abhiramissāmī’ti iminā kāraṇena tuṭṭho gāyāmī”ti. “Kiṃ pana te, bho purisa, uttaradvāre ṭhapitanidhānaṃ sataṣaṃsāmatā atthi”ti? “Natthi, devā”ti. Rājā “tena hi paññāsa saṃsāni, cattālīsa, tiṃsa, vīsa, dasa, saṃsānaṃ, pañca satāni, cattāri, tīni, dve, ekaṃ, satānaṃ, paññāsaṃ, cattālīsaṃ, tiṃsaṃ, vīsaṃ, dasa, pañca, cattāri, tayo, dve, eko kahāpaṇo, aḍḍho, pādo, cattāro māsaṃ, tayo, dve, eko māsaṃ”ti pucchi. Sabbhaṃ paṭikkhipitvā “aḍḍhamāsako”ti vutto “āma, deva, ettakaṃ mayhaṃ dhaṇaṃ, taṃ āharitvā tāya saddhiṃ abhiramissāmīti gacchāmi, tāya pītiyā tena somanassaṃ na maṃ esa vātātaṃ tapati”ti āha.

Atha naṃ rājā “bho purisa, evarūpe ātape tattha mā gami, ahaṃ te aḍḍhamāsakaṃ dassāmī”ti āha. “Deva, ahaṃ tumhākaṃ kathāya ṭhatvā tañca gaṇhissāmi, itarañca dhaṇaṃ na nāseṣsāmi, mama gamanaṃ ahāpetvā tampi gahessāmi”ti. “Bho purisa, nivatta, māsaṃ te dassāmi, dve māsaṃkehi evaṃ vadḍhetvā koṭiṃ koṭisataṃ aparimitaṃ dhaṇaṃ dassāmi, nivattā”ti vuttepi “deva, taṃ gahetvā itarampi gaṇhissāmi”icceva āha. Tato seṭṭhiṭṭhānādīhi ṭhānantarehi palobhito yāva uparajjā tatheva vatvā “upaddharajjaṃ te dassāmi, nivattā”ti vutte sampaṭicchi. Rājā “gacchatha mama saṃsāyassa kesamassaṃ kāretvā nhāpetvā alaṅkaritvā ānetha na”nti amacce āṇāpesi. Amaccā tathā akāṃsu. Rājā

rajjaṃ dvidhā bhinditvā tassa upaḍḍharajjaṃ adāsi. “So pana taṃ gahetvāpi aḍḍhamāsakapemena uttarapassaṃ gatoyevā”ti vadanti. So aḍḍhamāsakarājā nāma ahosi. Te samaggā sammodamānā rajjaṃ kārentā ekadivasaṃ uyyānaṃ gamimsu. Tattha kīḷitvā udayarājā aḍḍhamāsakaraṅṅo anke sīsaṃ katvā nipajji. Tasmim̄ niddaṃ okkante parivāraṃmanussā kīḷānubhavanavasena tattha tattha agamaṃsu.

Aḍḍhamāsakarājā “kiṃ me niccakālaṃ upaḍḍharajjena, imaṃ māretvā ahameva sakalarajjaṃ kāressāmī”ti khaggaṃ abbāhitvā “paharissāmi na”nti cintetvā puna “ayaṃ rājā maṃ daliddakapaṇaṃ manussaṃ attanā samānaṃ katvā mahante issariye patiṭṭhapesi, evarūpaṃ nāma yasadāyakaṃ māretvā rajjaṃ kāressāmīti mama icchā uppannā, ayuttaṃ vata me kamma”nti satim̄ paṭilabhivā asim̄ pavesesi. Athassa dutiyampi tatiyampi tatheva cittaṃ uppajji. Tato cintesi “idaṃ cittaṃ punappunaṃ uppajjamānaṃ maṃ pāpakamme niyojeyyā”ti. So asim̄ bhūmiyaṃ khipitvā rājānaṃ utṭhāpetvā “khamāhi me, devā”ti pādesu pati. “Nanu samma, tava mamantare doso natthī”ti? “Atthi, mahārāja, ahaṃ idaṃ nāma akāsi”nti. “Tena hi samma, khamāmi te, icchanto pana rajjaṃ kārehi, ahaṃ uparājā hutvā taṃ upaṭṭhahissāmī”ti. So “na me, deva, rajjena attho, ayaṅhi taṅhā maṃ apāyesu nibbattāpessati, tava rajjaṃ tvameva gaṇha, ahaṃ pabbajissāmi, diṭṭhaṃ me kāmassa mūlaṃ, ayaṅhi saṅkappaṇa vaḍḍhati, na dāni naṃ tato paṭṭhāya saṅkappessāmī”ti udānento catutthaṃ gāthamāha –

39. “Addasaṃ kāma te mūlaṃ, saṅkappā kāma jāyasi;  
Na taṃ saṅkappayissāmi, evaṃ kāma na hehisi”ti.

Tattha **evanti** evaṃ mamantare. **Na hehisi**ti na uppajjissasi.

Evaṅca pana vatvā puna kāmesu anuyuñjantassa mahājanassa dhammaṃ desento pañcamāṃ gāthamāha –

40. “Appāpi kāmā na alaṃ, bahūhipi na tappati;  
Ahaṃ bālalapanā, parivajjetha jaggato”ti.

Tattha **ahahāti** saṃvegadīpanaṃ. **Jaggatoti** jagganto. Idaṃ vuttaṃ hoti – mahārāja, imassa mahājanassa appakāpi vatthukāmakilesakāmā na alaṃ pariyattāva, bahūhipi ca tehi na tappateva, “aho ime mama rūpā mama saddā”ti lapanato bālalapanā kāmā, ime vipassanaṃ vaḍḍhetvā bodhipakkhiyānaṃ dhammānaṃ bhāvanānuyogamanuyutto jagganto kulaputto parivajjetha, pariññāpahānābhisamayehi abhisamētvā pajaheyyāti.

Evaṃ so mahājanassa dhammaṃ desetvā udayarājānaṃ rajjaṃ paṭicchāpetvā mahājanaṃ assumukhaṃ rodamānaṃ pahāya himavantaṃ pavisitvā pabbajitvā jhānābhiññāyo nibbattetvā vihāsi. Tassa pabbajitakāle rājā taṃ udānaṃ sakalaṃ katvā udānento chaṭṭhaṃ gāthamāha –

41. “Appassa kammaṃ phalaṃ mamedam̄, udayo ajjhāgamā mahattapattaṃ;  
Suladdhalābho vata māṇavassa, yo pabbajī kāmarāgaṃ pahāyā”ti.

Tattha **udayoti** attānaṃ sandhāya vadati. **Mahattapattanti** mahantabhāvappattaṃ vipulaṃ issariyaṃ ajjhāgamā. **Māṇavassāti** sattassa mayhaṃ sahāyassa suladdhalābho, yo kāmarāgaṃ pahāya pabbajitoti adhippāyenevamāha.

Imissā pana gāthāya na koci atthaṃ jānāti. Atha naṃ ekadivasaṃ aggamaheṣī gāthāya atthaṃ pucchi, rājā na kathesi. Eko panassa gaṅgamālo nāma maṅgalanāpito, so raṅṅo massuṃ karonto paṭhamaṃ khuraparikkammaṃ katvā pacchā saṅḍāsena lomāni gaṇhāti, raṅṅo ca khuraparikkammakāle sukhaṃ hoti, lomaharaṇakāle dukkhaṃ. So paṭhamaṃ tassa varaṃ dātukāmo hoti, pacchā sīsacchedanamākankhati. Athekadivasaṃ “bhadde, amhākaṃ gaṅgamālakappako bālo”ti deviyā tamatthaṃ ārocetvā “ki pana, deva, kātuṃ vaṭṭati”ti vutte “paṭhamaṃ saṅḍāsena lomāni gahetvā



pacchā khuraparikkamma’nti āha. Sā taṃ kappakaṃ pakkosāpetvā “tāta, idāni rañño massukaraṇadivase paṭhamam lomāni gahetvā pacchā khuraparikkammaṃ kareyyāsi, rañña ca ‘varam gaṇhāhi’ti vutte ‘aññena, deva, me attho natthi, tumhākaṃ udānagāthāya attham ācikkhathā’ti vadeyyāsi, aham te bahuṃ dhanam dassāmī”ti āha. So “sādhū”ti sampañcchitvā massukaraṇadivase paṭhamam saṇḍāsam gaṇhi. “Kiṃ, bhaṇe gaṅgamāla, apubbaṃ te karaṇa’nti rañña vutte “deva, kappakā nāma apubbampi karontī”ti vatvā paṭhamam lomāni gahetvā pacchā khuraparikkammaṃ akāsi. Rājā “varam gaṇhāhi”ti āha. “Deva, aññena me attho natthi, tumhākaṃ udānagāthāya attham kathethā”ti. Rājā attano daliddakāle kataṃ kathetuṃ lajjanto “tāta, iminā te varena ko attho, aññaṃ gaṇhāhi”ti āha. “Etameva dehi, devā”ti. So musāvādabhayena “sādhū”ti sampañcchitvā kummāsapiṇḍijātake vuttanayeneva sabbaṃ saṃvidahāpetvā ratanapallaṅke nisīditvā “aham gaṅgamāla, purimabhava imasmimyeva nagare”ti sabbaṃ purimakiriyaṃ ācikkhitvā “iminā kāraṇena upaḍḍhagātham, ‘sahāyo pana me pabbajito, aham pamatto hutvā rajjameva kāremī’ti iminā kāraṇena pacchā upaḍḍhagātham vadāmī”ti udānassa attham kathesi.

Taṃ sutvā kappako “upaḍḍhuposathakammena kira rañña ayaṃ sampatti laddhā, kusalam nāma kātabbameva, yaṃnūnāham pabbajitvā attano patiṭṭham kareyya’nti cintetvā ñātibhogaparivaṭṭam pahāya rājānam pabbajam anujānāpetvā himavantam gantvā isipabbajam pabbajitvā tilakkhaṇam āropento vipassanam vaḍḍhetvā paccekabodhiṃ patvā iddhiyā nibbattapattacīvaradhāro gandhamādanapabbate pañcachabbassāni vasitvā “bārāṇasirājānam olokessāmī”ti ākāsenāgantvā uyyāne maṅgalasilāyaṃ nisīdi. Uyyānapālo sañjānitvā gantvā rañño ārocesi “deva, gaṅgamālo paccekabuddho hutvā ākāsenāgantvā uyyāne nisinnō”ti. Rājā taṃ sutvā “paccekabuddham vandissāmī”ti vegena nikkhami. Rājamātā ca puttana saddhimyeva nikkhami. Rājā uyyānam pavisitvā taṃ vanditvā ekamantaṃ nisīdi saddhiṃ parisāya. So rañña saddhiṃ paṭisanthāram karonto “kiṃ, brahmadatta, appamattosi, dhammena rajjam kāresi, dānādīni puññāni karosī”ti rājānam kulanāmena ālapitvā paṭisanthāram karoti. Taṃ sutvā rañño mātā “ayaṃ hīnajacco malamajjako nhāpitaputto attānam na jānāti, mama puttam pathavissaram jātikhattiyam ‘brahmadattā’ti nāmenālapatī”ti kujjhivā sattamaṃ gāthamāha –

42. “Tapasā pajahanti pāpakammaṃ, tapasā nhāpitakumbhakārabhāvam;  
Tapasā abhibhuyya gaṅgamāla, nāmenālapasajja brahmadattā”ti.

Tassattho – ime tāva sattā **tapasā** attanā katena tapoguṇena **pāpakammaṃ** jahanti, kiṃ panete tapasā **nhāpitakumbhakārabhāvampi** jahanti, yaṃ tvaṃ gaṅgamāla, attano **tapasā** abhibhuyya mama puttam brahmadattaṃ nāmenālapasi, patirūpaṃ nu te etantī?

Rājā mātaram vāretvā paccekabuddhassa guṇam pakāsento aṭṭhamam gāthamāha –

43. “Sandiṭṭhikameva amma passatha, khantīsoraccassa ayaṃ vipāko;  
Yo sabbajanassa vanditohu, taṃ vandāma sarājikā samaccā”ti.

Tattha **khantīsoraccassāti** adhivāsanakhantiyā ca soraccassa ca. **Taṃ vandāmāti** taṃ idāni mayam sarājikā samaccā sabbe vandāma, passatha amma, khantīsoraccānam vipākanti.

Rañña mātari vāritāya sesamahājano uṭṭhahitvā “ayuttaṃ vata, deva, evarūpassa hīnajaccassa tumhe nāmenālapana’nti āha. Rājā mahājanampi paṭibāhitvā tassa guṇakatham kathetuṃ osānagāthamāha –

44. “Mā kiñci avacuttha gaṅgamālam, muninaṃ monapathesu sikkhamānam;  
Eso hi atari aṇṇavam, yaṃ taritvā caranti vītasokā”ti.

Tattha **muninanti** agārikānagārikasekkhāsekkhapaccekamunīsu paccakamuniṃ. **Monapathesu**

**sikkhamānanti** pubbabhāgapaṭipadābodhipakkhiyadhammasaṅkhātesu monapathesu sikkhamānaṃ. **Aṅṅavanti** saṃsāramahāsamuddaṃ.

Evañca pana vatvā rājā paccekabuddhaṃ vanditvā “bhante, mayhaṃ mātu khamathā”ti āha. “Khamāmi, mahārājā”ti. Rājaparisāpi naṃ khamāpesi. Rājā attānaṃ nissāya vasanatthāya paṭiññaṃ yāci. Paccekabuddho pana paṭiññaṃ adatvā sarājikāya parisāya passantiyāva ākāse ṭhatvā rañño ovādaṃ datvā gandhamādanameva gato.

Satthā imaṃ dhammalesanaṃ āharitvā “evañca upāsakā uposathavāso nāma vasitabbayuttako”ti vatvā jātaṃ samodhānesi – “tadā paccekabuddho parinibbāyi, aḍḍhamāsakarājā ānando ahoṣi, rañño mātā mahāmāyā, aggamaheṣi rāhulamātā, udayarājā pana ahameva ahoṣi”nti.

Gaṅgamālaajātakavaṇṇanā pañcamā.

[422] 6. Cetiyaajātakavaṇṇanā

**Dhammo have hatō hantīti** idaṃ satthā jetavane viharanto devadattassa pathavipavesanaṃ ārabha kathesi. Tasmiñhi divase bhikkhū dhammasabhāyaṃ kathaṃ samuṭṭhāpesuṃ “āvuso, devadatto musāvādaṃ katvā pathaviṃ pavitṭho avācīparāyaṇo jāto”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepi pathaviṃ pavitṭhoyevā”ti vatvā atītaṃ āhari.

Atīte paṭhamakappe mahāsammato nāma rājā asaṅkhyeyyāyuko ahoṣi. Tassa putto rojo nāma, tassa putto vararojo nāma, tassa putto kalyāṇo nāma, kalyāṇassa putto varakalyāṇo nāma, varakalyāṇassa putto uposatho nāma, uposathassa putto varauposatho nāma, varauposathassa putto mandhātā nāma, mandhātussa putto varamandhātā nāma, varamandhātussa putto varo nāma, varassa putto upavaro nāma ahoṣi, uparivarotipi tasseva nāmaṃ. So cetiyaraṭṭhe sotthiyanagare rajjaṃ kāresi, catūhi rājiddhīhi samannāgato ahoṣi uparicaro ākāsaḡāmī, cattāro naṃ devaputtā catūsu disāsu khaggahatthā rakkhanti, kāyato candanagandho vāyati, mukhato uppalaḡandho. Tassa kapilo nāma brāhmaṇo purohito ahoṣi. Kapilabrāhmaṇassa pana kaniṭṭho korakalambo nāma rañña saddhiṃ ekācariyakule uggahitasippo bālasahāyo. So tassa kumārakāleyeva “ahaṃ rajjaṃ patvā tuyhaṃ purohitaṭṭhānaṃ dassāmī”ti paṭijāni. So rajjaṃ patvā pitu purohitaṃ kapilabrāhmaṇaṃ purohitaṭṭhānato cāvetuṃ nāsakkhi. Purohite pana attano upaṭṭhānaṃ āgacchante tasmiṃ gāravena apacitākāraṃ dassesi. Brāhmaṇo taṃ sallakkhetvā “rajjaṃ nāma samavayehi saddhiṃ suparihāraṃ hoti, ahaṃ rājānaṃ āpucchitvā pabbajissāmī”ti cintetvā “deva, ahaṃ mahallako, gehe kumārako atthi, taṃ purohitaṃ karohi, ahaṃ pabbajissāmī”ti rājānaṃ anujānāpetvā puttaṃ purohitaṭṭhāne ṭhapāpetvā rājuyyānaṃ pavisitvā isipabbajjaṃ pabbajitvā jhānābhīñṇāyo nibbattetvā puttaṃ nissāya tattheva vāsaṃ kappesi.

Korakalambo “ayaṃ pabbajantopi na mayhaṃ ṭhānantaraṃ dāpesi”ti bhātari āghātaṃ bandhitvā ekadivasaṃ sukhakathāya nisinnasamaye rañña “korakalamba kiṃ tvaṃ purohitaṭṭhānaṃ na karosi”ti vutte “āma, deva, na karomi, bhātā me karotī”ti āha. “Nanu te bhātā pabbajito”ti? “Āma pabbajito, ṭhānantaraṃ pana puttassa dāpesi”ti. “Tena hi tvaṃ karohi”ti? “Deva, paveṇiyā āgataṃ ṭhānantaraṃ mama bhātaraṃ apanetvā na sakkā mayā kātu”nti. “Evaṃ sante ahaṃ taṃ mahallakaṃ katvā bhātaraṃ te kaniṭṭhaṃ karissāmī”ti. “Kathaṃ, devā”ti? “Musāvādaṃ katvā”ti. “Kiṃ deva, na jānātha, yadā mama bhātā mahantena abbhutadhammena samannāgato vijjādharo, so abbhutadhammena tumhe vañcessati, cattāro devaputte antarahite viya karissati, kāyato ca mukhato ca sugandhaṃ duggandhaṃ viya karissati, tumhe ākāsa otāretvā bhūmiyaṃ ṭhite viya karissati, tumhe pathaviṃ pavisantā viya bhavissatha, tadā tumhākaṃ kathāya paṭiṭṭhātuṃ na sakkhissathā”ti. “Tvaṃ evaṃ saññaṃ mā kari, ahaṃ kātuṃ sakkhissāmī”ti. “Kadā karissatha, devā”ti? “Ito sattame divase”ti. Sā kathā sakalanagare pākāṭā ahoṣi. “Rājā kira musāvādaṃ katvā mahallakaṃ khuddakaṃ, khuddakaṃ mahallakaṃ karissati, ṭhānantaraṃ khuddakassa dāpessati, kīdiso nu kho musāvādo nāma, kiṃ nīlako, udāhu pītakādīso aññataravaṇṇo”ti evaṃ mahājanassa vitakko udapādi. Tadā kira lokassa saccavādīkālo, “musāvādo

nāma evarūpo’’ti na jānanti.

Purohitaputtopi taṃ kathaṃ sutvā pitu santikaṃ gantvā kathesi ‘‘tāta, rājā kira musāvādaṃ katvā tumhe khuddake katvā amhākaṃ ṭhānantaraṃ mama cūlapitussa dassatī’’ti. ‘‘Tāta, rājā musāvādaṃ katvāpi amhākaṃ ṭhānantaraṃ harituṃ na sakkhissati. Kataradivase pana karissatī’’ti? ‘‘Ito kira sattame divase’’ti. ‘‘Tena hi tadā mayhaṃ āroceyyāsī’’ti. Sattame divase mahājanā ‘‘musāvādaṃ passissāmā’’ti rājaṅgaṇe sannipatitvā mañcātimañce bandhitvā aṭṭhaṃsu. Kumāro gantvā pitu ārocesi. Rājā alaṅkatapaṭiyatto nikkhamma mahājanamajjhe rājaṅgaṇe ākāse aṭṭhāsī. Tāpaso ākāsenāgantvā rañño purato nisīdanacammaṃ attharitvā ākāse pallaṅkena nisīditvā ‘‘saccaṃ kira tvaṃ mahārāja, musāvādaṃ katvā khuddakaṃ mahallakaṃ katvā tassa ṭhānantaraṃ dātukāmosī’’ti? ‘‘Āma ācariya, evaṃ me kathita’’nti. Atha naṃ so ovadanto ‘‘mahārāja, musāvādo nāma bhāriyo guṇaparidhaṃsako catūsu apāyesu nibbattāpeti. Rājā nāma musāvādaṃ karonto dhammaṃ hanati, so dhammaṃ hanitvā sayameva haññatī’’ti vatvā paṭhamaṃ gāthamāha –

45. ‘‘Dhammo have hatō hanti, nāhato hanti kiñcanaṃ;  
Tasmā hi dhammaṃ na hane, mā tvaṃ dhammo hatō hanī’’ti.

Tattha **dhammoti** jeṭṭhāpacāyanadhammo idhādhippeto.

Atha naṃ uttaripi ovadanto ‘‘sace, mahārāja, musāvādaṃ karissasi, catasso iddhiyo antaradhāyissantī’’ti vatvā dutiyaṃ gāthamāha –

46. ‘‘Alikāṃ bhāsamānassa, apakkamanti devatā;  
Pūtikañca mukhaṃ vāti, sakaṭṭhānā ca dhamsati;  
Yo jānaṃ pucchito pañhaṃ, aññathā naṃ viyākare’’ti.

Tattha **apakkamanti devatā**ti mahārāja, sace alikāṃ bhaṇissasi, cattāro devaputtā ārakkhaṃ chaḍḍetvā antaradhāyissantīti adhippāyēnetaṃ vadati. **Pūtikañca mukhaṃ vātī**ti mukhañca te kāyo ca ubho pūtīgandhaṃ vāyissantīti sandhāyāha. **Sakaṭṭhānā ca dhamsatī**ti ākāśato bhassitvā pathaviṃ pavississatīti dīpento evamāha.

Taṃ sutvā rājā bhīto korakalambaṃ olokesi. Atha naṃ so ‘‘mā bhāyi, mahārāja, nanu mayā paṭhamameva tumhākaṃ etaṃ kathita’’nti āha. Rājā kapilassa vacanaṃ sutvāpi anādiyitvā attanā kathitameva purato karonto ‘‘tvaṃsi, bhante, kaniṭṭho, korakalambo jeṭṭho’’ti āha. Athassa saha musāvādena cattāro devaputtā ‘‘tādisassa musāvādīno ārakkhaṃ na gaṇhissāmā’’ti khagge pādamūle chaḍḍetvā antaradhāyīṃsu, mukhaṃ bhinnakukkuṭaṇḍapūti viya, kāyo vivaṭavaccakuṭi viya duggandhaṃ vāyi, ākāśato bhassitvā pathaviyaṃ paṭiṭṭhahi, catassopi iddhiyo parihāyīṃsu. Atha naṃ mahāpurohito ‘‘mā bhāyi, mahārāja, sace saccaṃ bhaṇissasi, sabbaṃ te pākatikaṃ karissāmī’’ti vatvā tatiyaṃ gāthamāha –

47. ‘‘Sace hi saccaṃ bhaṇasi, hohi rāja yathā pure;  
Musā ce bhāsase rāja, bhūmiyaṃ tiṭṭha cetiyā’’ti.

Tattha **bhūmiyaṃ tiṭṭhāti** bhūmiyaṃyeva paṭiṭṭha, puna ākāśaṃ laṅghituṃ na sakkhissasīti attho.

So ‘‘passa, mahārāja, paṭhamaṃ musāvādeneva te catasso iddhiyo antarahitā, sallakkhehi, idānipi sakkā pākatikaṃ kātu’’nti vuttopi ‘‘evaṃ vatvā tumhe maṃ vañcetukāmā’’ti dutiyampi musāvādaṃ bhaṇitvā yāva gopphakā pathaviṃ pāvīsi. Atha naṃ punapi brāhmaṇo ‘‘sallakkhehi, mahārāja, idānipi sakkā pākatikaṃ kātu’’nti vatvā catutthaṃ gāthamāha –

48. ‘‘Akāle vassatī tassa, kāle tassa na vassati;

Yo jānaṃ pucchito pañhaṃ, aññathā naṃ viyākare’’ti.

Tattha **tassā**ti yo jānanto pucchitaṃ pañhaṃ musāvādaṃ katvā aññathā byākaroti, tassa rañño vijite devo yuttakāle avassitvā akāle vassatīti attho.

Atha naṃ punapi musāvādaphalena yāva jaṅghā pathaviṃ paviṭṭhaṃ ‘‘sallakkhehi, mahārājā’’ti vatvā pañcamaṃ gāthamāha –

49. ‘‘Sace hi saccamaṃ bhaṇasi, hohi rāja yathā pure;  
Musā ce bhāsase rāja, bhūmiṃ pavisa cetiyā’’ti.

So tatiyampi ‘‘tvamsi, bhante, kaniṭṭho, jeṭṭho korakalambo’’ti musāvādameva katvā yāva jānukā pathaviṃ pāvisi. Atha naṃ punapi ‘‘sallakkhehi, mahārājā’’ti vatvā dve gāthā abhāsi –

50. ‘‘Jivhā tassa dvidhā hoti, uragasseva disampati;  
Yo jānaṃ pucchito pañhaṃ, aññathā naṃ viyākare.

51. ‘‘Sace hi saccamaṃ bhaṇasi, hohi rāja yathā pure;  
Musā ce bhāsase rāja, bhīyyo pavisa cetiyā’’ti.

Imā dve gāthā vatvā ‘‘idāni sakkā pākatikaṃ kātu’’nti āha. Rājā tassa vacanaṃ sutvāpi anādiyitvā ‘‘tvamsi, bhante, kaniṭṭho, jeṭṭho korakalambo’’ti catutthampi musāvādaṃ katvā yāva kaṭito pathaviṃ pāvisi. Atha naṃ brāhmaṇo ‘‘sallakkhehi, mahārājā’’ti vatvā puna dve gāthā abhāsi –

52. ‘‘Jivhā tassa na bhavati, macchasseva disampati;  
Yo jānaṃ pucchito pañhaṃ, aññathā naṃ viyākare.

53. ‘‘Sace hi saccamaṃ bhaṇasi, hohi rāja yathā pure;  
Musā ce bhāsase rāja, bhīyyo pavisa cetiyā’’ti.

Tattha **macchasevā**ti nibbattanibbattaṭṭhāne musāvādino macchassa viya kathanasamatthā jivhā na hoti, mūgo va hotīti attho.

So pañcamampi ‘‘tvamsi kaniṭṭho, jeṭṭho korakalambo’’ti musāvādaṃ katvā yāva nābhito pathaviṃ pāvisi. Atha naṃ brāhmaṇo punapi ‘‘sallakkhehi, mahārājā’’ti vatvā dve gāthā abhāsi –

54. ‘‘Thiyova tassa jāyanti, na pumā jāyare kule;  
Yo jānaṃ pucchito pañhaṃ, aññathā naṃ viyākare.

55. ‘‘Sace hi saccamaṃ bhaṇasi, hohi rāja yathā pure;  
Musā ce bhāsase rāja, bhīyyo pavisa cetiyā’’ti.

Tattha **thiyovā**ti nibbattanibbattaṭṭhāne musāvādissa dhītarova jāyanti, puttā na jāyantīti attho.

Rājā tassa vacanaṃ anādiyitvā chaṭṭhampi tatheva musāvādaṃ bhaṇitvā yāva thanā pathaviṃ pāvisi. Atha naṃ punapi brāhmaṇo ‘‘sallakkhehi, mahārājā’’ti vatvā dve gāthā abhāsi –

56. ‘‘Puttā tassa na bhavanti, pakkamanti disodisaṃ;  
Yo jānaṃ pucchito pañhaṃ, aññathā naṃ viyākare.

57. ‘‘Sace hi saccamaṃ bhaṇasi, hohi rāja yathā pure;

Musā ce bhāsase rāja, bhiyyo pavisa cetiyā’’ti.

Tattha **pakkamantī**ti sace musāvādissa puttā bhavanti, mātāpitūnaṃ anupakārā hutvā palāyantīti attho.

So pāpamittasaṃsaggadosena tassa vacanaṃ anādiyitvā sattamampi tatheva musāvādaṃ akāsi. Athassa pathavī vivaraṃ adāsi, avīcito jālā uṭṭhahitvā gaṇhi.

58. “Sa rājā isinā satto, antalikkhacaro pure;  
Pāvekkhi pathaviṃ cecco, hīnatto patva pariyāyaṃ.

59. Tasmā hi chandāgamaṃ, nappasaṃsanti paṇḍitā;  
Aduṭṭhacitto bhāseyya, giraṃ saccūpasamhita’’nti. –

Imā dve abhisambuddhagāthā honti.

Tattha **sa rājā**ti bhikkhave, so rājā cetiyo pubbe antalikkhacaro hutvā pacchā isinā abhisatto parihiṇasabhāvo hutvā. **Patva pariyāyanti** attano kālapariyāyaṃ patvā pathaviṃ pāvisīti attho. **Tasmāti** yasmā cetiyarājā chandāgamanena avīciparāyaṇo jāto, tasmā. **Aduṭṭhacittoti** chandādīhi adūsitacitto hutvā saccameva bhāseyya.

Mahājano “cetiyarājā isim akkositvā musāvādaṃ katvā avīciṃ pavitṭho’’ti bhayappatto ahoṣi. Rañño pañca puttā āgantvā brāhmaṇassa pādesu patitvā “amhākaṃ avassayo hohī’’ti vadiṃsu. Brāhmaṇo “tāta, tumhākaṃ pitā dhammaṃ nāsetvā musāvādaṃ katvā isim akkositvā avīciṃ upapanno, dhammo nāmesa hato hanati, tumhehi na sakkā idha vasitu’’nti vatvā tesu sabbajeṭṭhakaṃ “ehi tvaṃ, tāta, pācīnadvārena nikkhamitvā ujukaṃ gacchanto sabbasetamṃ sattapatiṭṭhamṃ hatthiratanamṃ passissasi, tāya saññāya tattha nagaraṃ māpetvā vasa, taṃ nagaraṃ **hatthipuram** nāma bhavissatī’’ti āha. Dutiyamṃ āmantetvā “tvaṃ, tāta, dakkhiṇadvārena nikkhamitvā ujukameva gacchanto sabbasetamṃ assaratanamṃ passissasi, tāya saññāya tattha nagaraṃ māpetvā vasa, taṃ nagaraṃ **assapuram** nāma bhavissatī’’ti āha. Tatiyamṃ āmantetvā “tvaṃ, tāta, pacchimadvārena nikkhamitvā ujukameva gacchanto kesarasīhamṃ passissasi, tāya saññāya tattha nagaraṃ māpetvā vasa, taṃ nagaraṃ **sīhapuram** nāma bhavissatī’’ti āha. Catutthamṃ āmantetvā “tvaṃ, tāta, uttaradvārena nikkhamitvā ujukameva gacchanto sabbaratanamayaṃ cakkapañjaramṃ passissasi, tāya saññāya tattha nagaraṃ māpetvā vasa, taṃ nagaraṃ **uttarapañcālam** nāma bhavissatī’’ti āha. Pañcamaṃ āmantetvā “tāta, tayā imasmiṃ ṭhāne vasituṃ na sakkā, imasmiṃ nagare mahāthūpaṃ katvā nikkhamitvā pacchimittarāya disāya ujukameva gacchanto dve pabbate aññamaññaṃ paharivā paharivā daddarasaddamṃ karonte passissasi, tāya saññāya tattha nagaraṃ māpetvā vasa, taṃ nagaraṃ **daddarapuram** nāma bhavissatī’’ti āha. Te pañcapi janā tāya tāya saññāya gantvā tasmimṃ tasmimṃ ṭhāne nagarāni māpetvā vasimṃsu.

Satthā imaṃ dhammadesanaṃ āharitvā “na, bhikkhave, idāneva, pubbepi devadatto musāvādaṃ katvā pathaviṃ pavitṭho’’ti vatvā jātaṃ samodhānesi – “tadā cetiyarājā devadatto ahoṣi, kapilabrāhmaṇo pana ahameva ahoṣi’’nti.

Cetiyajātakavaṇṇanā chaṭṭhā.

[423] 7. Indriyajātakavaṇṇanā

**Yo indriyānanti** idaṃ satthā jetavane viharanto purānadutiyikāpalobhanaṃ ārabha kathesi. Sāvattiyamṃ kireko kulaputto satthu dhammadesanaṃ sutvā “na sakkā agāramajjhe vasantena ekantaparipuṇṇamṃ ekantaparissuddhamṃ brahmacariyamṃ carituṃ, niyyānikasāsane pabbajitvā dukkhassantaṃ karissāmi’’ti ghare vibhavaṃ puttadārassa niyyādetvā nikkhamitvā satthāraṃ pabbajjamṃ yāci. Satthāpissa pabbajjamṃ dāpesi. Tassa ācariyupajjhāyehi saddhimṃ piṇḍāya carato navakattā ceva

bhikkhūnaṃ bahubhāvena ca kulaghare vā āsanasālāya vā āsanaṃ na pāpuṇāti, saṅghanavakānaṃ koṭiyaṃ pīthakaṃ vā phalakaṃ vā pāpuṇāti. Āhāropi uḷuṅkapitṭhena ghaṭṭitā bhinnasitthakayāgu vā pūṭisukkhakhajjakaṃ vā jhāmasukkhakūro vā pāpuṇāti, yāpanapamaṇaṃ na hoti. So attanā laddhaṃ gahetvā purāṇadutiyaikāya santikaṃ gacchati. Athassa sā pattaṃ gahetvā vanditvā pattato bhattaṃ nīharitvā susampādītāni yāgubhattasūpabyañjanāni deti. Mahallako rasataṇhāya bajjhivā purāṇadutiyaikā jahitūṃ na sakkoti. Sā cintesi “baddho nu kho, noti vīmaṃsissāmi na”nti.

Athekadivasaṃ janapadamanussaṃ setamattikāya nhāpetvā gehe nisīdāpetvā aññepissa katipaye parivāramanusse añāpetvā thokathokaṃ pānabhojanaṃ dāpesi. Te khādantā bhuñjantā nisīdiṃsu. Gehadvāre ca cakkesu goṇe bandhāpetvā ekaṃ sakaṭampi ṭhapāpesi, sayāṃ pana piṭṭhigabbhe nisīditvā pūve paci. Mahallako āgantvā dvāre aṭṭhāsi. Taṃ disvā eko mahallakapuriso “ayye, eko thero dvāre ṭhito”ti āha. “Vanditvā aticchāpehi”ti. So “aticchatha, bhante”ti punappunaṃ kathetvāpi taṃ agacchantāṃ disvā “ayye, thero na gacchati”ti āha. Sā āgantvā sāṇiṃ ukkhipitvā oloketvā “ambho ayaṃ mama dārapitā”ti vatvā nikkhamitvā pattaṃ gahetvā geḥaṃ pavesetvā parivisitvā bhojanapariyosāne vanditvā “bhante, tumhe idheva parinibbāyatha, mayaṃ ettakaṃ kālaṃ aññaṃ kulaṃ na gaṇhima, asāmike pana ghare gharāvāso na saṅṭhāti, mayaṃ aññaṃ kulaṃ gaṇhāma, dūraṃ janapadaṃ gacchissāma, tumhe appamattā hotha, sace me doso atthi, khamathā”ti āha. Mahallakassa hadayaphālanakālo viya ahosi. Atha naṃ “ahaṃ taṃ jahitūṃ na sakkomi, mā gaccha, vibbhamissāmi, asukaṭṭhāne me sāṭakaṃ pesehi, pattacīvaraṃ paṭicchāpetvā āgacchissāmi”ti āha. Sā “sādhū”ti sampaṭicchi. Mahallako vihāraṃ gantvā ācariyupajjhāye pattacīvaraṃ paṭicchāpentō “kasmā, āvuso, evaṃ karosī”ti vutto “purāṇadutiyaikā jahitūṃ na sakkomi vibbhamissāmi”ti āha. Atha naṃ te anicchantaññeva satthu santikaṃ netvā “kiṃ, bhikkhave, imaṃ anicchantaññeva ānayitthā”ti vutte “bhante, ayaṃ ukkaṇṭhitvā vibbhamitukāmo”ti vadiṃsu. Atha naṃ satthā “saccaṃ kira tvaṃ bhikkhu ukkaṇṭhitosī”ti pucchi. “Saccaṃ, bhante”ti. “Ko taṃ ukkaṇṭhāpesī”ti? “Purāṇadutiyaikā bhante”ti vutte “bhikkhu na idāneva sā itthi tuyhaṃ anattakārikā, pubbepi tvaṃ taṃ nissāya catūhi jhānehi parihīno mahādukkhaṃ patvā maṃ nissāya tamhā dukkhā muccitvā naṭṭhajjhānaṃ paṭilabhī”ti vatvā atūtaṃ āhari.

Atīte bārāṇasiyaṃ brahmadatte rajjaṃ kārente bodhisatto tassa purohitaṃ paṭicca tassa brāhmaṇiyā kucchimhi nibbatti. Jātadivase cassa sakalanagare āvudhāni pajjalimṃsu, tenassa “jotipālakumāro”ti nāmaṃ karimṃsu. So vayappatto takkasīlāyaṃ sabbasippāni uggaṇhitvā rañño sippaṃ dassetvā issariyaṃ pahāya kañci ajānāpetvā aggadvārena nikkhamitvā araññaṃ pavisitvā sakkadattiye kaviṭṭhakaassame isipabbajjaṃ pabbajitvā jhānābhīññāyo nibbatesi. Taṃ tattha vasantaṃ anekāni isisatāni parivāresuṃ, mahāsamāgamo ahosi. So sarabhaṅgasatthā nāma ahosi, tassa satta antevāsikajeṭṭhakā ahesuṃ. Tesu sālissaro nāma isi kaviṭṭhakaassamā nikkhamitvā suraṭṭhajanapade puratthimajanapade sātōdikāya nāma nadiyā tīre anekasahassaisiparivāro vasi. Meṇḍissaro nāma isi pajjotakapañcālarañño vijjite kalabbacūlakaṃ nāma nigamaṃ nissāya anekasahassaisiparivāro vasi. Pabbato nāma isi ekaṃ aṭavijjanapadaṃ nissāya anekasahassaisiparivāro vasi. Kāḷadevilo nāma isi avantidakkhiṇāpathe ekagghanaselaṃ nissāya anekasahassaisiparivāro vasi. Kisavaccho nāma isi ekakova daṇḍakirañño kumbhavatīnagaraṃ nissāya uyyāne vasi. Anupiyatāpaso pana bodhisattassa upaṭṭhāko tassa santike vasi. Nārado nāma isi kāḷadevilassa kaniṭṭho majjhimadesa ārañjaragirimhi pabbatajālantare ekakova ekasmiṃ guhāleṇe vasi.

Ārañjaragirino nāma avidūre eko ākiṇṇamanusso nigamo atthi, tesāṃ antare mahatī nadī atthi, taṃ nadiṃ bahū manussā otaranti. Uttamarūpadharā vaṇṇadāsīyopi purise palobhayamānā tassā nadiyā tīre nisīdanti. Nāradaṭāpaso tāsu ekaṃ disvā paṭibaddhacitto hutvā jhānaṃ antaradhāpetvā nirāhāro parisussanto kilesavasāṃ gantvā sattāhaṃ vasitvā nipajji. Athassa bhātā kāḷadevilo āvajjento taṃ kāraṇaṃ ṇatvā ākāsenāgantvā leṇaṃ pāvīsi. Nārado taṃ disvā “kasmā bhavaṃ āgatō”ti āha. “Bhavaṃ ‘akallako’ti bhavantaṃ paṭijaggitūṃ āgatomhī”ti. Atha naṃ so “abhūtaṃ kathaṃ kathesi, alikaṃ tucchaṃ kathesī”ti musāvādena niggaṇhi. So “netāṃ pahātuṃ vaṭṭatī”ti sālissaraṃ ānesi, meṇḍissaraṃ ānesi, pabbatampi ānesi. Itaropi te tayo musāvādena niggaṇhi. Kāḷadevilo

“sarabhaṅgasatthāraṃ ānessāmī”ti ākāsenāgantvā taṃ ānesi. So āgantvā taṃ disvā “indriyavasam gato”ti ñatvā “kacci nārada, indriyānaṃ vasaṃ gato”ti pucchi. Itarena taṃ sutvāva uṭṭhāya vanditvā “āma, ācariyā”ti vutte “nārada, indriyavasam gatā nāma imasmiṃ attabhāve sussantā dukkhaṃ anubhavitvā dutiye attabhāve niraye nibbantantī”ti vatvā paṭhamam gāthamāha –

60. “Yo indriyānaṃ kāmena, vasaṃ nārada gacchati;  
So pariccajjubho loke, jīvantova visussatī”ti.

Tattha **yo indriyānanti** nārada, yo puriso rūpādīsu subhākāraṃ gahetvā kilesakāmasasena channaṃ indriyānaṃ vasaṃ gacchati. **Pariccajjubho loketi** so manussalokañca devalokañcāti ubholoke pariccajitvā nirayādīsu nibbantantīti attho. **Jīvantova visussatīti** jīvantoyeva attanā icchitaṃ kilesavatthum alabhanto sokena visussati, mahādukkhaṃ pāpuṇātīti.

Taṃ sutvā nārado “ācariya, kāmasevanaṃ nāma sukhaṃ, evarūpaṃ sukhaṃ kiṃ sandhāya dukkhanti vadasi”ti pucchi. Athassa sarabhaṅgo “tena hi suṇāhī”ti dutiyam gāthamāha –

61. “Sukhassānantaram dukkhaṃ, dukkhassānantaram sukhaṃ;  
Sosi patto sukhā dukkhaṃ, pāṭikañkha varaṃ sukha”nti.

Tattha **sukhassānantaranti** kāmasukhassa anantaram nirayadukkhaṃ. **Dukkhasatī** sīlarakkhaṇadukkhasa anantaram dibbamānusakasukhañceva nibbānasukhañca. Idaṃ vuttaṃ hoti – nārada, ime hi sattā kāmasevanasamaye kālam katvā ekantadukkhe niraye nibbantanti, sīlam rakkhantā vipassanāya kammaṃ karontā ca pana kilamanti, te dukkhena sīlam rakkhitvā sīlabalena vuttappakāram sukhaṃ labhanti, idaṃ dukkhaṃ sandhāyāhaṃ evaṃ vadāmīti. **Sosi pattoti** so tvaṃ nārada, idāni jhānasukhaṃ nāsetvā tato sukhā mahantaṃ kāmanissitaṃ cetasikadukkhaṃ patto. **Pāṭikañkhāti** idaṃ kilesadukkhaṃ chaḍḍetvā puna tadeva varaṃ uttamaṃ jhānasukhaṃ iccha patthehīti.

Nārado “idaṃ ācariya, dukkhaṃ dussahaṃ, na taṃ adhvāsetum sakkomī”ti āha. Atha naṃ mahāsatto “nārada, dukkhaṃ nāma uppannaṃ adhvāsetabbamevā”ti vatvā tatiyam gāthamāha –

62. “Kicchakāle kicchasaḥo, yo kicchaṃ nātivattati;  
Sa kicchantaṃ sukhaṃ dhīro, yogaṃ samadhigacchatī”ti.

Tattha **nātivattatīti** nānuvattati, ayameva vā pāṭho. Idaṃ vuttaṃ hoti – nārada, yo kāyikacetasikadukkhasaṅkhātassa kicchassa uppannakāle appamatto tassa kicchassa haraṇūpāyam karonto kicchasaḥo hutvā taṃ kicchaṃ nānuvattati, tassa vase avattitvā tehi tehi upāyehi taṃ kicchaṃ abhibhavati vināseti, so dhīro kicchassa antimasāṅkhātaṃ nirāmisasukhasaṅkhātaṃ jhānasukhaṃ adhigacchati, taṃ vā kicchantaṃ yogasukhaṃ adhigacchati, akilamantova pāpuṇātīti.

So “ācariya, kāmasukhaṃ nāma uttamasukhaṃ, na taṃ jahitum sakkomī”ti āha. Atha naṃ mahāsatto “nārada, dhammo nāma na kenaci kāraṇena nāsetabbo”ti vatvā catuttham gāthamāha –

63. “Na heva kāmāna kāmā, nānatthā nātthakāraṇā;  
Na katañca niraṅkatvā, dhammā cavitumarahasi”ti.

Tattha **kāmāna kāmāti** kāmānaṃ kāmā, vatthukāmānaṃ patthanāyāti attho. **Nānatthā nātthakāraṇāti** na anattato na atthakāraṇā. **Na katañca niraṅkatvāti** katañca nipphāditaṃ jhānaṃ niraṅkatvā. Idaṃ vuttaṃ hoti – nārada, na heva vatthukāmapatthanāya dhammā cavitumarahasi, ekasmiṃ anattthe uppanne taṃ paṭihanitukāmo nānatthā na atthenapi kāraṇabhūtena dhammā cavitumarahasi, “asuko nāma me attho uppajjissatī”ti evampi atthakāraṇāpi na dhammā cavitumarahasi, kataṃ pana nipphāditaṃ jhānasukhaṃ niraṅkatvā vināsetvā neva dhammā cavitumarahasi.

Evam sarabhaṅgena catūhi gāthāhi dhamme desite kāḷadevilo attano kaniṭṭham ovadanto pañcamam gāthamāha –

64. “Dakkham gahapatī sādhu, saṃvibhajjaṅca bhojanam;  
Ahāso atthalābhesu, atthabyāpatti abyatho”ti.

Tattha **dakkham gahapatī**ti nārada gharāvāsam vasantānam gahapatīnam bhoguppādanatthāya analasyachekakusalabhāvasaṅkhātā dakkham nāma sādhu, dakkhabhāvo bhaddako. **Saṃvibhajjaṅca bhojananti** dukkhena uppāditabhogānam dhammikasamaṇabrāhmaṇehi saddhiṃ saṃvibhajitvā paribhogakaraṇam dutiyam sādhu. **Ahāso atthalābhesū**ti mahante issariye uppanne appamādasena ahāso anuppilāvittam tatiyam sādhu. **Atthabyāpatti**ti yadā pana attano atthabyāpatti yasavināso hoti, tadā **abyatho** akilamanam catuttham sādhu, tasmā tvam, nārada, “jhānam me antarahita”nti mā soci, sace indriyānam vasam na gamissasi, naṭṭhampi te jhānam puna pākatikameva bhavissatīti.

Tam puna kāḷadevilena nāradasa ovaditabhāvam ṅatvā satthā abhisambuddho hutvā chaṭṭham gāthamāha –

65. “Ettāvatetaṃ paṇḍiccaṃ, api so devilo bravi;  
Na yito kiñci pāpiyo, yo indriyānam vasam vaje”ti.

Tassattho – bhikkhave, ettakam etaṃ paṇḍiccaṃ soyaṃ devilo abravi. Yo pana kilesavasena indriyānam vasam vajati, ito añño pāpiyo natthīti.

Atha nam sarabhaṅgo āmantetvā “nārada, idaṃ tāva suṇa, yo hi paṭhamameva kattabbayuttakam na karoti, so araṇnam pavitṭhamāṇavako viya socati paridevatī”ti vatvā atītam āhari.

Atīte ekasmiṃ kāsinigame eko brāhmaṇamāṇavo abhirūpo ahosi thāmasampanno nāgabalo. So cintesi – “kiṃ me kasikammādīni katvā mātāpitūhi puṭṭhehi, kiṃ puttadārena, kiṃ dānādīhi puññehi katehi, kañci apositvā kiñci puññam akatvā araṇnam pavisitvā mige māretvā attānamyeva possessāmī”ti? So pañcāvudhasannaddho himavantam gantvā nānamige vadhitvā khādanto antohimavante vidhavāya nāma nadiyā tīre giriparikkhittam mahantam pabbatajālam patvā tattha mige vadhitvā aṅgāre pakkamaṃsam khādanto vāsam kappesi. So cintesi “ahaṃ sabbadā thāmasampanno na bhavissāmi, dubbalakāle araṇne caritum na sakkhissāmi, idāneva nānāvaṇṇe mige pabbatajālam pavesetvā dvāram yojetvā araṇnam anāhiṇḍantova yathāruciya mige vadhitvā khādissāmī”ti tathā akāsi. Athassa kāle atikkante tam kammaṃ matthakappattam diṭṭhadhammavedanīyam jātam, attano hatthapādehi na labhi gantum, aparāparam parivattetum nāsakkihi, neva kiñci khādaniyam bhojanīyam, na pānīyam passi, sarīram milāyi, manussapeto ahosi, gimhakāle pathavī viya sarīram bhijjitvā rājiyo dassesi, so durūpo dussaṅghito mahādukkham anubhavi.

Evam addhāne gate siviraṭṭhe sivrājā nāma “araṇne aṅgārapakkamaṃsam khādissāmī”ti amaccānam rajjam niyyādetvā pañcāvudhasannaddho araṇnam pavisitvā mige vadhitvā maṃsam khādamaṇo anupubbena tam padesaṃ patvā tam purisaṃ disvā bhītopi satim upaṭṭhapetvā “kosi tvam ambho purisā”ti pucchi. “Sāmi, manussapeto aham, attano katakamma phalam anubhomi, tvam pana kosi”ti? “Sivirājāhamasmī”ti. “Atha kasmā idhāgatosī”ti? “Migamaṃsam khādanatthāya”ti. Athassa so “ahampi mahārāja, imināva kāraṇena āgantvā manussapeto jāto”ti sabbam vitthārena kathetvā attano dukkhitabhāvam raṇño ācikkhanto sesagāthā āha –

66. “Amittānamva hatthattham, sivi pappoti māmiva;  
Kammaṃ vijjaṅca dakkheyyam, vivāham silamaddavam;  
Ete ca yase hāpetvā, nibbatto sehi kammehi.



67. “Sohaṃ sahaṣṣajīnava, abandhu aparāyaṇo;  
Ariyadhammā apakkanto, yathā peto tathevahaṃ.
68. “Sukhakāme dukkhāpetvā, āpannosmi padaṃ imaṃ;  
So sukhaṃ nādhigacchāmi, t̥hito bhāṇumatāmivā”ti.

Tattha **amittānaṃva hatthathanti** amittānaṃ hatthe atthaṃ vināsaṃ viya. **Sivīti** rājānaṃ ālapati. **Pappoti māmivāti** mādiso pāpakammaena pāpuṇāti, attanova kammaena vināsaṃ pāpuṇātīti vuttaṃ hoti. **Kammanti** kasikammādibhedaṃ ājīvasādhakaṃ kiccaṃ. **Vijjanti** nānappakāraṃ hatthisippādikaṃ sippaṃ. **Dakkheyyanti** nānappakārena bhoguppādanakosallaṃ. **Vivāhanti** āvāhavivāhasambandhaṃ. **Sīlamaddavanti** pañcavidhasīlañceva muduvacanaṃ hitakāmaṃ pāpanivāraṇaṃ kalyāṇamittatañca. So hi idha maddavoti adhippeto. **Ete ca yase hāpetvāti** ete ettake yasadāyake dhamme hāpetvā ca. **Nibbatto sehi kammehīti** attano kammehi nibbatto. Idaṃ vuttaṃ hoti – ahaṃ, mahārāja, imasmiṃ loke issariyadāyakaṃ kattabbayuttakaṃ kammaṃ akatvā sippaṃ asikkhitvā upāyena bhoge anuppādetvā āvāhavivāhaṃ akatvā sīlaṃ arakkhitvā maṃ akiccaṃ karontaṃ pāpanivāraṇasamatthe kalyāṇamitte abhajitvā ime ettake yasadāyakattā “yase”ti saṅkhyāṃ gate lokappavattidhamme hāpetvā chaḍḍetvā imaṃ araññaṃ pavisitvā sayāṃ katehi pāpakammehi idāni manussapeto hutvā nibbattosmīti.

**Sahassajīnovāti** sahaṣṣajīnapuriso viyāti attho. Svāhaṃ sammā paṭipajjitvā bhoge uppādeyyaṃ, tehi anekasahashehi bhogehi jitotipi attho. **Aparāyaṇoti** asaraṇo, nippatiṭṭhoti attho. **Ariyadhammāti** sappurisadhammato. **Yathā petoti** yathā mato peto hutvā uppajjeyya, jīvamānoyeva tathā manussapeto jātosmīti attho. **Sukhakāme dukkhāpetvāti** sukhakāme satte dukkhāpetvā. “Sukhakāmo”tipi pāṭho, sayāṃ sukhakāmo paraṃ dukkhāpetvāti attho. **Āpannosmi padaṃ imanti** evarūpaṃ koṭṭhāsaṃ pattosmi. Pathantipi pāṭho, idaṃ dukkhassa pathabhūtaṃ attabhāvaṃ pattosmīti attho. **T̥hito bhāṇumatāmivāti** bhāṇumā vuccati aggi, vītaccikaṅgārehi samantā parikiṇṇo viya sarīre utṭhitena mahādāhena dayhanto kāyikacetāsikasukhaṃ na vindāmīti vadati.

Evañca pana vatvā “ahaṃ, mahārāja, sukhakāmo paraṃ dukkhāpetvā diṭṭheva dhamme manussapeto jāto, tasmā tvaṃ pāpaṃ mā kari, attano nagaraṃ gantvā dānādīni puññāni karohī”ti āha. Rājā tathā katvā saggapuraṃ pūresi. Sarabhaṅgasatthā imaṃ kāraṇaṃ āharitvā tāpasāṃ saññāpesi. So tassa dhammakathāya saṃvegaṃ paṭilabhivā taṃ vanditvā khamāpetvā kaṣiṇaparikkammaṃ katvā naṭṭhaṃ jhānaṃ paṭipākātikaṃ akāsi. Sarabhaṅgo tassa tattha vasitūṃ adatvā taṃ ādāya attano assamaṃ gato.

Satthā imaṃ dhammadesanaṃ āharitvā saccāni pakāsetvā jātakaṃ samodhānesi, saccapariyosāne ukkaṇṭhitabhikkhu sotāpattiphale patiṭṭhahi.

Tadā nārado ukkaṇṭhitabhikkhu ahoṣi, nagarasobhiṇī purāṇadutiyikā, sālissaro sārīputto, meṇḍissaro kassapo, pabbato anuruddho, kāḷadevilo kaccāyano, anupīyo ānando, kisavaccho mahāmoggallāno, sarabhaṅgo pana ahameva ahoṣinti.

Indriyajātakavaṇṇanā sattamā.

[424] 8. Ādittajātakavaṇṇanā

**Ādittasminti** idaṃ satthā jetavane viharanto asadisadānaṃ ārabha katesi. Asadisadānaṃ **mahāgovindasuttavaṇṇanāto** (dī. ni. atṭha. 2.296) vitthāretvā kathetabbaṃ. Tassa pana dinnadivasato dutyadivase dhammasabhāyaṃ kathaṃ samuṭṭhāpesuṃ “āvuso, kosalarājā vicinitvāva, puññakkhettaṃ ñatvā buddhappamukhassa ariyasaṅghassa asadisadānaṃ adāsi”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “anacchariyaṃ, bhikkhave, rañño vicinitvā anuttare puññakkhette dānapatiṭṭhāpanaṃ, porāṇakapaṇḍitāpi vicinitvāva mahādānaṃ adamsū”ti vatvā atītaṃ āhari.

Atīte siviraṭṭhe roruvanagare roruvamahārājā nāma dasa rājadhamme akopetvā catūhi saṅgahavattūhi janaṃ saṅgaṅhanto mahājanassa mātāpituṭṭhāne ṭhatvā kapaṇaddhikavanibbakayācakādīnaṃ mahādānaṃ pavattesi. Tassa samuddavijayā nāma aggamaheṣī ahoṣi paṇḍitā nīṇasampannā. So ekadivasam dānaggaṃ olokeno “mayhaṃ dānaṃ dussilā lolasattā bhuñjanti, taṃ maṃ na hāseti, ahaṃ kho pana silavantānaṃ aggadakkhiṇeyyānaṃ paccekabuddhānaṃ dātukāmo, te ca himavantapadese vasanti, ko nu kho te nimantetvā ānessati, kaṃ pesessāmi”ti cintetvā tamatthaṃ deviyā ārocesi. Atha naṃ sā āha “mahārāja, mā cintayittha, amhākaṃ dātabbadānabalena silabalena saccabalena pupphāni pesetvā paccekabuddhe nimantetvā tesam āgatakāle sabbaparikkhārasampannadānaṃ dassāma”ti. Rājā “sādhū”ti sampaṭicchitvā “sakalanagaravāsino silaṃ samādiyantū”ti nagare bheriṃ carāpetvā sayampi saparijano uposathaṅgāni adhiṭṭhāya mahādānaṃ pavattetvā sumanapupphapuṇṇaṃ suvaṇṇasamuggaṃ gāhāpetvā pāsādā oruyha rājaṅgaṇe ṭhatvā pañcaṅgāni pathaviyaṃ patiṭṭhāpetvā pācīnadisābhimukho vanditvā “pācīnadisāya arahante vandāmi, sace amhākaṃ koci guṇo atthi, amhesu anukampaṃ katvā amhākaṃ bhikkhaṃ gaṅhathā”ti vatvā satta pupphamuṭṭhiyo khipi. Pācīnadisāya paccekabuddhānaṃ abhāvena punadivase nāgamimsu. Dutiyadivase dakkhiṇadisam namassi, tatopi nāgatā. Tatiyadivase pacchimadisam namassi, tatopi nāgatā. Catutthadivase uttaradisam namassi, namassitvā ca pana “uttarahimavantapadesavāsino paccekabuddhā amhākaṃ bhikkhaṃ gaṅhantū”ti satta pupphamuṭṭhiyo vissajjesi. Pupphāni gantvā nandamūlakapabbhāre pañcannaṃ paccekabuddhasatānaṃ upari patimsu.

Te āvajjamānā rañña attano nimantitabhāvaṃ ṇatvā punadivase satta paccekabuddhe āmantetvā “mārisā, rājā vo nimanteti, tassa saṅgahaṃ karothā”ti vadimsu. Satta paccekabuddhā ākāsenāgantvā rājadvāre otarimsu. Te disvā rājā somanassajāto vanditvā pāsādaṃ āropetvā mahantaṃ sakkāraṃ katvā dānaṃ datvā bhattakiccapariyosāne punadivasatthāya punadivasatthāyāti evaṃ cha divase nimantetvā sattame divase sabbaparikkhāradānaṃ sajjetvā sattaratanakhacitāni mañcapīṭhādīni paññāpetvā ticīvarādike sabbasamaṇaparibhoge sattannaṃ paccekabuddhānaṃ santike ṭhapetvā “mayam ime parikkhāre tumhākaṃ demā”ti vatvā tesam bhattakiccapariyosāne rājā ca devī ca ubhopi namassamānā aṭṭhaṃsu. Atha nesam anumodanaṃ karonto saṅghatthero dve gāthā abhāsi –

69. “Ādittasmiṃ agārasmiṃ, yaṃ nīharati bhājanaṃ;  
Taṃ tassa hoti atthāya, no ca yaṃ tattha ḍayhati.
70. “Evamādīpito loko, jarāya maraṇena ca;  
Nīharetheva dānena, dinnam hoti sunīhata”nti.

Tattha **ādittasmiṃ**ti taṅkhaṇe pajjalite. **Bhājananti** upakaraṇaṃ. **No ca yaṃ tattha ḍayhatī**ti yaṃ pana tattha ḍayhati, antamaso tiṇasanthāropi, sabbam tassa anupakaraṇameva hoti. **Jarāya maraṇena cāti** desanāsīsametaṃ, atthato panesa ekādasahi aggīhi ādīpito nāma. **Nīharethevāti** tato ekādasati aggīhi pajjalitalokā dasavidhadānavatthubhedam taṃ taṃ parikkhāradānaṃ cetanāya nikkadḍhethēva. **Dinnam hotī**ti appam vā bahum vā yaṃ dinnam, tadeva sunīhataṃ nāma hotīti.

Evaṃ saṅghatthero anumodanaṃ katvā “appamatto hohi, mahārājā”ti rañño ovādam datvā ākāse uppatitvā pāsādakaṇṇikaṃ dvidhā katvā gantvā nandamūlakapabbhāreyeva otari. Tassa dinnaparikkhāropi teneva saddhiṃ uppatitvā nandamūlakapabbhāreyeva otari. Rañño ca deviyā ca sakalasarīraṃ pītiyā puṇṇaṃ ahoṣi. Evaṃ tasmim gate avasesāpi –

71. “Yo dhammaladdhassa dadāti dānaṃ, uṭṭhānavīriyādhigatassa jantu;  
Atikkamma so veteraṇiṃ yamassa, dibbāni ṭhānāni upeti macco.
72. “Dānaṅca yuddhaṅca samānamāhu, appāpi santā bahuke jinanti;  
Appampi ce saddahāno dadāti, teneva so hoti sukhī parattha.

73. “Viceyya dānaṃ sugatappasatthaṃ, ye dakkhiṇeyyā idha jīvaloke;  
Etesu dinnāni mahapphalāni, bījāni vuttāni yathā sukhette.
74. “Yo pāṇabhūtāni aheṭṭhayaṃ caraṃ, parūpavādā na karoti pāpaṃ;  
Bhīruṃ pasamsanti na tattha sūraṃ, bhayā hi santo na karonti pāpaṃ.
75. “Hīnena brahmacariyena, khattiye upapajjati;  
Majjhimena ca devattaṃ, uttamena visujjhati.
76. “Addhā hi dānaṃ bahudhā pasatthaṃ, dānā ca kho dhammapadaṃva seyyo;  
Pubbeva hi pubbatareva santo, nibbānamevajjhagamuṃ sapaññā”ti. –

Evamekekāya gāthāya anumodanaṃ katvā tatheva agamiṃsu saddhiṃ parikkhārehi.

Tattha **dhammaladdhassāti** khīṇāsavaṃ ādiṃ katvā yāva sukkhavipassakayogāvacarō puggalo dhammassa laddhattā dhammaladdho nāma. Sveva uṭṭhānavīriyena tassa dhammassa adhigatattā uṭṭhānavīriyādhigato nāma. Tassa puggalassa yo jantu dadāti dānanti attho, dhammena laddhassa uṭṭhānasaṅkhātēna vīriyena adhigatassa deyyadhammassa aggaṃ gahetvā yo jantu sīlavantesu dānaṃ dadātītipi attho. Upayogatthe vā sāmivacanaṃ katvāpettha attho veditabbo. **Vetaraṇīnti** desanāsīsametaṃ, aṭṭha mahāniraye soḷasa ca ussade atikkamitvāti attho. **Dibbāni ṭhānāni upetīti** devaloke uppajjati.

**Samānamāhūti** sadisaṃ vadanti. Khayabhīrukassa hi dānaṃ natthi, bhayabhīrukassa yuddhaṃ natthi. Jīvite ālayaṃ vijahitvā yujjantova yujjhituṃ sakkoti, bhogesu ālayaṃ vijahitvā dāyako dātuṃ sakkoti, teneva taṃ ubhayaṃ “samāna”nti vadanti. **Appāpi santāti** thokāpi samānā pariccattajīvitā bahuke jinanti, evameva appāpi muñcacetanā bahumpi maccheracittaṃ lobhādiṃ vā kilesagahanaṃ jināti. **Appampi ceti** thokampi ce deyyadhammaṃ kammaṇca phalaṇca saddahanto deti. **Teneva soti** tena parittadeyyadhammavattukena parittakenāpi cāgena so parattha sukhī hoti, mahārājāti.

**Viceyya dānanti** dakkhiṇaṇca dakkhiṇeyyaṇca vicinitvā dinnadānaṃ. Tattha yaṃ vā taṃ vā adatvā aggaṃ paṇītaṃ deyyadhammaṃ vicinitvā dadanto dakkhiṇaṃ vicināti nāma, yesaṃ tesāṃ vā adatvā sīlādiguṇasampanne vicinitvā tesāṃ dadanto dakkhiṇeyyaṃ vicināti nāma. **Sugatappasatthanti** evarūpaṃ dānaṃ buddhehi pasatthaṃ. Tattha dakkhiṇeyyavicinaṃ dassetuṃ “**ye dakkhiṇeyyā**”tiādi vuttaṃ. Tattha **dakkhiṇeyyāti** dakkhiṇāya anucchavikā buddhādayo.

**Pāṇabhūtānīti** pāṇasaṅkhātāni bhūtāni. **Aheṭṭhayaṃ caranti** kāruṇṇena aviheṭṭhayaṃto caraṃāno. **Parūpavādāti** parūpavādabhayena pāpaṃ na karoti. **Bhīrunti** upavādabhīrukaṃ. **Na tattha sūranti** yo pana ayonisomanasikārena tasmīṃ upavāde sūro hoti, taṃ paṇḍitā nappasamsanti. **Bhayaṃ hīti** upavādabhayena hi paṇḍitā pāpaṃ na karonti.

**Hīnena brahmacariyenāti** bāhiritthāyatane tāva methunaviratisīlamattaṃ hīnaṃ brahmacariyaṃ nāma, tena khattiyakule uppajjati. Jhānassa upacāramattaṃ majjhimaṃ, tena devaloke uppajjati. Aṭṭha samāpattiyo uttamaṃ, tena brahmaloke uppajjanto visujjhati nāma. Sāsane pana sīlavantasappa ekaṃ devanikāyaṃ paṇidhāya brahmacariyaṃ hīnaṃ nāma, parisuddhasīlasseva samāpattinibbattaṃ majjhimaṃ nāma, parisuddhasīle ṭhatvā vipassanaṃ vaḍḍhetvā arahattupatti uttamaṃ nāma.

Osānagāthāya ayamatto – mahārāja, kiñcāpi ekaṃseneva dānaṃ bahudhā pasatthaṃ vaṇṇitaṃ, dānato pana samathavipassanāsaṅkhātāṃ nibbānasaṅkhātāṇca dhammakotṭhāsabhūtaṃ dhammapadameva uttaritaraṃ. Kiṃkāraṇā? Pubbeva hi imasmīṃ kappe kassapadasabalādayo pubbatareva vessabhūdasabalādayo santo sappurisā sapaññā samathavipassanaṃ bhāvetvā nibbānameva

ajjhagamum adhigatāti.

Evam satta paccekabuddhā anumodanāya rañño amatamahānibbānaṃ vaṇṇetvā rājānaṃ appamādena ovaditvā vuttanayeneva attano vasaṇaṭṭhānameva gatā. Rājāpi saddhiṃ aggamaheṣiyā dānaṃ datvā yāvajīvaṃ ṭhatvā tato cavitvā saggapuraṃ pūresi.

Satthā imaṃ dhammaḍḍesaṇaṃ āharitvā “evaṃ pubbepi paṇḍitā viceyya dānaṃ adamsū”ti vatvā jātaṃ samodhānesi – “tadā paccekabuddhā parinibbāyimsu, samuddavijayā rāhulamātā ahoṣi, roruvamahārājā pana ahameva ahoṣi”nti.

Ādittajātakavaṇṇanā aṭṭhamā.

[425] 9. Aṭṭhānājātakavaṇṇanā

**Gaṅgā kumudinī**ti idaṃ satthā jetavane viharanto ekaṃ ukkaṇṭhitabhikkhuṃ ārabba kathesi. Tañhi bhikkhuṃ satthā “saccaṃ kira tvam bhikkhu ukkaṇṭhitosi”ti pucchitvā “saccaṃ, bhante”ti vutte “kiṃkāraṇā”ti vatvā “kilesavasenā”ti vutte “bhikkhu mātuḡāmo nāma akataññū mittadubbhī avissāsanīyo. Atīte paṇḍitā devasikaṃ sahaṣṣaṃ dentāpi mātuḡāmaṃ tosetuṃ nāsakkhimsu. Sā ekadivasamattaṃ sahaṣṣaṃ alabhitvāva te gīvāyaṃ gāhāpetvā nīharāpesi, evaṃ akataññū mātuḡāmo, mā tassa kāraṇā kilesavasam gacchā”ti vatvā atītaṃ āhari.

Atīte bārānasiyaṃ brahmadatte rajjaṃ kārente tassa ca putto brahmadattakumāro, bārānasisetṭhino ca putto mahādhanakumāro nāma. Te ubhopi sahaṃsukīlakā sahāyakā ahesuṃ, ekācariyakuleyeva sippaṃ gaṇhimsu. Rājakumāro pitu accayena rajje patiṭṭhāsi, setṭhiputtoṃ pissa santikeyeva ahoṣi. Bārānasiyañca ekā nagarasobhiṇī vaṇṇadāsī abhirūpā ahoṣi sobhaggappattā. Setṭhiputto devasikaṃ sahaṣṣaṃ datvā niccakāle tāyeva saddhiṃ abhiraṃanto pitu accayena setṭhiṭṭhānaṃ labhitvāpi na taṃ vijahi, tatheva devasikaṃ sahaṣṣaṃ datvā abhiraṃi. Setṭhiputto divasassa tayo vāre rājupaṭṭhānaṃ gacchati. Athassa ekadivasam rājupaṭṭhānaṃ gatassa raññā saddhiṃ samullapantasseva sūriyo atthaṅgami, andhakāraṃ jātaṃ. So rājakulā nikkhamitvā “idāni gehaṃ gantvā āgamanavelā natthi, nagarasobhiṇiyāyeva gehaṃ gamissāmi”ti upaṭṭhāke uyyojetvā ekakova tassā gehaṃ pāvīsi. Atha naṃ sā disvā “ayyaputta, sahaṣṣaṃ ābhata”nti āha. “Bhadde, ahaṃ ajjeva ativikālo jāto, tasmā gehaṃ agantvā manusse uyyojetvā ekakova pavīṭṭhosmi, sve pana te dve sahaṣṣāni dassāmi”ti.

Sā cintesi “sacāhaṃ ajja okāsaṃ karissāmi, aññesupi divasesu tucchahatthakova āgamissati, evaṃ me dhaṇaṃ parihāyissati, na dānissa okāsaṃ karissāmi”ti. Atha naṃ evamāha “sāmi, mayaṃ vaṇṇadāsīyo nāma, amhākaṃ sahaṣṣaṃ adatvā keḷi nāma natthī”ti. “Bhadde, sve diguṇaṃ āharissāmi”ti punappunaṃ yāci. Nagarasobhiṇī dāsīyo ānāpesi “etassa idha ṭhatvā maṃ oloketuṃ mā adattha, gīvāyaṃ taṃ gahetvā nīharitvā dvāraṃ pidahathā”ti. Taṃ sutvā dāsīyo tathā karimsu. Atha so cintesi “ahaṃ imāya saddhiṃ asītikotiḍhanaṃ khādiṃ, sā maṃ ekadivasam tucchahatthaṃ disvā gīvāyaṃ gahetvā nīharāpesi, aho mātuḡāmo nāma pāpo nillajjo akataññū mittadubbhī”ti. So mātuḡāmassa aguṇaṃ anussarantova virajji, paṭikūlasaññaṃ paṭilabhi, gharāvāsepi ukkaṇṭhito “kiṃ me gharāvāseṇa, ajjeva nikkhamitvā pabbajissāmi”ti puna gehaṃ agantvā rājānampi adisvāva nagarā nikkhamitvā araññaṃ pavisitvā gaṅgātīre assamaṃ māpetvā isipabbajjaṃ pabbajitvā jhānābhīññāyo uppādetvā vanamūlaphalāhāro tattha vāsaṃ kappesi.

Rājā taṃ apassanto “kahaṃ mama sahāyo”ti pucchi. Nagarasobhiṇiyāpi katakammaṃ sakalanagare pākātaṃ jātaṃ. Athassa tamattaṃ ācikkhitvā “itī te deva, sahāyo lajjāya gharaṃpi agantvā araññaṃ pavisitvā pabbajito bhavissati”ti āhaṃsu. Rājā taṃ sutvā nagarasobhiṇiṃ pakkosāpetvā “saccaṃ kira tvam ekadivasam sahaṣṣaṃ alabhitvā mama sahāyaṃ gīvāyaṃ gāhāpetvā nīharāpesi”ti pucchi. “Saccaṃ, dev”ti. “Pāpe jammī, sīghaṃ mama sahāyassa gataṭṭhānaṃ gantvā taṃ ānehi, no ce ānessasi, jīvitam te natthī”ti. Sā rañño vacanaṃ sutvā bhītā rathaṃ āruya mahantena parivārena nagarā nikkhamitvā tassa vasaṇaṭṭhānaṃ pariyesanī sutavasena taṃ ṭhānaṃ sutvā tattha

gantvā vanditvā ‘‘ayya, mayā andhabālabhāvena kataṃ dosaṃ khamatha, ahaṃ na punevaṃ karissāmi’’ti yācitvā ‘‘sādhu, khamāmi te, natthi me tayi āghāto’’ti vutte ‘‘sace me khamatha, mayā saddhiṃ rathaṃ abhiruhatha, nagaraṃ gacchissāma, gatakāle yaṃ mama ghare dhaṇaṃ atthi, sabbaṃ dassāmi’’ti āha. So tassā vacanaṃ sutvā ‘‘bhaddo, idāni tayā saddhiṃ gantuṃ na sakkā, yadā pana imasmiṃ loke yena na bhavitabbaṃ, taṃ bhavissati, api nāma tadā gaccheyya’’nti vatvā paṭhamam gāthamāha –

77. ‘‘Gaṅgā kumudinī santā, saṅkhavaṇṇā ca kokilā;  
Jambū tālaphalaṃ dajjā, atha nūna tadā siyā’’ti.

Tassattho – bhaddo, yathā hi kumudasarā kumudehi saṅchannā tiṭṭhanti, tatheva sace sakalāpi mahāgaṅgā kumudinī sīghasotaṃ pahāya santā upasantā siyā, sabbe kokilā ca saṅkhavaṇṇā bhavēyyuṃ, sabbo jamburukko ca tālaphalaṃ dadeyya. **Atha nūna tadā siyā**ti atha tādise kāle amhākampi samāgamo nūna siyā, bhavēyya nāmāti vuttaṃ hoti.

Evañca vatvā punapi tāya ‘‘ehi, ayya, gacchāmā’’ti vutte ‘‘gacchissāmā’’ti vatvā ‘‘kasmim kāle’’ti vutte ‘‘asukasmiñca asukasmiñcā’’ti vatvā sesagāthā abhāsi –

78. ‘‘Yadā kacchapalomānaṃ, pāvāro tividho siyā;  
Hemantikaṃ pāvuraṇaṃ, atha nūna tadā siyā.
79. ‘‘Yadā makasapādānaṃ, aṭṭālo sukato siyā;  
Daḷho ca avikampī ca, atha nūna tadā siyā.
80. ‘‘Yadā sasavisāṇānaṃ, nisseṇī sukata siyā;  
Saggassārohaṇatthāya, atha nūna tadā siyā.
81. ‘‘Yadā nisseṇimāruya, candaṃ khādeyyu mūsikā;  
Rāhuñca paripāteyyuṃ, atha nūna tadā siyā.
82. ‘‘Yadā surāghaṭaṃ pitvā, makkhikā gaṇacāriṇī;  
Aṅgāre vāsaṃ kappeyyuṃ, atha nūna tadā siyā.
83. ‘‘Yadā bimboṭṭhasampanno, gadrabho sumukho siyā;  
Kusalo naccagītassa, atha nūna tadā siyā.
84. ‘‘Yadā kākā ulūkā ca, mantayeyyuṃ rahogata;  
Aññamaññaṃ pihayeyyuṃ, atha nūna tadā siyā.
85. ‘‘Yadā muḷālapattānaṃ, chattaṃ thirataṃ siyā;  
Vassassa paṭighātāya, atha nūna tadā siyā.
86. ‘‘Yadā kulako sakuṇo, pabbataṃ gandhamādanaṃ;  
Tuṇḍenādāya gaccheyya, atha nūna tadā siyā.
87. ‘‘Yadā sāmuddikaṃ nāvaṃ, sayantaṃ savaṭākaraṃ;  
Ceṭo ādāya gaccheyya, atha nūna tadā siyā’’ti.

Tattha **tividhoti** eko kacchapalomamayena pupphena, eko tūlena, eko ubhayenāti evaṃ tippakāro. **Hemantikaṃ pāvuraṇanti** himapātasamaye pāvuraṇāya bhavituṃ samattho. **Atha nūna tadā siyā**ti atha tasmiṃ kāle mama tayā saddhiṃ ekamseneva saṃsaggo siyā. Evaṃ sabbattha pacchimapaḍaṃ

yojetabbaṃ. **Aṭṭālo sukato**ti abhiruhitvā yujjhantaṃ purisasataṃ dhāretuṃ yathā sakkoti, evaṃ sukato. **Paripāteyyunti** palāpeyyuṃ. **Āngāreti** vītaccikaṅgārasanthare. **Vāsaṃ kappeyyunti** ekekaṃ surāghaṭaṃ pivitvā mattā vaseyyuṃ. **Bimboṭṭhasampannoti** bimbaphalasadisehi oṭṭhehi samannāgato. **Sumukhoti** suvaṇṇaādāsasadiso mukho. **Pihayeyyunti** aññaṃaññaṃ sampattiṃ icchantā pihayeyyūṃ pattheyyūṃ. **Muḷālapattānanti** saṅhānaṃ muḷālagacchapattānaṃ. **Kulakoti** eko khuddakasakuṇo. **Sāmuḍḍikanti** samuddapakkhandanamahānāvamaṃ. **Sayantaṃ savaṭṭākaranti** yantena ceva vaṭṭākarena ca saddhiṃ sabbasambhārayuttaṃ. **Ceṭo ādāyāti** yadā evarūpaṃ nāvaṃ khuddako gāmadārako hatthena gahetvā gaccheyyāti attho.

Iti mahāsatto iminā aṭṭhānaparikappena ekādasa gāthā abhāsi. Taṃ sutvā nagarasobhiṇī mahāsattaṃ khamāpetvā nagaraṃ gantvā rañño taṃ kāraṇaṃ ārocetvā attano jīvitāṃ yācitvā gaṇhi.

Satthā imaṃ dhammadesanaṃ āharitvā “evaṃ bhikkhu mātuḡāmo nāma akataññū mittadubbhī”ti vatvā saccāni pakāsetvā jātaṃ samodhānesi, saccapariyosāne ukkaṅṭhitabhikkhu sotāpattiṃphale patiṭṭhahi. Tadā rājā ānando ahoṣi, tāpaso pana ahameva ahoṣinti.

Aṭṭhānajātakavaṇṇanā navamā.

[426] 10. Dīpijātakavaṇṇanā

**Khamanīyaṃ yāpanīyaṃ** idamaṃ satthā veḷuvane viharanto ekaṃ eḷikaṃ ārabba kathesi. Ekasmiñhi samaye mahāmoggallānatthero giriparikkhitte ekadvāre giribbajasenāsane vihāsi. Dvārasamīpeyevassa caṅkamo ahoṣi. Tadā eḷakapālakā “eḷakā ettha carantū”ti giribbajamaṃ pavesetvā kīḷantā viharanti. Tesu ekadivasamaṃ sāyamaṃ āgantvā eḷake gahetvā gacchantesu ekā eḷikā dūre caramānā eḷake nikkhamante adisvā ohīyi. Taṃ pacchā nikkhamantiṃ eko dīpiko disvā “khādissāmi na”nti giribbajadvāre aṭṭhāsi. Sāpi ito cito ca oloketi taṃ disvā “esa maṃ māretvā khādītukāmatāya ṭhito, sace nivattitvā palāyissāmi, jīvitāṃ me natthi, ajja mayā purisakāraṃ kātuṃ vaṭṭati”ti cintetvā siṅgāni ukkhipitvā tassa abhimukhaṃ vegena pakkhanditvā dīpikassa “ito gaṇhissāmi, ito gaṇhissāmi”ti vipphandato va gahaṇaṃ anupagantvā vegena palāyitvā eḷakānaṃ antaraṃ pāvīsi. Atha thero taṃ tesamaṃ kiriyaṃ disvā punadivase gantvā tathāgatassa ārocetvā “evaṃ bhante, sā eḷikā attano upāyakusalatāya parakkamaṃ katvā dīpikato mucchi”ti āha. Satthā “moggallāna, idāni tāva so dīpiko taṃ gahetuṃ nāsakkihi, pubbe pana naṃ viravantiṃ māretvā khādī”ti vatvā tena yācito atītaṃ āhari.

Atīte magadharatṭhe bodhisatto ekasmiṃ gāme mahābhogakule nibbattitvā vayappatto kāme pahāya isipabbajamaṃ pabbajitvā jhānābhīññāyo nibbattetvā ciraṃ himavante vasitvā loṇambilasevanatthāya rājagahaṃ gantvā ekasmiṃyeva giribbaje paṇṇasālaṃ māpetvā vāsaṃ kappesi. Tadā imināva niyāmena eḷakapālakesu eḷake carantesu ekadivasamaṃ evameva ekaṃ eḷikaṃ pacchā nikkhamantiṃ disvā eko dīpiko “khādissāmi na”nti dvāre aṭṭhāsi. Sāpi taṃ disvā “ajja mayamaṃ jīvitāṃ natthi, ekenupāyena iminā saddhiṃ madhurapaṭisanthāraṃ katvā hadayamassa mudukaṃ janetvā jīvitāṃ rakkhissāmi”ti cintetvā dūratova tena saddhiṃ paṭisanthāraṃ karonti āgacchamānā paṭhamamaṃ gāthamāha –

88. “Khamanīyaṃ yāpanīyaṃ, kacci mātula te sukhaṃ;  
Sukhaṃ te ammā avaca, sukhakāmāva te maya”nti.

Tattha **sukhaṃ te ammā**ti mayamaṃ mātāpi “tumahākaṃ sukhaṃ puccheyyāsī”ti ajja maṃ avacāti attho. **Mayanti** mātula mayampi tumhākaṃ sukhaṃ eva icchāmāti.

Taṃ sutvā dīpiko “ayaṃ dhuttikā maṃ mātulavādena vañcetukāmā, na me kakkhaḷabhāvaṃ jānāti”ti cintetvā dutiyaṃ gāthamāha –

89. “Naṅguṭṭhaṃ me avakkamma, heṭṭhayitvāna eḷike;

Sājja mātulavādena, muñcitabbā nu maññasi’’ti.

Tassattho – tvaṃ mama naṅguṭṭhamaṇḍalaṃ akkamitvā heṭṭhayitvā āgacchasi, sā tvaṃ ‘‘ajja mātulavādena muñcitabbāhamasmī’’ti maññasi nu, evaṃ maññasi maññeti.

Taṃ sutvā itarā ‘‘mātula, mā evaṃ kari’’ti vatvā tatiyaṃ gāthamāha –

90. ‘‘Puratthāmukho nisinnosi, ahaṃ te mukhamāgatā;  
Pacchato tuyhaṃ naṅguṭṭhaṃ, kathaṃ khvāhaṃ avakkami’’nti.

Tattha **mukhanti** abhimukhaṃ. **Kathaṃ khvāhaṃ avakkaminti** tava pacchato ṭhitaṃ ahaṃ kathaṃ avakkaminti attho.

Atha naṃ so ‘‘kiṃ kathesi eḷike, mama naṅguṭṭhassa aṭṭhitaṭṭhānaṃ nāma natthī’’ti vatvā catutthaṃ gāthamāha –

91. ‘‘Yāvataṃ caturō dīpā, sasamuddā sapabbatā;  
Tāvataṃ mayhaṃ naṅguṭṭhaṃ, kathaṃ kho taṃ vivajjayī’’ti.

Tattha tāvatāti ettakaṃ ṭhānaṃ mama naṅguṭṭhaṃ parikkhipitvā gatanti vadati.

Taṃ sutvā eḷikā ‘‘ayaṃ pāpo madhurakathāya na allīyati, paṭisattu hutvā tassa kathessāmī’’ti vatvā pañcamāṃ gāthamāha –

92. ‘‘Pubbeva metamakkhiṃsu, mātā pitā ca bhātaro;  
Dīghaṃ duṭṭhassa naṅguṭṭhaṃ, sāmhi vehāyasāgatā’’ti.

Tattha **akkhiṃsūti** pubbeva me etaṃ mātā ca pitā ca bhātaro ca ācikkhiṃsu. **Sāmhitī** sā ahaṃ ñātakānaṃ santikā tava naṅguṭṭhassa dīghabhāvaṃ sutvā tava naṅguṭṭhaṃ pariharantī **vehāyasā** ākāsenā āgatāti.

Atha naṃ so ‘‘jānāmi te ahaṃ ākāsenā āgatabhāvaṃ, evaṃ āgacchantī pana mayhaṃ bhakkhe nāsetvā āgatāsī’’ti vatvā chaṭṭhaṃ gāthamāha –

93. ‘‘Tañca disvāna āyantīṃ, antalikkhasmi eḷike;  
Migasaṅgho palāyittha, bhakkho me nāsito tayā’’ti.

Taṃ sutvā itarā maraṇabhayaabhītā aññaṃ kāraṇaṃ āharitūṃ asakkontī ‘‘mātula, mā evarūpaṃ kakkhaḷakammaṃ kari, jīvitaṃ me dehī’’ti vilapi. Itaropi naṃ vilapantiññeva khandhe gahetvā māretvā khādi.

94. ‘‘Icceaṃ vilapantiyā, eḷakiyā ruhagghaso;  
Galakaṃ anvāvamaddi, natthi duṭṭhe subhāsitaṃ.

95. ‘‘Neva duṭṭhe nayo atthi, na dhammo na subhāsitaṃ;  
Nikkamaṃ duṭṭhe yuñjetha, so ca sabbhiṃ na rañjati’’ti. –

Imā dve abhisambuddhagāthā –

Tattha **ruhagghasoti** ruhirabhakkho lohitapāyī sāhasikadīpiko. **Galakaṃ anvāvamaddīti** gīvaṃ maddi, ḍaṃsitvā phālesīti attho. **Nayoti** kāraṇaṃ. **Dhammoti** sabhāvo. **Subhāsitanti** sukathitavacanāṃ,

sabbametam duṭṭhe natthīti attho. **Nikkamaṃ duṭṭhe yuñjethā**ti bhikkhave, duṭṭhapuggale parakkamameva yuñjeyya. **So ca sabbhiṃ na rañjati** so pana puggalo sabbhiṃ sundaram subhāsitaṃ na rañjati, na piyāyatīti attho. Tāpasō tesam kiriyam sabbam addasa.

Satthā imam dhammadesanam āharitvā jātakam samodhānesi – “tadā eḷikāva etarahi eḷikā ahosi, dīpikopi etarahi dīpikova, tāpasō pana ahameva ahosi”nti.

Dīpajātakavaṇṇanā dasamā.

Jātakuddānam –

Kaccānī aṭṭhasaddaṇca, sulasā ca sumaṅgalam;  
Gaṅgamālaṇca cetiyam, indriyaṇceva ādittam;  
Aṭṭhānaṇceva dīpi ca, dasa aṭṭhanipātake.

Aṭṭhakanipātavaṇṇanā niṭṭhitā.

## 9. Navakanipāto

[427] 1. Gijjhajātakavaṇṇanā

**Parisaṅkupatho nāmā**ti idam satthā jetavane viharanto ekaṃ dubbacabhikkhum ārabha kathesi. So kira eko kulaputto niyyānikasāsane pabbajitvāpi atthakāmehi ācariyupajjhāyehi ceva sabrahmacārīhi ca “evam te abhikkamitabbam, evam paṭikkamitabbam, evam ālokitabbam, evam vilokitabbam, evam samiñjitabbam, evam pasāritabbam, evam nivāsetabbam, evam pārūpitabbam, evam patto gahetabbo, yāpanamattam bhattam gahetvā paccavekkhitvāva paribhuñjitabbam, indriyesu guttadvārena bhōjane mattaññunā jāgariyamanuyuttena bhavitabbam, idam āgantukavattam nāma jānitabbam, idam gamikavattam nāma, imāni cuddasa khandhakavattāni, asīti mahāvattāni. Tattha te sammā vattitabbam, ime terasa dhutaṅgaguṇā nāma, ete samādāya vattitabba”nti ovadiyamāno dubbaco ahosi akkhamo appadakkhiṇaggāhī anusāsaniṃ. “Aham tumhe na vadāmi, tumhe pana mam kasmā vadatha, ahameva attano attham vā anattham vā jānissāmi”ti attānam avacanīyam akāsi. Athassa dubbacabhāvam ñatvā bhikkhū dhammasabhāyam aguṇakatham kathentā nisīdīmsu. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte tam bhikkhum pakkosāpetvā “saccam kira tvam bhikkhu dubbacosī”ti pucchitvā “sacca”nti vutte “kasmā bhikkhu evarūpe niyyānikasāsane pabbajitvā atthakāmānam vacanam na karosi, pubbepi tvam paṇḍitānam vacanam akatvā verambhavātamukhe cuṇṇavicuṇṇo jāto”ti vatvā atītam āhari.

Atīte gijjhakūṭe pabbate bodhisatto gijjhayoniyam nibbatti. Putto panassa supatto nāma gijjharājā anekasahassagijjhaparivāro thāmasampanno ahosi. So mātāpitaro posesi, thāmasampannatā pana atidūram uppatati. Atha nam pitā “tāta, ettakam nāma thānam atikkamitvā na gantabba”nti ovadi. So “sādhū”ti vatvāpi ekadivasam pana vuṭṭhe deve gijjhehi saddhim uppatitvā sese ohāya atibhūmim gantvā verambhavātamukham patvā cuṇṇavicuṇṇabhāvam pāpuṇi. Satthā tamattham dassento abhisambuddho hutvā imā gāthā abhāsi –

1. “Parisaṅkupatho nāma, gijjhapantho sanantano;  
Tatrāsi mātāpitaro, gijjho posesi jīṇṇake;  
Tesam ajagaramedaṃ, accahāsi bahuttaso.
2. “Pitā ca puttam avaca, jānam uccam papātinam;  
Supattam thāmasampannam, tejjasim dūragāminam.



3. “Pariplavantam pathaviṃ, yadā tāta vijānahi;  
Sāgarena parikkhittam, cakkamva parimaṇḍalam;  
Tato tāta nivattassu, māssu etto param gami.
4. “Udapattosi vegena, balī pakkhī dijuttamo;  
Olokayanto vakkaṅgo, pabbatāni vanāni ca.
5. “Addassa pathaviṃ gijjho, yathāsāsi pitussutam;  
Sāgarena parikkhittam, cakkamva parimaṇḍalam.
6. “Tañca so samatikkamma, paramevaccavattatha;  
Tañca vātasikhā tikkhā, accahāsi baliṃ dijam.
7. “Nāsakkhātigato poso, punadeva nivattitum;  
Dijo byasanamāpādi, verambhānam vasaṃ gato.
8. “Tassa puttā ca dārā ca, ye caññe anujīvino;  
Sabbe byasanamāpādum, anovādakare dije.
9. “Evampi idha vuḍḍhānam, yo vākyam nāvabujjhati;  
Atisīmacaro ditto, gijjhovātītasāsano;  
Sa ve byasanam pappoti, akatvā vuḍḍhasāsana’nti.

Tattha **parisaṅkupathoti** saṅkupatho. Manussā hiraññasuvaṇṇathāya gacchantā tasmim padese khāṇuke koṭṭetvā tesu rajjuyo bandhitvā gacchanti, tena so gijjhapabbate jaṅghamaggo “saṅkupatho”ti vuccati. **Gijjhapanthoti** gijjhapabbatamatthake mahāmaggo. **Sanantanoti** porāṇo. **Tatrāsīti** tasmim gijjhapabbatamatthake saṅkupathe eko gijjho āsi, so jiṇṇake mātāpitaro posesi. **Ajagaramedanti** ajagarānam medam. **Accahāsīti** ativiya āhari. **Bahuttasoti** bahuso. **Jānam uccam papātinanti** “putto te atiuccam thānam laṅghati”ti sutvā “ucce papātī aya”nti jānanto. **Tejassinti** purisatejasampannam. **Dūragāminanti** teneva tejena dūragāmiṃ. **Pariplavantanti** uppalapattam viya udake uplavamānam. **Vijānahīti** vijānāsi. **Cakkamva parimaṇḍalanti** yasmim te padese thitassa samuddena paricchinnō jambudīpo cakkamaṇḍalamva paññāyati, tato tāta nivattāhīti ovadanto evamāha.

**Udapattosīti** pitu ovādam akatvā ekadivasam gijjhehi saddhim uppatito te ohāya pitarā kathitaṭṭhānam agamāsi. **Olokayantoti** tam thānam patvā heṭṭhā olokento. **Vakkaṅgoti** vaṅkagīvo. **Yathāsāsi pitussutanti** yathāssa pitu santikā sutam āsi, tatheva addasa, “yathāsāsī”tipi pātho. **Paramevaccavattathāti** pitarā akkhātāṭṭhānato param ativattova. **Tañca vātasikhā tikkhāti** tam anovādam balimpi samānam dijam tikhiṇaverambhavātasikhā accahāsi atihari, cuṇṇavicuṇṇam akāsi. **Nāsakkhātigatoti** nāsakkhi atigato. **Posoti** satto. **Anovādakareti** tasmim dije paṇḍitānam ovādam akaronte sabbepi te mahādukkham pāpuṇṇisu. **Akatvā vuḍḍhasāsanananti** vuḍḍhānam hitakāmānam vacanam akatvā evameva byasanam mahādukkham pāpuṇṇāti. Tasmā tvaṃ bhikkhu mā gijjhasadiso bhava, atthakāmānam vacanam karohīti. So satthārā evam ovadito tato paṭṭhāya suvaco ahosi.

Satthā imaṃ dhammadesanam āharitvā jātakam samodhānesi – “tadā dubbacagijjho etarahi dubbacabhikkhu ahosi, gijjhapiṭā pana ahameva ahosi”nti.

Gijjhajātakavaṇṇanā paṭhamā.

[428] 2. Kosambiyajātakavaṇṇanā

**Puthusaddoti** idam satthā kosambim nissāya ghoṣitārāme viharanto kosambiyam bhaṇḍanakārake bhikkhū ārabba katesi. Vatthu **kosambakakkhandhake** (mahāva. 451 ādayo) āgatameva, ayam

panettha saṅkhepo. Tadā kira dve bhikkhū ekasmiṃ āvāse vaṣṣu vinayadharo ca suttantiko ca. Tesu suttantiko ekadivasam sarīravalañjam katvā udakakoṭṭhake ācamanaudakāvasesam bhājane ṭhapetvā nikkhami. Pacchā vinayadharo tattha pavittṭho taṃ udakam disvā nikkhamitvā itaram pucchi “āvuso, tayā udakam ṭhapita”nti. “Āmāvuso”ti. “Kiṃ panettha āpattibhāvaṃ na jānāsī”ti? “Āmāvuso na jānāmī”ti. “Hoti, āvuso, ettha āpattī”ti? “Tena hi paṭikarissāmi na”nti. “Sace pana te, āvuso, asaṅcicca asatiyā kataṃ, natthi āpattī”ti. So tassā āpattiyā anāpattidiṭṭhi ahoṣi. Vinayadharopi attano nissitakānaṃ “ayaṃ suttantiko āpattiṃ āpajjamānopi na jānātī”ti ārocesi. Te tassa nissitake disvā “tumhākaṃ upajjhāyo āpattiṃ āpajjitvāpi āpattibhāvaṃ na jānātī”ti āhaṃsu. Te gantvā attano upajjhāyassa ārocesuṃ. So evamāha – “ayaṃ vinayadharo pubbe ‘anāpattī’ti vatvā idāni ‘āpattī’ti vadati, musāvādī eso”ti. Te gantvā “tumhākaṃ upajjhāyo musāvādī”ti evaṃ aññamaññaṃ kalahaṃ vaḍḍhayiṃsu. Tato vinayadharo okāsaṃ labhitvā tassa āpattiyā adassanena ukkhepanīyakammaṃ akāsi. Tato paṭṭhāya tesam paccayadāyakā upāsakāpi dve koṭṭhāsā ahesuṃ. Ovādapaṭiggāhikā bhikkhuniyopi ārakkhadevatāpi dve koṭṭhāsā ahesuṃ. Tāsaṃ sandiṭṭhasambhattā ākāsaṭṭhadevatāpi yāva brahmalokā sabbe puthujjanā dve pakkhā ahesuṃ. Yāva akaniṭṭhabhavanā pana idaṃ kolāhalaṃ agamāsi.

Atheko bhikkhu tathāgataṃ upasaṅkamitvā ukkhepakānaṃ “dhammikeneva kammaṃ ayaṃ ukkhitto, ukkhittānuvattakānaṃ adhammikenā kammaṃ ukkhitto”ti laddhiṃ, ukkhepakehi vāriyamānānampi tesam taṃ anuparivāretvā caraṇabhāvañca satthu ārocesi. Bhagavā “samaggā kira hontū”ti dve vāre pesetvā “na icchanti bhante samaggā bhavitu”nti sutvā tatiyavāre “bhinno bhikkhusaṅgho”ti tesam santikaṃ gantvā ukkhepakānaṃ ukkhepane, itaresaṅca asaṅcicca āpattiyā adassane ādīnavaṃ vatvā pakkāmi. Puna tesam tattheva ekasīmāyaṃ uposathādīni kāretvā bhattaggādīsu bhaṇḍanañjātānaṃ “āsanantarikāya nisīditabba”nti bhattagge vattaṃ paññāpetvā “idānipi bhaṇḍanañjātā viharantī”ti sutvā tattha gantvā “alaṃ, bhikkhave, mā bhaṇḍana”ntiādīni vatvā aññatarena bhikkhunā dhammavādinā bhagavato vihesaṃ anicchantena “āgametu, bhante, bhagavā dhammasāmi, apposukko bhante, bhagavā diṭṭhadhammasukhavahāraṃ anuyutto viharatu, mayaṃ tena bhaṇḍanena kalahena viggahena vivādena paññāyissamā”ti vutte –

Bhūtapubbaṃ, bhikkhave, bārāṇasiyaṃ brahmadatto nāma kāsirājā ahoṣīti brahmadattena dīghītissa kosalarañño rajjaṃ acchanditvā aññātakavesena vasantassa māritabhāvañceva dīghāvukumārena attano jīvite dinne tato paṭṭhāya tesam samaggabhāvañca kathetvā “tesaṅhi nāma, bhikkhave, rājūnaṃ ādinnadaṇḍānaṃ ādinnasatthānaṃ evarūpaṃ khantisoraccaṃ bhavissati. Idha kho taṃ, bhikkhave, sobhetha, yaṃ tumhe evaṃ svākkhāte dhammavinaye pabbajitā samānā khamā ca bhavyeyātha soratā cā”ti ovaditvā dutiyampi tatiyampi “alaṃ, bhikkhave, mā bhaṇḍana”nti vāretvā anoramante disvā “pariyādiṅṅarūpā kho ime moghapurisā, na yime sukarā saññāpetu”nti pakkamitvā punadivase piṇḍapātaṭikkanto gandhakuṭiyā thokaṃ vissamitvā senāsaṃsaṃsāmetvā attano pattacīvaramādāya saṅghamajjhe ākāse ṭhatvā imā gāthā abhāsi –

10. “Puthusaddo samajano, na bālo koci maññatha;  
Saṅghasmiṃ bhijjamānasmim, nāññaṃ bhiyyo amaññaruṃ.
11. “Parimuṭṭhā paṇḍitābhāsā, vācāgocarabhāṇino;  
Yāvicchanti mukhāyāmaṃ, yena nītā na taṃ vidū.
12. “Akkocchi maṃ avadhi maṃ, ajini maṃ ahāsi me;  
Ye ca taṃ upanayhanti, veraṃ tesam na sammati.
13. “Akkocchi maṃ avadhi maṃ, ajini maṃ ahāsi me;  
Ye ca taṃ nupanayhanti, veraṃ tesūpasammati.
14. “Na hi verena verāni, sammantīdha kudācanaṃ;  
Averena ca sammantī, esa dhammo sanantano.

15. “Pare ca na vijānanti, mayamettha yamāmase;  
Ye ca tattha vijānanti, tato sammanti medhagā.
16. “Aṭṭhicchinnā pāṇaharā, gavāssadhanahārino;  
Raṭṭhaṃ vilumpamānānaṃ, tesampi hoti saṅgati;  
Kasmā tumhāka no siyā.
17. “Sace labhetha nipakaṃ sahāyaṃ, saddhimcaram sādhuvihāridhīraṃ;  
Abhibhuyya sabbāni parissayāni, careyya tenattamano satimā.
18. “No ce labhetha nipakaṃ sahāyaṃ, saddhimcaram sādhuvihāridhīraṃ;  
Rājāva raṭṭhaṃ vijitaṃ pahāya, eko care mātaṅgaraññeva nāgo.
19. “Ekassa caritaṃ seyyo, natthi bāle sahāyatā;  
Eko care na pāpāni kayirā, apposukko mātaṅgaraññeva nāgo”ti.

Tattha puthu mahāsaddo assāti **puthusaddo**. **Samajanoti** samāno ekasadisō jano, sabbovāyaṃ bhaṇḍanakāraḥajano samantato saddanicchāraṇena puthusaddo ceva sadiso cāti vuttaṃ hoti. **Na bālo koci maññathāti** tattha koci ekopi “ahaṃ bālo”ti na maññittha, sabbe paṇḍitamānino, sabbovāyaṃ bhaṇḍanakāraḥajano janoyeva. **Nāññaṃ bhiyyo amaññarunti** koci ekopi “ahaṃ bālo”ti na maññittha, bhiyyo ca saṅghasmiṃ bhijjamāne aññampi ekaṃ “mayhaṃ kāraṇā saṅgho bhijjati”ti idaṃ kāraṇaṃ na maññitthāti attho.

**Parimuṭṭhāti** muṭṭhassatino. **Paṇḍitābhāsāti** attano paṇḍitamānena paṇḍitasadisā. **Vācāgocarabhāṇinoti** rā-kārassa rassādeso kato, vācāgocarā ca na satipaṭṭhānādiariyadhammagocarā, bhāṇino ca. Kathaṃ bhāṇino? **Yāvicchanti mukhāyāmanti**, yāva mukhaṃ pasāretuṃ icchanti, tāva pasāretvā aggapādehi ṭhatvā bhāṇino, ekopi saṅghagāravena mukhasaṅkocanaṃ na karotīti attho. **Yena nītāti** yena bhaṇḍanena imaṃ nillajjabhāvaṃ nītā. **Na taṃ vidūti** evaṃ “ādīnavaṃ ida”nti taṃ na jānanti.

**Ye ca taṃ upanayhantīti** taṃ “akkocchi ma”ntiādikaṃ ākāraṃ ye upanayhanti. **Sanantanoti** porāṇo. **Pareti** paṇḍite ṭhapetvā tato aññe bhaṇḍanakāraḥajā pare nāma. Te ettha saṅghamajjhe kolāhalaṃ karontā “mayam yamāmase upayamāma nassāma, satataṃ samitaṃ maccusantikaṃ gacchāmā”ti na jānanti. **Ye ca tattha vijānantīti** ye tattha paṇḍitā “mayam maccusamīpaṃ gacchāmā”ti vijānanti. **Tato sammanti medhagāti** bhikkhave, evañhi te jānantā yonisomanasikāraṃ uppādetvā medhagānaṃ kalahānaṃ vūpasamāya paṭipajjanti.

**Aṭṭhicchinnāti** ayaṃ gāthā brahmadattañca dīghāvukumārañca sandhāya vuttā. Tesampi hoti saṅgati. Kasmā tumhākaṃ na hoti? Yesaṃ vo neva mātāpitūnaṃ aṭṭhīni chinnāni, na pāṇā haṭā, na gavāssadhanāni haṭāni. Idaṃ vuttaṃ hoti – bhikkhave, tesañhi nāma ādinnadaṇḍānaṃ ādinnasatthānaṃ rājūnaṃ evarūpā saṅgati samāgamo āvāhavivāhasambandhaṃ katvā ekato pānabhojanaṃ hoti, tumhe evarūpe sāsane pabbajitvā attano veramattampi jahituṃ na sakkotha, ko tumhākaṃ bhikkhubhāvoti.

**Sace labhethāti**ādīgāthāyo paṇḍitasahāyassa ca bālasahāyassa ca vaṇṇāvaṇṇadīpanatthaṃ vuttā. **Abhibhuyya sabbāni parissayānīti** sabbe pākaṭaparissaye ca paṭicchannaparissaye ca abhibhavitvā tena saddhim attamano satimā careyya. **Rājāva raṭṭhaṃ vijitaṃ pahāyāti** yathā attano vijitaṃ raṭṭhaṃ mahājanakarājā ca arindamarājā ca pahāya ekakova carimṣu, evaṃ careyyāti attho. **Mātaṅgaraññeva nāgoti** mātaṅgo araññe nāgo. **Mātaṅgoti** hatthī vuccati, **nāgoti** mahantādhivacanametam. Yathā hi mātuposako mātaṅganāgo araññe ekako cari, na ca pāpāni akāsi, yathā ca silavahatthināgo. Yathā ca pālileyako, evaṃ eko care, na ca pāpāni kayirāti vuttaṃ hoti.



Tadiṅgha maṃ brūhi vasantasannibha, kasmā suva sukkhadumaṃ na riñcasī’’ti.

Tattha **jhāyasīti** kiṃkāraṇā sukkhakhāṇumatthake jhāyanto pajjhāyanto tiṭṭhasi. **Īnghāti** codanatthe nipāto. **Vasantasannibhāti** vasantakāle vanasaṅḍo suvagaṇasamokiṇṇo viya nīlobhāso hoti, tena taṃ ‘‘vasantasannibhā’’ti ālapati. **Na riñcasīti** na chaḍḍesi.

Atha naṃ suvarājā ‘‘ahaṃ haṃsa attano kataññukataveditāya imaṃ rukkhaṃ na jahāmī’’ti vatvā dve gāthā abhāsi –

22. ‘‘Ye ve sakhīnaṃ sakhāro bhavanti, pāṇaccaye dukkhasukhesu haṃsa;  
Khīṇaṃ akhīṇampi na taṃ jahanti, santo sataṃ dhammamanussarantā.
23. ‘‘Sohaṃ sataṃ aññatarosmi haṃsa, ñātī ca me hoti sakhā ca rukkho;  
Taṃ nussahe jīvikattho pahātuṃ, khīṇanti ñatvāna na hesa dhammo’’ti.

Tattha **ye ve sakhīnaṃ sakhāro bhavanti** ye sahāyānaṃ sahāyā honti. **Khīṇaṃ akhīṇampi** paṇḍitā nāma attano sahāyaṃ bhogaparikkhayena khīṇampi akhīṇampi na jahanti. **Sataṃ dhammamanussarantāti** paṇḍitānaṃ paveṇiṃ anussaramānā. **Ñātī ca meti** haṃsarāja, ayaṃ rukkho sampiyāyanatthena mayhaṃ ñātī ca samāciṇṇacaraṇatāya sakhā ca. **Jīvikattho** tamahaṃ jīvikāya atthiko hutvā pahātuṃ na sakkomi.

Sakko tassa vacanaṃ sutvā tuṭṭho pasaṃsitvā vamaṃ dātukāmo dve gāthā abhāsi –

24. ‘‘Sādhu sakkhi kataṃ hoti, metti saṃsati santhavo;  
Sacetaṃ dhammaṃ rocesi, pāsaṃsosi vijānataṃ.
25. ‘‘So te suva vamaṃ dammi, pattayāna vihaṅgama;  
Vamaṃ varassu vakkaṅga, yaṃ kiñci manasicchasi’’ti.

Tattha **sādhūti** sampahaṃsanaṃ. **Sakkhi kataṃ hoti, metti saṃsati santhavoti** sakhībhāvo ca metti ca parisamajje santhavo cāti tayā mittamaṃ kataṃ sādhu hoti laddhakaṃ bhaddakameva. **Sacetaṃ dhammanti** sace etaṃ mittadhammaṃ. **Vijānataṃ** evaṃ sante viññūnaṃ pasaṃsitabbayuttakosīti attho. **So teti** so ahaṃ tuyhaṃ. **Varassūti** icchassu. **Yaṃ kiñci manasicchasi** yaṃ kiñci manasā icchasi, sabbaṃ taṃ vamaṃ dadāmi teti.

Taṃ sutvā suvarājā vamaṃ gaṇhanto sattamaṃ gāthamāha –

26. ‘‘Varaṅca me haṃsa bhavaṃ dadeyya, ayaṅca rukkho punarāyumaṃ labhetha;  
So sākhavā phalimā saṃvirūḷho, madhutthiko tiṭṭhatu sobhamāno’’ti.

Tattha **sākhavāti** sākhasampanno. **Phalimāti** phalena upeto. **Saṃvirūḷho** samantato virūḷhapatto taruṇapattasampanno hutvā. **Madhutthiko** saṃvijjamaṇamadhuraphalesu pakkhittamadhu viya madhuraphalo hutvāti attho.

Athassa sakko vamaṃ dadamāno aṭṭhamaṃ gāthamāha –

27. ‘‘Taṃ passa samma phalimaṃ uḷāraṃ, sahāva te hotu udumbarena;  
So sākhavā phalimā saṃvirūḷho, madhutthiko tiṭṭhatu sobhamāno’’ti.

Tattha **sahāva te hotu udumbarenāti** tava udumbarena saddhiṃ saha ekatova vāso hotu.

Evañca pana vatvā sakko taṃ attabhāvaṃ vijahitvā attano ca sujāya ca ānubhāvaṃ dassetvā gaṅgāto hatthena udakaṃ gahetvā udumbarakhānukaṃ pahari. Tāvadeva sākḥāviṭapasacchanno madhuraphalo rukkho uṭṭhahitvā muṇḍamaṇipabbato viya vilāsasampanno aṭṭhāsi. Suvarājā taṃ disvā somanassappatto sakkassa thutiṃ karonto navamaṃ gāthamāha –

28. “Evaṃ sakka sukhī hohi, saha sabbehi ñātibhi;  
Yathāhamajja sukhito, disvāna saphalaṃ duma”nti.

Sakkopi tassa varam datvā udumbaraṃ amataphalaṃ katvā saddhiṃ sujāya attano ṭhānameva gato. Tamatthaṃ dīpayamānā osāne abhisambuddhagāthā ṭhapitā –

29. “Suvassa ca varam datvā, katvāna saphalaṃ dumaṃ;  
Pakkāmi saha bhariyāya, devānaṃ nandanaṃ vana”nti.

Satthā imaṃ dhammadesanaṃ āharitvā “evaṃ bhikkhu porāṇakapaṇḍitā tiracchānayanīyaṃ nibbattāpi aloluppacārā ahesuṃ. Tvaṃ pana kasmā evarūpe sāsane pabbajitvā loluppacāraṃ carasi, gaccha tattheva vasāhī”ti kammaṭṭhānamassa kathetvā jātaṃ samodhānesi. So bhikkhu tattha gantvā vipassanaṃ vaḍḍhento arahattaṃ pāpuṇi. Tadā sakko anuruddho ahosi, suvarājā pana ahameva ahosinti.

Mahāsuvaṇṇakavaṇṇanā tatiyā.

[430] 4. Cūḷasuvajātakavaṇṇanā

**Santi rukkhāti** idaṃ satthā sāvattīyaṃ jetavane viharanto verañjakaṇḍaṃ ārabba kathesi. Satthari verañjāyaṃ vassaṃ vasitvā anupubbena sāvattīyaṃ anuppatte bhikkhū dhammasabhāyaṃ kathaṃ samuṭṭhāpesuṃ “āvuso, tathāgato khattiyasukhumālo buddhasukhumālo mahantena iddhānubhāvena samannāgatopi verañjabrahmaṇena nimantito temāsaṃ vasanto mārāvaṭṭanavasena tassa santikā ekadivasampi bhikkhaṃ alabhitvā loluppacāraṃ pahāya temāsaṃ patthapulakapiṭṭhodakena yāpento aññattha na agamāsi, aho tathāgatānaṃ appicchasantuṭṭhabhāvo”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “anacchariyaṃ, bhikkhave, tathāgatassa idāni loluppacārappahānaṃ, pubbepi tiracchānayanīyaṃ nibbattopi loluppacāraṃ pahāsi”nti vatvā atītaṃ āhari. Sabbampi vatthu purimanayeneva vitthāretabbaṃ.

30. “Santi rukkhā haripattā, dumā nekaphalā bahū;  
Kasmā nu sukkhe koḷāpe, suvassa nirato mano.
31. “Phalassa upabhuñjimmhā, nekavassagaṇe bahū;  
Aphalampi viditvāna, sāva metti yathā pure.
32. “Sukkhāñca rukkhaṃ koḷāpaṃ, opattamaphalaṃ dumaṃ;  
Ohāya sakuṇā yanti, kiṃ dosaṃ passase dija.
33. “Ye phalattā sambhajanti, aphaloti jahanti naṃ;  
Attatthapaññā dummedhā, te honti pakkhapātino.
34. “Sādhu sakkhi kataṃ hoti, metti saṃsati santhavo;  
Sacetaṃ dhammaṃ rocesi, pāsamsosi vijānataṃ.
35. “So te suva varam dammi, pattayāna vihaṅgama;  
Varam varassu vakkaṅga, yaṃ kiñci manasicchasi.

36. “Api nāma naṃ passeyyaṃ, sapattaṃ saphalaṃ dumaṃ;  
Daliddova nidhiṃ laddhā, nandeyyāhaṃ punappunaṃ.
37. “Tato amatamādāya, abhisīñci mahīruhaṃ;  
Tassa sākhā virūhiṃsu, sītacchāyā manoramā.
38. “Evaṃ sakka sukhī hohi, saha sabbehi nātibhi;  
Yathāhamajja sukhito, disvāna saphalaṃ dumaṃ.
39. “Suvassa ca varaṃ datvā, katvāna saphalaṃ dumaṃ;  
Pakkāmi saha bhariyāya, devānaṃ nandanaṃ vana’nti. –

Pañhapaṭipañhāpi atthopi purimanayeneva veditabbā, anuttānapadameva pana vaṇṇayissāma.

**Haripattāti** nīlapattasacchannā. **Koḷāpeti** vāte paharante ākoṭitasaddaṃ viya muñcamāne nissāre. **Suvassāti** āyasmato suvarājassa kasmā evarūpe rukkhe mano nirato. **Phalassāti** phalaṃ assa rukkhasa. **Nekavassagaṇeti** anekavassagaṇe. **Bahūti** samānepi anekasate na dve tayo, atha kho bahūva. **Viditvānāti** haṃsarāja idāni amhākaṃ imaṃ rukkhaṃ aphalaṃ viditvāpi yathā pure etena saddhiṃ metti, sāva metti, tañhi mayaṃ na bhindāma, mettiṃ bhindantā hi anariyā asappurisā nāma hontīti pakāsento evamāha.

**Opattanti** avapattaṃ nippattaṃ patitapattaṃ. **Kiṃ dosaṃ passaseti** aññe sakuṇā etaṃ ohāya aññattha gacchanti, tvaṃ evaṃ gamane kiṃ nāma dosaṃ passasi. **Ye phalathhāti** ye pakkhino phalathhāya phalakāraṇā sambhajanti upagacchanti, aphaloti nītvā etaṃ jahanti. **Attatthapaññāti** attano atthāya paññā, paraṃ anoloketvā attaniyeva vā ṭhitā etesaṃ paññāti attatthapaññā. **Pakkhapātinoti** te attanoyeva vuḍḍhiṃ paccāsīsamānā mittapakkaṃ pātenti nāsentīti pakkhapātino nāma honti. Attapakkeyeva vā patantīti **pakkhapātino**.

**Api nāma nanti** haṃsarāja, sace me manoratho nipphajjeyya, tayā dinno varo sampajjeyya, api nāma ahaṃ imaṃ rukkhaṃ sapattaṃ saphalaṃ puna passeyyaṃ, tato daliddo nidhiṃ labhitvāva punappunaṃ etaṃ abhinandeyyaṃ, taṃ disvāva pamodeyyaṃ. **Amatamādāyāti** attano ānubhāvena ṭhito gaṅgodakaṃ gahetvā abhisīñcayīti attho. Imasmiṃ jātakaṃ imāya saddhiṃ dve abhisambuddhagāthā honti.

Satthā imaṃ dhammadesanaṃ āharitvā jātakaṃ samodhānesi – “tadā sakko anuruddho ahoṣi, suvarājā pana ahameva ahoṣi’nti.

Cūḷasuvajātakavaṇṇanā catutthā.

[431] 5. Haritacajātakaṇṇanā

**Sutaṃ metaṃ mahābrahmeti** idaṃ satthā jetavane viharanto ukkaṇṭhitabhikkhuṃ ārabha katesi. Tañhi bhikkhuṃ ekaṃ alaṅkatamātugāmaṃ disvā ukkaṇṭhitaṃ dīghakesanakhalomāṃ vibbhamitukāmaṃ ācariyupajjhāyehi aruciyā ānītaṃ. Satthā “saccaṃ kira tvaṃ bhikkhu ukkaṇṭhitosī’nti pucchitvā “saccaṃ, bhante’nti vutte “kiṃkāraṇā’nti vatvā “alaṅkatamātugāmaṃ disvā kilesavasena, bhante’nti vutte “bhikkhu kilesa nāma guṇavidhamsako appassādo niraye nibbattāpeti, esa pana kilesa kiṃkāraṇā taṃ na kilamessati? Na hi sineruṃ paharitvā paharaṇavāto purāṇapaṇṇassa lajjati, imañhi kilesaṃ nissāya bodhiñāṇassa anupadaṃ caramānā pañcaabhiññāaṭṭhasamāpattilābhino visuddhamahāpurisāpi satim upaṭṭhapetuṃ asakkontā jhānaṃ antaradhāpesu’nti vatvā atītaṃ āhari.

Atīte bārāṇasiyaṃ brahmadatte rajjaṃ kārente bodhisatto ekasmiṃ nigame asītikoṭivibhave brāhmaṇakule nibbatti, kañcanachavitāya panassa “haritacakumāro’nti nāmaṃ kariṃsu. So vayappatto

takkasilam gantvā uggahitasippo kuṭumbaṃ saṅṭhapetvā mātāpītūnaṃ accayena dhanavilokanaṃ katvā “dhanameva paññāyati, dhanassa uppādakā na paññāyanti, mayāpi maraṇamukhe cuṇṇavicuṇṇena bhavitabba”nti maraṇabhayaabhīto mahādānaṃ datvā himavantaṃ pavasitvā isipabbajjaṃ pabbajitvā sattame divase abhiññā ca samāpattiyo ca nibbattetvā tattha ciraṃ vanamūlaphalāhāro yāpetvā loṇambilasevanatthāya pabbatā otarivā anupubbena bārāṇasiṃ patvā rājuyyāne vasitvā punadivase bārāṇasiyaṃ bhikkhāya caranto rājadvāraṃ sampāpuṇi. Rājā taṃ disvā pasannacitto pakkosāpetvā samussitasetacchatte rājapallaṅke nisīdāpetvā nānaggarasabhojanaṃ bhojetvā anumodanāvasāne atirekatarāṃ pasīditvā “kaḥaṃ, bhante, gacchathā”ti vatvā “vassāvāsattāhānaṃ upadhārema, mahārājā”ti vutte “sādhu, bhante”ti bhuttapātarāso taṃ ādāya uyyānaṃ gantvā tattha rattitthānadivāṭṭhānādīni kārāpetvā uyyānapālaṃ paricārakaṃ katvā datvā vanditvā nikkhami. Mahāsatto tato paṭṭhāya nibaddhaṃ rañño gehe bhuñjanto dvādasa vassāni tattha vasi.

Athekadivasaṃ rājā paccantaṃ kupitaṃ vūpasametum gacchanto “ambhākaṃ puññakkhettaṃ mā pamajjī”ti mahāsattaṃ deviyā niyyādetvā agamāsi. Tato paṭṭhāya sā mahāsattaṃ sahatthā parivisati. Athekadivasaṃ sā bhojanaṃ sampādetvā tasmiṃ cirāyamāne gandhodakena nhatvā saṅhaṃ maṭṭhasāṭakaṃ nivāsetvā sīhapañjaraṃ vivarāpetvā sarīre vātaṃ paharāpentī khuddakamañcake nipajji. Mahāsattopi divāturaṃ sunivattho supāruto bhikkhābhājanaṃ ādāya ākāsenāgantvā sīhapañjaraṃ pāpuṇi. Deviyā tassa vākacirasaddaṃ sutvā vegena utthahantiyā maṭṭhasāṭako bhassi, mahāsattassa visabhāgārammaṇaṃ cakkhum paṭihaññi. Athassa anekavassakoṭisatasahassakāle abbhantare nivutthakilesa karaṇḍake sayitaāsīviso viya utthahitvā jhānaṃ antaradhāpesi. So satim upaṭṭhāpetum asakkonto gantvā devim hatthe gaṇhi, tāvadeva sānim parikkhipimsu. So tāya saddhim lokadhammaṃ sevivā bhuñjitvā uyyānaṃ gantvā tato paṭṭhāya devasikaṃ tatheva akāsi. Tassa tāya saddhim lokadhammapaṭisevanaṃ sakalanagare pākaṭaṃ jātaṃ. Amaccā “haritacatāpaso evamakāsi”ti rañño paṇṇaṃ paṇiṃsu. Rājā “maṃ bhinditukāmā evaṃ vadanti”ti asaddahitvā paccantaṃ vūpasametvā bārāṇasiṃ paccāgantvā nagaraṃ padakkhiṇaṃ katvā deviyā santikaṃ gantvā “saccaṃ, kira mama ayyo haritacatāpaso tayā saddhim lokadhammaṃ paṭisevatī”ti pucchi. “Saccaṃ, devā”ti. So tassāpi asaddahitvā “tameva paṭipucchissāmi”ti uyyānaṃ gantvā vanditvā ekamantaṃ nisīditvā taṃ pucchanto paṭhamaṃ gāthamāha –

40. “Sutaṃ metaṃ mahābrahme, kāme bhuñjati hārito;  
Kaccetaṃ vacanaṃ tucchaṃ, kacci suddho iriyyasi”ti.

Tattha **kaccetanti** kacci etaṃ “hārito kāme paribhuñjati”ti amhehi sutāṃ vacanaṃ tucchaṃ abhūtaṃ, kacci tvaṃ suddho iriyyasi viharasīti.

So cintesi – “ayaṃ rājā ‘nāhaṃ paribhuñjāmi’ti vuttepi mama saddahissateva, imasmim loke saccasadisī patiṭṭhā nāma natthi. Ujjhitasaccā hi bodhimūle nisīditvā bodhim pāpuṇitum na sakkonti, mayā saccameva kathetum vaṭṭati”ti. Bodhisattassa hi ekaccesu thānesu pañātipātopi adinnādānampi kāmesumicchāropi surāmerayamajjapānampi hotiyeva, atthabhedakavisaṃvādanaṃ purakkhatvā musāvādo nāma na hoti, tasmā so saccameva kathento dutiyaṃ gāthamāha –

41. “Evametaṃ mahārāja, yathā te vacanaṃ sutāṃ;  
Kummaggaṃ paṭipannosmi, mohaneyyesu mucchito”ti.

Tattha **mohaneyyesūti** kāmaguṇesu. Kāmaguṇesu hi loko muyhati, te ca lokaṃ mohayanti, tasmā te “mohaneyyā”ti vuccantīti.

Taṃ sutvā rājā tatiyaṃ gāthamāha –

42. “Adu paññā kimatthiyā, nipuṇā sādhucentinī;  
Yāya uppatitaṃ rāgaṃ, kiṃ mano na vinodaye”ti.



Tattha **adūti** nipāto. Idaṃ vuttaṃ hoti – bhante, gilānassa nāma bhesajjaṃ, pipāsītassa pānīyaṃ paṭisaraṇaṃ, tumhākaṃ panesā nipuṇā sādhuṇaṃ atthānaṃ cintinī paññā kimatthiyā, yāya puna uppatitaṃ rāgaṃ **kiṃ mano na vinodaye**, kiṃ cittaṃ vinodetuṃ nāsakkhīti.

Athassa kilesabalaṃ dassento hārito catutthaṃ gāthamāha –

43. “Cattārome mahārāja, loke atibalā bhusā;  
Rāgo doso mado moho, yattha paññā na gādhatī”ti.

Tattha **yatthāti** yesu pariyuṭṭhānaṃ pattersu mahoghe patitā viya paññā gādhaṃ patitṭhaṃ na labhati.

Taṃ sutvā rājā pañcamaṃ gāthamāha –

44. “Arahā sīlasampanno, suddho carati hārito;  
Medhāvī paṇḍito ceva, iti no sammato bhava”nti.

Tattha **iti no sammatotī** evaṃ amhākaṃ sammato sambhāvito bhavaṃ.

Tato hārito chaṭṭhamaṃ gāthamāha –

45. “Medhāvīnampi hiṃsanti, isiṃ dhammaguṇe ratam;  
Vitakkā pāpakā rāja, subhā rāgūpasamhitā”ti.

Tattha **subhāti** subhanimittaggaṇena pavattāti.

Atha naṃ kilesappahāne ussāhaṃ kārento rājā sattamaṃ gāthamāha –

46. “Uppannāyaṃ sarīrajo, rāgo vaṇṇavidūsono tava;  
Taṃ pajaha bhaddamatthu te, bahunnāsi medhāvisammato”ti.

Tattha **vaṇṇavidūsono tavāti** tava sarīravaṇṇassa ca guṇavaṇṇassa ca vidūsono. **Bahunnāsīti** bahūnaṃ āsi medhāvīti sammato.

Tato mahāsatto satim labhitvā kāmesu ādīnavaṃ sallakkhetvā aṭṭhamaṃ gāthamāha –

47. “Te andhakārake kāme, bahudukkhe mahāvisē;  
Tesaṃ mūlaṃ gavesissaṃ, checchaṃ rāgaṃ sabandhana”nti.

Tattha **andhakāraketi** paññācakkhuvināsanato andhabhāvakare. **Bahudukkheti** ettha “appassādā kāmā”tiādīni (ma. ni. 1.234; pāci. 417; cūḷava. 65) suttāni haritvā tesaṃ bahudukkhatā dassetabbā. **Mahāviseti** sampayuttakilesavisassa ceva vipākavisassa ca mahantatāya mahāvisē. **Tesaṃ mūlanti** te vuttappakāre kāme pahātuṃ tesaṃ mūlaṃ gavesissaṃ pariyesissāmi. Kiṃ pana tesaṃ mūlanti? Ayonisomanasikāro. **Checchaṃ rāgaṃ sabandhananti** mahārāja, idāneva paññākhaggena paharivā subhanimittabandhanena sabandhanaṃ rāgaṃ chindissāmīti.

Idaṅca pana vatvā “mahārāja, okāsaṃ tāva me karohī”ti okāsaṃ kāretvā paṇṇasālaṃ pavisitvā kaṣiṇamaṇḍalaṃ oloketvā puna naṭṭhajjhānaṃ uppādetvā paṇṇasālato nikkhamitvā ākāse pallaṅkena nisīditvā rañño dhammaṃ desetvā “mahārāja, ahaṃ aṭṭhāne vutthakāraṇā mahājanamajjhe garahappatto, appamatto hohi, puna dāni ahaṃ anitthigandhavanasaṇḍameva gamissāmī”ti rañño rodantassa paridevantassa himavantameva gantvā aparihīnājjhāno brahmalokūpago ahoṣi.

Satthā taṃ kāraṇaṃ ñatvā –

48. “Idaṃ vatvāna hārito, isi saccaparakkamo;  
Kāmarāgaṃ virājetvā, brahmalokūpago ahū”ti. –

Abhisambuddho hutvā imaṃ gāthaṃ vatvā saccāni pakāsetvā jātakam samodhānesi, saccapariyosāne ukkaṇṭhitabhikkhu arahatte patiṭṭhahi.

Tadā rājā ānando ahosi, haritacatāpaso pana ahameva ahosinti.

Haritacajātakavaṇṇanā pañcamā.

[432] 6. Padakusalamaṇavajātakavaṇṇanā

**Bahussutanti** idaṃ satthā jetavane viharanto ekaṃ dāraṃ ārabba kathesi. So kira sāvattiyam kuṭumbikaputto sattavassakāleyeva padakusalo ahosi. Athassa pitā “imaṃ vīmaṃsissāmi”ti tassa ajānantasseva mittagharaṃ agamāsi. So pitu gataṭṭhānaṃ apucchitvā tassa padānusārena gantvā pitu santike aṭṭhāsi. Atha naṃ pitā ekadivasam pucchi “tāta, tvaṃ mayi taṃ ajānāpetvā gatepi mama gataṭṭhānaṃ kiṃ jānāsi”ti? “Tāta, padaṃ te sañjānāmi, padakusalo aha”nti. Athassa vīmaṃsanatthāya pitā bhuttapātarāso gharā nikkhamitvā anantaraṃ paṭivissakagharaṃ gantvā tato dutiyam, tato tatiyam gharaṃ pavisitvā tatiyagharā nikkhamitvā puna attano gharaṃ āgantvā tato uttaradvārena nikkhamitvā nagaraṃ vāmaṃ karonto jetavanaṃ gantvā satthāraṃ vanditvā dhammaṃ suṇanto nisīdi. Dārako “kahaṃ me pitā”ti pucchitvā “na jānāmi”ti vutte tassa padānusārena anantarapaṭivissakassa gharaṃ ādiṃ katvā pitu gatamaggena jetavanaṃ gantvā satthāraṃ vanditvā pitu santike aṭṭhāsi. Pitarā ca “kathaṃ tāta, mama idhāgatabhāvaṃ aññāsi”ti puṭṭho “padaṃ te sañjānitvā padānusārena āgatomi”ti āha. Satthā “kiṃ kathesi upāsakā”ti pucchitvā “bhante, ayaṃ dārako padakusalo, ahaṃ imaṃ vīmaṃsanto iminā nāma upāyena āgato, ayampi maṃ gehe adisvā mama padānusārena āgato”ti vutte “anacchariyam, upāsaka, bhūmiyam padasañjānaṃ, porāṇakapaṇḍitā ākāse padaṃ sañjāniṃsū”ti vatvā tena yācito atītaṃ āhari.

Atīte bārānasiyam brahmadatte rajjaṃ kārente tassa aggamaheṣi aticaritvā raññā puchitā “sace ahaṃ tumhe aticarāmi, assamukhī yakkhinī homī”ti sapaṭhaṃ katvā tato kālaṃ katvā ekasmiṃ pabbatapāde assamukhī yakkhinī hutvā leṇaguhāyam vasamānā mahāaṭaviyam pubbantato aparantaṃ gamanamagge anusañcarante manusse gahetvā khādanti. Sā kira tīṇi vassāni vessavaṇaṃ upaṭṭhahitvā āyāmato tiṃsayojane vitthārato pañcayojane ṭhāne manusse khāditaṃ labhi. Athekadivasam eko aḍḍho mahaddhano mahābhogo abhirūpo brāhmaṇo bahūhi manussehi parivuto taṃ maggaṃ abhiruhi. Taṃ disvā yakkhinī tussitvā pakkhandī, taṃ disvā parivāraṃ manussaṃ palāyimsu. Sā vātavegena gantvā brāhmaṇaṃ gahetvā piṭṭhiyā nipajjāpetvā guhaṃ gacchantī purisasamphassaṃ paṭilabhitvā kilesavasena tasmim sinehaṃ uppādetvā taṃ akhāditaṃ attano sāmikaṃ akāsi. Te ubhopi samaggasaṃvāsaṃ vasimsu tato paṭṭhāya yakkhinī manusse gaṇhantī vatthataṇḍulatelādīnipi gahetvā tassa nānaggarasabhojanaṃ upanetvā attanā manussamaṃsaṃ khādanti. Gamanakāle tassa palāyanabhayena mahatiyā silāya guhādvāraṃ pidahitvā gacchati. Evaṃ tesu sammodamānesu vasantesu bodhisatto nibbataṭṭhānā cavitvā brāhmaṇaṃ paṭicca tassā kucchimhi paṭisandhiṃ gaṇhi. Sā dasamāsaccayena puttaṃ vijāyitvā putte ca brāhmaṇe ca balavasinehā hutvā ubhopi posesi. Sā aparabhāge putte vuḍḍhippatte puttampi pitarā saddhiṃ antoguhāyam pavesetvā dvāraṃ pidahi.

Athekadivasam bodhisatto tassā gatakālaṃ ñatvā silaṃ apanetvā pitaraṃ bahi akāsi. Sā āgantvā “kena silā apanitā”ti vatvā “amma, mayā apanitā, andhakāre nisīditaṃ na sakkomi”ti vutte puttasinēhena na kiñci avoca. Athekadivasam bodhisatto pitaraṃ pucchi “tāta, mayhaṃ mātu mukhaṃ aññādisaṃ, tumhākaṃ mukhaṃ aññādisaṃ, kiṃ nu kho kāraṇa”nti? “Tāta, tava mātā manussamaṃsakhādikā yakkhinī, mayaṃ ubho manussa”ti. “Tāta, yadi evaṃ, idha kasmā vasāma, ehi manussapaṭhaṃ gacchāmā”ti. “Tāta, sace mayaṃ palāyissāma, ubhopi amhe tava mātā khādissati”ti.

Bodhisatto “mā bhāyi, tāta, tava manussapathasampāpanaṃ mama bhāro”ti pitaraṃ samassāsetvā punadivase mātari gatāya pitaraṃ gahetvā palāyi. Yakkhinī āgantvā te adisvā vātavegena pakkhanditvā te gahetvā “brāhmaṇa, kiṃ palāyasi, kiṃ te idha natthi”ti vatvā “bhadde, mā mayhaṃ kujjhi, putto te maṃ gahetvā palāyati”ti vutte puttasinghena kiñci avatvā te assāsetvā attano vasanaṭṭhānaññeva te gahetvā gantvā evaṃ punapi katipaye divase palāyante ānesi.

Bodhisatto cintesi “mayhaṃ mātu paricchinnena okāsenā bhavitabbaṃ, yaṃnūnāhaṃ imissā āṇāpavattiṭṭhānasīmaṃ puccheyyaṃ, atha naṃ atikkamitvā palāyissāma”ti. So ekadivasaṃ mātaraṃ gahetvā ekamantaṃ nisinna “amma, mātusantakaṃ nāma puttānaṃ pāpuṇāti, akkhāhi tāva me attano santakāya bhūmiyā pariccheda”nti āha. Sā sabbadisāsu pabbatanadīnimitādīni kathetvā āyāmato tiṃsayojanaṃ, vitthārato pañcayojanaṃ puttassa kathetvā “idaṃ ettakaṃ ṭhānaṃ sallakkhehi puttā”ti āha. So dve tayo divase atikkamitvā mātu aṭavigatakāle pitaraṃ khandhaṃ āropetvā tassā dinnasaññāya vātavegena pakkhando paricchedanadītiraṃ sampāpuṇi. Sāpi āgantvā te apassantī anubandhi. Bodhisatto pitaraṃ gahetvā nadīmajjhaṃ agamāsi. Sā āgantvā nadītire ṭhatvā attano paricchedaṃ atikkantabhāvaṃ ṇatvā tattheva ṭhatvā “tāta, pitaraṃ gahetvā ehi, ko mayhaṃ doso, tumhākaṃ maṃ nissāya kiṃ nāma na sampajjati, nivatta, sāmī”ti puttañca patiñca yāci. Atha brāhmaṇo nadiṃ uttari. Sā puttameva yācantī “tāta, mā evaṃ kari, nivattāhi”ti āha. “Amma, mayaṃ manussā, tvaṃ yakkhinī, na sakkā sabbakālaṃ tava santike vasitu”nti. “Neva nivattissasi, tāta”ti. “Āma, amma”ti. “Tāta, yadi na nivattissasi, manussaloke jīvitāṃ nāma dukkhaṃ, sippaṃ ajānantā jīvitūṃ na sakkonti, ahaṃ ekaṃ cintāmaṇiṃ nāma vijjaṃ jānāmi, tassānubhāvena dvādasasaṃvaccharamatthake haṭabhaṇḍampi padānupadaṃ gantvā sakkā jānitūṃ. Ayaṃ te jīvikā bhavissati, uggaṇha, tāta, anagghaṃ manta”nti tathārūpena dukkhena abhibhūtāpi puttasinghena mantāṃ adāsi.

Bodhisatto nadiyā ṭhitakova mātaraṃ vanditvā atisakkaccaṃ sutāṃ katvā mantāṃ gahetvā mātaraṃ vanditvā “gacchatha, amma”ti āha. “Tāta, tumhesu anivattantesu mayhaṃ jīvitāṃ natthi”ti vatvā –

“Ehi putta nivattassu, mā anāthaṃ karohi me;  
Ajja puttaṃ apassantī, yakkhinī maraṇaṃ gatā”ti.

Yakkhinī uraṃ pahari, tāvadevassā puttasinghena hadayaṃ phali. Sā maritvā tattheva patitā. Tadā bodhisatto tassā matabhāvaṃ ṇatvā pitaraṃ pakkosivā mātu santikaṃ gantvā citakaṃ katvā jhāpetvā ālāhanaṃ nibbāpetvā nānāvaṇṇehi pupphehi pūjetvā vanditvā roditvā paridevitvā pitaraṃ ādāya bārāṇasiṃ gantvā rājadvāre ṭhatvā “padakusalo māṇavo dvāre ṭhito”ti rañño paṭivedetvā “tena hi āgacchatū”ti vutte pavisitvā rājānaṃ vanditvā “tāta, kiṃ sippaṃ jānāsi”ti vutte “deva, dvādasasaṃvaccharamatthake haṭabhaṇḍaṃ padānupadaṃ gantvā gaṇhitūṃ jānāmi”ti āha. “Tena hi maṃ upaṭṭhāhi”ti. “Deva, devasikaṃ sahasaṃ labhanto upaṭṭhahissāmi”ti. “Sādhu tāta, upaṭṭhahā”ti. Rājā devasikaṃ sahasaṃ dāpesi.

Athekadivasaṃ purohito rājānaṃ āha – “mahārāja, mayaṃ tassa māṇavassa sippānubhāvena kassaci kammaṃ akatattā ‘sippaṃ atthi vā natthi vā’ti na jānāma, vīmaṃsissāma tāva na”nti. Rājā “sādhu”ti sampaṭicchitvā ubhopi janā nānāratanaṃ gopakānaṃ saññaṃ datvā ratanasārabhaṇḍikaṃ gahetvā pāsādā oruyha rājanivesanantare tikkhattuṃ āvijjhitvā nisseṇiṃ attharivā pākāramatthakena bahi otarivā vinicchayasālaṃ pavisitvā tattha nisīditvā puna gantvā nisseṇiṃ attharivā pākāramatthakena otarivā antepure pokkharāṇiyā tīraṃ gantvā pokkharāṇiṃ tikkhattuṃ padakkhiṇaṃ katvā otarivā antopokkharāṇiyaṃ bhaṇḍikaṃ ṭhapetvā pāsādaṃ abhiruḥṃsu. Punadivase “rājanivesanato kira ratanaṃ harisū”ti ekakolāhalaṃ ahoṣi. Rājā ajānanto viya hutvā bodhisattaṃ pakkosāpetvā “tāta, rājanivesanato bahuratanabhaṇḍaṃ haṭaṃ, handa naṃ anuvicinitūṃ vaṭṭatī”ti āha. “Mahārāja, dvādasasaṃvaccharamatthake haṭabhaṇḍaṃ corānaṃ padānupadaṃ gantvā āharaṇasamatthassa mama anacchariyaṃ ajja rattim haṭabhaṇḍaṃ āharitūṃ, āharissāmi taṃ, mā cintayitthā”ti. “Tena hi āharā”ti. So “sādhu, devā”ti vatvā mātaraṃ vanditvā mantāṃ parivattetvā mahātale ṭhitova “mahārāja, dvinnaṃ corānaṃ padaṃ paññāyati”ti vatvā rañño ca purohitassa ca

padānusārena sirigabbhaṃ pavisitvā tato nikkhamitvā pāsādā oruyha rājanivesanantare tikkhattuṃ parigantvā padānusāreneva pākārasamīpaṃ gantvā pākāre ɥatvā “mahārāja, imasmiṃ ɥhāne pākārato mucchitvā ākāse padaṃ paññāyati, nisseṇiṃ attharāpetvā dethā”ti nisseṇiṃ pākāramatthakena otarivā padānusāreneva vinicchayasālaṃ gantvā puna rājanivesanaṃ āgantvā nisseṇiṃ attharāpetvā pākāramatthakena oruyha pokkharāṇiṃ gantvā tikkhattuṃ padakkhiṇaṃ katvā “mahārāja, corā imaṃ pokkharāṇiṃ otiṇṇā”ti vatvā attanā ɥapitaṃ viya bhaṇḍikaṃ nīharitvā rañño datvā “mahārāja, ime dve corā abhiññātamahācorā iminā maggena rājanivesanaṃ abhiruḥhā”ti āha. Mahājanā tuṭṭhapahaṭṭhā aṅguliyo phoṭesuṃ, celukkhepā pavattiṃsu.

Rājā cintesi – “ayaṃ māṇavo padānusārena gantvā corehi ɥapitabhaṇḍaṭṭhānameva maññe jānāti, core pana gaṇhituṃ na sakkoti”ti. Atha naṃ āha “corehi haṭabhaṇḍaṃ tāva no tayā āhaṭaṃ, corā pana na āhaṭa”ti. “Mahārāja, idheva corā, na dūre”ti. “Ko ca ko cā”ti. “Yo mahārāja, icchati, sova coro hoti, tato tumhākaṃ bhaṇḍikassa laddhakālato paṭṭhāya corehi ko attho, mā pucchitṭhā”ti. “Tāta, ahaṃ tuyhaṃ devasikaṃ sahaṣsaṃ dammi, core me gahetvā dehi”ti. “Mahārāja, dhane laddhe kiṃ corehi”ti. “Dhanatopi no, tāta, core laddhuṃ vaṭṭati”ti. “Tena hi, mahārāja, ‘ime nāma corā’ti tumhākaṃ na kathessāmi, atīte pavattakāraṇaṃ pana te āharissāmi, sace tumhe paññavanto, taṃ kāraṇaṃ jānāthā”ti so evaṃ vatvā atītaṃ āhari.

Atīte bārāṇasito avidūre nadītiraḡāmake pāṭali nāma eko naṭo vasati. So ekasmiṃ ussavadvise bhariyamādāya bārāṇasiṃ pavisitvā naccitvā vīṇaṃ vāditvā gāyitvā dhanam labhitvā ussavapariyosāne bahuṃ surābhataṃ gāhāpetvā attano gāmaṃ gacchanto nadītiraṃ patvā navodakaṃ āgacchantaṃ disvā bhataṃ bhuñjanto suraṃ pivanto nisīditvā matto hutvā attano balaṃ ajānanto “mahāvīṇaṃ gīvāya bandhitvā nadiṃ uttaritvā gamissāmi”ti bhariyaṃ hatthe gahetvā nadiṃ otari. Vīṇāchiddehi udakaṃ pāvīsi. Atha naṃ sā vīṇā udake osīdāpesi. Bhariyā panassa osīdanabhāvaṃ ñatvā taṃ vissajjetvā uttaritvā tīre aṭṭhāsi. Naṭapāṭali sakim ummujjati, sakim nimujjati, udakaṃ pavisitvā uddhumātaudaro ahoṣi. Athassa bhariyā cintesi “mayhaṃ sāmiko idāni marissati, ekaṃ naṃ gītakaṃ yācitvā parisamajjhe taṃ gāyanti jīvikaṃ kappessāmi”ti cintetvā “sāmi, tvaṃ udake nimujjasi, ekaṃ me gītakaṃ dehi, tena jīvikaṃ kappessāmi”ti vatvā gāthamāha –

49. “Bahussutaṃ cittakathim, gaṅgā vahati pāṭalim;  
Vuyhamānaka bhaddante, ekaṃ me dehi gāthaka”nti.

Tattha **gāthakanti** khuddakaṃ gāthaṃ.

Atha naṃ naṭapāṭali “bhadda, kathaṃ tava gītakaṃ dassāmi, idāni mahājanassa paṭisaraṇabhūtaṃ udakaṃ maṃ māreti”ti vatvā gāthamāha –

50. “Yena siṅcanti dukkhitaṃ, yena siṅcanti āturaṃ;  
Tassa majjhe marissāmi, jātaṃ saraṇato bhaya”nti.

Bodhisatto imaṃ gāthaṃ vatvā “mahārāja, yathā udakaṃ mahājanassa paṭisaraṇaṃ, tathā rājānopi, tesam santikā bhaye uppanne taṃ bhayaṃ ko paṭibāhissati”ti vatvā “mahārāja, idaṃ kāraṇaṃ paṭicchannaṃ, mayā pana paṇḍitavedaniyaṃ katvā kathitaṃ, jānāhi, mahārāja”ti āha. “Tāta ahaṃ evarūpaṃ paṭicchannakathaṃ na jānāmi, core me gahetvā dehi”ti. Athassa mahāsatto “tena hi, mahārāja, idaṃ sutvā jānāhi”ti aparampi kāraṇaṃ āhari. Deva, pubbe imissāva bārāṇasiyā dvāragāme eko kumbhakāro bhājanatṭhāya mattikaṃ āharanto ekasmiṃyeva ɥhāne nibaddhaṃ gaṇhitvā antopabbhāraṃ mahantaṃ āvāṭaṃ khaṇi. Atheadivasam tassa mattikaṃ gaṇhantassa akālamahāmegho uṭṭhahitvā mahāvutṭhiṃ pātesi. Udakaṃ avattharamānaṃ āvāṭaṃ pātesi, tenassa matthako bhijji. So paridevanto gāthamāha –

51. “Yattha bījāni rūhanti, sattā yattha patiṭṭhitā;

Sā me sīsaṃ nipīleti, jātaṃ saraṇato bhaya’’nti.

Tattha **nipīletī**ti nipatitvā pīleti bhindati.

Yathā hi deva, mahājanassa paṭisaraṇabhūtā mahāpathavī kumbhakārassa sīsaṃ bhindi, evameva mahāpathavīsame sabbalokassa paṭisaraṇe narinde uṭṭhāya corakammaṃ karonte ko bāhissati, sakkhissasi, mahārāja, evaṃ paṭicchādetvā kathitaṃ coraṃ jānitunti. Tāta, mayhaṃ paṭicchannena kāraṇaṃ natthi, ayaṃ coroti evaṃ me coraṃ gahetvā dehīti. So rājānaṃ rakkhanto ‘‘tvaṃ coro’’ti avatvā aparaṃpi udāharaṇaṃ āhari. Mahārāja, pubbe imasmiṃyeva nagare ekassa purisassa geḥaṃ ādittaṃ. So ‘‘anto pavisitvā bhaṇḍakaṃ nīharā’’ti aññaṃ āṇāpesi. Tasmim paṭisaraṇato gehadvāraṃ pidahi. So dhūmandho hutvā nikkhamanaggaṃ alabhanto uppannaḍāhadukkho hutvā anto ʘhitova paridevanto gāthamāha –

52. ‘‘Yena bhattāni paccanti, sītaṃ yena vihaññati;  
So maṃ ḍahati gattāni, jātaṃ saraṇato bhaya’’nti.

Tattha **so maṃ ḍahatī**ti so me ḍahati, ayameva vā pāṭho.

‘‘Mahārāja, aggi viya mahājanassa paṭisaraṇabhūto eko manusso ratanabhaṇḍikaṃ hari, mā maṃ coraṃ pucchā’’ti. ‘‘Tāta, mayhaṃ coraṃ dehiyevā’’ti. So rājānaṃ ‘‘tvaṃ coro’’ti avatvā aparaṃpi udāharaṇaṃ āhari. Deva, pubbe imasmiṃyeva nagare eko puriso atibahuṃ bhuñjitvā jīrāpetuṃ asakkonto vedanāppatto hutvā paridevanto gāthamāha –

53. ‘‘Yena bhuttena yāpanti, puthū brāhmaṇakhattiyā;  
So maṃ bhutto byāpādeti, jātaṃ saraṇato bhaya’’nti.

Tattha **so maṃ bhutto byāpādetī**ti so odano bhutto maṃ byāpādeti māreti.

‘‘Mahārāja, bhattaṃ viya mahājanassa paṭisaraṇabhūto eko bhaṇḍaṃ hari, tasmim laddhe kiṃ coraṃ pucchasi’’ti? ‘‘Tāta, sakkonto coraṃ me dehi’’ti. So tassa saññāpanatthaṃ aparaṃpi udāharaṇaṃ āhari. Mahārāja, pubbepi imasmiṃyeva nagare ekassa vāto uṭṭhahitvā gattāni bhañji. So paridevanto gāthamāha –

54. ‘‘Gimhānaṃ pacchime māse, vātamicchanti paṇḍitā;  
So maṃ bhañjati gattāni, jātaṃ saraṇato bhaya’’nti.

Iti mahārāja, saraṇato bhayaṃ uppannaṃ, jānāhi taṃ kāraṇanti. Tāta, coraṃ me dehīti. So tassa saññāpanatthaṃ aparaṃpi udāharaṇaṃ āhari. Deva, atīte himavantapadese sākḥāviṭapasampanno mahārukkho ahoṣi pupphaphalasampanno anekasahassānaṃ sakuṇānaṃ nivāso tassa dve sākḥā aññaṃ aññaṃ saṅghaṭṭesum, tato dhūmo uppajji, aggicuṇṇāni patimsu. Taṃ disvā sakuṇajetṭhako gāthamāha –

55. ‘‘Yaṃ nissitā jagatiruhaṃ, svāyaṃ aggim pamuñcati;  
Disā bhajatha vakkāṅgā, jātaṃ saraṇato bhaya’’nti.

Tattha **jagatiruhanti** mahīruhaṃ.

Yathā hi, deva, rukkho pakkhīnaṃ paṭisaraṇaṃ, evaṃ rājā mahājanassa paṭisaraṇaṃ, tasmim corikaṃ karonte ko paṭibāhissati, sallakkhehi, devāti. Tāta, mayhaṃ corameva dehīti. Athassa so aparaṃpi udāharaṇaṃ āhari. Mahārāja, ekasmiṃ kāsigāme aññatarassa kulagharassa pacchimabhāge kakkhaḷā susumāranadī atthi, tassa ca kulassa ekova putto. So pitari kālakate mātaraṃ paṭijaggi. Tassa

mātā anicchamānasseva ekaṃ kuladhītaraṃ ānesi. Sā pubbabhāge sassuṃ sampiyāyitvā pacchā puttadhītāhi vaḍḍhamānā taṃ nīharitukāmā ahosi. Tassā pana mātāpi tasmimīyeva ghare vasati. Sā sāmikassa santike sassuyā nānappakāraṃ dosaṃ vatvā paribhinditvā “ahaṃ te mātaraṃ posetuṃ na sakkomi, mārehi na”nti vatvā “manussamāraṇaṃ nāma bhāriyaṃ, kathaṃ naṃ māremī”ti vutte “niddokkamanakāle naṃ mañcakeneva saddhiṃ gahetvā susumāranadiyaṃ khipissāma, atha naṃ susamārā khādissantī”ti āha. “Tuyhaṃ pana mātā kaha”nti? “Tassāyeva santike supatī”ti. “Tena hi gaccha, tassā nipannamañcake rajjuṃ bandhitvā saññaṃ karohī”ti. Sā tathā katvā “katā me sañña”ti āha. Itaro “thokaṃ adhvāsehi, manussā tava niddāyantū”ti niddāyanto viya nipajjitvā gantvā taṃ rajjukāṃ bhariyāya mātu mañcake bandhitvā bhariyaṃ pabodhetvā ubhopi gantvā taṃ mañcakeneva saddhiṃ ukkhipitvā nadiyaṃ khipiṃsu. Tattha naṃ niddāyamānaṃ susumārā viddhaṃsetvā khādīṃsu.

Sā punadivase mātu parivattitabhāvaṃ ñatvā “sāmi, mama mātāva mārītā, idāni tava mātaraṃ mārehi”ti vatvā “tena hi sādhu”ti vutte “susāne citakaṃ katvā aggimhi naṃ pakkhipitvā māressāmā”ti āha. Atha naṃ niddāyamānaṃ ubhopi susānaṃ netvā ṭhapayīṃsu. Tattha sāmiko bhariyaṃ āha “aggi te ābhato”ti? “Pamuṭṭhāsmi, sāmī”ti. “Tena hi gantvā ānehi”ti. “Na sakkomi sāmi, gantuṃ, tayi gatepi ṭhātuṃ na sakkhissāmi, ubhopi mayaṃ gacchissāmā”ti. Tesu gatesu mahallikā sītavātena pabodhitā susānabhāvaṃ ñatvā “ime maṃ māretukāmā aggiatthāya gatā”ti ca upadhāretvā “na me balaṃ jānanti”ti ekaṃ matakāḷevaraṃ gahetvā mañcake nipajjāpetvā upari pilotikāya paṭicchādetvā sayāṃ palāyitvā tattheva leṇaguhaṃ pāvīsi. Itare aggim āharitvā “mahallikā”ti saññāya kaḷevaraṃ jhāpetvā pakkamiṃsu. Ekena corena tasmimī guhāleṇe pubbe bhaṇḍikā ṭhapitā, so “taṃ gaṇhissāmī”ti āgantvā mahallikaṃ disvā “ekā yakkhinī bhavissati, bhaṇḍikā me amanussapariggahitā”ti ekaṃ bhūtavajjaṃ ānesi. Vejjo mantāṃ karonto guhaṃ pāvīsi.

Atha naṃ sā āha “nāhaṃ yakkhinī, ehi ubhopi imaṃ dhanaṃ bhājessāmā”ti. “Kathaṃ saddahitabba”nti? “Tava jivhaṃ mama jivhāya ṭhāpēhī”ti. So tathā akāsi. Athassa sā jivhaṃ ḍamsitvā chinditvā pātesi. Bhūtavajjo “addhā esā yakkhinī”ti jivhāya lohitaṃ paggharantiyā viravamāno palāyi. Mahallikā punadivase maṭṭhasāṭakaṃ nivāsetvā nānāratanaḥḍikāṃ gahetvā gharaṃ agamāsi. Suñisā taṃ disvā “kahaṃ te, amma, idaṃ laddha”nti pucchi. “Amma, etasmimī susāne dārucitakāya jhāpitā evarūpaṃ labhanti”ti. “Amma, mayāpi sakkā laddhu”nti. “Mādisī hutvā labhissasī”ti. Sā laddhabhaṇḍikalobhena sāmikassa kathetvā tattha attānaṃ jhāpesi. Atha naṃ punadivase sāmiko apassanto “amma, imāyapi velāya tvaṃ āgatā, suñisā te nāgacchatī”ti āha. Sā taṃ sutvā “are pāpapurisa, kiṃ matā nāma āgacchantī”ti taṃ tajjetvā gāthamāha –

56. “Yamānayaṃ somanassaṃ, māliniṃ candanussadaṃ;  
Sā maṃ gharā nicchubhati, jātaṃ saraṇato bhaya”nti.

Tattha **somanassanti** somanassaṃ uppādetvā. “Somanassā”tipi pātho, somanassavatī hutvāti attho. Idaṃ vuttaṃ hoti – yamaṃ “imaṃ me nissāya putto puttadhītāhi vaḍḍhissati, mañca mahallikakāle possessatī”ti māliniṃ candanussadaṃ katvā alaṅkaritvā somanassajāta ānesiṃ. Sā maṃ ajja gharā nīharati, saraṇato yeva me bhayaṃ uppananti.

“Mahārāja, suñisā viya sassuyā mahājanassa rājā paṭisaraṇaṃ, tato bhaye uppanne kiṃ sakkā kātuṃ, sallakkhehi, devā”ti. Taṃ sutvā rājā “tāta, nāhaṃ tayā ānītakāraṇāni jānāmi, corameva me dehī”ti āha. So “rājānaṃ rakkhissāmī”ti aparampi udāharaṇaṃ āhari. Deva, pubbe imasmimīyeva nagare eko puriso patthanaṃ katvā puttaṃ labhi. So puttajātakāle “putto me laddho”ti somanassajāto taṃ posetvā vayappattakāle dārena saṃyojetvā aparabhāge jaraṃ patvā kammaṃ adhiṭṭhātuṃ nāsakkhi. Atha naṃ putto “tvaṃ kammaṃ kātuṃ na sakkosi, ito nikkhamā”ti gehato nīhari. So kicchena kasirena jīvikaṃ kappento paridevamāno gāthamāha –

57. “Yena jātena nandissaṃ, yassa ca bhavamicchisaṃ;  
So maṃ gharā nicchubhati, jātaṃ saraṇato bhaya”nti.

Tattha **so manti** so putto maṃ gharato nicchubhati nīharati. Svāhaṃ bhikkhaṃ caritvā dukkhena jīvāmi, saraṇato yeva me bhayaṃ uppananti.

“Mahārāja, yathā pitā nāma mahallako paṭibalena puttana rakkhitabbo, evaṃ sabbopi janapado rañña rakkhitabbo, idaṅca bhayaṃ uppajjamānaṃ sabbasatte rakkhantassa rañño santikā uppannaṃ, iminā kāraṇena ‘asuko nāma coro’ ti jānāhi, devā’ ti. ‘Tāta, nāhaṃ kāraṇaṃ vā akāraṇaṃ vā jānāmi, coraṃ vā me dehi, tvaññeva vā coro hohī’ ti evaṃ rājā punappunaṃ māṇavaṃ anuyuñji. Atha naṃ so evamāha ‘kiṃ pana, mahārāja, ekamsena coragahaṇaṃ rocethā’ ti? ‘Āma, tāta’ ti. Tena hi ‘asuko ca coro’ ti parisamajje pakāsemīti. ‘Evaṃ karohi, tāta’ ti. So tassa vacanaṃ sutvā ‘ayaṃ rājā attānaṃ rakkhituṃ na deti, gaṇhissāmi dāni cora’ nti sannipatite mahājane āmantetvā imā gāthā āha –

58. “Suṇantu me jānapadā, negamā ca samāgatā;  
Yatodakaṃ tadādittaṃ, yato khemaṃ tato bhayaṃ.
59. “Rājā vilumpate raṭṭhaṃ, brāhmaṇo ca purohito;  
Attaguttā viharatha, jātaṃ saraṇato bhaya’ nti.

Tattha **yatodakaṃ tadādittanti** yaṃ udakaṃ tadeva ādittaṃ. **Yato khemanti** yato rājato khemena bhavitabbaṃ, tatova bhayaṃ uppannaṃ. **Attaguttā viharathā**ti tumhe idāni anāthā jātā, attānaṃ mā vināsetha, attanāva guttā hutvā attano santakaṃ dhanadhaññaṃ rakkhatha, rājā nāma mahājanassa paṭisaraṇaṃ, tato tumhākaṃ bhayaṃ uppannaṃ, rājā ca purohito ca vilopakhādakacorā, sace core gaṇhitukāmattha, ime dve gahetvā kammakaraṇaṃ karothāti.

Te tassa kathaṃ sutvā cintayimṣu ‘ayaṃ rājā rakkhaṇārahopi samāno idāni aññaṃ upari dosaṃ āropetvā attano bhaṇḍikaṃ sayameva pokkharaniyaṃ ṭhapetvā coraṃ pariyesāpeti, ito dāni paṭṭhāya puna corakammaṃ akaraṇatthāya mārema naṃ pāparājāna’ nti. Te daṇḍamuggarādihattā uṭṭhāya tattheva rājānaṃca purohitaṃca pothetvā jīvitakkhayaṃ pāpetvā mahāsattaṃ abhisiñcitvā rajje patiṭṭhapesuṃ.

Satthā imaṃ dhammadesanaṃ āharitvā ‘anacchariyaṃ, upāsaka, pathaviyaṃ padasañjānaṃ, porāṇakapaṇḍitā evaṃ ākāse padaṃ sañjāniṃsu’ ti vatvā saccāni pakāsetvā jātaṃ samodhānesi, saccapariyosāne upāsako ca putto ca sotāpattiṃphale patiṭṭhitā. Tadā pitā kassapo ahoṣi, padakusalamaṇavo pana ahameva ahoṣinti.

Padakusalamaṇavajātakavaṇṇanā chaṭṭhā.

[433] 7. Lomasakassapajātakavaṇṇanā

**Assa indasamo rājā**ti idaṃ satthā jetavane viharanto ekaṃ ukkaṅṭhitabhikkhuṃ ārabba kathesi. Tañhi bhikkhuṃ satthā ‘saccaṃ kira tvaṃ bhikkhu ukkaṅṭhitosi’ ti pucchitvā ‘sacca’ nti vutte ‘bhikkhu sinerukampaṇavāto kiṃ purāṇapaṇṇāni na kampaṇessati, yasaṃginiṃpī sappurisā āyasyaṃ pāpuṇanti, kilesā nāmete parisuddhasattepi saṃkiliṭṭhe karonti, pageva tādisa’ nti vatvā tena yācīto atītaṃ āhari.

Atīte bārānasiyaṃ brahmadatte rajjaṃ kārente brahmadattassa putto brahmadattakumāro nāma purohitaputto ca kassapo nāma dve sahāyakā hutvā ekācariyakule sabbasippāni uggaṇhimsu. Aparabhāge brahmadattakumāro pitu accayena rajje patiṭṭhāsi. Kassapo cintesi ‘mayhaṃ sahāyo rājā jāto, idāni me mahantaṃ issariyaṃ dassati, kiṃ me issariyena, ahaṃ mātāpitaro ca rājānaṃca āpucchitvā pabbajissāmi’ ti. So rājānaṃca mātāpitaro ca āpucchitvā himavantaṃ pavisitvā isipabbajjaṃ pabbajitvā sattame divase abhiñña ca samāpattiyo ca nibbattetvā uñchācariyāya yāpento vihāsi. Pabbajitaṃ pana naṃ ‘lomasakassapo’ ti sañjāniṃsu. So paramajitindriyo ghoratapo tāpaso ahoṣi. Tassa tejena sakkassa bhavanaṃ kampi. Sakko āvajjento taṃ disvā cintesi ‘ayaṃ tāpaso ativiya uggatejo sakkabhāvāpi maṃ

cāveyya, bārāṇasirañña saddhiṃ ekato hutvā tapamassa bhindissāmī”ti. So sakkānubhāvena aḍḍharattasamaye bārāṇasirañño sirigabbhaṃ pavisitvā sakalagabbhaṃ sarīrappabhāya obhāsetvā rañño santike ākāse ʘhito “uʘthehi, mahārāja”ti rājānaṃ pabodhesi. “Kosi tva”nti vutte “sakkohamasmī”ti āha. “Kimatthaṃ āgatosī”ti? “Mahārāja, sakalajambudīpe ekarajjaṃ icchasi, na icchasi”ti? “Kissa na icchāmī”ti? Atha naṃ sakko “tena hi lomasakassapaṃ ānetvā pasughātayaññaṃ yajāpehi, sakkasamo ajarāmaro hutvā sakalajambudīpe rajjaṃ kāressasi”ti vatvā paṭhamāṃ gāthamāha –

60. “Assa indasamo rāja, accantaṃ ajarāmaro;  
Sace tvaṃ yaññaṃ yājeyya, isiṃ lomasakassapa”nti.

Tattha **assā**ti bhavissasi. **Yājeyyā**ti sace tvaṃ araññāyatanato isiṃ lomasakassapaṃ ānetvā yaññaṃ yajeyyāsīti.

Tassa vacanaṃ sutvā rājā “sādhū”ti sampāṭicchi. Sakko “tena hi mā papañcaṃ karī”ti vatvā pakkāmi. Rājā punadivase seyyaṃ nāma amaccaṃ pakkosāpetvā “samma, mayhaṃ piyasahāyakassa lomasakassapassa santikaṃ gantvā mama vacanena evaṃ vadehi ‘rājā kira tumhehi pasughātayaññaṃ yajāpetvā sakalajambudīpe ekarājā bhavissati, tumhākampi yattakaṃ padesaṃ icchatha, tattakaṃ dassati, mayā saddhiṃ yaññaṃ yajituṃ āgacchathā””ti āha. So “sādhū, devā”ti tāpasassa vasanokāsajānanatthaṃ nagare bheriṃ carāpetvā ekena vanacarakena “ahaṃ jānāmī”ti vutte taṃ purato katvā mahantena parivārena tattha gantvā isiṃ vanditvā ekamantaṃ nisinna taṃ sāsaṇaṃ ārocesi. Atha naṃ so “seyya kiṃ nāmetāṃ kathesi”ti vatvā paṭikkhipanto catasso gāthā abhāsi –

61. “Sasamuddapariyāyaṃ, mahiṃ sāgarakuṇḍalaṃ;  
Na icche saha nindāya, evaṃ seyya vijānāhi.
62. “Dhiratthu taṃ yasalābhaṃ, dhanalābhañca brāhmaṇa;  
Yā vutti vinipātena, adhammacaraṇena vā.
63. “Api ce pattamādāya, anagāro paribbaje;  
Sāyeva jīvikā seyyo, yā cādhammena esanā.
64. “Api ce pattamādāya, anagāro paribbaje;  
Aññaṃ ahiṃsayāṃ loke, api rajjena taṃ vara”nti.

Tattha **sasamuddapariyāyanti** sasamuddaparikkhepaṃ. **Sāgarakuṇḍalanti** cattāro dīpe parikkhipitvā ʘhitasāgarehi kaṇṇavaliyā ʘhapitakuṇḍalehi viya samannāgataṃ. **Saha nindāyā**ti “iminā pasughātakammaṃ kata”nti imāya nindāya saha cakkavāḷapariyantaṃ mahāpathaviṃ na icchāmīti vadati. **Yā vutti vinipātenā**ti narake vinipātakammaṃ yā ca jīvitavutti hoti, taṃ dhiratthu, garahāmi taṃ vuttinti dīpeti. **Sāyeva jīvikā**ti pabbajitassa mattikāpattaṃ ādāya paragarāni upasaṅkamitvā āhārapariyesana jīvikāva yasadhanalābhato sataguṇena sahasaguṇena varatarāti attho **api rajjena taṃ varanti** taṃ anagārassa sato aññaṃ avihimsantassa paribbajanaṃ sakalajambudīparajjenapi varanti attho.

Amacco tassa kathaṃ sutvā gantvā rañño ārocesi. Taṃ sutvā rājā “anāgacchante kiṃ sakkā kātu”nti tuṇhī ahoṣi. Puna sakko aḍḍharattasamaye āgantvā ākāse ʘhatvā “kiṃ, mahārāja, lomasakassapaṃ ānetvā yaññaṃ na yajāpesi”ti āha. “Mayā pesitopi nāgacchatī”ti. “Tena hi, mahārāja, attano dhītaṃ candavatiṃ kumārikaṃ alaṅkaritvā seyyaṃ tatheva pesetvā ‘sace kira āgantvā yaññaṃ yajissasi, rājā te imaṃ kumārikaṃ dassati’ti vadāpehi, addhā so kumārikāya paṭibaddhacitto hutvā āgacchissati”ti. Rājā “sādhū”ti sampāṭicchitvā punadivase seyyassa hatthe dhītaṃ adāsi. So rājadhītaṃ gahetvā tattha gantvā isiṃ vanditvā paṭisanthāraṃ katvā devaccharapaṭibhāgaṃ rājadhītaṃ tassa dassetvā ekamantaṃ aṭṭhāsi. Atha isi indriyāni bhinditvā taṃ olokesi, saha



olokaneneva paṭibaddhacitto hutvā jhānā parihāyi. Amacco tassa paṭibaddhacittabhāvaṃ ñatvā “bhante, sace kira yaññaṃ yajissatha, rājā te imaṃ dārikaṃ pādapariṇāyikaṃ katvā dassatī”ti āha. So kilesavasena kampanto “imaṃ kira me dassatī”ti āha. “Āma, yaññaṃ yajantassa te dassatī”ti. So “sādhu imaṃ labhanto yajissāmi”ti vatvā taṃ gahetvā saheva jaṭāhi alaṅkatarathaṃ abhiruyha bārāṇasiṃ agamāsi. Rājāpi “āgacchati kirā”ti sutvā yaññāvāṭe kammaṃ paṭṭhapesi. Atha naṃ āgataṃ disvā “sve yaññaṃ yajāhi, ahaṃ indasamo bhavissāmi, yaññapariyosāne te dhītaraṃ dassāmi”ti āha. Kassapo “sādhu”ti sampaṭicchhi. Atha naṃ rājā punadivase taṃ ādāya candavatiyā saddhimyeva yaññāvāṭaṃ gato. Tattha hatthiassausabhādisabbacattuppadā paṭipāṭiyā ṭhapitāva ahesuṃ. Kassapo te sabbe hanitvāva ghātetvā yaññaṃ yajituṃ ārabhi. Atha naṃ tattha sannipatito mahājano disvā “idaṃ te lomasakassapa ayuttaṃ appatirūpaṃ, kiṃ nāmetaṃ karosī”ti vatvā paridevanto dve gāthā abhāsi –

65. “Balaṃ cando balaṃ suriyo, balaṃ samaṇabrāhmaṇā;  
Balaṃ velā samuddassa, balātibalamitthiyo.

66. “Yathā uggatapaṃ santaṃ, isiṃ lomasakassapaṃ;  
Pitu atthā candavatī, vājapeyyaṃ ayājayī”ti.

Tattha **balaṃ cando balaṃ suriyoti** mahandhakāraviddhamane aññaṃ balaṃ nāma natthi, candimasūriyāvettha balavantoti attho. **Samaṇabrāhmaṇāti** iṭṭhāniṭṭhavisayasavegasahane khantibalaññabalena samannāgatā samitapāpabāhitapāpā samaṇabrāhmaṇā. **Balaṃ velā samuddassāti** mahāsamuddassa uttarituṃ adavā udakaṃ āvaritvā vināsetuṃ samatthātāya velā balaṃ nāma. **Balātibalamitthiyoti** itthiyo pana visadaññāpepi avītarāge attano vasaṃ ānetvā vināsetuṃ samatthātāya tehi sabbehi balehi atibalā nāma, sabbabalehi itthibalameva mahantanti attho. **Yathāti** yasmā. **Pitu atthāti** pitu vuḍḍhiatthāya. Idaṃ vuttaṃ hoti – yasmā imaṃ uggatapaṃ samānaṃ silādiguṇānaṃ esitattā isiṃ ayaṃ candavatī nissīlaṃ katvā pitu vuḍḍhiatthāya vājapeyyaṃ yaññaṃ yājeti, tasmā jānitabbametaṃ “balātibalamitthiyo”ti.

Tasmiṃ samaye kassapo yaññaṃ yajanatthāya “maṅgalaṭṭhiṃ gīvāyaṃ paharissāmi”ti khaggaratanaṃ ukkhipi. Hatthī taṃ disvā maraṇabhayatajjito mahāraṇaṃ ravi. Tassa ravaṃ sutvā sesāpi hatthiassausabhādayo maraṇabhayatajjitā bhayena viraviṃsu. Mahājanopi viravi. Kassapo taṃ mahāviraṇaṃ sutvā saṃvegappatto hutvā attano jaṭādāni olokesi. Athassa jaṭāmassukacchalomāni pākāṭāni ahesuṃ. So vippaṭisārī hutvā “ananurūpaṃ vata me pāpakammaṃ kata”nti saṃvegaṃ pakāsento aṭṭhamāṃ gāthamāha –

67. “Taṃ lobhapakataṃ kammaṃ, kaṭukaṃ kāmahetukaṃ;  
Tassa mūlaṃ gavesissaṃ, checchaṃ rāgaṃ sabandhana”nti.

Tassattho – mahārāja, yaṃ etaṃ mayā candavatiyā lobhaṃ uppādetvā tena lobhena pakataṃ kāmahetukaṃ pāpakaṃ, taṃ kaṭukaṃ tikhiṇavipākaṃ. Tassāhaṃ ayonisomanasikārasaṅkhātāṃ mūlaṃ gavesissaṃ, alaṃ me iminā khaggena, paññākhaggaṃ nīharitvā subhanimittabandhanena saddhiṃ sabandhanaṃ rāgaṃ chindissāmīti.

Atha naṃ rājā “mā bhāyi samma, idāni te candavatiṃ kumārīṇca raṭṭhaṇca sattaratanarāsīṇca dassāmi, yajāhi yañña”nti āha. Taṃ sutvā kassapo “na me, mahārāja, iminā kilesena attho”ti vatvā osānagāthamāha –

68. “Dhiratthu kāme subahūpi loke, tapova seyyo kāmaguṇehi rāja;  
Tapo karissāmi pahāya kāme, taveva raṭṭhaṃ candavatī ca hotū”ti.

Tattha **subahūpīti** atibahukepi. **Tapo karissāmīti** silasaṃyamatapeva karissāmi.

So evaṃ vatvā kasiṇaṃ samannāharitvā naṭṭhaṃ visesaṃ uppādetvā ākāse pallaṅkena nisīditvā rañño dhammaṃ desetvā “appamatto hohi”ti ovaditvā yaññāvāṭaṃ viddhamaṣāpetvā mahājanassa abhayadānaṃ dāpetvā rañño yācantasappa uppatitvā attano vasanaṭṭhānameva gantvā yāvajīvaṃ ṭhatvā āyupariyosāne brahmalokaparāyaṇo ahosi.

Satthā imaṃ dhammadeśanaṃ āharitvā saccāni pakāsetvā jātaṃ samodhānesi, saccapariyosāne ukkaṇṭhitabhikkhu sotāpattiphale patitṭhahi. Tadā seyyo mahāamacco sārīputto ahosi, lomasakassapo pana ahameva ahosinti.

Lomasakassapajātakavaṇṇanā sattamā.

[434] 8. Cakkavākajātakavaṇṇanā

**Kāsāyavattheti** idaṃ satthā jetavane viharanto ekaṃ lolabhikkhuṃ ārabba kathesi. So kira lolo ahosi paccayaluddho, ācariyupajjhāyavattādīni chaḍḍetvā pātova sāvattiṃ pavisitvā visākhāya gehe anekakhādānīyaparivāraṃ yāguṃ pivitvā nānaggarasasālimamaṣodanaṃ bhuñjitvāpi tena atitto tato cūlaanāthapiṇḍikassa mahāanāthapiṇḍikassa kosalaraññoti tesam tesam nivesanāni sandhāya vicari. Athekadivasam tassa lolabhāvaṃ ārabba dhammasabhāyaṃ kathaṃ samuṭṭhāpesuṃ. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte taṃ bhikkhuṃ pakkosāpetvā “saccaṃ kira tvam bhikkhu lolo”ti pucchitvā “saccaṃ, bhante”ti vutte “bhikkhu kasmā lolosi, pubbepi tvam lolabhāvena bārāṇasiyaṃ hatthikuṇapādīni khādītva vicaranto tehi atitto tato nikkhamitvā gaṅgātīre vicaranto himavantaṃ pavaṭṭho”ti vatvā atītaṃ āhari.

Atīte bārāṇasiyaṃ brahmadatte rajjaṃ kārente eko lolakāko bārāṇasiyaṃ hatthikuṇapādīni khādītva vicaranto tehi atitto “gaṅgākūle macchamataṃ khādissāmī”ti gantvā tattha matamacche khādanto katipāhaṃ vasitvā himavantaṃ pavisitvā nānāphalāphalāni khādanto bahumacchakacchapaṃ mahantaṃ padumasaraṃ patvā tattha suvaṇṇavaṇṇe dve cakkavāke sevālaṃ khādītva vasante disvā “ime ativiya vaṇṇasampannā sobhaggappattā, imesaṃ bhojanaṃ manāpaṃ bhavissati, imesaṃ bhojanaṃ pucchitvā ahampi tadeva bhuñjitvā suvaṇṇavaṇṇo bhavissāmī”ti cintetvā tesam santikaṃ gantvā paṭisanthāraṃ katvā ekasmiṃ sākhaṃpariyante nisīditvā tesam pasamsanapaṭisaṃyuttaṃ kathaṃ kathento paṭhamam gāthamāha –

69. “Kāsāyavatthe sakūṇe vadāmi, duve duve nandamane carante;  
Kaṃ aṇḍajaṃ aṇḍajā mānusesu, jātiṃ pasamsanti tadingha brūthā”ti.

Tattha **kāsāyavattheti** suvaṇṇavaṇṇe kāsāyavatthe viya. **Duve duveti** dve dve hutvā. **Nandamaneti** tuṭṭhacitte. **Kaṃ aṇḍajaṃ aṇḍajā mānusesu jātiṃ pasamsantīti** ambho aṇḍajā tumhe manussesu pasamsantā kaṃ aṇḍajaṃ jātiṃ kataraṃ nāma aṇḍajanti vatvā pasamsanti, kaṃ sakūṇaṃ nāmāti vatvā tumhe manussānaṃ antare vaṇṇentīti attho. “Kaṃ aṇḍajaṃ aṇḍajamānusesū”tipi pāṭho. Tassattho – tumhe aṇḍajesu ca mānusesu ca kataraṃ aṇḍajanti vatvā pasamsantīti.

Taṃ sutvā cakkavāko dutiyaṃ gāthamāha –

70. “Amhe manussesu manussahiṃsa, anubbate cakkavāke vadanti;  
Kalyāṇabhāvamhe dijesu sammatā, abhirūpā vicarāma aṇṇave”ti.

Tattha **manussahiṃsāti** kāko manusse hiṃsati vihettheti, tena naṃ evaṃ ālapati. **Anubbateti** aññamaññaṃ anugate sammodamāne viyaṣaṃvāse. **Cakkavāketi** cakkavākā nāma sā aṇḍajajātīti pasamsanti vaṇṇenti kathenti. **Dijesūti** yattakā pakkhino nāma, tesu mayaṃ “kalyāṇabhāvā”tipi manussesu sammatā. Dutīye atthavikappe manussesu amhe “cakkavākā”tipi vadanti, dijesu pana mayaṃ “kalyāṇabhāvā”ti sammatā, “kalyāṇabhāvā”ti no dijā vadantīti attho. **Aṇṇaveti** imasmim ṭhāne saro “aṇṇavo”ti vutto, imasmim padumasare mayameva dve janā paresam ahiṃsanato abhirūpā

vicarāmāti attho. Imissāya pana gāthāya catutthapadam ‘na ghāsahetūpi karoma pāpa’nti paṭhanti. Tassattho – yasmā mayaṃ ghāsahetūpi pāpaṃ na karoma, tasmā ‘‘kalyāṇabhāvā’’ti amhe manussesu ca dijesu ca sammata.

Taṃ sutvā kāko tatiyaṃ gāthamāha –

71. ‘‘Kiṃ aṇṇave kāni phalāni bhuñje, maṃsaṃ kuto khādatha cakkavākā;  
Kiṃ bhojanaṃ bhuñjatha vo anomā, balañca vaṇṇo ca anapparūpā’’ti.

Tattha **kinti** pucchāvasena ālapanam, kiṃ bho cakkavākāti vuttaṃ hoti. **Aṇṇaveti** imasmiṃ sare. **Bhuñjeti** bhuñjatha, kiṃ bhuñjathāti attho **maṃsaṃ kuto khādathāti** katarapāṇānaṃ sarīrato maṃsaṃ khādatha. **Bhuñjatha voti vokāro** nipātamattaṃ, parapadena vāssa sambandho ‘‘balañca vā vaṇṇo ca anapparūpā’’ti.

Tato cakkavāko catuttham gāthamāha –

72. ‘‘Na aṇṇave santi phalāni dhañka, maṃsaṃ kuto khāditaṃ cakkavāke;  
Sevālabhakkhamha apāṇabhojanā, na ghāsahetūpi karoma pāpa’nti.

Tattha **cakkavāketi** cakkavākassa. **Apāṇabhojanāti** pāṇakarāhitaudakabhojanā. Amhākañhi sevālañceva udakañca bhojananti dasseti. **Na ghāsahetūti** tumhādisā viya mayaṃ ghāsahetu pāpaṃ na karomāti.

Tato kāko dve gāthā abhāsi –

73. ‘‘Na me idaṃ ruccati cakkavāka, asmiṃ bhava bhojanasannikāso;  
Ahoṣi pubbe tato me aññathā, icceva me vimati ettha jātā.
74. ‘‘Ahampi maṃsāni phalāni bhuñje, annāni ca loṇiyateliyāni;  
Rasaṃ manussesu labhāmi bhottuṃ, sūrova saṅgāmamukhaṃ vijetvā;  
Na ca me tādiso vaṇṇo, cakkavāka yathā tavā’’ti.

Tattha **idanti** idaṃ tumhākaṃ bhuñjanabhojanaṃ mayhaṃ na ruccati. **Asmiṃ bhava bhojanasannikāso**ti imasmiṃ bhava bhojanasannikāso yaṃ imasmiṃ cakkavākabhava bhojanaṃ, tvaṃ tena sannikāso taṃsadiso tadanurūpo ahoṣi, ativiya pasannasarīrosīti attho. **Tato me aññathāti** yaṃ mayhaṃ pubbe tumhe disvāva ete ettha nānāvīdhāni phalāni ceva macchamaṃsañca khādanti, tena evaṃ sobhaggappattāti ahoṣi, idāni me tato aññathā hotīti attho. **Iceva meti** eteneva me kāraṇena ettha tumhākaṃ sarīravaṇṇe vimati jātā ‘‘kathaṃ nu kho ete evarūpaṃ lūkhābhojanaṃ bhuñjantā vaṇṇavanto jātā’’ti. **Ahampīti** ahañhi, ayameva vā pāṭho. **Bhuñjeti** bhuñjāmi. **Annāni cāti** bhojanāni ca. **Loṇiyateliyānīti** loṇatelayuttāni. **Rasanti** manussesu paribhogaṃ paṇītarasaṃ. **Vijetvāti** yathā sūro vīrayodho saṅgāmamukhaṃ vijetvā vilumpitvā paribhuñjati, tathā vilumpitvā paribhuñjāmīti attho. **Yathā tavāti** evaṃ paṇītaṃ bhojanaṃ bhuñjantassapi mama tādiso vaṇṇo natthi, yādiso tava vaṇṇo, tena tava vacanaṃ na saddahāmīti dīpeti.

Athassa vaṇṇasampattiyā abhāvakāraṇaṃ attano ca bhāvakāraṇaṃ kathento cakkavāko sesagāthā abhāsi –

75. ‘‘Asuddhabhakkhosi khaṇānupātī, kicchena te labbhati annapānaṃ;  
Na tussasī rukkaphalehi dhañka, maṃsāni vā yāni susānamajjhe.
76. ‘‘Yo sāhasena adhiḡamma bhoge, paribhuñjati dhañka khaṇānupātī;

Tato upakkosati naṃ sabhāvo, upakkuṭṭho vaṇṇabalaṃ jahāti.

77. “Appampi ce nibbutiṃ bhuñjati yadi, asāhasena aparūpaghātī;  
Balañca vaṇṇo ca tadassa hoti, na hi sabbo āhāramayena vaṇṇo”ti.

Tattha **asuddhabhakkhosī** tvaṃ thenetvā vañcetvā bhakkhanato asuddhabhakkho asi. **Khaṇānupātī** pamādakkaṇe anupatanasīlo. **Kicchena** teti tayā dukkhena annapānaṃ labbhati. **Maṃsāni vā yānī** yāni vā susānamajjhe maṃsāni, tehi na tussasi. **Tatoti** pacchā. **Upakkosati naṃ sabhāvoti** attāva taṃ puggalaṃ garahi. **Upakkuṭṭhoti** attanāpi parehipi upakkuṭṭho garahito vipaṭṭisāritāya vaṇṇaṇca balañca jahāsi. **Nibbutiṃ bhuñjati yadī** yadi pana paraṃ aviheṭhetvā appakampi dhammaladdhaṃ nibbutibhojanaṃ bhuñjati. **Tadassa hotī** tadā assa paṇḍitassa sarīre balañca vaṇṇo ca hoti. **Āhāramayenā** nānappakārena āhāreneva. Idaṃ vuttaṃ hoti – bho kāka, vaṇṇo nāmesa catusamūṭṭhāno, so na āhāramatteneva hoti, utucittakammehipi hotiyevāti.

Evam cakkavāko anekapariyāyena kākaṃ garahi. Kāko harāyitvā “na mayhaṃ tava vaṇṇena attho, kā kā”ti vassanto palāyi.

Satthā imaṃ dhammadesanaṃ āharitvā saccāni pakāsetvā jātakam samodhānesi, saccapariyosāne lolabhikkhu anāgāmiṃphale patiṭṭhahi. Tadā kāko lolabhikkhu ahoṣi, cakkavākī rāhulamātā, cakkavāko pana ahameva ahoṣinti.

Cakkavākajātakavaṇṇanā aṭṭhamā.

[435] 9. Haliddirāgajātakavaṇṇanā

**Sutitikkhanti** idaṃ satthā jetavane viharanto thullakumārikāpalobhanaṃ ārabha kathesi. Vatthu terasakanipāte **cūlanāradajātake** (jā. 1.13.40 ādayo) āvi bhavissati. Atītavatthumhi pana sā kumārikā tassa tāpasakumārassa sīlaṃ bhinditvā attano vase ṭhitabhāvaṃ ñatvā “imaṃ vañcetvā manussapathaṃ nessāmi”ti cintetvā “rūpādikāmaguṇavirahite araññe rakkhitasīlaṃ nāma na mahapphalaṃ hoti, manussapathe rūpādīnaṃ paccupaṭṭhāne mahapphalaṃ hoti, ehi mayā saddhiṃ tattha gantvā sīlaṃ rakkhāhi, kiṃ te araññena”ti vatvā paṭṭhamam gāthamāha –

78. “Sutitikkhaṃ araññamhi, pantamhi sayanāsane;  
Ye ca gāme titikkhanti, te uḷāratarā tayā”ti.

Tattha **sutitikkhanti** suṭṭhu adhivāsaṃ. **Titikkhantī** sītādīni adhivāsenti.

Taṃ sutvā tāpasakumāro “pitā me araññaṃ gato, tasmim āgate taṃ āpucchitvā gamissāmi”ti āha. Sā cintesi “pitā kirassa atthi, sace maṃ so passissati, kājakoṭiyā maṃ pothetvā vināsaṃ pāpessati, mayā paṭṭhamameva gantabba”nti. Atha naṃ sā “tena hi ahaṃ maggasaññaṃ kurumānā paṭṭhamataraṃ gamissāmi, tvaṃ pacchā āgacchāhi”ti vatvā agamāsi. So tassā gatakāle neva dārūni āhari, na pānīyaṃ, na paribhojanīyaṃ upaṭṭhāpesi, kevalaṃ pajjhāyantova nisīdī, pitu āgamanakāle paccuggamaṃ nākāsi. Atha naṃ pitā “itthīnaṃ vasaṃ gato eso”ti ñatvāpi “kasmā tāta, neva dārūni āhari, na pānīyaṃ, na paribhojanīyaṃ upaṭṭhāpesi, pajjhāyantoyeva pana nisinnosī”ti āha. Atha naṃ tāpasakumāro “tāta, araññe kira rakkhitasīlaṃ nāma na mahapphalaṃ hoti, manussapathe mahapphalaṃ, ahaṃ tattha gantvā sīlaṃ rakkhissāmi, sahāyo me maṃ ‘āgaccheyyāsi’ti vatvā purato gato, ahaṃ teneva saddhiṃ gamissāmi, tattha pana vasantena mayā katara puriso sevītabbo”ti pucchanto dutiyaṃ gāthamāha –

79. “Arañña gāmaṃāgama, kiṃsīlaṃ kiṃvataṃ ahaṃ;  
Purisaṃ tāta seveyyaṃ, taṃ me akkhāhi pucchito”ti.

Athassa pitā kathento sesagāthā abhāsi –

80. “Yo te vissāsaye tāta, vissāsañca khameyya te;  
Sussūsī ca titikkhī ca, taṃ bhajehi ito gato.
81. “Yassa kāyena vācāya, manasā natthi dukkaṭaṃ;  
Urasīva patiṭṭhāya, taṃ bhajehi ito gato.
82. “Yo ca dhammena carati, carantopi na maññati;  
Visuddhakāriṃ sappaññaṃ, taṃ bhajehi ito gato.
83. “Haliddirāgaṃ kopicittaṃ, purisaṃ rāgavirāginaṃ;  
Tādisaṃ tāta mā sevi, nimmanussampi ce siyā.
84. “Āsīvisaṃva kupitaṃ, mīlhalittaṃ mahāpathaṃ;  
Ārakā parivajjehi, yānīva visamaṃ pathaṃ.
85. “Anatthā tāta vaḍḍhanti, bālaṃ accupasevato;  
Māssu bālena saṃgacchi, amitteneva sabbadā.
86. “Taṃ tāhaṃ tāta yācāmi, karassu vacanaṃ mama;  
Māssu bālena saṃgacchi, dukkho bālehi saṅgamo”’ti.

Tattha **yo te vissāsayeti** yo tava vissāseyya. **Khameyya teti** yo ca tava attani tayā kataṃ vissāsaṃ khameyya. **Sussūsī ca titikkhī cāti** tava vacanaṃ sussūsāya ceva vacanādhivāsanena ca samannāgato bhaveyyāti attho. **Urasīva patiṭṭhāyāti** yathā mātu urasi putto patiṭṭhāti, evaṃ patiṭṭhahitvā attano mātaraṃ viya maññaṃāno taṃ bhajeyyāsīti vadati. **Yo ca dhammena caratīti** yo tividhena sucaritena dhammena iriyati. **Na maññatīti** tathā carantopi “ahaṃ dhammaṃ carāmi”’ti mānaṃ na karotī. **Visuddhakārinti** visuddhānaṃ dasakusalakammaphānaṃ kārakaṃ.

**Rāgavirāginanti** rāginañca virāginañca rajjitvā taṃkhaṇaṇṇeva virajjanasabhāvaṃ. **Nimmanussampi ce siyāti** sacepi sakalajambudīpatalaṃ nimmanussaṃ hoti, soyeva eko manusso tiṭṭhati, tathāpi tādisaṃ mā sevi. **Mahāpathanti** gūthamakkhitaṃ maggaṃ viya. **Yānīvāti** yānena gacchanto viya. **Visamanti** ninnannatakhāṇupāsāṇādivisamaṃ. **Bālaṃ accupasevatoti** bālaṃ appaññaṃ atisevantassa. **Sabbadāti** tāta, bālena saha saṃvāso nāma amittasaṃvāso viya sabbadā niccakālema dukkho. **Taṃ tāhanti** tena kāraṇena taṃ ahaṃ.

So evaṃ pitarā ovadīto “tāta, ahaṃ manussapathaṃ gantvā tumhādise paṇḍite na labhissāmi, tattha gantuṃ bhāyāmi, idheva tumhākaṃ santike vasissāmi”’ti āha. Athassa bhīyyopi ovādaṃ datvā kaṣiṇaparikkamaṃ ācikkhi. So na cirasseva abhiññāsamaṇāpattiyō nibbattvā saddhiṃ pitarā brahmalokaparāyaṇo ahoṣi.

Satthā imaṃ dhammadesanaṃ āharitvā saccāni pakāsetvā jātaṃ samodhānesi, saccapariyosāne ukkaṇṭhitabhikkhu sotāpattiphale patiṭṭhahi.

Tadā tāpasakumāro ukkaṇṭhitabhikkhu ahoṣi, kumārikā thullakumārikāva, pitā tāpaso pana ahameva ahoṣinti.

Haliddirāgajātakavaṇṇanā navamā.

[436] 10. Samuggajātakavaṇṇanā

**Kuto nu āgacchathāti** idaṃ satthā jetavane viharanto ukkaṇṭhitabhikkhuṃ ārabba kathesi. Tañhi satthā “saccaṃ kira tvaṃ bhikkhu ukkaṇṭhitosī”’ti pucchitvā “saccaṃ, bhante”’ti vutte “kasmā bhikkhu

mātugāmaṃ patthesi, mātugāmo nāmesa asabbho akataññū, pubbe dānavarakkhasā gilitvā kucchinā pariharantāpi mātugāmaṃ rakkhituṃ ekapurisanissitaṃ kātuṃ nāsakkhimsu, tvaṃ kathaṃ sakkhissasī”ti vatvā atītaṃ āhari.

Atīte bārānasiyaṃ brahmadatte rajjaṃ kārente bodhisatto kāme pahāya himavantaṃ pavisitvā isipabbajjaṃ pabbajitvā abhiññā ca samāpattiyo ca nibbattetvā phalāphalena yāpento vihāsi. Tassa paṇṇasālāya avidūre eko dānavarakkhaso vasati. So antarantarā mahāsattaṃ upasaṅkamitvā dhammaṃ suṇāti, aṭaviyaṃ pana manussānaṃ sañcaraṇamagge ṭhatvā āgatāgate manusse gahetvā khādati. Tasmim� kāle ekā kāsiraṭṭhe kuladhītā uttamarūpadharā aññatarasmim� paccantagāme nivutthā hoti. Tassā ekadivasaṃ mātāpitūnaṃ dassanattāya gantvā paccāgamanakāle parivāramanusse disvā so dānavo bheravarūpena pakkhandi. Manussā bhītā gahitagahitāvudhāni chaḍḍetvā palāyimsu. Dānavo yāne nisinnaṃ abhirūpaṃ mātugāmaṃ disvā paṭibaddhacitto hutvā taṃ attano guhaṃ netvā bhariyaṃ akāsi. Tato paṭṭhāya sappitelataṇḍulamacchamaṃsādīni ceva madhuraphalāphalāni ca āharitvā taṃ posesi, vatthālaṅkārehi ca naṃ alaṅkaritvā rakkhaṇattāya ekasmim� karaṇḍake pakkhipitvā karaṇḍakaṃ gilitvā kucchinā pariharati. So ekadivasaṃ nhāyitukāmatāya ekaṃ saraṃ gantvā karaṇḍakaṃ uggilitvā taṃ tato nīharitvā nhāpetvā vilimpetvā alaṅkāretvā “thokaṃ tava sarīraṃ utuṃ gaṇhāpehī”ti taṃ karaṇḍakasamīpe ṭhapetvā sayāṃ nhānatitthaṃ otarivā taṃ anāsaṅkamāno thokaṃ dūraṃ gantvā nhāyi.

Tasmim� samaye vāyussaputto nāma vijjādharo sannaddhakhaggo ākāseṇa gacchati. Sā taṃ disvā “ehī”ti hatthamuddaṃ akāsi, vijjādharo khippaṃ otari. Atha naṃ sā karaṇḍake pakkhipitvā dānavassa āgamaṇaṃ oloketū karaṇḍakūpari nisīditvā taṃ āgacchantaṃ disvā tassa attānaṃ dassetvā tasmim� karaṇḍakasamīpaṃ asampattheyeva karaṇḍakaṃ vivaritvā anto pavisitvā vijjādharassa upari nipajjitvā attano sāṭakaṃ pārupi. Dānavo āgantvā karaṇḍakaṃ asodhetvā “mātugāmoyeva me”ti saññāya karaṇḍakaṃ gilitvā attano guhaṃ gacchantaṃ antarāmagge cintesi “tāpaso me ciraṃ diṭṭho, ajja tāva naṃ gantvā vandissāmī”ti. So tassa santikaṃ agamāsi. Tāpasopi naṃ dūratova āgacchantaṃ disvā dvinnaṃ janānaṃ kucchigatabhāvaṃ ñatvā sallapanto paṭṭhamaṃ gāthamāha –

87. “Kuto nu āgacchatha bho tayo janā, svāgatā etha nisīdathāsane;  
Kaccittha, bhonto kusalaṃ anāmayāṃ, cirassamabbhāgamanañhi vo idhā”ti.

Tattha **bhoti** ālapanāṃ. **Kaccitthāti** kacci hotha bhavatha vijjatha. **Bhontoti** puna ālapanto āha. **Kusalaṃ anāmayanti** kacci tumhākaṃ kusalaṃ ārogyaṃ. **Cirassamabbhāgamanañhi vo idhāti** ajja tumhākaṃ idha abbhāgamanañca ciraṃ jātaṃ.

Taṃ sutvā dānavo “ahaṃ imassa tāpasassa santikaṃ ekakova āgato, ayañca tāpaso ‘tayo janā’ti vadati, kiṃ nāmesa katheti, kiṃ nu kho sabhāvaṃ ñatvā katheti, udāhu ummattako hutvā vilapati”ti cintetvā tāpasaṃ upasaṅkamitvā vanditvā ekamantaṃ nisīditvā tena saddhim� sallapanto dutiyaṃ gāthamāha –

88. “Ahameva eko idha majja patto, na cāpi me dutiyo koci vijjati;  
Kimeva sandhāya te bhāsitaṃ ise, kuto nu āgacchatha bho tayo janā”ti.

Tattha **idha majjāti** idha ajja. **Kimeva sandhāya te bhāsitaṃ iseti** bhante, isi kiṃ nāmetaṃ sandhāya tayā bhāsitaṃ, pākaṃ tāva me katvā kathehīti.

Tāpaso “ekamsenevāvuso sotukāmosī”ti pucchitvā “āma, bhante”ti vutte “tena hi suṇāhī”ti vatvā tatiyaṃ gāthamāha –

89. “Tuvañca eko bhariyā ca te piyā, samuggapakkhittanikiṇṇamantare;  
Sā rakkhitā kucchigatāva te sadā, vāyussaputtena sahā tahiṃ ratā”ti.

Tattha **tuvañca ekoti** paṭhamam tava tvam eko jano. **Pakkhittanikiṇṇamantareti** pakkhittānikiṇṇaantare tam tattha bhariyam rakkhitukāmena sadā tayā samugge pakkhittā saddhiṃ samuggena nikiṇṇā antare, antokucchiyam ṭhapitāti attho. **Vāyussaputtana saḥāti** evaṃnāmakena vijjādharena saddhiṃ. **Tahiṃ ratāti** tattha tava antokucchiyaññeva kilesaratiyā ratā. So dāni tvam mātugāmaṃ “ekam purisanissitam karissāmi”ti kucchināpi pariharanto tassā jāram ukkhipitvā carasīti.

Tam sutvā dānavo “vijjādhara nāma bahumāyā honti, sacassa khaggo hatthagato bhavissati, kucchiṃ me phāletvāpi palāyissati”ti bhītatasito hutvā khippam karaṇḍakam uggilitvā purato ṭhapesi. Satthā abhisambuddho hutvā tam pavattiṃ pakāsento catuttham gāthamāha –

90. “Samviggārūpo isinā viyākato, so dānavo tattha samuggamuggili;  
Addakkhi bhariyam sucimāladhārinim, vāyussaputtana saḥā tahiṃ rata”nti.

Tattha **addakkhīti** so karaṇḍakam vivarivā addasa.

Karaṇḍake pana vivaṭamattēyeva vijjādharo vijjam jappitvā khaggaṃ gahetvā ākāsam pakkhandi. Tam disvā dānavo mahāsattassa tussitvā thutipubbaṅgamā sesagāthā abhāsi –

91. “Sudiṭṭharūpamuggatapānuvattinā, hīnā narā ye pamadāvasam gatā;  
Yathā have pāṇarivettha rakkhitā, duṭṭhā mayī aññamabhippamodayi.
92. “Divā ca ratto ca mayā upaṭṭhitā, tapassinā jotirivā vane vasam;  
Sā dhammamukkamma adhammamācari, akiriyarūpo pamadāhi santhavo.
93. “Sarīramajjhamhi ṭhitāti maññaham, mayham ayanti asatiṃ asaṇṇatam;  
Sā dhammamukkamma adhammamācari, akiriyarūpo pamadāhi santhavo.
94. “Surakkhitam meti katham nu vissase, anekacittāsu na hatthi rakkhaṇā;  
Etā hi pātālapapātasannibhā, etthappamatto byasanaṃ nigacchati.
95. “Tasmā hi te sukhino vītasokā, ye mātugāmehi caranti nissaṭā;  
Etaṃ sivaṃ uttamamābhipathayaṃ, na mātugāmehi kareyya santhava”nti.

Tattha **sudiṭṭharūpamuggatapānuvattināti** bhante, isi uggatapānuvattinā tayā sudiṭṭharūpaṃ idaṃ kāraṇam. **Hīnāti nīcā. Yathā have pāṇarivettha rakkhitāti** ayaṃ mayā attano pāṇā viya ettha antokucchiyam pariharantena rakkhitā. **Duṭṭhā mayīti** idāni mayi mittadubbhikammaṃ katvā duṭṭhā aññam purisaṃ abhippamodati. **Jotirivā vane vasanti** vane vasantena tapassinā aggi viya mayā upaṭṭhitā paricaritā. **Sā dhammamukkammāti** sā eṣā dhammaṃ okkamitvā atikkamitvā. **Akiriyarūpoti** akattabbarūpo. **Sarīramajjhamhi ṭhitāti maññaham, mayham ayanti asatiṃ asaṇṇatanti** imaṃ asatiṃ asappurisadhammasamannāgataṃ asaṇṇatam dussīlam “mayham sarīramajjhamhi ṭhitā”ti ca “mayham aya”nti ca maññāmi.

**Surakkhitam meti katham nu vissaseti** ayaṃ mayā surakkhitāti katham paṇḍito vissāseyya, yatra hi nāma mādisopi antokucchiyam rakkhanto rakkhitum nāsakkhi. **Pātālapapātasannibhāti** lokassādena duppūraṇiyattā mahāsamudde pātālasankhātena papātena sadisā. **Etthappamattoti** eṭāsu evarūpāsu nigguṇāsu pamatto puriso mahābyasanaṃ pāpuṇāti. **Tasmā hīti** yasmā mātugāmavasam gatā mahāvināsam pāpuṇanti, tasmā ye mātugāmehi nissaṭā hutvā caranti, te sukhino. **Etaṃ sivaṃ** yadetaṃ mātugāmato nissaṭānaṃ viśamsaṭṭhānaṃ caraṇam, etaṃ jhānasukhameva sivaṃ khemaṃ uttamam abhipatthettabbam, etaṃ patthayamāno mātugāmehi saddhiṃ santhavaṃ na kareyyāti.

Evañca pana vatvā dānavo mahāsattassa pādesu nipatitvā “bhante, tumhe nissāya mayā jīvitaṃ

laddham, aham imāya pāpadhammāya vijjādharena mārāpito’’ti mahāsattam abhitthavi. Sopissa dhammam desetvā ‘‘imissā mā kiñci pāpam akāsi, sīlāni gaṇhāhi’’ti tam pañcasu sīlesu patitthāpesi. Dānavo ‘‘aham kucchinā pariharantopi tam rakkhitum na sakkomi, añño ko rakkhissati’’ti tam uyyojetvā attano araṇṇameva agamāsi.

Satthā imam dhammadesanam āharitvā saccāni pakāsetvā jātakam samodhānesi, saccapariyosāne ukkaṇṭhitabhikkhu sotāpattiphale patitthahi. Tadā dibbacakkhukatāpaso ahameva ahosinti.

Samuggajātakavaṇṇanā dasamā.

[437] 11. Pūtimamsajātakavaṇṇanā

**Na kho me ruccati**ti idam satthā jetavane viharanto indriyaasamvaram ārabha katesi. Ekasmiñhi samaye bahū bhikkhū indriyesu aguttadvārā ahesum. Satthā ‘‘ime bhikkhū ovaditum vaṭṭati’’ti ānandattherassa vatvā aniyamavasena bhikkhusaṅgham sannipātāpetvā alaṅkatapallaṅkavaramajjhagato bhikkhū āmantetvā ‘‘na, bhikkhave, bhikkhunā nāma rūpādīsu subhanimittavasena nimittam gahetum vaṭṭati, sace hi tasmim samaye kālam karoti, nirayādīsu nibbattati, tasmā rūpādīsu subhanimittam mā gaṇhatha. Bhikkhunā nāma rūpādigocarena na bhavitabbam, rūpādigocarā hi diṭṭheva dhamme mahāvināsam pāpuṇanti, tasmā varam, bhikkhave, tattāya ayosalākāya ādittāya sampajjalitāya sajotibhūtāya cakkhundriyam sampalimattha’’nti vitthāretvā ‘‘tumahākam rūpam olokanakālopi atthi anolokanakālopi. Olokanakāle subhavasena anoloketvā asubhavaseneva olokeyyātha, evam attano gocarā na parihāyissatha. Ko pana tumhākam gocaroti? Cattāro satipatthānā, cattāro sammappadhānā, cattāro iddhipādā, ariyo aṭṭhaṅgiko maggo, nava lokuttaradhammā. Etasmiñhi vo gocare carantānam na lacchati māro otāram, sace pana kilesavasikā hutvā subhanimittavasena olokessatha, pūtimamsasiṅgālo viya attano gocarā parihāyissathā’’ti vatvā atītam āhari.

Atīte bārānasiyam brahmadatte rajjam kārente himavantapadese araṇṇāyatane pabbataguhāyam anekasatā eḷakā vasanti. Tesam vasanaṭṭhānato avidūre ekissā guhāya pūtimamsa nāma siṅgālo veṇiyā nāma bhariyāya saddhim vasati. So ekadivasam bhariyāya saddhim vicaranto te eḷake disvā ‘‘ekena upāyena imesam mamsam khādītum vaṭṭati’’ti cintetvā upāyena ekekam eḷakam māresi. Te ubhopi eḷakamamsam khādantā thāmasampannā thūlasarīrā ahesum. Anupubbena eḷakā parikkhayam agamamsu. Tesam antare meṇḍamātā nāma ekā eḷikā byattā ahosi upāyakusalā. Siṅgālo tam māretum asakkonto ekadivasam bhariyāya saddhim sammantento ‘‘bhadde, eḷakā khīṇā, imam eḷikam ekena upāyena khādītum vaṭṭati, ayam panettha upāyo, tvaṃ ekikāva gantvā etāya saddhim sakhī hohi, atha te tāya saddhim vissāse uppanne aham matālayam karitvā nipajjissāmi, tvaṃ etaṃ upasaṅkamitvā ‘eḷike sāmiko me mato, ahañca anāthā, ṭhapetvā tam añño me ñātako natthi, ehi roditvā kanditvā tassa sarīrakiccam karissāmā’’ti vatvā tam gahetvā āgaccheyyāsi, atha nam aham uppatitvā gīvāya ḍamsitvā māressāmī’’ti āha.

Sā ‘‘sādhū’’ti sampaṭicchitvā tāya saddhim sakhibhāvam katvā vissāse uppanne eḷikam tathā avoca. Eḷikā ‘‘āḷi siṅgāli tava sāmikena sabbe mama ñātaka khādītā, bhāyāmi na sakkomi gantu’’nti āha. ‘‘Āḷi, mā bhāyi, matako kiṃ karissati’’ti? ‘‘Kharamanto te sāmiko, bhāyāmevāha’’nti sā evam vatvāpi tāya punappunam yāciyamānā ‘‘addhā mato bhavissati’’ti sampaṭicchitvā tāya saddhim pāyāsi. Gacchantī pana ‘‘ko jānāti, kiṃ bhavissati’’ti tasmim āsaṅkāya siṅgālim purato katvā siṅgālam pariggaṇhantīyeva gacchati. Siṅgālo tasmam padasaddam sutvā ‘‘āgatā nu kho eḷikā’’ti sīsam ukkhipitvā akkhīni parivattetvā olokesi. Eḷikā tam tathā karontam disvā ‘‘ayam pāpadhammo mam vañcetvā māretukāmo matālayam dassetvā nipanno’’ti nivattitvā palāyantī siṅgāliyā ‘‘kasmā palāyasi’’ti vutte tam kāraṇam kathenti paṭhamam gāthamāha –

96. ‘‘Na kho me ruccati āḷi, pūtimamsassa pekkhanā;  
Etādisā sakhārasmā, ārakā parivajjaye’’ti.



Tattha **āḷīti** ālapanam, sakhi sahāyiketi attho. **Etādisā sakhārasmāti** evarūpā sahāyakā apakkamitvā taṃ sahāyakam ārakā parivajjeyyāti attho.

Evañca pana vatvā sā nivattitvā attano vasanaṭṭhānameva gatā. Siṅgālī taṃ nivattetuṃ asakkontī tassā kujjhivā attano sāmikasaveva santikam gantvā pajjhāyamānā nisīdi. Atha naṃ siṅgālo garahanto dutiyam gāthamāha –

97. “Ummattikā ayam veṇī, vaṇṇeti patino sakhiṃ;  
Pajjhāyi paṭigacchantiṃ, āgataṃ meṇḍamātara”’nti.

Tattha **veṇīti** tassā nāmam. **Vaṇṇeti patino sakhinti** paṭhamameva attano sakhiṃ eḷikam “mayi sinehā vissāsikā āgamissati no santikam, matālayam karohī”’ti patino santike vaṇṇeti. Atha naṃ sā idāni āgataṃ mama santikam anāgantvāva paṭigacchantiṃ meṇḍamātaram pajjhāyati anusocatīti.

Taṃ sutvā siṅgālī tatiyam gāthamāha –

98. “Tvam khosi samma ummatto, dummedho avicakkhaṇo;  
Yo tvam matālayam katvā, akālena vipekkhasī”’ti.

Tattha **avicakkhaṇoti** vicāraṇapaññārahito. **Akālena vipekkhasīti** eḷikāya attano santikam anāgatāyeva olokesīti attho.

99. “Na akāle vipekkhayya, kāle pekkheyya paṇḍito;  
Pūtimaṃsova pajjhāyi, yo akāle vipekkhati”’ti. – ayam abhisambuddhagāthā;

Tattha **akāleti** kāmaguṇe ārabba subhavasena cittuppādakāle. Ayañhi bhikkhuno rūpaṃ oloketuṃ akālo nāma. **Kāleti** asubhavasena anussativasena kasiṇavasena vā rūpaggahaṇakāle. Ayañhi bhikkhuno rūpaṃ oloketuṃ kālo nāma. Tattha akāle sārattakāle rūpaṃ oloketā mahāvināsaṃ pāpuṇantīti haritacajātakalomasakassapajātakādīhi dīpetabbaṃ. Kāle asubhavasena oloketā arahatte paṭiṭṭhahantīti asubhakammikatissattheravatthunā kathetabbaṃ. **Pūtimaṃsova pajjhāyīti** bhikkhave, yathā pūtimaṃsasiṅgālo akāle eḷikam oloketvā attano gocarā parihīno pajjhāyati, evaṃ bhikkhu akāle subhavasena rūpaṃ oloketvā satipaṭṭhānādigocarā parihīno diṭṭhadhamme samparāyepi socati pajjhāyati kilamatīti.

Veṇīpi kho siṅgālī pūtimaṃsam assāsetvā “sāmi, mā cintesi, ahaṃ taṃ punapi upāyena ānessāmi, tvam āgatakāle appamatto gaṇheyyāsī”’ti vatvā tassā santikam gantvā “āḷi, tava āgatakāleyeva no attho jāto, tava āgatakālasmiṃyeva hi me sāmiko satim paṭilabhi, idāni jīvati, ehi tena saddhiṃ paṭisanthāram karohī”’ti vatvā pañcamam gāthamāha –

100. “Piyam kho āḷi me hotu, puṇṇapattam dadāhi me;  
Pati sañjivito mayham, eyyāsī piyapucchikā”’ti.

Tattha **puṇṇapattam dadāhi meti** piyakkhānam akkhāyikā mayham tuṭṭhidānam dehi. **Pati sañjivito mayhanti** mama sāmiko sañjivito uṭṭhito arogoti attho. **Eyyāsīti** mayā saddhiṃ āgaccha.

Eḷikā “ayam pāpadhammā maṃ vañcetukāmā, ayuttam kho pana paṭipakkhakarānam, upāyeneva naṃ vañcessāmi”’ti cintetvā chaṭṭham gāthamāha –

101. “Piyam kho āḷi te hotu, puṇṇapattam dadāmi te;  
Mahatā parivārena, essaṃ kayirāhi bhojana”’nti.

Tattha **essanti** āgamissāmi. Āgacchamānā ca attano ārakkhaṃ katvā mahantena parivārena āgamissāmīti.

Atha naṃ siṅgālī parivāraṃ pucchantī sattamaṃ gāthamāha –

**102.** “Kīdiso tuyhaṃ parivāro, yesaṃ kāhāmi bhojanaṃ;  
Kiṃ nāmakā ca te sabbe, te me akkhāhi pucchitā”ti.

Sā ācikkhantī aṭṭhamaṃ gāthamāha –

**103.** “Māliyo caturakkho ca, piṅgiyo atha jambuko;  
Ediso mayhaṃ parivāro, tesam kayirāhi bhojana”nti.

Tattha **te meti** te parivāre mayhaṃ ācikkhi. **Māliyoti**ādīni catunnaṃ sunakhānaṃ nāmāni. “Tattha ekekassa pañca pañca sunakhasatāni parivārenti, evaṃ dvīhi sunakhasahashehi parivāritā āgamissāmī”ti vatvā “sace te bhojanaṃ na labhissanti, tumhe dvepi jane māretvā khādissanti”ti āha.

Taṃ sutvā siṅgālī bhītā “alaṃ imissā tattha gamanena, upāyenassā anāgamanameva karissāmī”ti cintetvā navamaṃ gāthamāha –

**104.** “Nikkhantāya agārasmā, bhaṇḍakampi vinassati;  
Ārogyaṃ ālino vajjaṃ, idheva vasa māgamā”ti.

Tassattho – āḷi, tava gehe bahubhaṇḍakaṃ atthi, taṃ te nikkhantāya agārasmā anārakkhaṃ bhaṇḍakaṃ vinassati, ahameva te ālino sahāyakassa ārogyaṃ vajjaṃ vadissāmi, tvaṃ idheva vasa māgamāti.

Evañca pana vatvā maraṇabhayaabhītā vegena sāmikassa santikaṃ gantvā taṃ gahetvā palāyi. Te puna taṃ ṭhānaṃ āgantum nāsakkhimsu.

Satthā imaṃ dhammadesanaṃ āharitvā jātakaṃ samodhānesi “tadā ahaṃ tasmiṃ ṭhāne vanajeṭṭhakarukkhe nibbattadevatā aho”nti.

Pūtimaṃsajātakavaṇṇanā ekādasamā.

[438] 12. Daddarajātakavaṇṇanā

**Yo te puttaketi** idaṃ satthā gijjhakūṭe viharanto devadattassa vadhāya parisakkaṃ ārabha kathesi. Tasmīñhi samaye dhammasabhāyaṃ kathaṃ samuṭṭhāpesuṃ “aho āvuso devadatto nillajjo anariyo evaṃ uttamaguṇadharassa sammāsambuddhassa ajātasattunā saddhiṃ ekato hutvā dhanuggahapayojanasilāpavijjhananālāgirivissajjanehi vadhāya upāyaṃ karotī”ti. Satthā āgantvā “kāya nuttha, bhikkhave, etarahi kathāya sannisinnā”ti pucchitvā “imāya nāmā”ti vutte “na, bhikkhave, idāneva, pubbepi devadatto mayhaṃ vadhāya parisakki, idāni pana me tāsamattampi kātum nāsakkhī”ti vatvā atītaṃ āhari.

Atīte bārānasiyaṃ brahmadatte rajjaṃ kārente eko disāpāmokkho ācariyo pañcasatānaṃ māṇavakānaṃ sippaṃ vācento ekadivasaṃ cintesi “mayhaṃ idha vasantassa palibodho hoti, māṇavakānaṃ sippaṃ na niṭṭhāti, himavantapadese araññāyatanaṃ pavisitvā tattha vasanto vācessāmī”ti. So māṇavakānaṃ kathetvā tilataṇḍulatelavattādīni gāhāpetvā araññaṃ pavisitvā maggato avidūre ṭhāne pañnasālaṃ kāretvā nivāsaṃ kappesi, māṇavāpi attano pañnasālaṃ karimsu. Māṇavakānaṃ nātakaṃ telataṇḍulādīni pesenti. Raṭṭhavāsīnopi “disāpāmokkho ācariyo kira araññe asukaṭṭhāne nāma vasanto sippaṃ uggaṇhāpeti”ti tassa taṇḍulādīni abhiharanti, kantārapaṭṭipannāpi

denti, aññataropi puriso khīrapānathāya savacchaṃ dhenuṃ adāsi. Ācariyassa paññasālāya santike dvīhi potakehi saddhiṃ ekā godhā vasati, sīhabyagghāpissa upatthānaṃ āgacchanti. Eko tittiropi tattha nibaddhavāso ahoṣi. So ācariyassa māṇavānaṃ mante vācentassa saddaṃ sutvā tayopi vede uggaṇhi. Māṇavā tena saddhiṃ ativissāsikā ahesuṃ.

Aparabhāge māṇavesu nipphattiṃ appattesuyeva ācariyo kālamakāsi. Māṇavā tassa sarīraṃ jhāpetvā vālukāya thūpaṃ katvā nānāpupphehi pūjetvā rodanti paridevanti. Atha ne tittiro “kasmā rodathā”ti āha. “Ācariyo no sippe anīṭṭhiteyeva kālakato, tasmā rodāmā”ti. “Evaṃ sante mā socittha, ahaṃ vo sippaṃ vācessāmī”ti. “Tvam kathaṃ jānāsī”ti? “Ahaṃ ācariye tumhākaṃ vācente saddaṃ sutvā tayo vede paguṇe akāsinti. Tena hi attano paguṇabhāvaṃ amhe jānāpehī”ti. Tittiro “tena hi suṇāthā”ti tesam gaṇṭhiṭṭhānameva pabbatamatthakā nadiṃ otaranto viya osāresi. Māṇavā haṭṭhatuṭṭhā hutvā tittirapaṇḍitaṃ santike sippaṃ paṭṭhapesuṃ. Sopi disāpāmokkhācariyassa ṭhāne ṭhatvā tesam sippaṃ vācesi. Māṇavā tassa suvaṇṇapañjaraṃ karitvā upari vitānaṃ bandhitvā suvaṇṇataṭṭake madhulājādīni upaharantā nānāvaṇṇehi pupphehi pūjentā mahantaṃ sakkāraṃ karimṃsu. “Tittiro kira araññāyatane pañcasate māṇavake mantam vāceti”ti sakalajambudīpe pākaṭo ahoṣi.

Tadā jambudīpe giraggasamajjasadisam mahantaṃ chaṇaṃ ghosayimṃsu. Māṇavānaṃ mātāpitaro “chaṇadassanathāya āgacchantū”ti pesesuṃ. Māṇavā tittirassa ārocetvā tittirapaṇḍitaṃ sabbañca assamapadaṃ godhaṃ paṭicchāpetvā attano attano nagarameva agamimṃsu. Tadā eko nikkāruṇiko duṭṭhatāpaso tattha tattha vicaranto taṃ ṭhānaṃ sampāpuṇi. Godhā taṃ disvā paṭisanthāraṃ katvā “asukatthāne taṇḍulā, asukatthāne telādīni atthi, bhattaṃ pacitvā bhuñjāhī”ti vatvā gocaratthāya gatā. Tāpaso pātova bhattaṃ pacitvā dve godhāputtake māretvā khādi, divā tittirapaṇḍitañca vacchakañca māretvā khādi, sāyaṃ dhenuṃ āgacchantaṃ disvā tampi māretvā maṃsaṃ khāditvā rukkhamūle nipajjivā ghurughurāyanto niddaṃ okkamī. Godhā sāyaṃ āgantvā puttake apassantī upadhārayamānā vicari. Rukkadevatā godhaṃ puttake adisvā kampamānaṃ oloketvā khandhaviṭṭapabbhantare dibbānubhāvena ṭhatvā “godhe mā kampi, iminā pāpapurisena tava puttakā ca tittiro ca vaccho ca dhenu ca mārītā, gīvāya naṃ ḍamsitvā jīvitakkhayaṃ pāpehī”ti sallapantī paṭhamam gāthamāha –

105. “Yo te puttake akhādi, dinnabhatto adūsake;  
Tasmim dāṭhaṃ nipātehi, mā te muccittha jīvato”ti.

Tattha **dinnabhattoti** bhattaṃ pacitvā bhuñjāhīti tayā dinnabhatto. **Adūsaketi** niddose niraparādhe. **Tasmim dāṭhaṃ nipātehīti** tasmim pāpapurise catassopi dāṭhā nipātehīti adhippāyo. **Mā te muccittha jīvato**ti jīvanto sajīvo hutvā tava hatthato eso pāpadhammo mā muccittha, mokkhaṃ mā labhatu, jīvitakkhayaṃ pāpehīti attho.

Tato godhā dve gāthā abhāsi –

106. “Ākiṇṇaluddo puriso, dhāticelaṃva makkhito;  
Padesam taṃ na passāmi, yattha dāṭhaṃ nipātaye.

107. “Akataññussa posassa, niccaṃ vivaradassino;  
Sabbam ce pathaviṃ dajjā, neva naṃ abhirādhaye”ti.

Tattha **ākiṇṇaluddoti** gālhaluddo. **Vivaradassinoti** chiddaṃ otāraṃ pariyesantassa. **Neva naṃ abhirādhayeti** evarūpaṃ puggalaṃ sakalapathaviṃ dentopi tosetuṃ na sakkuṇeyya, kimaṅgaṃ panāhaṃ bhattamattadāyikāti dasseti.

Godhā evaṃ vatvā “ayaṃ pabujjhivā mampi khādeyyā”ti attano jīvitaṃ rakkhamānā palāyi. Tepi pana sīhabyagghā tittirassa sahāyakāva, kadāci te āgantvā tittiraṃ passanti, kadāci so gantvā tesam dhammaṃ desetvā āgacchati, tasmim pana divase sīho byagghaṃ āha – “samma, ciraṃ diṭṭho no tittiro,

ajja sattatṭhādivasā honti, gaccha, tāvassa pavattiṃ ñatvā ehī’ti. Byaggho “sādhū”ti sampaticchitvā godhāya palāyanakāle taṃ ṭhānaṃ patvā taṃ pāpapurisaṃ niddāyantaṃ passi. Tassa jaṭantare tittirapaṇḍitassa lomāni paññāyanti, dhenuyā ca vacchakassa ca aṭṭhīni paññāyanti. Byaggharājā taṃ sabbaṃ disvā suvaṇṇapañjare ca tittirapaṇḍitaṃ adisvā “iminā pāpapurisenā ete māritā bhavissanti”ti taṃ pādena paharivā uṭṭhāpesi. Sopi taṃ disvā bhītatasito ahoṣi. Atha naṃ byaggho “tvaṃ ete māretvā khādasi”ti pucchi. “Neva māremi, na khādāmi”ti. “Pāpadhamma tayi amārente añño ko māressati, kathehi tāva kāraṇaṃ, akathentassa jīvitamaṃ te natthi”ti. So maraṇabhayaabhīto “āma, sāmi, godhāputtake ca vacchakaṇca dhenuṇca māretvā khādāmi, tittiraṃ pana na māremi”tiāha. So tassa bahuṃ kathentassapi asaddahitvā “tvaṃ kuto āgatosi”ti pucchitvā “sāmi, kaliṅgaratṭhato vāñijakānaṃ bhaṇḍaṃ vahanto jīvikahetu idaṇcīdaṇca kammaṃ katvā idānimhi idhāgato”ti tena sabbasmiṃ attanā katakamme kathite “pāpadhamma tayi tittiraṃ amārente añño ko māressati, ehi sīhassa migarañño santikaṃ taṃ nessāmi”ti taṃ purato katvā tāsento agamāsi. Sīharājā taṃ ānentaṃ byagghaṃ pucchanto catutthaṃ gāthamāha –

**108.** “Kiṃ nu subāhu taramānarūpo, paccāgatosi saha māṇavena;  
Kiṃ kiccamatthaṃ idhamatthi tuyhaṃ, akkhāhi me pucchito etamattha”nti.

Tattha **subāhūti** byagghaṃ nāmenālapati. Byagghassa hi purimakāyo maṇāpo hoti, tena taṃ evamāha. **Kiṃ kiccamatthaṃ idhamatthi tuyhanti** kiṃ karaṇīyaṃ atthasaññitaṃ iminā māṇavena idha atthi. “Tuyhaṃ kiṃ kiccamattha”ntipi pāṭho, ayamevattho.

Taṃ sutvā byaggho pañcamaṃ gāthamāha –

**109.** “Yo te sakhā daddaro sādthurūpo, tassa vadhaṃ parisaṅkāmi ajja;  
Purisassa kammāyatanāni sutvā, nāhaṃ sukhiṃ daddaraṃ ajja maññe”ti.

Tattha **daddaroti** tittiro. **Tassa vadhanti** tassa tittirapaṇḍitassa imamahā purisamahā ajja vadhaṃ parisaṅkāmi. **Nāhaṃ sukhinti** ahaṃ ajja daddaraṃ sukhiṃ arogaṃ na maññāmi.

Atha naṃ sīho chaṭṭhaṃ gāthamāha –

**110.** “Kānissa kammāyatanāni assu, purisassa vuttisamodhānatāya;  
Kaṃ vā paṭiññaṃ purisassa sutvā, parisaṅkasi daddaraṃ māṇavenā”ti.

Tattha **assūti** assosi. **Vuttisamodhānatāyāti** jīvitavuttisamodhānatāya, kāni nāma iminā attano kammāni tuyhaṃ kathitānti attho. **Māṇavenāti** kiṃ sutvā iminā māṇavena māritaṃ parisaṅkasi.

Athassa kathento byaggharājā sesagāthā abhāsi –

**111.** “Ciṇṇā kaliṅgā caritā vañijjā, vettācaro saṅkupathopi ciṇṇo;  
Naṭehi ciṇṇaṃ saha vākurehi, daṇḍena yuddhampi samajjamajjhe.

**112.** “Baddhā kulīkā mitamāḷakena, akkhā jītā saṃyamo abbhatīto;  
Abbāhitaṃ pubbakaṃ aḍḍharattaṃ, hatthā daḍḍhā piṇḍapaṭiggahena.

**113.** “Tānissa kammāyatanāni assu, purisassa vuttisamodhānatāya;  
Yathā ayaṃ dissati lomapiṇḍo, gāvo hatā kiṃ pana daddarassā”ti.

Tattha **ciṇṇā kaliṅgāti** vāñijakānaṃ bhaṇḍaṃ vahantena kira tena kaliṅgaratṭhe ciṇṇā. **Caritā vañijjāti** vañijjāpi tena katā. **Vettācaroti** vettehi saṅcaritabbo. **Saṅkupathopi ciṇṇoti** khāṇukamaggopi valañjito. **Naṭehīti** jīvikahetuyeva naṭhipi saddhiṃ. **Ciṇṇaṃ saha vākurehīti** vākuraṃ vahantena

vākurehi saddhiṃ caritaṃ. **Daṇḍena yuddhanti** daṇḍena yuddhampi kira tena yujjhitam.

**Baddhā kulikā**ti sakuṇikāpi kira tena baddhā. **Mitamāḷakenā**ti dhañṇamāpakakammampi kira tena kataṃ. **Akkhā jitā**ti akkhadhuttānaṃ veyyāvaccam karontena akkhā haṭā. **Samyamo abbhatī**ti jīvitavuttiṃ nissāya pabbajanteneva sīlasamyamo atikkanto. **Abbāhanti** apaggharaṇam kataṃ. **Pubbakanti** lohitaṃ. Idaṃ vuttam hoti – iminā kira jīvikam nissāya rājāparādhikānaṃ hatthapāde chinditvā te ānetvā sālāya nipajjāpetvā vaṇamukhehi paggharantaṃ lohitaṃ aḍḍharattasamaye tattha gantvā kuṇḍakadhūmaṃ datvā ṭhapitanti. **Hatthā daḍḍhā**ti ājīvikapabbajam pabbajitakāle uṇhapiṇḍapaṭapaṭiggahaṇe hatthāpi kirassa daḍḍhā.

**Tānissa kammāyatanānī**ti tāni assa kammāni. **Assūti** assosiṃ. **Yathā ayanti** yathā esa etassa jaṭantare tittiralomapiṇḍopi dissati, iminā kāraṇena vedītabbameṭam “eteneva so mārito”ti. **Gāvo hatā kiṃ pana daddarassā**ti gāvopi etena hatā, daddarassa pana kiṃ na hanitabbaṃ, kasmā esa tam na māressatīti.

Sīho tam purisaṃ pucchi “mārito te tittirapaṇḍito”ti? “Āma, sāmī”ti. Athassa saccavacanaṃ sutvā sīho tam vissajjetukāmo ahoṣi. Byaggharājā pana “māretabbayuttako eso”ti vatvā tattheva naṃ dāṭhāhi paharivā māretvā āvātam khaṇitvā pakkhipi. Māṇavā āgantvā tittirapaṇḍikaṃ adisvā roditvā paridevitvā nivattiṃsu.

Satthā imaṃ dhammadešanaṃ āharitvā “evaṃ, bhikkhave, devadatto pubbepi mayhaṃ vadhāya parisakkī”ti vatvā jātakam samodhānesi – “tadā kūṭajaṭilo devadatto ahoṣi, godhā uppalavaṇṇā, byaggho moggallāno, sīho sārīputto, disāpāmokkho ācariyo mahākassapo, tittirapaṇḍito pana ahameva ahoṣi”nti.

Daddarajātakavaṇṇanā dvādasamā.

Jātakuddānaṃ –

Gijjhakosambī suvaṇca, cūlasūvaṃ harittacaṃ;  
Kusalaṃ lomakassapaṃ, cakkavākaṃ haliddi ca.

Samuggaṃ pūtimamaṃsaṇca, daddarañceva dvādasa;  
Jātake navanipāte, gīyīṃsu gītikārakā.

Navakanipātavaṇṇanā niṭṭhitā.

(Tatiyo bhāgo niṭṭhito.)